

國學基本叢書  
十駕齋養新錄

下

098  
H418  
(1)

# 十駕齋養新錄卷第十

三公

尙書大傳曰：煙氛郊社不修，山川不祝，風雨不時，霜雪不降，責於天公。臣多弑主，孽多殺宗，五品不訓，責於人公。城郭不繕，溝池不修，水泉不修，水爲民害，責於地公。王者三公，各有所主。論衡明天公、司徒、人公、司馬、地公、司空也。

文選載任彥昇竟陵文宣王行狀：沈休文安陸昭王碑文稱公不稱王者，爵列親王，不如三公之位尊也。竟陵生爲三公，安陸亦贈司徒，故得稱公。宋制：朝會宰相班在親王之上。

員缺

顧寧人日知錄謂員缺之名自晉時已有之。今攷漢書循吏傳、公卿缺，則選諸所表以次用之。酷吏傳後左馮翊缺，韓安國傳、梁內史缺，翟方進傳、杜業言方進爲京兆尹時、陳咸爲少府、在九卿高第。陛下所自知也。方進素與司直師丹相善，臨御史大夫缺，使丹奏咸爲姦利，請案驗，卒不能有所得，而方進果自得御史大夫。薛宣傳、御史大夫任重職大，非庸材所能堪，今當選於羣卿以充其缺。又云：會司隸缺，佞幸傳，其後御史大夫缺，則西漢已有缺稱，不始于晉也。

大尙書

予初讀隋書經籍志。四人月令一卷。漢大尙書崔實撰。疑其有誤。後讀洪氏隸續。載劉寬碑陰。有大尙書河南張祇字子戒一人。洪云碑有大尙書張祇。祝睦碑亦云拜大尙書。攷東京官制。唯鴻臚司農長秋。有大字尙書六人。分爲六曹。初無大尙書。及觀祝睦後碑。但云拜尙書。尙書僕射。乃知大尙書者。以其長於諸曹。故加大以別之。然後向者之疑始釋。蓋當時官曹有此稱。未著於令甲也。蜀志衛繼傳。屢遷奉車都尉。大尙書。

大著作

魏太和中。始置著作郎職。隸中書。晉元康初。又隸祕書。著作郎一人。謂之大著作。專掌史任。又置佐著作郎八人。見史通史官篇

五官

漢有五官中郎將。比二千石。五官中郎。比六百石。五官侍郎。比四百石。五官郎中。比三百石。郡國亦有五官掾。注家不言五官何義。予按淮南兵略訓云。夫論除謹。動靜時。吏卒辨。兵甲治。正行伍。連什伯。明鼓旗。此尉之官也。前後知險易。見敵知難易。發斥不忘遺。此候之官也。隘路頭。行輜治。賦丈均。處軍輯。并竈通。此司空之官也。收藏於後。遷舍不離。無淫輿。無遺輜。此輿之官也。凡此五官之於將也。猶身之有股肱手足也。又云。將軍不與於五官之事。而爲五官督。五官之名。或出於此。但據淮南所稱。有尉官。有候官。有司

空官有與官而尙闕其一。是必有脫文矣。

### 大學士

唐書百官志。修文館。

後改昭文館。

景龍二年始置大學士十四人。以象四時。學士八人。以象八節。直學士十二人。

以象十二時。此大學士設官之始。

李嶠宗楚客趙彥昭章嗣立爲大學士。李適劉憲崔湜鄭愔盧藏用李

朝隱爲直學士。又引徐堅章元旦。又岑義劉子元爲學士。薛稷馬懷素宋之問武平一杜審言沈佺期闕

徐彥伯劉允濟等備員見文藝傳。李嶠宗楚客趙彥昭章嗣立皆宰相也。天寶二載崇賢館置大學士二

人。以宰相爲之。至德二年置集賢院大學士。貞元四年罷崇元館。集賢院大學士。崇元卽崇賢也。按張說傳始帝

欲授說大學士。辭曰。學士本無大稱。中宗崇寵大臣。乃有之。臣不敢以爲稱。說時爲集賢院學士也。李泌

傳。加集賢殿崇文館大學士。泌建言。學士加大。始中宗時。及張說爲之。固辭。至崔圓復爲大學士。亦引泌

爲讓而止。此泌傳之誤。蓋集賢之置大學士。始於崔圓。正在至德二載。而貞元四年學士去大字。則由於

泌之請耳。然自元和以後。宰相兼宏文館集賢殿大學士。率以爲常。鮮有如張李二公之能讓者矣。宋初

昭文館集賢殿大學士皆宰相領之。蓋沿唐五代之舊。其後置觀文殿資政殿大學士。雖不任事。亦以前

### 總督巡撫

宰執充。餘官不得與焉。明代始專以殿閣大學士爲宰輔之官。然秩止五品。國朝始升爲正一品。總督字始見於漢書敘傳。云總督城郭三十有六。南北朝史多用此字。如晉書謝元傳。以方平河北幽冀。



宜須總督。魏書任城王澄傳。以澄總督二鎮。授之節度。于烈傳。遷司衛監。總督禁旅。南史柳仲禮傳。與諸藩赴援。見推總督。劉之亨傳。總督衆軍。杖鉞而西。吳明徹傳。吾爲總督。必須身居其後。王猛傳。總督所部赴援。北史景穆十二王傳。梁武以爲北道總督。齊本紀。節閔以長孫承業爲大行臺總督焉。李常傳。總督三軍。揚旌恆朔。李平傳。陛下不以臣不武。委以總督之任。周書文帝紀。拜章武公導爲大將軍。總督留守諸軍。是也。巡撫字亦見於南北朝。南史袁昂傳。帝使豫州刺史李元履巡撫東土。北史趙彥深傳。文襄慮河南有變。仍自巡撫。周書武帝紀。詔皇太子贊巡撫西土。是也。總督巡撫之語。由來已久。其定爲官名入銜。則自明始。

唐人服色視散官

野客叢書云。唐制服色不視職事官。而視階官之品。至朝散大夫。方換五品服色。衣銀緋。白樂天爲中書舍人。知制誥。元簡爲京兆尹。官皆六品。謂階官也。尙猶著綠。其詩所謂鳳閣舍人京兆尹。白頭猶未脫青衫。南宮啓請無多日。朝散何時復入銜。劉夢得賀給事加五品詩曰。八舍郎官換綠衣。元微之作武儒衡陞朝散大夫制曰。今由是級。則服色驟加。誠足貴矣。樂天授朝散大夫制曰。陰子封妻。豈惟腰白金而已。唐時臣僚章服。不論職事官之崇卑。唯論散官之品秩。雖宰相之尊。而散官未及三品。猶以賜紫繫銜。舊唐書宣宗紀。有正議大夫。守中書侍郎。同平章事。集賢殿大學士。賜紫金魚袋馬植。有太中大夫。守中書

侍郎兼禮部尙書同平章事賜紫金魚袋崔慎由有通議大夫守中書侍郎兼禮部尙書同平章事集賢殿大學士賜紫金魚袋鄭朗有朝散大夫守工部尙書同平章事集賢殿大學士賜紫金魚袋蕭鄴有朝議大夫守戶部侍郎同平章事判度支賜紫金魚袋劉瑑皆見任宰相中書侍郎六部尙書又皆三品職事官也而散官未到金紫銀青則非賜不得衣紫唐人之重散官如此

### 升朝官 京官

宋史選舉志前代朝官自一品以下皆曰常參官其未常參者曰未常參官宋曰常參者曰朝官祕書郎以下未常參者曰京官老學庵筆記國初以常參官預朝謁故謂之朝官而未預者曰京官元豐官制行以通直郎以上朝預宴坐仍謂之升朝官而按唐制去京官之名凡條制及吏牘止謂之承務郎以上然俗猶謂之京官案元豐以前祕書省著作佐郎大理寺丞光祿寺丞衛尉寺丞將作監丞大理評事太常寺太祝奉禮郎祕書省校書郎正字將作監主簿皆京官也元豐改制以宣教政和政宣義承事承奉承務郎爲京官京官之下則爲選人有七資四等之差崇寧中改選人七階爲承直儒林文林從事通仕登三階其通仕登仕將仕三階係奏補未出身人

### 前行中行後行 頭司子司

唐宋制六部有前行中行後行三等而廿四司有頭司子司之稱唐會要故事以兵吏及左右司爲前行

刑戶爲中行。工禮爲後行。每行各管四司。而以本行名爲頭司。餘爲子司。如吏部爲頭司。司勳司封。顯慶元年七月二十一日。改戶部尙書爲度支尙書。侍郎亦准此。遂以度支爲頭司。戶部爲子司。至龍朔二年二月四日。復舊次第。

海錄碎事。唐制。郎官前行爲要。後行爲閒。南部新書。先天中。王上客爲御史。自以才望清華。當入省臺。望前行。忽除膳部員外郎。微有惋悵。吏部郎中張敬忠詠曰。有意嫌兵部。專心望考功。誰知腳踏蹬。卻落省牆東。蓋膳部在省最東北隅也。膳部爲後行。又在禮部四司之末。

### 吏部七司

唐制。六部各置四司。宋元豐改官制以後。分尙書左右選。侍郎左右選。各置郎官。南渡後。遂有尙左。尙右。侍左。侍右之稱。皆吏部一司所分也。兼司勳。司封。考功。是爲七司。

### 尙左尙右侍左侍右

文獻通考。宋朝典選之制。自分爲四。文選二。曰審官東院。曰流內銓。武選二。曰審官西院。曰三班院。元豐定制。以審官東院爲尙書左選。審官西院爲尙書右選。流內銓爲侍郎左選。三班院爲侍郎右選。舊制。吏部除侍郎二員。分典左右選。總稱吏部侍郎。開命官兼攝。惟稱左選侍郎。或右選而已。紹熙三年。謝深甫。張叔椿兼攝。始有侍左侍郎。侍右侍郎之稱。旣而林大中。沈揆。擢貳尙書。則侍左侍右。徑入除目。相承不

改矣。郎中主管尚書左右選。侍郎左右選。各一員。初進擬。第云吏部郎官。及擬告身細銜。始直言吏部尚書郎中或員外郎。主管尚書某選。主管侍郎某選。紹興間。呂希常以監六部門兼權侍右郎官。李端民正除尚右郎官。既而何備、楊倓、費行之、除吏部郎官。皆有侍左侍右尚左尚右之稱。自此相承不改。宋史、徐霖、應麟、陳宗禮俱嘗任尚左郎官。范鍾、王萬、高斯得、吳潛、李伯玉、任尚右郎官。曹彥約、王邁、徐鹿卿、楊文仲、陳仲微、嘗任侍右郎官。而徐清叟、孫夢觀、家鉉翁傳皆有侍右侍郎之稱。

### 左右

唐宋左右僕射。左右丞相。左右丞。皆以左爲上。元左右丞相。左右丞。則以右爲上。科場蒙古色目人稱右榜。漢人南人稱左榜。亦右爲上也。明六部左右侍郎。左右都御史。左右給事中。左右布政使。仍以左爲上。

### 度支支度不同

度支者。戶部四司之一。唐碑結銜稱度支郎中。度支員外郎者。皆郎官也。至各道節度使。有帶支度營田使者。則其屬有支度判官。此外任幕職也。宋初沿五代之制。以三司使總領天下財賦。三司者。卽唐之戶部度支兩司。及鹽鐵使也。三司使既總其要。又分置副使判官佐之。于是有度支副使。度支判官之名。此則三司之屬。爲京朝官差遣。與外任幕職。班秩不同。一稱支度。一稱度支。其名亦不相混。校書者昧于官制。往往率意妄改。貽誤非淺。

### 階官分左右

元祐四年十一月三省言承務郎以上至朝請大夫欲分左右進士加左字餘官加右字從之昆陵志引哲宗舊實

紹聖二年四月詔職事官罷帶職朝請大夫以下勿分左右宋史哲宗紀

揮塵前錄元祐間范忠宣當國始帶左右攷忠宣以元祐四年六月罷相而階官分左右乃在是年之冬則非忠宣所改也

紹興元年九月詔文臣寄祿官依元祐法分左右用樞密院編修官楊愿請也昆陵志引繫年錄宋史宰

淳熙元年三月詔寄祿官及選人並去左右字宋史孝宗紀周必大撰趙善俊神道碑云孝宗屢欲用君因奏進士任子自分兩途仕州縣者不相下蓋由階帶左右流弊至此頃楊時嘗論之今華貫清流非進士自不可至豈在二字宜如元豐官制有旨從之

按元祐階官分左右自承務郎以上則選人無左右之分也紹興則自承直至迪功皆分左右與元祐亦不盡同

正議大夫以上分左右

徐度卻埽編舊制諫議大夫積十一轉而至僕射由諫議一轉給事中再轉後行侍郎三轉中行侍郎四至吏部初轉給事中再轉工侍三轉戶侍四轉及官制行太中大夫即舊諫議七轉至特進尚書也二府乃七轉左右丞五轉禮書六轉戶書七轉吏書

即僕而不分庶官與二府。自太中一轉通議，再轉正議，三轉光祿，四轉銀青光祿，五轉金紫光祿，六轉即特進。元祐中始令正議、光祿、銀青光祿、金紫光祿並置左右，分爲二資。於是復十一轉而至特進。紹聖以後，因之不改。政和中增置通奉、正奉、宣奉三階，而罷分左右，止十轉至特進，而庶官二府並循此制。蓋祖宗以來，二府不磨勘，故有優遷。紹興新書乃并二府有磨勘之法，然亦未嘗舉行也。

特進 金紫光祿大夫 銀青光祿大夫 光祿大夫 宣奉大夫 正奉大夫 正議大夫 通奉大夫 通議大夫 太中大夫以上凡十階。

選人七資四等

畱守節度觀察判官

節度觀察掌書記 支使 防禦團練判官

畱守節度觀察推官 軍監判官以上兩使職官。

防禦團練軍事推官以上初等職官。

錄事參軍 縣令

知錄事參軍 知縣令以上令錄。

軍巡判官 司理 司法 司戶 簿 尉以上判司簿尉。

判司簿尉七考。令錄職官六考。有京官舉主五人內一員轉運使副或提刑。並磨勘引見轉合入京朝

官。宋史職官志

判司簿尉初任循一資入知令錄。次任二考以上入正令錄。知令錄循一資入初等職官。正令錄入兩使職官。初等職官循一資入兩使職官。兩資入支掌防團判官。三資入節察判官。同石林燕語云：選人寄祿官凡四等七資。

謂此也。

### 帥漕憲倉

文獻通考言唐之州縣不過一使臨之。而宋則有帥漕憲倉四司。故州縣之官尤難以奉承展布。帥漕憲倉蓋當時案牘之稱。帥謂安撫司。漕謂轉運司。憲謂提點刑獄司。倉謂提舉常平司。帥憲倉一人而已。漕則一路或有兩三人。曰轉運使。曰轉運副使。曰轉運判官。皆漕司也。

### 庾司

提舉常平司。宋人謂之倉司。亦謂之庾司。宋史孫夢觀傳。提點廣東刑獄。改廣西兼漕庾二司。黃營傳。知廣州。主管廣南東路經略安撫司公事。馬步軍都總管。領漕庾如故。是也。漕庾本流俗相稱。如今人稱布政。按察曰藩臬之類。若臣僚除授。自當書轉運及提舉常平。方合史法。宋史於南渡諸臣傳。不特敘次無法。卽所書官名亦鄙俗如此。

四總領

紹興十一年收諸帥兵以爲御前軍屯駐之所皆置總領一人以朝臣爲之敍位在轉運副使之上鎮江諸軍錢糧淮東總領掌之建康池州諸軍錢糧淮西總領掌之鄂州荆南江州諸軍錢糧湖廣總領掌之興元興州錢糧四川總領掌之四川總領初稱總領四川宣撫司錢糧紹興十八年改四川總領總領財賦所或謂之總所亦稱餉所又謂之餉司龍山集中往有此名目

十都統

紹興十一年張俊韓世忠岳飛除樞密使副入覲俊首納所部兵乃分命三大帥副校各統所部自爲一軍更其銜曰統制御前軍馬鎮江大軍卽韓世忠舊部建康大軍卽張俊舊部鄂州大軍卽岳飛舊部也并荆南府江州池州皆有御前軍凡六統制十九年又改漢沔兩大將爲御前諸軍吳璘稱利州西路駐劄御前諸軍都統制在興州楊政稱利州東路都統制在興元金州但以知州兼節制所謂利路三大屯也而興州之事權特重及吳曦叛後改興州爲沔州又分興州十軍爲沔利二軍移沔州副都統司於利州沔州除都統制不除副利州除副都統制不除正天下有十都統矣

直隸

宋制以州領縣而縣亦有不領於州而直隸京師者九域志利州路有三縣唐隸興元府皇朝乾德五



年以縣直隸京師。至道二年建爲大安軍。三年廢軍爲縣。而縣之直隸京師如故也。直隸兩字始見於此。寰宇記於四縣三泉縣並云皇朝平蜀後。以此縣路當要衝申奏公事直屬朝廷。三泉今寧羌州地。

### 州院

乾隆戊戌歲瓜洲浚河得南宋官印文曰宿州州院朱記。初不解州院爲何職。後讀羅端良新安志乃知每州有州院與司理院皆刑獄之稱。州院則錄事參軍主之。司理院則司理參軍主之。若州升爲府則稱府院。會稽志錄事參軍廨舍在府治之西南。府院在焉。司理參軍廨舍在府治之南。獄在焉。

### 宜差

景定建康志卷首題承直郎宜差充江南東路安撫使司幹辦公事周應合修纂。蓋當時諸路帥臣多有奉敕便宜行事者。以其未奉朝旨故謂之宜差。或讀爲宣差者非也。金元始有宜差之名。志載通判南廳壁記結銜有稱宜差者。有稱宜特改差者。皆在馬光祖鎮建康日與應合同時。予又見慶元五年石刻萬壽山修觀音祠記。後題宜差通判軍州兼管內勸農營田事劉震書并篆。蓋此又在景定之前。石刻分明可無疑矣。

### 建康府通判三人

建康志國朝會要諸州置通判各一員。西京南京天雄成德等府各二員。江寧府初置一員。其後視西京等例增置一員。分東西二廳。其後又添差一員。以朝士充。是爲南廳。

官名俗省

宋人文集小說稱人官名。往往割取兩字。蓋流俗相稱之詞。如云撫幹者。安撫司幹辦公事也。運幹者。轉運司幹辦公事也。提幹者。提刑司幹辦公事也。總幹者。總領所幹辦公事也。制機者。制置司主管機宜文字也。帥機者。安撫司主管機宜文字也。帥準者。安撫司準備差遣也。

狀元榜眼

進士第一人稱狀元。起於唐。至今猶因之。予嘗讀周益公省齋文集。有回姚狀元穎啓。回弟二人葉狀元適啓。回弟三人李狀元寅仲啓。又魏了翁鶴山集。有回蔣狀元重珍。蔡狀元仲龍。趙狀元發三啓。於蔡則云擢亞倫魁。於趙則云名列魁三。又嚴州澠安縣狀元坊二。一在儒學。以淳祐丁未邑人黃蛻爲大對第一。二建。一在邑東新橋。以邑人方逢辰爲大對第一。建見新定續志。是第二三人皆可稱狀元也。南宋坊刻有陸狀元增節音注精議資治通鑑一書。首題會稽陸唐老集注。攷宋時狀元無陸唐老其人。蓋亦弟二三人矣。宋史陳若拙傳。稱當時以弟二人及第者爲榜眼。然王元之小畜集。有送弟三人朱嚴先輩從事和州詩云。榜眼科名釋褐初。是第三人亦稱榜眼也。

朱國楨湧幢小品云。元時及第第二者亦稱狀元。蓋其時第一必蒙古人。以中國人居第二。故中國自以狀元稱之。其餘進士係中國人者。亦曰某人榜進士。皆第二也。諸公多致疑。或曰從俗。或曰訛。殆未之究。

耳。如李黼榜進士。黼亦第二也。予謂朱說非是。元時鄉會及廷試皆分左右二榜。蒙古色目人爲右榜。漢人南人爲左榜。各有狀元。未嘗併而爲一。如泰定四年。賜阿察赤、李黼等及第。阿察赤左榜第一。李黼右榜第一。故楊廉夫自稱李黼榜進士。黼右榜狀元。非第二也。今國子監有元至正十一年進士題名牌。又嘗見元統元年題名錄。皆分左右榜。國楨臆說不可信。

經義破題

唐人應試詩賦。首二句謂之破題。韋象畫狗馬難爲功賦。其破題曰。有二人於此。一則矜能於狗馬。一則誇妙于鬼神。見據此賦有破題也。裴令公居守東都。夜宴半酣。公索聯句。時公爲破題。亦見此詩有破題也。宋熙寧中以經義取士。雖變五七言之體。而士大夫習於排偶。文氣雖疎暢。其兩兩相對。猶如故也。偶閱橫浦日新云。有一人作健而說義。破題云。君子有勝小人之道。而無勝小人之心。極佳。然則宋時經義已有破題。不始於明也。宋季有魏天應論學繩尺一書。皆當時應舉文字。有破題、接題、小講、大講、入題、原題諸式。是論亦有破題。

題目疑難處上請

宋禮部試士。知貢舉官下簾幙出示題目。中有疑難處。聽士人就簾外上請。主文於簾中詳答之。夢梁錄

塗改添注

鄉會試有塗改添注字數之例。洪容齋引貽子錄云：燭下寫試無誤筆，即題其後云：並無楷改塗乙注。如有，即言字數。蓋唐宋已有之。元史選舉志：塗乙注五十字以上者不考。

### 春秋合題

經義唯春秋有合題。予嘗見劉青田集載至順癸酉會試。春秋義以荆人來聘。楚屈完來盟于師。楚人使宜申來獻捷。楚子使椒來聘四節合爲一題。國朝沿明舊制。鄉會試春秋有單題有合題。其異於元者。元時合題多至五六事。今一題祇兩事耳。乾隆初始去合題。

### 銓試

吳自牧夢梁錄：每歲三月上旬。應文武官蔭授子弟。宗子蔭補者。並赴銓闈。就試出官。朝廷遣監試主文。考試等官。就禮部貢院放試。試中者三名。取一名。文臣試兩場。本經及刑統義。第三日願試法科者聽。武臣試七書義三。學生員入試中選者。陞內舍。如省闈年分。移于八月放試。中榜者赴吏部伺候。簾試過。參注差遣。武選中者。就兵部右選廳銓量注授。其文武銓魁。特轉一資恩例。銓魁仍置局。造題名集。設同年宴于西湖。帥運諸司。俱有送助。以爲局費。

### 科舉之弊

魏華父云：釋老之患。幾於無儒。科舉之患。幾於無書。杜德稱墓志又云：古者閭閻月書。族時考。州歲比。鄉三年而

賓興。衆賓之席弗屬。堂下之觀禮者弗坐。無異詞也。今易吏而主其事。糊名而察其言。望實之素著。或攻而去之。文詞之稍異。或思而抑之。寧收卑近。無拔僑尤。其幸而得之。則又將以其取於人。將取人矣。眉州

院記

文文肅殿試卷

文文肅公震孟。天啓二年殿試卷。今藏吳中袁氏。後列讀卷官。少師兼太子太師吏部尚書建極殿大學士葉向高。少傅兼太子太傅吏部尚書建極殿大學士韓爌。太子太保禮部尚書兼文淵閣大學士朱國祚。太子太保吏部尚書張問達。禮部尚書兼東閣大學士史繼階。兵部尚書兼東閣大學士孫承宗。戶部尚書汪應蛟。刑部尚書王紀。都察院左都御史鄒元標。吏部左侍郎兼翰林院侍讀學士戚以弘。禮部右侍郎兼翰林院侍讀學士協理詹事府事周如磐。禮部右侍郎兼翰林院侍讀學士署掌院事錢象坤。兵部左侍郎張經世。詹事府少詹事兼翰林院侍讀學士駱從宇。詹事府少詹事兼翰林院侍讀學士周炳謨。詹事府少詹事兼翰林院侍讀學士魏廣微。通政使司左通政袁可立。大理寺左寺丞鄭尙賓。凡十有八人。皆朱字鈴印。卷中太祖成祖神祖列聖字樣皆不出格。讀卷官於文之佳者以紅圈斷句。與今式異。

鄉試錄

予家有康熙四十一年江南鄉試錄。考試官吏部文選司郎中陳汝弼。山東福山人。工科給事中黃鼎楫。

直隸宣化人。其序云。先以御史臣朝楠貳之。繼命給事中鼎楫來代朝楠。未詳其姓也。是科始編官卷。江南中式八十三名。官卷中者八人。第七名華亭張維煦。第十五名崑山徐駿。皆官卷也。



# 十駕齋養新錄卷第十一

## 江南

史記貨殖傳江南豫章長沙。又言江南卑溼。丈夫早夭。皆謂今湖廣江西之地。項羽本紀江東雖小。縱江東父老憐而王我。今人所謂江南。古之江東也。

## 上江下江

漢書王莽傳南郡張霸江夏羊牧王匡等起雲杜綠林。號曰下江兵。是南郡以下皆可云下江也。李密與王慶書上江米船皆被抄截。通鑑載隋煬帝之言曰。朕方欲歸。正爲上江米船未至。注夏口以上爲上江。是武昌以上皆可云上江也。蓋中隨筆又史記正義三江者在蘇州東南三十里。名三江口。一江西南上七十里至太湖。名曰松江。古等澤江。一江東南上七十里白蠟湖。名曰上江。亦曰東江。一江東北下三百餘里入海。名曰下江。亦曰婁江。是婁江東江亦有上江下江之名。

## 三楚

史記貨殖傳自淮北沛陳汝南南郡此西楚也。彭城以東東海吳廣陵此東楚也。衡山九江江南豫章長沙此南楚也。據此文彭城是東楚。非西楚矣。項羽都彭城。而東有吳廣陵會稽郡。乃以西楚霸王自號者。



羽兼有梁楚地。梁在楚西。言西楚。則梁地亦在其中也。又攷三楚之分。大率以淮爲界。淮北爲西楚。淮南爲南楚。唯東楚跨淮南北。吳廣陵在淮南。東海在淮北。彭城亦在淮北。而介乎東西之間。故彭城以東可稱東楚。彭城以西亦可稱西楚也。又孟康漢書注。舊名江陵爲南楚。吳爲東楚。彭城爲西楚。高帝紀。太平寰宇記。楚文王徙都於郢。故江陵是爲西楚。漢封元王交於彭城。是爲東楚。又封屬王胥於廣陵。是爲南楚。此又一說。與史記貨殖傳不合。

### 三蜀

左思蜀都賦。三蜀之豪。時來時往。劉逵注。三蜀。蜀郡、廣漢、犍爲也。本一蜀國。漢高祖分置廣漢。漢武帝分置犍爲。

### 兗州

漢之兗州刺史治鄆城。劉宋以後。徙治瑕邱。相沿至今。驗其封畛。實禹貢徐州之域。與古兗州無涉也。

### 山東

秦都關中。以六國爲山東。賈誼謂秦并諸侯山東三十餘郡。又云。山東豪俊。竝起而亡秦族矣。是也。漢書。山東出相。山西出將。亦泛指函關以東。非今所稱山東也。然漢時亦有稱齊魯爲山東者。如酷吏傳。御史大夫宏曰。臣居山東。爲小吏時。寧州爲濟南都尉。儒林傳。伏生教齊魯之間。學者由此頗能言尙書。山東

大師亡不涉尙書以教則齊魯之號山東非無因矣。

今山東省於唐爲河南道地。宋改爲京東路。又分東西兩路。東路治青州。西路治兗州。而東昌武定兩府。臨清及德州。唐宋皆別屬河北。蓋唐宋以前。大河故道。皆由千乘入海。唐宋爲棣州。今東曹濮齊青在河南岸。今開博。今東貝。今清德棣。在河北岸。觀河南河北分界。而河之經流了然在目矣。

### 湖北湖南

宋荆湖分南北路。岳、澧、鼎、辰、沅、皆屬北路。施州別屬夔路。而南路所領有全州。皆與今分界異。

### 四川

明四川布政司所領有遵義府。今改隸貴州。鎮雄軍民府。今爲鎮雄州。屬雲南昭通府。烏蒙軍民府。今爲昭通府。屬雲南。烏撒軍民府。今爲威寧州。屬貴州。東川軍民府。今爲東川府。屬雲南。

### 分天下爲路

宋史地理志。至道三年。分天下爲十五路。天聖析爲十八。元豐又析爲二十三。志所云路者。以轉運使所轄言之。若慶歷元年。分陝西沿邊爲秦鳳。涇原。環慶。鄜延。四路。八年。河北置大名。高陽關。真定。定州。四路。熙寧五年。陝西又置熙河路。此特爲軍事而設。每路設安撫使兼馬步軍都部署。後避英宗諱。改稱都總管。其民事仍領於轉運司。故不在十八路。廿三路之數。初陝西祇有一轉運司。及熙寧收熙河路。乃分轉運司爲二。一

治永興軍。曰永興軍路。郟延。環慶屬焉。一治秦州。曰秦鳳路。秦鳳。涇原。熙河屬焉。志於陝西路。敍次五路沿革。不甚了了。讀史者益致茫昧矣。

水經注難盡信

水經注載漢時侯國。難以盡信。如河水篇以臨羌爲孫都封國。不知孫都本封臨蔡。其地在河內。不在金城也。以西平爲公孫渾邪封國。不知渾邪本封平曲。其地在高城。不在金城也。汾水篇以河東之平陽爲范明友封國。不知明友本封平陵。其地在武當。不在河東也。安成侯劉蒼。在贛水篇以爲長沙之安成。在汝水篇以爲汝南之安成。桃侯劉襄。在泝水篇以爲酸棗之桃虛。屬東在濁漳水篇以爲信都之桃縣。建成侯劉拾。在贛水篇以爲豫章之建成。在淮水篇以爲沛之建成。皆彼此重複。不相檢照。又淮水篇云。山陽城。卽射陽縣故城也。漢世祖建武十五年。封子荆爲山陽公。治此。攷山陽僑治射陽。乃在東晉安帝之世。漢之山陽郡。自治昌邑。今金鄉縣境。以典午之僑治。當東漢之故封。豈其然乎。

河水篇。河水又東北逕陽阿縣故城西。漢高帝六年。封郎中萬訢爲侯國。沁水篇。陽泉水東逕陽陵城南。陽阿縣之故城也。漢高帝七年。封卞訢爲侯國。此二條人名與年數小異。亦重複而舛誤也。史漢表但有陽河齊侯其石。此云陽阿。可證二表之譌。漢志平原鄉有阿陽縣。上黨郡有陽阿縣。與酈所見本不同。而萬訢。卞訢。其石。三名互異。未審誰是。史記功臣侯表。百年之間。見侯五。正義以楊阿侯。卞仁當見侯之一。是正義本作卞。與酈所見本同。

澗水篇。蒲水逕夏屋故城。世謂之寡婦城。賈復從光武追銅馬五幡於北平所作也。世俗音轉。故有是名矣。又汝水篇。桓水逕賈復城北。復南擊郟所築也。俗語譌謬。謂之寡婦城。水曰寡婦水。此兩寡婦城。皆云賈復之譌。必有一誤矣。予謂夏之言假也。陳郡陽夏縣。夏讀如賈。賈寡聲相近。北音讀屋如烏。與婦音亦相似。則夏屋之爲寡婦。不必因於賈復也。

### 廣韻載唐州名

廣韻所載州名。平聲八十九。曰同、忠、通、蓬、松、容、瀧、嬌、隋、岐、儀、伊、綏、夔、舒、渠、徐、慮、滌、渝、扶、鄆、蒲、瀘、齊、西、懷、開、萊、中、陳、秦、岷、幽、均、文、汾、忻、原、丹、安、檀、蘭、燕、延、豪、曹、河、和、瓜、巴、沙、揚、洋、梁、涼、商、房、坊、襄、芳、唐、常、滄、黃、光、杭、平、荆、瀛、營、成、洛、并、青、邢、庭、靈、寧、興、登、恆、幽、金、嵐、甘、鹽、上、聲、十五。曰隴、汝、許、楚、武、濟、海、鄴、沔、趙、夏、穎、壽、陝、去、聲、二十九。曰鳳、宋、雍、絳、遂、利、冀、涓、魏、豫、潞、薊、衛、貝、會、代、鄆、萬、建、汴、華、相、宥、慶、鄭、定、勝、鄧、沁、入、聲、二十。二曰濮、復、肅、密、蔚、滑、莫、毫、博、廓、澤、號、易、石、壁、翼、德、隰、集、合、壘、峽、皆唐開元以前之疆域。蓋承唐韻舊文。孫恂序所謂輿地志及武德已來。剏置迄開元三十年。並列注中者是也。每州敘述沿革甚備。惟容、遂、建、三州。但云州名。不敘沿革。則宋景德刊修時刪去之矣。唐所置州尙多。乃江南嶺南諸路。州名全闕。兩浙惟載杭州。皆宋人妄刪。非孫氏之舊也。伊、涼、甘、瓜、疊、宕、庭、鄯、蕪、薊、嬌、平。久不在宋版圖之內。山南之通州。宋初改名達州矣。此云通州。本漢宕渠縣。則是唐之通州。非宋之通州。知實係孫恂舊文。宋人刪改。有未盡

耳。

平州

漢書王莽傳。民棄城郭。流亡爲盜賊。并州平州尤甚。胡三省注通鑑。謂此時未有平州。疑爲字誤。子攷路博德傳云。西河平州人。平州縣名。屬西河郡。正在并州部內。故有并州平州之稱。地理志無平州。而有平周。周州古字通用。非有遺漏也。胡氏疑爲遼東之平州。故云此時未有平州。不知并州本有平州縣也。

薛

漢時魯國有薛縣。司馬彪郡國志。薛本國。張守節史記正義云。薛故城在今徐州滕縣南四十四里。而菑川國亦有薛縣。史記平津侯列傳。稱齊菑川薛縣人。漢書亦云。菑川薛人是也。或據班氏地理志。菑川無薛縣。疑本傳有誤。是大不然。本傳明云。菑川國人推舉。與魯國無預。菑川本齊地。故汲黯以齊人多詐譏之也。漢初菑川與魯俱有薛縣。而菑川之薛。不見於班志。志所載者。元成以後之版籍。武帝時此縣猶未併省也。

春秋時魯有薛邑。莊公卅一年。築臺于薛。此別是一地。非任姓之薛國。

盱眙

漢書地理志。臨淮郡有盱眙縣。應劭曰。音吁怡。史記或作盱台。裴駟引鄭元說。音煦怡。廣韻。十虞部。盱字

下注云。盱眙縣。在楚州。盱眙字皆从目。無可疑也。類篇於目部眙字下云。盱眙地名是矣。乃於肉部別出盱字。云盱胎縣名。此所謂北人不識盱眙者歟。

### 牟婁

春秋。莒人伐杞。取牟婁。于欽曰。安邱南有牟婁山。俗譌作朦朧山。卽其地。蓋牟婁朦朧聲相近也。

### 通州

王楙野客叢書云。唐時揚州爲盛。通州爲惡。引白樂天詩曰。通州海內栖惶地。司馬人閒冗長官。元微之詩曰。折君災難是通州。又曰。黃泉便是通州郡。其不美如此。勉夫蓋誤以微之所謫之通州卽淮南之通州。揚通同在一道。而相去霄壤。是可怪耳。予謂唐之通州。隸山南道。卽今達州。宋乾德三年更名。若淮南之通州。本揚州海陵縣。其置州乃在五代之世。元和閒未有此州也。

### 大名府

宋大名府領縣十三。今大名府領一州六縣。唯元城附郭。及南樂一縣。沿宋之舊。其餘無同者。成安屬廣平府。內黃屬河南之彰德府。莘館陶清平冠氏今無氏字屬山東之東昌府。臨清山東直隸州。以夏津爲屬縣。朝城屬山東之曹州府。宗城金改屬洛州。元志無此縣。則金季已廢矣。魏縣國朝裁併入大名縣。今大名府所領之開州及清豐長垣卽宋之澶州也。東明則宋曹州之冤句縣也。宋東明縣屬開封府。今爲儀封蘭陽二縣。

### 泉州

泉州之名雖同。而有隋唐之異。隋志云。隋平陳。改豐州曰泉州。後改閩州。又改福州。此隋之泉州也。又唐志云。析泉州之南安。莆田。龍溪。置武榮州。治南安。後治晉江。武榮州尋廢縣。還隸泉州。又復置武榮州。更武榮州爲泉州。唐志在景雲二年。通典以爲神龍以後。初置泉州不同。此唐之泉州也。今爲泉州。自此泉之與福。始定分爲二郡。不相涵矣。故景雲二年已前。凡曰泉州者。指今福州也。景雲二年之後。凡曰泉州者。指今泉州也。輿地紀勝。

### 新豐

丹徒縣有新豐鎮。陸游入蜀記。六月十六日。早發雲陽。過夾岡。過新豐。小憩。李太白詩云。南國新豐酒。東山小妓歌。又唐人詩云。再入新豐市。猶聞舊酒香。皆謂此。非長安之新豐也。然長安之新豐。亦有名酒。見王摩詰詩。

### 石城

後漢書方術傳。高獲遠遁江南。卒於石城。石城人思之。共爲立祠。章懷注。石城在今蘇州西南。大昕案。蘇州無石城。據郡國志。丹陽郡有石城縣。當是高獲所遁也。

### 虎嘯城

顧氏方輿紀要。四川廣安州北十里有虎嘯城。建置未詳。按元史楊大淵傳。中統三年。復於渠江濱築虎

嘯城以逼宋大良城。宋瀋祐三年移廣安軍於大良平寶祐六年入于元至元三年宋復取大良平改爲寧西軍。楊文安傳中統四年進築虎嘯城以困大良趙匡刺傳中統三年守東川四年宋夏貴以兵侵虎嘯山寨元帥欽察遣匡刺率兵往禦之貴敗走追至新明縣。新明縣在廣安州西六十里西南至合州定遠縣百卅里。斬首三十餘級至元五年戊東安虎嘯山兩城宋楊立以兵護糧送大良平匡刺率所部兵與立戰於三重山立敗走是虎嘯山爲宋元交爭之地其築城始末歷歷可攷顧氏以爲建置未詳蓋未檢元史耳顧氏所載宋金元地名大約本諸薛方山通鑑而未讀全史如三重山東安城之名皆缺而不書。

### 蜀四帥府

元憲宗八年。即宋寶祐六年也。宋大獲山守將楊大淵。時宋以大獲爲閬州治。運山守將張大悅。宋以運山爲蓬州治。大良平守將蒲元圭。宋以大良平爲廣安軍治。皆以城降元元即授以元帥使守之青居山軍人亦殺其守將出降。宋以青居爲順慶府治。明年遣便宜都總帥汪惟正戍青居與大獲運山大良平稱四帥府。

### 水洛城

宋慶歷所築水洛城屬秦鳳路。今甘肅靜寧州西南有水洛城。元豐所築永樂城屬鄜延路。今陝西米脂縣西南永樂城。兩城皆與西夏交爭之地而相距遼遠名目不同今涑水記聞皆作永洛是誤仞爲一地矣。溫公畱心經濟目係目睹耳聞之事不應舛謬乃爾當是校書之人不諳地理輒有改易非溫公元本也。宰輔編年錄亦以水洛作永洛。



光化

宋京西路有兩光化縣。其一屬隨州。本蕭齊所置。安化縣。隋唐皆爲光化縣。而宋初因之。熙寧元年。省入隨縣。今隨州東有光化廢縣。卽熙寧所廢之縣也。其一屬襄陽府。本宜城縣之陰城鎮。宜城九域志作穀城。按志兩縣皆屬襄陽府。而穀城在州西北。宜城在州南。今光化亦在州西北。則九域志作穀城是也。紀勝亦作穀城。乾德三年。置乾德縣。爲光化軍治。熙寧五年。廢軍。改乾德爲光化縣。隸襄陽。其後復爲光化軍。今襄陽府光化縣。卽其地也。兩縣一省一置。俱在熙寧間。宋史地理志記載分明。或者仍爲一地。轉訾史志有誤。是不然矣。王象之云。隨州有廢光化縣。非襄陽之光化也。

沌口

由武昌至江陵。水行當泝大江。別有沌口者。亦水道。可避江行之險。沌讀如篆。夏秋水漲可行。過九月則沌涸。不可行。必由巴陵至荊渚矣。陸氏入蜀記。八月三十日。離鄂州。沿鸚鵡洲南行。過謝家磯。金雞汊。泊通濟口。九月一日。始入沌。實江中小夾也。過新潭。有龍祠。自是無復居人。兩岸葭葦彌望。謂之百里荒。二日至下郡。始復有挽路。登舟背望竟陵遠山。泊白臼。三日。過八疊汊口。泊歸子保。四日。過綱步。泊畢家池。蓋屬復州玉沙縣滄浪鄉云。五日。泊紫湄。六日。過東場。泊鷄鳴。七日至淇江。八日至江陵之建寧鎮。蓋沌口也。晉王澄棄荊州。別駕郭舒不冝從。澄東下。乃畱屯沌口。陳侯安都討王琳。至沌口。皆此地也。自是泛江入石首縣界。過公安。至沙市。距荊州陸行十里。

李晏口

通鑑周顯德二年正月。詔浚胡盧河。築城於李晏口。注。冀州蓨縣東北有李晏鎮。時築城屯軍。以爲靜安軍。按薛史。其軍南距冀州百里。北距深州三十里。夾胡盧河爲界。大昕案。舊五代史。是年三月。以李晏口爲靜安軍。與胡注合。但注云。其軍南距冀州百里。則是在冀州之北。蓨縣又在冀州東北一百五十里。則不得以蓨縣之李晏鎮當之矣。攷一統志。李晏鎮在景州東北。當胡盧河南岸。此爲東李晏口。又有西李晏口。在今深州南。皆五代時置軍屯守處。是則李晏本有東西兩口。而周所置之靜安軍。則在深州。不在蓨縣。胡氏殆混而一之矣。沈存中筆談云。深州舊治靖安。其地隴鹵。景德中議遷。時傅潛家在李晏。乃奏請遷州于李晏。今深州是也。此說亦不然。深州本治陸澤。後周置靜安軍於李晏口。在州南卅里。泊宋雍熙二年。靜安軍廢。四年。移州治李晏。因故軍名。爲靜安縣。省陸澤。下博二縣入焉。此深州改治之見於九域志者。沈誤以爲景德中。又謂州舊治靖安。皆攷之未審也。九域志。冀州蓨縣有李晏鎮。此東李晏鎮。

平水

金史地理志。平陽府平陽縣有平水。金時有毛麾者。平陽人。自號平水老人。見趙與峕賓退錄。金元之世。平陽立經籍所。一時書坊印板。咸集於此。今世所傳政和證類本草。卽平陽張存惠所刊也。

張湏會稽續志。平水市在會稽縣東二十五里。元微之序白氏長慶集云。予嘗於平水市中。見邨校諸童。

競習詩。召而問之。皆對曰。先生教我樂天微之詩。固亦不知予之爲微之也。自注。平水。鏡湖旁。艸市名。此又一平水也。

秀水

朱勝非有秀水間居錄三卷。陳振孫云。寓居宜春時作。秀水者。袁江水名也。非秀州之秀水縣。

青海

青海之名。昉於後魏。水經注河水篇云。湟水又東南流。逕龍夷城。故西零之地也。十三州志曰。城在臨羌。新縣西三百一十里。王莽納西零之獻。以爲西海郡。治此城。湟水又東南逕卑禾羌海。北有鹽池。闕駟曰。縣西有卑禾羌海者也。世謂之青海。東去西平二百五十里。按古人讀西如先。酈所云西零。卽漢書之先零。元始四年。王莽誘塞外羌獻鮮水海。允谷鹽池。置西海郡。先鮮音相似。鮮水者。先零水。鮮水海。卽今青海矣。晉隆安二年。後涼楊軌。降於禿髮烏孤。尋爲羌酋梁飢所敗。西奔僂海。僂乙弗鮮卑。而據其地。僂卽零之俗體。亦以先零得名也。西魏初。涼州刺史史寧。與突厥分道襲吐谷渾。還會於青海。隋開皇初。遣元諧等襲吐谷渾。敗之於青海。隋書。青海在吐谷渾中。周回千餘里。自唐以來。青海之名著。遂無有稱鮮水海者矣。

避諱改郡縣名

漢文帝名恆。改恆山郡曰常山。光武叔父趙王名良。改壽良縣曰壽張。殤帝名隆。改隆慮縣曰林慮。吳大帝孫權。立子和爲太子。改禾興縣曰嘉興。景帝孫休立。避諱改休陽縣曰海寧。

晉武帝父名昭。改張掖之昭武縣曰臨澤。建安之昭武曰邵武。邵陵之昭陽縣曰邵陽。愍帝名業。改建業縣曰建康。鄴縣曰臨漳。簡文帝名昱。改育陽縣曰云陽。成帝杜皇后名陵。改陵陽縣曰廣陽。簡文鄭太后名春。改富春縣曰富陽。平春縣曰平陽。斬春縣曰斬陽。春穀縣曰陽穀。宜春縣曰宜陽。東海王越世子名毗。改毗陵郡曰晉陵。郡縣曰晉陵縣。桓溫父名彝。改平夷郡曰平蠻。夫夷縣曰扶縣。夷道縣曰西道。後魏道武帝名珪。改上邳縣曰上封。獻武帝諱宏。改宏農郡曰恆農。

齊文宣立子殷爲太子。改殷州曰趙州。

隋文帝父名忠。改中牟縣曰內牟。雲中縣曰雲內。中鄉縣曰眞鄉。煬帝名廣。改廣州曰番州。廣潤縣曰靈武。廣威縣曰化隆。廣恩縣曰洮河。廣化縣曰河池。廣長縣曰修城。廣陽縣曰汶山。廣年縣曰左封。廣都縣曰雙流。廣漢縣曰雒。廣定縣曰蒲江。廣通縣曰通義。南廣縣曰南溪。廣武縣曰滎澤。廣寧縣曰汝北。廣福縣曰安福。廣川縣曰長河。廣宗縣曰宗城。廣平縣曰永年。廣阿縣曰象城。廣城縣曰樂壽。廣昌縣曰飛狐。

唐高祖名淵。改長淵縣曰長水。瀘淵縣曰瀘水。太宗名世民。改萬世縣曰萬歲。富世縣曰富義。興勢縣曰

興道。明皇名隆基。改隆州曰閬州。箕州曰儀州。隆化縣曰賓化。盈隆縣曰盈川。唐隆縣曰唐安。隆山縣曰彭山。昌隆縣曰昌明。隆康縣曰普康。隆平縣曰太平。隆安縣曰崇安。隆龕縣曰崇龕。基城縣曰祐川。代宗名預。改豫州曰蔡州。宿預縣曰宿遷。樂預縣曰樂山。豫章縣曰鍾陵。豫寧縣曰武寧。德宗名适。改括州曰處州。括蒼縣曰麗水。憲宗名純。改純化縣曰慕化。純義縣曰正義。又改涪州曰蠻州。還淳縣曰青溪。涪風縣曰從化。穆宗名恆。改恆州曰鎮州。恆陽縣曰曲陽。武德初。避太子建成名。改晉城縣曰晉安。新城縣曰新政。建城縣曰高安。又唐高祖避外祖獨孤信名。改信州曰夔州。神龍初。避孝敬皇帝諱。改宏農縣曰恆農。宏靜縣曰安靜。垂拱初。避武氏家諱。改華州曰大州。華陰縣曰仙掌。華原縣曰永安。華容縣曰容城。江華縣曰雲溪。華亭縣曰亭川。

後梁朱全忠祖名誠。改臺城縣曰臺平。欒城縣曰欒氏。阜城縣曰漢阜。臨城縣曰房子。潞城縣曰潞子。黎城縣曰黎亭。告成縣曰陽邑。襄城縣曰苞孚。韓城縣曰韓原。舊唐書作元誤翼城縣曰澮川。鄆城縣曰萬安。文城縣曰屈邑。晉城縣曰高都。陽城縣曰濩澤。應城縣曰應陽。豐城縣曰吳高。朝城縣曰武陽。宗城縣曰廣宗。聊城縣曰聊邑。成安縣曰斥邱。父名信。改信都縣曰堯都。皆唐天祐中敕改

後唐莊宗祖名國昌。改博昌縣曰博興。昌陽縣曰萊陽。孝昌縣曰孝感。義昌縣曰郴義。平昌縣曰德平。昌樂縣曰南樂。

後晉高祖名敬瑭。改竟陵曰景陵。

宋太祖之祖名敬。改敬州爲梅州。石鏡縣曰石照。父名宏殷。改宏農縣曰常農。本曰恆農。史家避眞宗諱改。殷城縣曰

商城。潞水縣曰商水。太祖名匡胤。改匡城縣曰鶴邱。長垣。即今長垣。引山縣曰平蜀。太宗名光義。改義陽軍曰信陽。

義武軍曰定武。昭義軍曰昭德。崇義軍曰崇信。保義軍曰保平。威義軍曰威德。彰義軍曰彰化。南義州曰

南儀。孝義縣曰中陽。義川縣曰宜川。義興縣曰宜興。義章縣曰宜章。郴義縣曰桂陽。通義縣曰眉山。方義

縣曰小溪。義賓縣曰宜賓。義寧縣曰信安。全義縣曰興安。信義縣曰信宜。義倫縣曰宜倫。義清縣曰中慮。

歸義縣曰歸信。豐義縣曰彭陽。招義縣曰招信。正義縣曰蒙山。富義監曰富順。仁宗名禎。改禎州曰惠州。

永貞縣曰永昌。滇陽縣曰眞陽。滇昌縣曰保昌。神宗名頊。改旭川縣曰榮德。孝宗名昚。改慎縣曰梁縣。理

宗名昀。改筠州曰瑞州。大中祥符五年。避聖祖諱。改元武縣曰中江。朗州曰鼎州。朗山縣曰確山。朗池縣

曰營山。天聖元年。避章獻后父諱。改淮南之通州爲崇州。蜀之通州爲達州。通利軍曰安利。通化縣曰金

川。大觀四年。避孔子諱。改瑕邱縣曰瑕縣。龔邱縣曰龔縣。紹興十二年。避金太祖諱。改岷州曰西和州。廿

八年。避金太子光瑛名。改光州爲蔣州。光山縣曰期思。

金章宗名璟。改景州曰觀州。睿宗名宗堯。改宗州曰瑞州。宗安縣曰瑞安。衛紹王名允濟。改濟陽縣曰清

陽。永濟縣曰豐閏。顯宗名允恭。改共城縣曰河平。龔縣曰寧陽。武功縣曰武亭。

明成祖名棣。改滄州之無棣曰慶雲。樂安州之無棣曰海豐。神宗名翊鈞。改鈞州曰禹州。光宗名常洛。改洛南縣曰雒南。

漢地理志縣名相同

子弟晦之言。漢縣名相同者。每加東西南北上下以別之。然攷之地理志。重出者正復不少。如曲陽三見。一屬九江。一屬東海。一屬交趾。作曲易師古曰古陽字。建城三見。一屬勃海。一屬沛侯國。一屬豫章。劇兩見。一屬北海。一屬甯川。定陶兩見。一屬濟陰。一屬定襄。西平兩見。一屬汝南。一屬臨淮。陽城兩見。一屬潁川。一屬汝南侯國。平昌兩見。一屬平原侯國。一屬琅琊。成陽兩見。一屬濟陰。一屬汝南侯國。東安兩見。一屬東海侯國。一屬城陽。新陽兩見。一屬汝南。一屬東海侯國。鍾武兩見。一屬江夏侯國。一屬零陵。成兩見。一屬涿侯國。一屬泰山。新市兩見。一屬鉅鹿侯國。一屬中山。建陽兩見。一屬九江。一屬東海侯國。平安兩見。一屬千乘侯國。一屬廣陵。平城兩見。一屬北海侯國。一屬雁門。阿陽兩見。一屬平原。一屬天水。臨胸兩見。一屬東萊。一屬齊郡莽俱改監胸。新都兩見。一屬南陽侯國。一屬廣漢。昌陽兩見。一屬東萊。一屬臨淮侯國。安陵兩見。一屬潁川。一屬汝南。高平兩見。一屬臨淮侯國。一屬安定。饒兩見。一屬北海侯國。一屬西河。高陽兩見。一屬涿郡。一屬琅邪侯國。武城兩見。一屬左馮翊。一屬定襄定襄之武城續志作成王莽改縣名桓就是當爲成也。廣平兩見。一屬臨淮侯國。一屬廣平。陰山兩見。一屬西河。一屬桂陽。樂成兩見。一屬南陽侯國。一屬河間。富平兩見。一屬平原。一屬北地。成安兩見。一屬陳畱。一屬潁川侯國。

復陽兩見。一屬南陽。侯國房目反。一屬清河。音腹。安定三見。一屬鉅鹿。侯國。一屬安定。一屬交趾。武陽兩見。一屬東海。侯國。一屬犍爲。鄭兩見。一屬京兆。一屬山陽。侯國。成鄉兩見。一屬北海。一屬高密。安陽兩見。一屬汝南。侯國。一屬漢中。陽樂兩見。一屬東萊。侯國。一屬遼西。武都兩見。一屬武都。一屬五原。歸德兩見。一屬汝南。侯國。一屬北地。東陽兩見。一屬臨淮。一屬清河。黃兩見。一屬山陽。侯國。一屬東萊。安邱兩見。一屬琅邪。一屬北海。開陽兩見。一屬東海。一屬臨淮。樂陵兩見。一屬平原。一屬臨淮。侯國。安成兩見。一屬汝南。侯國。一屬長沙。西陽兩見。一屬江夏。一屬山陽。侯國。安平兩見。一屬涿。一屬豫章。侯國。高成兩見。一屬南郡。一屬勃海。新昌兩見。一屬涿。侯國。一屬遼東。朝陽兩見。一屬南陽。一屬濟南。高陵兩見。一屬琅邪。侯國。一屬左馮翊。宜春兩見。一屬汝南。侯國。一屬豫章。石城兩見。一屬丹陽。一屬右北平。新成兩見。一屬河南。一屬北海。侯國。若沛郡之鄼。音嗟。本是鄼字。與南陽之鄼。形聲自別也。

後漢縣名相同

續漢郡國志。縣名相同者。平都。一屬豫章郡。侯國。一屬巴郡。安城。一屬汝南。一屬長沙。高平。一屬山陽。侯國。一屬安定郡。武都。一屬武都郡。道。一屬五原郡。潞。一屬上黨郡。一屬漁陽郡。無慮。一屬遼東郡。一屬遼東屬國。安帝紀元初二年。鮮卑圍無慮縣。又攻扶犂營。殺縣令。注。無慮屬遼東郡。扶犂縣名。屬遼東屬國。或疑遼東屬國之無慮。卽扶犂之譌。候城。一屬遼東郡。一屬元菟郡。曲陽。一屬下邳國。侯國。一屬交趾郡。九江之曲。漢昌。一屬中山國。一屬巴郡。穀城。一屬河南尹。一屬東郡。陰平。



一屬東海郡。一屬廣漢屬國都尉。陰平道。

唐縣名相同

新城	涿	杭	龍泉	綏	處	陽城	河南	澤	武寧	洪	萬	永興	新	鄂	長樂	臨	福	龍門	河中	新
永清	幽	房	壽昌	沙	睦	太平	安南	宣	石泉	金	茂	安居	普	保	臨川	撫	振	大同	鎮北	龔
正平	絳	環	南昌	洪	白	新昌	涿	峯	樂平	太原	饒	梁山	萬	武	崑					

宋縣名相同

洪氏容齋五筆云。國朝之制。州名或同。則增一以別之。若河北有雄州。恩州。故廣東者。增南字。蜀有劍州。故福建者。亦增南字。以至西和西安州亦然。若縣邑。則不問。今河南。靜江。府。鞏州。皆有永寧縣。饒。邛。衡州。皆有安仁縣。蔡。英之真陽。廬。汝之梁。光。台之仙居。臨安。建昌之新城。越。筠之新昌。婺。蜀之永康。處。吉之龍泉。嚴。池之建德。渭。秀之華亭。信。吉之永豐。郴。興國之永興。衢。嘉之龍游。施。臨江之清江。洪。萬之武寧。福。循之長樂。郴。連之桂陽。福。桂之永福。是也。予按洪氏所舉。尚遺金。綿之石泉。滁。汀之清流。潭。慶。渭之安化。鞏。道之寧遠。江。泉之德化。泰。興化之興化。荆。邵武之建寧。郴。循之興寧。平。定化之樂平。臨安。南寧之昌化。汀。寧化之寧化。唯郴之興寧。置於嘉定間。洪氏所未及見。此外難免挂漏之譏矣。

元州縣名相同

保定、成都、皆有安州。上郡、常州、皆有宜興州。淮安、大名、皆有清河。保定、般陽、杭州、建昌、皆有新城。建德、池州、皆有建德。河南、吉安、皆有永寧。吉安、信州、皆有永豐。松江、平涼、皆有華亭。吉安、處州、皆有龍泉。衢州、嘉定、皆有龍游。福州、靜江、皆有永福。衡州、饒州、皆有安仁。安豐、重慶、威楚、皆有定遠。冀寧、天臨、皆有寧鄉。奉元、武昌、皆有咸寧。安豐、融州、皆有懷遠。汝寧、曲靖、皆有羅山。杭州、南寧、皆有昌化。福州、循州、皆有長樂。廬州、汝州、皆有梁縣。興國、郴州、皆有永興。龍興、夔州、皆有武寧。贛州、化州、皆有石城。贛州、欽州、皆有安遠。紹興、大同、皆有山陰。滄州、棣州、皆有無棣。永樂初改滄州之無棣曰海豐。慶雲、棣州之無棣曰海豐。鞏昌、道州、皆有寧遠。

### 明縣名相同

明縣名相同者。如直隸、山東、江西、浙江、皆有新城。直隸、河南、江西、皆有永寧。南直隸、陝西、皆有華亭。有山陽。江西、湖廣、皆有安仁。順天、湖廣、廣東、皆有東安。直隸、南直隸、皆有清河。山西、浙江、皆有山陰。山西、江西、皆有廣昌。有樂平。福建、廣東、皆有長樂。江西、浙江、貴州、皆有龍泉。陝西、湖廣、皆有咸寧。南直隸、浙江、皆有建德。山西、湖廣、皆有寧鄉。南直隸、山西、浙江、四川、皆有太平。南直隸、四川、雲南、皆有定遠。南直隸、雲南、皆有太和。陝西、湖廣、貴州、皆有安化。江西、浙江、皆有新昌。河南、廣東、皆有新安。湖廣、廣東、皆有興寧。江西、福建、皆有德化。山東、廣東、皆有海豐。湖廣、廣東、皆有會同。浙江、廣東、皆有昌化。福建、廣西、皆有永福。南直隸、廣西、皆有懷遠。南直隸、湖廣、皆有桃源。江西、廣東、皆有石城。江西、廣西、皆有興安。陝西、四川、皆有石泉。江

西、四川、廣東、皆有長寧。江西、四川、皆有東鄉。山西、四川、皆有大寧。陝西、廣東、皆有三水。而陝西之延安、鞏昌兩府、皆有安定。江西之廣信、吉安兩府、皆有永豐。則一省中且有同名之縣矣。

# 十駕齋養新錄卷第十二

姓氏

三代以前有天下者。皆先聖之後。封爵相承。遠有代序。衆皆知其得姓受氏之由。虞姚。夏姒。殷子。周姬。百世而婚姻不通。小史奠繫世序。昭穆實掌。其事不可紊也。戰國分爭。氏族之學。久廢不講。秦滅六雄。廢封建。雖公族亦無議貴之律。匹夫編戶。知有氏不知有姓久矣。漢高帝起于布衣。太公以上。名字且無可攷。況能知其族姓所出耶。故項伯。婁敬。賜姓劉氏。娥姁爲皇后。亦不言何姓。以氏爲姓。遂爲一代之制。而後世莫能改焉。史記高帝紀書云。姓劉氏。此漢制之異於三代者。後人強作解事。輒謂漢爲堯後。本祁姓。譏史公昧於姓氏之別。斯爲誕矣。漢爲堯後之說。始于向歆父子。史公著書。在武帝之世。當時本無此議。卽云史公會見左氏書。而劉夏。劉卷。亦載春秋。安知漢劉必爲祁姓。而非姬姓乎。且漢之諸帝。不聞自言祁姓。公主下嫁。初不云祁。載筆之臣。安得輕議國姓。宋儒好議論古人。而不稽時代。致有此失。孟堅贊雖言漢出堯後。而篇首仍用史公舊文。蓋三代以前。姓與氏分。漢魏以後。姓與氏合。終漢之世。未嘗自言姓祁。此古人慎重祖宗。不輕附會之意。宋徽宗改公主爲帝姬。其議出於秦京。京固不學。而後來議者。乃謂趙本嬴姓。常稱帝嬴。其迂誕可笑如此。三王異世。不相襲禮。況遙遙華胄。影響攀附。徒供有識捧腹爾。三代

以上男子未有系姓於名者。漢武帝元鼎四年封姬嘉爲周子南君。此男子冠姓於名之始。後代文人。有姬昌、姬滿、姬旦之稱。皆因於此。好古之士。常引以爲戒。近有得古戈者。其文云。羊子之艦戈。本是羊字。或釋爲羊。引左傳楚武王授師子焉爲證。誤矣。

姁

古人讀似姁二字。皆如已。詩於穆不已。孟仲子作於穆不似。是已似同音也。禹母吞薏苳而生。因姓姁氏。賈侍中說。已意已實也。意已卽薏苳。是已姁同音也。春秋葬我小君定姁。公羊作弋。弋姁聲相近。由於姁有以音。詩美孟弋矣。弋卽姁。

并官

孔子娶并官氏。今人以爲并官。其誤蓋自明始。按漢韓敕造禮器碑云。并官聖妃。在安樂里。宋祥符中。封鄆國夫人。制詞亦作并官氏。此二碑皆在曲阜孔廟。予嘗至句容廟學。見元至順元年加封號制石刻。亦作并官。又見宋板東家雜記。元板孔庭廣記。書并官字。未有作并者。自明人刊家語。誤并爲并。後來刊宋史者。轉依誤本校改。沿譌者三百餘年。良可怪也。

郤郤二姓相溷

郤姓出濟陰河南二望。左傳晉有大夫郤獻子。綺戟切。在入聲。郤姓出高平。丑饑切。在上平。兩字形聲俱

別本無通用之理。漢隸从谷旁字或變作𠂔。故郤亦作郟。後來刊晉書者併郟字亦改爲郟。此大誤也。郟、濟、陰單父人。與高平郟氏不同族。陸魯望詩一段清光染郟郎。此用郟誛事。當爲仄聲。而黃伯思譏其誤讀。又不然矣。

### 廣韻述氏姓

古姓氏書今多失傳。唯廣韻所采。多唐以前書。蓋取孫愐唐韻之舊。徵引最爲該洽。後人刪去其十之八九。唯張士俊所刊。尙是元本。然其中亦有紕繆。如衛大夫免餘。本公孫氏。今以爲爲姓。楚大夫涉其帑。據左傳。本云藍尹麇涉其帑。不與王舟。謂藍尹麇以舟載其妻子。而不冑與王耳。乃以涉其爲複姓。可乎。又夫部璩字云。姓也。晉有璩錢。按晉書有錢璩。吳興人。非姓璩也。鐸部拓字。引周書。王秉。王興。並賜姓拓。王氏。按周書有王盟。賜姓拓。王氏。未見王秉。王興。賜姓也。以賁育爲一人。則王深寧已譏之。

### 家譜不可信

顏師古云。私譜之文。出于閭巷。家自爲說。事非經典。苟引先賢。妄相假托。無所取信。寧足據乎。漢書註其注蕭望之傳云。近代譜牒。妄相託附。乃云望之蕭何之後。追次昭穆流俗。學者共祖述焉。但鄼侯漢室宗臣。功高位重。子孫嗣緒。具詳表傳。長倩鉅儒達學。名節並隆。博覽古今。能言其祖。市朝未變。年載非遙。長老所傳。耳目相接。若其實承何後。史傳寧得弗詳。漢書旣不敘論。後人焉所取信。不然之事。斷可識矣。蓋

南齊書本紀敘述先世以望之爲何六世孫。譏其附會不可信耳。師古精于史學。於私譜雜誌不敢輕信。識見非後人所及。唐書宰相世系表。雖詳贍可喜。然紀近事則有徵。溯遠胄則多舛。由於信譜牒而無實事求是之識也。

郡望

自魏晉以門第取士。單寒之家。屏棄不齒。而士大夫始以郡望自矜。唐宋重進士科。士皆投牒就試。無流品之分。而唐世猶尙氏族。奉勅第其甲乙。勒爲成書。五季之亂。譜牒散失。至宋而私譜盛行。朝廷不復過而問焉。士旣貴顯。多寄居它鄉。不知有郡望者。蓋五六百年矣。唯民間嫁娶名帖。偶一用之。言王必琅邪。言李必隴西。言張必清河。言劉必彭城。言周必汝南。言顧必武陵。言朱必沛國。其所祖何人。遷徙何自。概置弗問。此習俗之甚可笑者也。

朱、張、顧、陸、號吳中四姓。朱有沛國、義陽、吳郡、河南四望。而今人但稱沛國。沛之顯者在漢爲朱浮。今朱氏不皆祖浮也。予謂三吳之朱。當稱吳郡。若徽文公之後。則依文公自稱新安可也。張有清河、南陽、吳郡、安定、燉煌、武威、范陽、犍爲、沛國、梁國、中山、汲郡、河內、高平十四望。而今人但稱清河。予謂張之顯者多矣。當視其所祖何人。如季鷹、思曼之裔。則當云吳郡。茂先、道濟之裔。當云范陽。西平、公軌之後。當云安定。平子之裔。當云南陽。不應概稱清河也。廣韻顧姓出吳郡。不聞有它望。今顧氏所祖。不曰雍曰榮。則曰野王曰

況皆吳人也。而改稱武陵。謬矣。陸有吳郡。河南二望。河南之陸。出自鮮卑。本步陸孤氏。魏孝文時。改爲陸氏。今陸氏皆宗續。續遜抗。則爲吳郡之陸。審矣。而轉有取于代北之陸。何哉。聞有不稱河南而稱平原者。未審其故。若以士衡爲平原內史而稱之。則吾未聞以所歷之官爲郡望者也。

今人姓金者。多稱其望曰彭城。此承吳越避諱。改劉爲金。姓改而族望未改。如仁山之後。稱彭城。是爲當矣。日磾本匈奴。渾邪王子。厥後封侯。累世久居三輔。不應冒彭城之望也。

廣韻。汪姓。汪芒氏之裔。姓苑云。新安人。今汪氏皆祖越國公華。華故籍新安。乃不稱新安而平陽。非也。

### 杜康

說文。古者少康。初作箕帚秫酒。少康。杜康也。葬長垣。見巾部。帶字下。李善注文選。初未之引。

### 鴟夷子皮

淮南子。汜論訓。昔者齊簡公。釋其國家之柄。而專任大臣。將相攝威擅勢。私門成黨。而公道不行。故使陳成。田常。鴟夷子皮。得成其難。以鴟夷子皮爲田常之黨。它書所未見。按田常弑君之年。越未滅吳。范蠡何由入齊。此淮南之誤也。

### 養由基

論衡。儒增篇。養由基從軍射晉侯。中其目。按左氏傳。養由基射呂錡中項。未嘗射晉侯也。呂錡射楚共王。



中目王充誤記不足信。

刀父

荀子俛詩。閔姬子奢。莫之媒也。嫖母刀父。是之喜也。朱文公云。刀父未詳。竊疑卽齊之豎刁。亦作貂。刀有貂音。後人別刀刁爲二字。

季襄

淮南汜論訓。季襄、陳仲子、立節抗行。不入洿君之朝。不食亂世之食。遂餓而死。高誘注。季襄、魯人。孔子弟子。朱錫鬯撰孔子弟子攷。采摭羣書。得九十八人。以補史記家語之闕。獨不及季襄何也。

趙梁左強

史記龜策列傳。桀有諛臣。名曰趙梁。紂有諛臣。名曰左強。淮南覽冥訓。紂爲無道。左強在側。高誘注。左強、紂之諛臣。古今人表無趙左二人。

莊彭祖

儒林傳。春秋公羊。有嚴彭祖、顏安樂二家。彭祖本莊氏。史家避明帝諱。追改。公羊疏引六藝論云。眭孟弟子。莊彭祖及顏安樂。

蔡伯偕

論衡別通篇。扶風蔡伯僭。鬱林太守張孟嘗。東萊太守李季公之徒。心自通明。覽達古今。故其敬通人也。如見大賓。此蔡伯僭未詳其名。非陳留蔡邕也。

漢人不見於史者

論衡案書篇。東番鄒伯奇。臨淮袁太伯。袁文術。會稽吳君高。周長生之輩。位雖不至公卿。誠能知之囊橐。文雅之英雄也。觀伯奇之元思。太伯之易章句。文術之咸銘。君高之越紐錄。長生之洞歷。劉子政。楊子雲。不能過也。又對作篇引鄒伯奇檢論。周長生名樹。見謝承書。北堂書鈔引之。太平御覽引鄒子曰。朱買臣孜孜修學。不知雨之流麥。伯奇豈卽鄒子之字耶。

服虔注左傳。引彭仲博說。虞翻注易。引蔡景君說。皆漢人也。

徐巡

說文有徐巡說。案後漢書儒林傳。濟南徐巡。師事衛宏。後從杜受學。亦以儒顯。

張敞

說文引張敞說一條。案漢人不常以武帝諱爲名。疑是張敞。

朱建安

南史劉杳傳。沈約云。何承天纂文奇博。其書載長頸王事。此何所出。杳曰。長頸是毗鴛王。朱建安扶南以

南記云古來至今不死案隋書經籍志有扶南異物志一卷朱應撰應當是建安名也

謝超宗

金樓子載謝超宗子今刊本子誤作字幾卿中拜率更令驕人姓謝亦名超宗亦便自稱姓名云超宗蟲蟻就官

乞睽幾卿既不容酬此言驕人謂為不許而言之下已幾卿又走

王筠

梁有廣晉令王筠見南史陸襄傳與琅邪王元禮同時同姓名

漢人同姓名

孫季昭示兒編記古人同姓名如漢兩韓信兩王吉兩王霸唐兩李益兩韓翃之類然所舉多有未備今

卽班范二史言之西京有兩王莽兩嚴延年兩趙堯兩貢禹兩王崇兩王立兩劉澤兩蘇建兩京房兩劉

歆兩陳咸一見後漢陳龍傳兩陳欽一見後漢陳元傳東京有兩杜喬一見杜林傳兩鄭衆兩王渙兩王隆一見張

王元一公孫述將一烏桓校尉兩陳元一見循吏傳兩馬成一見虞延傳兩張超一在文苑兩陳紀一丹陽人兩趙典一見黨

張陵兩劉方一司空一山陽太守兼兩漢計之則有四王成一一前漢循吏一後漢宣者三王商一丞相一大將軍兩

張禹兩張猛一見張奐傳兩張敞一見武傳兩張武一見文帝紀兩張霸一見前漢儒林傳兩任安一見後漢儒林傳兩王嘉一

獨行若西京之兩杜子夏兩陳孟公則又同時同姓字而非同名也後漢張堪南陽宛人嘗為蜀郡太守

而張衡傳云。祖父堪。蜀郡太守。計其年代。相去不甚遠。而衡亦南陽西鄂人。雖縣名小異。而郡望未改。官職又同。是卽一人矣。或疑別一張堪。非是。

異代同姓名

異代而姓名相同者。難以悉數。今就兩漢而下。訖于宋元。略舉記憶所及者書之。如漢有張華。晉亦有張華。漢有賈逵。魏亦有賈逵。漢有王肅。曹魏元魏皆有王肅。漢有李廣。魏亦有李廣。見晉書文帝紀。漢有黃忠。見申屠蟠傳。蜀亦有黃忠。漢有王育。說文。晉亦有王育。忠義傳。漢有劉陶。魏晉皆有劉陶。漢有郭憲。魏亦有郭憲。字幼簡。漢有張邈。魏亦有張邈。漢有王卓。見順帝紀。晉亦有王卓。見王濟傳。漢有孔安國。晉亦有孔安國。漢有劉琨。論衡初稟。晉亦有劉琨。漢有李嵩。蘇不章傳。晉亦有李嵩。漢有李充。晉亦有李充。漢有謝安。見滕撫傳。晉亦有謝安。漢有劉毅。晉亦有劉毅。漢有孟觀。論衡超奇篇。晉亦有孟觀。漢有王商。蜀亦有王商。見秦必傳。漢有張陵。魏亦有張陵。魏志張範。唐亦有張陵。見唐詩紀事。漢有王甫。蜀亦有王甫。漢有張昭。見魏志張範傳。吳亦有張昭。漢有陳午。晉亦有陳午。見石勒載。漢有王暢。晉亦有王暢。見王澄傳。漢有張衡。晉亦有張衡。漢有馬武。晉亦有馬武。見洋傳。漢有馬融。晉亦有馬融。見陶黃傳。漢有胡廣。晉亦有胡廣。見胡奮傳。漢有徐幹。晉亦有徐幹。見王長文傳。漢有張綱。晉亦有張綱。漢有江革。南齊亦有江革。漢有董仲舒。梁亦有董仲舒。漢有朱買臣。梁亦有朱買臣。漢有李膺。梁亦有李膺。漢有王琳。見趙孝傳。梁亦有王琳。漢有樊毅。陳亦有樊毅。漢有劉向。北齊亦有

劉向見文宣帝紀漢有李善唐亦有李善漢有李延壽即繁唐亦有李延壽漢有李郃見文志唐亦有李郃見文志漢有

王逸見宰相表漢有李封見儒林傳唐亦有李封見美詩漢有周興見周榮傳唐亦有周興漢有李益見李

唐亦有李益漢有劉平宋亦有劉平漢有朱震宋亦有朱震漢有楊震宋亦有楊震漢有張俊宋亦有

張俊漢有劉豫見第五倫傳宋亦有劉豫漢有張林見鄭巨君傳宋亦有張林漢有趙禹徐州推官見

魏有張融南齊亦有張融魏有王修晉亦有王修魏有王基見王敦傳蜀有兩劉巴見李嚴傳

晉亦有劉巴見石勒載記蜀有李嚴晉亦有李嚴見趙王倫傳蜀有李福唐亦有李福宋亦有李福見仁宗朝武

有張裕劉宋亦有張裕吳有徐陵陳亦有徐陵吳有嚴武唐亦有嚴武吳有桓彝晉亦有桓彝晉有袁粲

宋亦有袁粲晉有賀循陳亦有賀循晉有劉穆之唐亦有劉穆之見寶刻類編晉有王戎唐亦有王戎見林士

晉有王恭唐亦有王恭見儒學傳晉有王珣唐亦有王珣見宰相表晉有王旦見石勒載記宋亦有王旦晉有吳曾見

延宋亦有吳曾見文志晉有葛洪宋亦有葛洪晉有王濬宋亦有王濬見石安詩苻秦有王猛陳亦有王猛劉

宋有蔡興宗趙宋亦有蔡興宗編注杜詩南齊有王儉唐亦有王儉見宰相表北魏有崔鴻唐亦有崔鴻見州刺史

居易唐有李沆見宰相表宋亦有李沆唐有張齊賢見儒學傳宋亦有張齊賢唐有韓琦見宰相表宋亦有韓琦唐

有王曾著作郎見金石錄宋亦有王曾唐有李石宋亦有李石字知幾見二百家名賢文粹金亦有李石唐有王珪宋元皆有

王珪元王珪見孝友傳唐有張錫宋亦有張錫唐有李綱宋亦有李綱唐有蔡京宋亦有蔡京唐有張說宋亦有

張說。唐有劉晏。宋亦有劉晏。見忠義傳。唐有蘇轍。見宋史孝友傳。宋亦有蘇轍。唐有高適。知趙州見會稽志。

唐有郭京。撰周易舉正。宋亦有郭京。唐有陳夷行。宋亦有陳夷行。子公輔。唐有李侗。衡州刺史。見廣川書跋。宋亦有李侗。唐

有鄭樵。見藝文志。宋亦有鄭樵。唐有李若水。見宰相世系表。宋亦有李若水。唐有張公謹。政和中知龍岡縣。唐

有張行成。宋亦有張行成。紹興中進士。號觀物先生。唐有王建。五代亦有王建。宋亦有王建。婺源進士。唐有王秘。宋亦有王

秘。東陽人。撰朱子語後錄。唐有王起。宋亦有王起。甘陵人。文彥博幕客。撰集善畫。唐有李珣。宋亦有李珣。景定二年省元。唐有朱長文。見唐詩紀事。宋亦有

常建。括蒼人。知台州。唐有李順。宋亦有李順。見東坡集善畫。唐有李珣。宋亦有李珣。景定二年省元。唐有朱長文。見唐詩紀事。宋亦有

有朱長文。後唐有李鄴。塔州刺史。見北夢瑣言。宋亦有李鄴。紹興時人。宋有崔立。循吏。金亦有崔立。宋有吳澄。淮東提刑。見

理宗紀。元亦有吳澄。

### 晉人同姓名

史繩祖學齋佔畢言古今同姓名者多矣。至晉尤甚。如兩劉毅。兩周撫。兩孫秀。兩解系。兩周訪。兩王愷。兩王渾。兩王澄。是也。予攷晉書。又有兩衛瓘。一有傳。一陳留人。為三都賦略解。見文苑傳。兩王沈。一有傳。一字彥伯。見文苑傳。兩李密。一在孝友傳。一犍為太守。見惠帝紀。兩張茂。一襲涼州牧。一吳郡太守。見列女傳。兩張駿。一襲涼州牧。一姚襄將。見哀帝紀。兩韓壽。一見賈充傳。一為慕容皝司馬。見載記。兩王敦。一有傳。一益州牙門將。見李特載記。兩孫登。一見隱逸傳。一附見孫楚傳。兩徐邈。一有傳。一見王彌傳及石勒

載記兩王洽一為丞相導子一見劉隗傳兩李矩一有傳一江州刺史見李充傳兩王祥一有傳一為呂光僕射見郭騰傳兩劉邁一為琨之祖一為毅之弟兩裴頠一有傳一為東海王越將見懷帝紀按周魏南太守裴頠疑懷帝紀頠字乃頠之譌皆學齋所未及

晉書姓名互異

穆帝紀永和五年褚裒使部將王龕北伐褚裒傳作徐龕按元帝紀有太山太守徐龕為石勒所執死已久矣當從紀

祖約傳其時牽騰率衆出降或帝紀戴洋傳並作牽騰

安帝紀隆安三年吳國內史桓謙義興太守魏隱並委官吳興太守謝邈永嘉太守司馬逸皆遇害孫恩傳桓謙作桓謹魏隱作魏僞隱僞聲相近司馬逸作謝逸南史孝義傳作司馬逸之當是恩傳誤謝瑗度傳有義興太守魏鄢又

僞之異文

段匹磾傳從弟末杯劉琨盧湛傳作末波波杯聲相近也亦作末杯見邵續傳王浚傳亦作末杯

張元張元之

謝安傳苻堅率衆次淮肥兄子元入問計安夷然無懼色答曰已別有旨既而寂然元不敢復言乃令張元重請其下即述命駕出山墅親朋畢集方與元圍棋賭別墅事安所與賭墅者即兄子元也而張元竟

無下落。亦不知其爵里何許也。列女謝道韞傳。初同郡張元妹。亦有才質。適于顧氏。元嘗稱之。以敵道韞。似卽其人矣。而同郡二字難曉。道韞爲王凝之妻。不識張元者。與謝同郡乎。抑與王同郡乎。謝元傳。授左將軍會稽內史。時吳興太守晉寧侯張元之。亦以才學顯。自吏部尙書。與元同年之郡。而元之名亞于元。時人稱爲南北二元。此與前兩傳之張元。同時同姓。同爲謝幼度親舊。唯名多一之字。豈卽一人。而傳聞異詞乎。元之在吳興。撰山墟名。樂史寰宇記屢引之。

#### 唐人同姓名

唐人同時同姓名。如文藝傳所載兩李益。兩韓翃。其最著矣。武后時幸臣有張昌宗。而張昌齡之兄亦名昌宗。見文藝傳。冀州南宮人。

#### 王宰

王宰。武宗朝節度使。附其父智興傳。明皇時又有善畫王宰。杜子美詩所謂五日畫一水。十日畫一石者也。

#### 李播

李瀄風父名播。作天象賦。見唐志。此唐初人也。又元和閒詩人李播。起家進士官郎中。蘄州刺史。見唐詩紀事。



盧貞

盧貞字子蒙。會昌五年爲河南尹。白樂天九老會。貞年未七十。亦預焉。時又有內供奉盧貞。見唐詩紀事。

李翱

李翱字習之。唐書有傳。唐詩紀事云。鄭州嘗掘地得刺史李翱戲贈詩。此自一李翱。非習之也。唐書習之傳亦不記爲鄭州。王深甫編次習之集。乃收入此詩。

呂太一

唐有兩呂太一。魏知古傳所薦。洹水令呂太一。後有聞於時。又韋倫傳。宦者呂太一反嶺南。此別是一人。杜子美詩。自平宮中呂太一。卽韋倫傳之太一。

陳子昂

陳子昂字伯玉。仕武后時。唐書有傳。又大歷中有畫人陳子昂。見段成式京洛寺塔記。

李若水

唐宗室世系表有兩李若水。一淄川郡王孝同之曾孫。一太宗五世孫。

王維王縉

唐太原王維王縉兄弟。一爲右丞。一爲宰相。而琅邪王方則之孫維與縉亦兄弟也。又王智興之父亦名

籍。

王定保

唐摭言十五卷。題云光化進士琅邪王定保撰。書中稱王方慶爲七世伯祖。今檢唐書宰相世系表。琅邪王氏未有名定保者。唯太原王氏有定保。字翊聖。乃起之曾孫。蕘之子。今書中於起直書其姓名。於蕘字亦不回避。則別是一人。非太原之定保矣。唐有兩王定保。而史僅載其一。此表之脫漏也。其書有云。從翁丞相溥。攷昭宗時宰相。有王搏。字昭逸。出自琅邪。有王溥。字德潤。出自太原。定保旣出琅邪。則溥當爲搏之譌。但依表所列。搏爲方慶八世孫。而定保稱方慶七世伯祖。則於搏不當有從翁之稱。是亦可疑也。

韋應物

韋應物。貞元二年。由左司郎中出爲蘇州刺史。而劉禹錫集中。有大和六年除蘇州舉韋應物自代狀。宋葉少蘊。胡元任。已疑其非一人。而沈作喆撰韋傳。合而一之。篇末雖亦有疑詞。而終未敢決。近世陳少章。景雲。據白樂天於元和中謫江州後。貽書元微之。於文盛稱韋蘇州詩。又言常蘇州在時。人亦未甚愛重。必待身後。人始貴之。則是時蘇州已歿。而劉狀又在此書十年以後。則其所舉必別是一人矣。樂天守蘇日。夢得以詩酬之云。蘇州刺史例能詩。西掖今來替左司。言白之詩名足繼左司耳。非謂實代其任也。沈傳謂貞元二年補外。得蘇州刺史。久之。白居易自中書舍人出守吳門。應物罷郡。寓郡之永定佛寺。則誤。

甚矣。白公出守。在長慶間。距貞元初垂四十年。豈有與章交代之理乎。大昕案。樂天刺蘇州。在寶歷元年。陳以爲在長慶間。亦誤。

劉沓虛

殷璠河岳英靈集錄劉沓虛詩。謂頃東南高唱者十數人。然聲律婉然。無出其右。惜其不永。天年隕碎。國寶。沓虛未詳何許人。意其爲南士也。李華三賢論。謂劉沓虛名儒史官之家兄弟。以學著五說。條貫源流。備古今之變。在京嘗疾。太尉房公臨扶風聞之。曰。挺卿。日若不起。無復有神道。殷直清有識。尙恨言理少對。常想見其面。後避地逝於安慶。當作康。安。康。郡。卽。金。州。也。唐。書。劉。迅。傳。作。康。此沓虛卽劉知幾之子迅。唐書附知幾傳。不言其能詩。或初爲一人。似不然。孟浩然有九日於龍沙寄劉大沓虛詩。而新舊書敍知幾六子。迅次在五。是行第不同也。王昌齡有送劉沓虛歸取宏詞解詩。而唐史不言登宏詞科。是出身不同也。一工於詩。一善著書。是趣向不同也。兩劉生雖同時。並有才不遇。而一名一號。似同實異。恐難溷而一之。

宋人同姓名

曹輔。一南劍州人。字載德。有傳。一海陵人。字子方。與蘇子瞻唱和。

王存。一字正仲。丹陽人。有傳。一紹興中神勇軍統制。見繫年錄。

吳革。一開封人。見忠義傳。一九江人。仕涪祐閒。嘗刻朱文公周易本義。一紹興初江西運副。見繫年錄。  
王襄。一鄧州人。見孝義傳。一南陽人。靖康中西道都總管。有傳。

劉通。一并州人。章獻皇后之父。見外戚傳。一紹興中知天長軍。見繫年錄。

王淮。一齊州人。洸之弟。一金華人。字季海。有傳。

王著。一單父人。字成象。有傳。一成都人。字知微。翰林侍書。附呂文仲傳。一紹興中通判溫州。見繫年錄。

王明。一大名人。字如誨。有傳。一承奉郎。與金人戰死。見繫年錄。一涪州將。見元史世祖紀。

王貴。一并州人。附楊業傳。一岳飛部將。

安守忠。一晉陽人。贈太尉。有傳。一捧日左廂都指揮使。欽州團練使。見長編。

李維。一洺州人。沆之弟。一昭武人。綱之弟。

李若谷。一徐州人。字子淵。有傳。一若水之兄。南渡參知政事。

蘇紳。一晉江人。字儀甫。有傳。一紹興中江東兵馬都監。

黃震。一浦城人。字伯起。有傳。一慈溪人。字東發。見儒林傳。一臨海人。字子聞。乾道進士。知瑞安縣。見赤城

志。又有琴師黃震。後改名振。見四朝聞見錄。

王珪。一成都人。字禹玉。有傳。一紹興中太常少卿。見繫年錄。一開封人。與任福死事。附福傳。

王琪。一字君玉。珪之從兄。有傳。一南渡武臣。德之子。

王鞏。一字定國。旦之孫。附王素傳。一紹興中知仁和縣。一端平丙申死蜀難。見理宗紀。

田敏。一鄒平人。見儒林傳。一易州人。真宗時武臣。有傳。

王雱。一字元澤。安石之子。附安石傳。一澤州人。雲之弟。官右奉議郎。見繫年錄。

陳升之。一熙寧宰相。有傳。一淳熙中保義郎。

蔡抗。一宋城人。字子直。附其弟挺傳。一建安人。字仲節。元定之孫。有傳。其名本是杭字。史誤从手。見長編。

趙鼎。一治平中侍御史。嘗奉使契丹。外國傳熙寧中提刑趙鼎。當卽一人。一聞喜人。字元鎮。有傳。

李浩。一西河人。東都武臣。有傳。一臨川人。字德遠。仕孝宗朝。有傳。

王質。一大名人。旦之兄子。見涑水記聞。一字景文。興國人。附王阮傳。

王彥昇。一字光烈。建隆功臣。有傳。一南渡閣門祇候。見繫年錄。

王佐。一山陰人。字宣子。紹興十八年狀元。一紹興間中軍第四將。見繫年錄。一寶祐間長寧守將。見忠義傳。

孫奕。一廬陵人。字季昭。撰示兒編。一元豐中都官員外郎。陳襄薦士三十三人之一也。

楊朴。一真宗朝隱士。一資陽人。紹興左宣教郎。一黃巖人。字文之。淳熙特科官承奉郎。

史炤。一眉山人。字見可。撰通鑑釋文者。一穎昌人。文彥博嘗從受學。嘉祐中提舉常平。史炤。熙寧四年前。

知襄州史炤言開修古瀆河一百六里灌田六千六百餘頃常卽潁昌之史炤也一咸瀆中利路統制見度宗紀

王堯臣一應天府人字伯庸有傳一汾州人嗣宗之子

張觀一常州人有傳一絳州人字思正有傳

胡銓一廬陵人字邦衡有傳一婺源人字仲平政和二年進士見新安志

張震一□□人有傳一歙人乾道五年進士見新安志

郭京一陳州人仁宗朝以布衣授大理評事一靖康時自言能用神兵者

劉藻一福州人字昭信紹興末祠部員外郎一嶺南人知梅州二人同時同姓名見周必大龍飛錄

張琬一韓城人樞密使昇之子崇寧間爲轉運副使會稽志元符三年六月張琬以朝散大夫權發遣越

州十二月移陝西提點刑獄此韓城人一鄱陽人治平二年登第見施元之注蘇詩

李常一字公擇建昌人一登州人東坡爲作遺直坊詩于欽齊乘人物篇誤切兩人爲一一度宗朝吏部

侍郎

王安國一臨川人安石之弟一理宗朝守棗陽軍

張林一游奕軍統領見楊巨源傳寧宗紀嘉定二年沔州統制張林等謀作亂事覺貸死除名與巨源傳

之張林未審卽一人否。一京東安撫使。本金降將。一咸淳二年死難武臣。見本紀。一德祐池州都統制。降元。

張維。一湖州人。官衛尉寺丞。子野之父。齊東野語云。卒於慶歷丙戌。一熙寧中官臨涇縣令。見長編。又東坡南行集有次韻答荆門張都官維見和惠泉詩。似又是一人。

李定。揮塵前錄。李定同時有三人。其一字仲求。洪州人。晏元獻之甥。欲預賽神會。蘇子美以其任子拒之。致興大獄者。又李定。字資深。元豐中御史中丞。揚州人。又李定。嘉祐治平以來。以風采聞。徧歷諸路計度。轉運使官制未行。蓋濟南人也。世多指而爲一。不可不辯。宋史有傳者。唯資深一人。卽劾東坡詩案者。坡集有壽州李定少卿出餞城東龍潭上詩。蓋濟南人也。

張永德。一并州人。有傳。一幽州人。暉之孫。見暉傳。一開封人。忠之子。見忠傳。

張昭遠。一濮州人。卽張昭也。有傳。一滄州人。凝之子。有傳。

張燾。一臨濮人。字景元。有傳。一饒州人。字子公。南渡執政。有傳。

王應麟。一慶元人。字伯厚。有傳。一晉江人。知南海縣。見石刻。與伯厚同時。

李祥。一無錫人。字元德。有傳。一開封人。見宦者傳。

王杲。一齊州人。咸平五年卒。有傳。一京兆人。朔州防禦使。雍熙四年卒。見太宗實錄。此兩人同姓名。又同。

時。

張廷翰。一澤州人。侍衛馬步軍都虞候。一冀州人。團練使。兩人皆仕太祖朝。皆有傳。

王延德。一東明人。有傳。一大名人。亦太宗晉邸舊人。附見延德傳。

徐自明。一永嘉人。字誠甫。撰宰輔編年錄。一金華人。嘗知蘇州之嘉定縣。見練川圖經。

陳均。一□□人。字平甫。撰九朝編年備要。一永嘉人。知平江府。見吳郡志。

楊萬里。一廬陵人。字廷秀。有傳。一錢塘人。知嘉定縣。見練川圖經。

王倫。一仁宗時虎翼軍。以反逆誅。見長編。一大名人。紹興奉使。死於金國。有傳。

葉適。一熙寧中光祿寺丞。見涑水記聞。一永嘉人。字正則。有傳。

王化基。一真定人。真宗朝參政。有傳。一元祐內臣。入黨籍。

張奎。一臨濮人。有傳。一天聖中保章正。見長編。

章甫。一字端叔。浦城人。熙寧三年進士。都官郎中。一字冠之。鄱陽人。自號易足居士。張端義貴耳錄。稱爲

張冠之者也。

何逢原。一字希深。與王十朋同時。一字文瀾。分水人。咸淳閒官中書舍人。入元累徵不起。

朱申。一字繼宣。江西人。太學生。一新安人。淳祐十一年。以朝散大夫知江州。



李珣。一嘉定十年江淮制置使。一德祐朝臣。

張順。一成都馬步軍總管。咸淳元年以死事贈卹。見度宗紀。一襄陽民兵都統。見忠義傳。兩人同時。

張忠。一字聖毗。開封人。有傳。一失其字。亦開封人。有傳。

鄭湜。一德安人。見王介甫集。一字溥之。寧宗朝直學士院。

王洙。一字原叔。有傳。一字原父。南渡人。見玫瑰集。

王綯。一字唐公。南渡執政。一字敏功。安陽人。紹興初知興國軍。樞密使炎之父也。見周益公集。

王古。元祐黨籍碑有兩王古。一字敏仲。官戶部尙書。文正公旦之曾孫。在曾任待制以上官。一在餘官。

黃裳。一字冕仲。延平人。元豐狀元。一字文叔。劍門人。南渡有傳。又有政和中福州知州黃裳。見渭南文集。

恐別是一人。非元豐狀元也。

黃定。一字致一。崇寧上舍第。一乾道八年狀元。

彭乘。一爲華陽人。有傳。一爲高安人。撰墨客揮犀。

張體仁。一紹興初左奉議郎。江東宣撫司幕官。見繫年錄。一卽詹體仁也。宋史有傳。而不著改姓。

徐奭。一建安人。大中祥符五年狀元。官至翰林學士。一杭州人。賜號沖晦先生。見夢梁錄。

王炎。一安陽人。南渡樞密使。有傳。一字晦叔。婺源人。乾道五年進士。見新安志。

呂好問。一建炎執政。有傳。一理宗朝。淮西總領兼江東運判。見景定建康志。

陳造。一字唐卿。高郵人。號江湖長翁。一字周士。吳興人。直齋之子。通判嘉興府。

王汾。一字彥祖。禹偁孫。官兵部侍郎。見東坡集。一金華人。南渡師心子。見王忠文公集。

王逵。一濮陽人。天禧三年進士。官刑部郎中。包拯集中有劾淮南轉運使疏。當卽其人也。一淄州人。當南宋時。

崇寧二年十二月丁巳。詔臣僚姓名有與姦黨人同者。並令改名。時改名者五人。朱紱、李積中、王公彥、江

潮、張鐸。朱誘舊名紱。改名後官至執政。

古人號相同。明以後不錄。

白樂天。自號醉吟先生。而皮日休、郭祥正亦號醉吟先生。樂天又號迂叟。而司馬溫公亦以自稱。邵堯夫

程正叔俱號伊川先生。黃伯思號雲林子。而貢奎、倪瓚俱號雲林。邵博。字公濟。康節孫。蔡元定、真德秀俱號西山

先生。鄭伯英。字景元。永嘉人。伯熊其兄也。號歸愚翁。而葛立方亦號歸愚。韓駒、牟獻俱號陵陽先生。郭雍、許謙俱號白

雲先生。蘇元老、蔡沈俱號九峯先生。郭忠孝、黃裳俱號兼山先生。胡宏、李孝光俱號五峯。王十朋、史達祖

俱號梅谿。洪邁、徐子方俱號容齋。王柏、許衡俱號魯齋。劉子翬、李之純俱號屏山。呂南公計有功俱號灌

園先生。錢文子號白石居士。姜夔號白石道人。楊繪。元素。楊傑。次公。皆號無爲子。魏掞之、謝諤皆號艮齋先生。

劉清之號靜春先生。劉黻字季文號靜春。見四朝聞見錄元表易亦有靜春堂集。林之奇、王寂俱號拙齋。馮椅、王應麟俱號厚齋。王厚之、趙彥肅俱號復齋。張行成號觀物先生。祝泌亦號觀物老人。陳去非、翁應龍俱號簡齋。薛紹彭號清閔居士。而倪瓚亦有清閔閣。

古人姓名割裂

漢魏以降。文尙駢儷。詩嚴聲病。所引用古人姓名。任意割省。當時不以爲非。如皇甫謐釋勸。榮期以三樂感尼父。庾信詩。唯有三明恥。無復榮期樂。白樂天詩。天教榮啓樂。人恕接輿狂。謂榮啓期也。費鳳別碑。司馬慕藺相。南容復白珪。謂藺相如也。楊巨源詩。不同蘧玉學。知非謂蘧伯玉也。朱君山墓誌。魚山本志。門豹遺風。謂西門豹也。抱朴子外篇。秦西以過厚見親。謂秦西巴也。晉書孫惠傳。竊慕墨翟。中包之誠。庾信詩。始知千載內。無復有申包。謂申包胥也。庾信詩。學異南宮敬。貧同北郭騷。謂南宮敬叔也。白樂天詩。君看齊鼎中。焦爛者。鄙其謂鄙食其也。庾信銘。年消張辟。謂張辟疆也。白樂天詩。宏恭陷蕭望。謂蕭望之也。李商隱詩。梓潼不見馬相如。謂司馬相如也。蜀志秦宓傳。仲尼嚴平。會聚衆書。以成春秋。指歸之文。謂嚴君平也。皇甫謐釋勸。鄭真躬耕以致譽。謂鄭子真也。陸厥詩。如姬寢臥內。班婕坐同車。謂班婕妤好也。陳師道詩。馬游從昔哀吾老。謂馬少游也。盧照鄰詩。孫賓遙見待。謂孫賓碩也。晉書王羲之傳。論師宜懸帳之奇。謂師宜官也。劉孝倬贈美人詩。幸非使君問。莫作秦羅敷也。晉書王濬傳。世祖旌賢。建葛亮

之嗣。謂諸葛亮也。潘岳關中詩。紛紜齊萬。亦孔之醜。謂齊萬年也。李商隱詩。曾不問潘安。又云。潘仁豈是才。王瑳詩。潘仁載果來。謂潘安仁也。杜子美詩。顧愷丹青重。謂顧愷之也。李邕東林寺碑。殷堪樞衣而每談。謂殷仲堪也。杜子美詩。劉牢出外甥。謂劉牢之也。李商隱詩。從事人人庾杲蓮。謂庾杲之也。白樂天七德舞詩。張謹哀聞人日哭。謂張公謹也。韋嗣立授黃門侍郎制。芝蘭並秀。見謝石之階庭。騏驥並驅。有劉山之昆季。謂謝安石劉公山也。褚載牋。曹興之圖畫雖精。終慙誤筆。謂曹不興也。



# 十駕齋養新錄卷第十三

## 詩傳附錄絕讀

寶山朱寄園家藏元儒雙湖胡氏詩傳附錄纂疏二十卷。泰定丁卯建安劉君佐翠巖精舍刊本。有盱江揭祐民序。其書前有綱領。後有詩序辨說。一遵朱文公元本。如定之方中。終然允藏。竹竿。遠兄弟。父母。君子于役。羊牛下括。皇矣。以篤于周。祐皆與唐石經同。與今通行本異。蓋今本沿明板之譌。卽經文亦有改竄。非考亭之舊矣。家伯維宰。維作爲。此以音相近而譌。今本作家宰。必非考亭意也。小雅。爰其適歸。爰下注。家語作奚。周頌。假以溢我。假下注。春秋傳作何。溢下注。春秋傳作恤。文公雖采它書而用其義。然未敢輕改經文。今本刪去家語作奚句。直改爲奚。大非文公說經謹慎之意。假以溢我句。刪去春秋傳云云。則注中假之爲何。溢之爲恤云云。令人不解何謂矣。讀是書。知元儒尙守家法。不似明人之鹵莽妄作。朱錫鬯經義考雖載此書。誤作八卷。注云未見。是誠世間難得之本矣。

## 儀禮注小字宋本

吳門黃堯圃所藏。每葉廿八行。行廿四字。每卷末記經注字數。末卷又總計經注字數。士冠禮建柩。今本誤建爲捷。此本經注皆不誤。

儀禮疏單行本

儀禮疏五十卷。亦黃蕘圃所藏。自卷廿二至卷廿七皆闕。每葉卅行。行廿七字。末卷有大宋景德元年校對。同校。都校諸臣姓名。及宰相呂蒙正。李沆。參政王旦。王欽若銜名。真北宋板也。唐人撰九經正義。宋初刑昺撰論語孝經爾雅疏。皆自爲一書。不與經注合并。南宋初乃有併經注正義合刻者。士子喜其便于誦習。爭相放效。其後又有併陸氏釋文附入經注之下者。陸氏所定經文。與正義本偶異。則改竄釋文以合之。而釋文亦失陸氏之舊矣。予三十年來。所見疏與注別行者。唯有儀禮爾雅兩經。皆人世希有之物也。

論語注疏正德本

論語注疏。每葉廿行。每行廿餘字。首卷標題。注疏下多解經二字。首葉板心有正德某年刊字。但遇宋諱。旁如圈識之。疑本元人翻宋板。中有避諱不全之字。識出令其補完耳。若明刻前代書籍。則未見此式。必是修補元板也。

國語

國語傳於今者。以宋明道二年槧本爲最古。錢曾讀書敏求記。舉周語昔我先王世后稷。及左右皆免冑而下拜二條。證今本之漏。是固然矣。予於錢所舉之外。復得六事。周語。瞽獻曲。注曲。樂曲也。今本曲皆作

典。高位實疾顛。今本顛作債。予謂債蓋慎之譌。古書慎與顛通。魯語笑吾子之大也。今本大下有滿字。古書大與泰通。泰即汰也。檀弓汰哉。叔齊語鹿皮四分。注分散也。今本分皆作个。管子書亦作四分。散作枚。鄭語依倅歷華。今本華作莘。吳語王孫雒。今本雒作雄。越絕書吳越春秋皆作王孫駱。駱雒同音。後漢書列女傳孝女叔先雄。雄亦雒之譌。皆當以明道本爲正。楚語王孫圉聘于晉。今本圉作圍。則未詳孰是。牟巖申省乞祠狀深恐疾顛。有辜隆使疾顛二字用國語。

### 廣雅

釋訓管管浴也。浴字未詳其義。按詩靡聖管管傳云管管無所依繫。箋云管管然以心自恣。蓋自恣之人不肖遵聖人法度。所爲皆無所依傍。毛鄭兩義本相承也。浴當爲恣之譌。

釋言賅賁也。按廣韻下平聲侵部賅賁也。賁當是賚之譌。

鼻懷也。懷或是懼之譌。

醒長也。王石臞謂醒與長義不相近。予謂呈長聲相近。

蓋黨也。黨讀如儻。蓋儻皆疑詞。

脰饌也。脰錯也。此二脰字當爲俎豆之豆。或漢隸俎豆字有从肉旁者。

免隕也。古免免同文。免與妥聲相近。易繫辭夫坤隕然示人簡矣。孟喜作退。陸績董遇姚信俱作妥。是免

與隕退聲亦相近也。



子已似也。已當卽十二支已午之已。以音相近取義。詩似續妣祖。鄭箋讀爲已午之已。鄭氏詩譜謂子思論詩於穆不已。孟仲子曰於穆不似。位莅祿也。古文位與立同。立祿聲相近。

酌、漱也。酌當作酌。

牒、崧也。崧當卽疏之異文。

### 玉篇

玉篇玉部琰字引說文云。玉爵也。夏曰琰。殷曰斝。周曰爵。又人部倝字引說文云。童子也。按說文無琰倝二字。此所引者。徐鉉等新附注也。予嘗謂今本玉篇不但非顧野王元本。并非孫強廣益之本。以此二條證之。益信。

說文解字凡五百四十部。玉篇刪併哭、延、教、詹、白、與自同、黽、飲、后、六、弦、十部。而別增父、云、彙、宥、處、地、磬、索、牀、弋、單、丈、十二部。共五百四十二部。又說文書字在聿部。今改爲部首。而併畫部入焉。此部分之不合于說文者也。

### 周成雜字

周成雜字一書。元應一切經音義。李善文選注。屢引之。攷隋書經籍志小學類。有雜字解詁四卷。魏掖庭

右丞周氏撰。又云。梁有解文字七卷。周成撰。亡。似周氏與周成非卽一人。唐書藝文志。有周成解文字七卷。而無周氏書。且兩志所載周成書。俱無雜字之名。未知卽此書否。掖庭左右丞。漢制皆宦者爲之。魏承漢制。則周氏亦必宦者。如注爾雅之李巡。亦中黃門也。

### 龍龜手鑑

契丹僧行均龍龜手鑑四卷。予所見者。影宋鈔本。前有燕臺憫忠寺沙門智光字法炬序。題云統和十五年丁酉七月。卽宋太宗至道三年也。書中於完字闕末一筆。知是南宋所鈔。晁氏馬氏載此書。本名龍龜手鏡。今改鏡爲鑑。蓋宋人避廣諱嫌字。如石鏡縣改曰石照矣。注中所引有舊藏新藏。隨文。隨函。江西隨函。西川隨函諸名。又引應法師音。郭遂音。郭氏或作琳琳法師說。予攷之宋藝文志。有可洪藏經音義隨函三十卷。未知其爲江西與西川也。僧元應有一切經音義十五卷。其卽應法師乎。

### 六書正譌

周伯琦六書正譌。多采戴侗說。以訾議許氏。又妄增說文所無之字。如喬爲椽檣字。罌爲器皿字。笑爲矢鏃字。𠂔爲堅韌字。𠂔爲舐觸之觸。崑爲山嵐之嵐。𦉳爲庭燎之燎。𦉳爲式樣之樣。淫本从壬。而改从王。堂本从止。而改从牙。印本从巴。而改爲二人相向。𦉳皆从支。而改从文。妾本从辛。而改从立。𦉳本兩字。而妄合之。扇从尸。尸卽屋也。而改从广。甚至以戊爲戈矛之戈。庚爲鍾虞之虞。謔謔叵信。視同戲劇。此六

書之異端。而自稱正譌。果誰正而誰譌乎。

文場備用排字禮部韻注

此至正壬辰徐氏一山書堂刊本。前有記一方云。皇朝科試。舉子所將。一禮韻耳。然惟張禮部敬夫定本最善。今復以諸韻參校。一韻爲增數字。凡增三千餘字。釋焉而詳。擇焉而精。敬用梓行。爲文場寸晷之助。云。第一卷首題云。文場備用排字禮部韻注。它卷皆題善本排字通併禮部韻略。前後殊未畫一。前載科舉條例甚詳。所列廟諱。止於英宗。而今上皇帝不名。似是泰定初刻。後來翻本。未及增添耳。上下平聲各十五。上聲廿九。去聲卅。入聲十七。與今韻同。而每韻下與某同用云云。尙沿禮部舊式。但未知張禮部何時人耳。

萬斯同石經攷

石經一字三字之分。紀載各殊。趙明誠、洪景伯諸人。攷定以一字者爲漢刻。三字者爲魏刻。旣確不可易矣。季野執後漢書儒林傳序。爲古文篆隸三體書法。以相參校一語。欲翻此案。謂蔚宗得于目睹。必不誣甚矣。季野之惑也。蔚宗著書。在宋文帝之世。其時洛陽已非宋土。何由得石經而睹之。若云目睹在義熙永初之間。則蔚宗未嘗官洛陽。晉時膏梁公子。豈可無故而跳身邊徼。更無此情理矣。衛恆晉初人。其撰四體書勢。則云正始中立三字石經矣。酈道元生長洛都。其注水經。則云漢碑五經。立于太學講堂前。悉

在東側碑上悉刻蔡邕等名。魏正始中又立古篆隸三字石經。樹之堂西矣。兩人真目睹石經者。並以三字爲魏正始刻。則一字爲漢刻。何疑。一字者。別于三字言之。漢人必無一字之目。但言魏立三字。則漢刻祇有隸書。不待言也。靈帝紀。蔡邕、張馴、李巡諸傳。俱不云有三體。唯儒林傳序有之。蓋蔚宗習聞太學有三體石經。誤切爲漢熹平所刻。遂增此語。後來又承蔚宗之誤。不能訂正。季野以史學自負。何亦憤憤若此。

### 史記宋元本

予所見史記宋槧本。吳門顧抱冲所藏。澄江耿秉刊於廣德郡齋者。紙墨最精善。此瀋熙辛丑官本也。黃蕘圃所藏三山蔡夢弼刊本。亦在瀋熙間。海寧吳槎客所藏元中統刊本。計其時在南宋之季。此三本皆有索隱而無正義。明嘉靖四年莆田柯維熊校本。金臺汪諒刻始合索隱正義爲一書。前有費懋中序。稱陝西翻宋本無正義。江西白鹿本有正義。是柯本出于白鹿本矣。同時震澤王氏亦有翻宋本。大約與柯本不異。史記索隱正義皆各自爲書。不與本書比附。宋南渡後始有合索隱於史記者。荆自蜀本。繼有桐川三山兩本。皆在瀋熙以前。其時正義猶單行也。白鹿本未審刻于何年。以意揆之。必在瀋熙以後。蓋以索隱爲主。而正義輔之。凡正義之文與索隱同者。悉從刪汰。自是正義無單行本。而守節之元文不可攷矣。

### 竹書紀年

晉書束皙傳稱竹書之異云益于天位啓殺之史通引竹書云益爲后啓所誅見疑古雜說等篇今本竹書云夏啓二年費侯伯益出就國六年伯益薨與束皙劉知幾所引全別然則今之竹書乃宋以後人僞託非晉時所得之本也

水經注引竹書紀年之文其於春秋時皆紀晉君之年三家分晉以後則紀魏君之年未有周王年者蓋古者列國各有史官紀年之體各用其國之年孔子修春秋亦用其法今俗本紀年改用周王之年分注晉魏於下此例起於紫陽綱目唐以前無此式也況在秦漢以上乎紀年出於魏晉固未可深信要必不如俗本之妄唯明代人空疏無學而好講書法乃有此等迂謬之識故愚以爲是書必明人所葺宋鼂氏陳氏馬氏書目皆無此書知非宋人僞撰也

此書蓋采摭諸書所引補湊成之如顯王十六年秦伐韓闕與惠成王使趙口破之注云不知是何年又三十一年秦蘇胡帥師伐鄭敗蘇胡于酸水注云不知是何年附此水經注引此無年又三十五年楚得吾帥師伐鄭圍綸氏注云不知何年附此水經注引此無年赧王七年翟章救鄭次于南屈注云此年未的此漢書臣無年如係古本如此則紀年歷歷何云未的又云不知何年耶

裴駟史記集解於夏本紀引汲冢紀年云有王與無王用歲四百七十一年矣於殷本紀引汲冢紀年云湯滅夏以至於受二十九王用歲四百九十六年也此二條今本紀年俱在附注中相傳附注出於梁沈

約而梁書南史約傳俱不言曾注紀年。隋經籍唐藝文志載紀年亦不言沈約有附注。則流傳之說不足據也。裴氏生於休文之前。其注史記已引此文。則此語不出於休文明矣。裴氏不云紀年有注。則此兩條者實紀年正文。未嘗別有注也。附注多采宋書符瑞志宋書約所撰。故注亦托名休文。作僞者之用心如此。

晉書東哲傳云。紀年十三篇。記夏以來。至周幽王爲犬戎所滅。以晉事接之。今本脫晉字。三家分。仍述魏事。至安釐王之二十年。據此。知紀年實始夏后。今本乃始於黃帝。亦後人僞託之一證也。

史記正義引括地志云。故堯城在濮州鄆城縣東北十五里。竹書云。昔堯德衰。爲舜所囚也。又有偃朱故城。在縣西北十五里。竹書云。舜囚堯。復偃塞丹朱。使不與父相見也。今竹書紀年。乃宋以後人所撰。故不取囚堯偃朱之說。

### 十六國春秋

今世所傳十六國春秋凡兩本。其一見於何鏜等所刊漢魏叢書。僅十六卷。寥寥數節。殆出後人依託。其一明萬歷中嘉興屠喬孫項琳之所刊。前有朱國祚序。凡百卷。蓋鈔撮晉書載記。參以它書。附合成之。其實亦贗本也。攷宋史藝文志。崇文總目。晁陳馬三家書目。不載崔鴻十六國春秋。則鴻書失傳已久。龔穎運歷圖。載前涼張實以下皆改元。晁氏謂不知所據。或云出崔鴻十六國春秋。鴻書久不傳于世。莫得而攷焉。是宋人已無見此書者。明人好作僞書。自具眼者觀之。不直一哂耳。又攷北史崔鴻傳。鴻旣爲春秋

百篇。別作序例一卷。年表一卷。今本無序例年表。又鴻子子元。奏稱亡考。刊著趙燕秦夏西涼乞伏西蜀等遺載。爲之贊序。褒貶評論。今本有敘事而無贊論。此其罅漏之顯然者。

吳越備史

吳越備史。卷首題武勝軍節度掌書記范垌。武勝軍節度巡官林禹撰。陳振孫謂錢儼所作。託名林范。宋史藝文志。霸史類載此書十五卷。亦云錢儼撰。託名范垌。林禹撰。又別有錢儼備史遺事五卷。世善堂書目作九卷今世所傳。乃明錢德洪刻本。前五卷。唐五代及宋開寶戊辰。後一卷。始開寶己巳。訖端拱戊子。與史志卷數不合。五卷之末題云。大宋嘉祐元年丙申歲正月七日。朝奉郎守尙書刑部郎中集賢殿修撰知梓州軍州事兼管內橋道使提舉戎瀘等七州賊盜甲兵專句當納溪夷人公事上護軍賜紫金魚袋四代孫中孚寫。攷程俱北山小集。中孚實中吳軍節度使元瓌之曾孫。於武肅爲四代孫也。錢偕序謂范林二記室撰備史五卷。至十九世孫緒山公。命門人馬蓋臣補忠懿遺事。合六卷。刻之姑蘇。今攷蓋臣所撰。唯吳越世家疑辨一卷。德洪序中。初不言補遺。出其手。偕蓋攷之未審矣。錢遵王記其家藏舊本止四卷。又稱忠懿爲今元帥吳越國王。自乾祐戊申。至端拱戊子。終始歷然。何緣更有補遺。顯係明人妄改。惜不得遵王本一讀之。

唐書直筆新例

唐書直筆新例一卷。宋呂夏卿撰。夏卿於仁宗朝預修唐書。故作此例。今以新書攷之。殊不相應。如書母。書內禪。書立皇太子。書立皇后。書命將征伐諸條。按之本紀。無一同者。又謂僕固懷恩不當立傳。宜見于鐵勒傳。李白杜甫同傳。不入文苑。李適之當附恆山王傳。今本皆不爾。是夏卿雖有此議。而歐宋兩公未之許也。歐公本紀。頗慕春秋褒貶之法。而其病卽在此。夏卿新例。益復煩碎非體。史家紀事。唯在不虛美。不隱惡。據事直書。是非自見。若各出新意。掉弄一兩字以爲褒貶。是治絲而棼之也。

### 薛氏宋元通鑑

薛方山宋元通鑑。意在推崇道學。而敘事多疏漏。其年月率不可信。如崇寧四年四月。以綦崇禮權直學士院。崇禮求便郡。拜徽猷閣學士。知漳州。攷崇禮本傳云。登重和元年上舍第。而崇寧四年。乃在重和前十有四年。崇禮尙未登科。安得遽登內翰乎。崇禮由翰林出知漳州。據李心傳繫年錄。乃高宗建炎四年十月事。而誤書於徽宗崇寧之年。此甚可笑。徽猷閣藏哲宗御集。建於大觀二年。在崇寧之後。不得先有學士也。

元祐二年。書召陳師道爲祕書省正字。適預郊祀。云云。遂以寒疾卒。按是年四月。書以徐州布衣陳師道爲本州教授。此見於長編可信者也。其後改潁州教授。時蘇軾爲知州。則是元祐六年事矣。魏衍撰彭城陳先生集記。稱元符三年除棗州教授。隨除正字。攷於建中靖國元年十二月廿九日。今繫之元祐二年。



其爲疏謬甚矣。

唐律疏義

唐律疏義三十卷。太尉揚州都督監修國史上柱國趙國公長孫無忌等撰。永徽四年十一月十九日進。其分門十二。曰名例。曰衛禁。曰職制。曰戶婚。曰廩庫。曰擅興。曰賊盜。曰鬪訟。曰詐僞。曰雜律。曰捕亡。曰斷獄。今所傳者。元泰定四年江西刊本。每卷末附以王元亮釋文。

唐高祖武德四年。詔僕射裴寂等十五人撰律令。大略以開皇爲準。太宗卽位二年。詔長孫無忌、房元齡等。復定律令。議絞刑之屬五十。皆免死而斷右趾。其後蜀王府法曹參軍裴宏獻。又駁律令不使者四十餘事。遂除斷趾法爲加役流。比古死刑。殆除其半。據有司定律五百條。分爲十二卷。此據文獻通攷。二年以上似當有貞觀字。今攷疏義云。加役流者。舊是死刑。武德年中改爲斷趾。貞觀六年。奉制改爲加役流。是則改絞刑爲斷趾。卽在太宗卽位之歲。故猶稱武德也。

魏李悝始造法經六篇。曰盜法。賊法。囚法。捕法。雜法。具法。漢丞相蕭何。益以戶、興、廩、三篇。是爲九章之律。魏明帝更定新律十八篇。以刑名冠於律首。又分立劫掠律、詐律、毀亡律、告劾律、繫訊律、斷獄律、請賊律、與擅律、留律、警事律、償贓律、免坐律。其盜、賊、囚、捕、雜、戶。猶仍舊名。晉泰始四年。頒新律。因漢九章。增刑名、法例、告劾、繫訊、斷獄、請賊、詐僞、水火、毀亡、宮衛、諸侯。十一篇。合二十篇。梁武帝天監初。頒律二十篇。曰刑

名、法例、盜劫、賊叛、詐僞、受賂、告劾、討捕、繫訊、斷獄、雜戶、擅興、毀亡、衛宮、水火、倉庫、厩、關、市、違制、北齊、河清三年、制齊律十二篇、曰名例、禁衛、戶婚、擅興、違制、詐欺、鬪訟、賊盜、捕斷、毀損、厩牧、雜律、後周武帝、改新律爲二十五篇、曰刑名、法制、祀享、朝會、婚姻、戶禁、水火、興擅、衛宮、市廩、鬪競、劫盜、賊叛、毀亡、違制、關津、諸侯、廐牧、雜犯、詐僞、請求、告言、逃亡、繫訊、斷獄、隋文帝開皇初、定新律一名例、二衛禁、三職制、四戶婚、五廐庫、六擅興、七賊盜、八鬪訟、九詐僞、十雜律、十一捕亡、十二斷獄、此唐律所因也。

### 史通

劉知幾沈潛諸史。用功數十年。及武后中宗之世。三爲史官。再入東觀。思舉其職。旣沮抑于監修。又見嫉于同列。議論鑿柄。不克施行。感憤作史通內外篇。當時史局遵守者。不過貞觀所修晉梁陳齊周隋六史之例。故其書指斥尤多。但以祖宗敕撰之本。輒加彈射。又恐讒謗取禍。遂於邊固已降。肆意舐排。無所顧忌。甚至疑古惑經。誹議上聖。陽爲狂易侮聖之詞。以掩詆毀先朝之迹。恥巽辭以諛今。假大言以蔑古。寘諸外篇。竊取莊生盜跖之義。後人大聲疾呼。目爲名教罪人。自是百世公論。要之蚍蜉撼樹。言匪由衷。柳翳隱形。志在避禍。千載之下。必有心知其意。而莫逆者。不然。六經三史。模楷萬世。夫豈不知叔孫之毀無傷日月也哉。然劉氏用功旣深。遂言立而不朽。歐宋新唐。往往采其緒論。如受禪之詔策。不書代言之制。誥不錄五行災變。不言占驗。諸臣籍貫。不取舊望。有韻之贊全刪。儷語之論都改。宰相世系。與志氏族何

殊。地理述土貢與志土物不異。叢亭之說。一時雖未施行。後代奉爲科律。誰謂著書無益哉。

司馬溫公稽古錄

陳少章云。溫公是書於古人姓名犯國諱者。往往易以它字。如王匡作王輔。石朗作石明。敬翔作恭翔之類是也。或二名減一。如尹元慶作尹慶。張元遇作張遇。崔元暉作崔暉。張敬達作張達。錢宏佐作錢佐。劉彥貞作劉彥之類是也。或以字易名。如秦朗作秦元明。謝元作謝幼度。王殷作王允中之類是也。然其中如劉宏、桓元、徐圓朗、許敬宗、敬暉、馬殷、朱守殷、李匡威、樂彥貞之類。又直書不避。而李敬元作李敬貞。於聖祖翼祖諱一避一否。尤不可曉。殆編纂恩遽。或點竄未至耶。末卷書仁宗建儲事。於英宗廟諱皆稱諱。而卷中陳曙一人凡三見。恐出後人擅易。非本文矣。

量公邁歷代紀年

量公邁歷代紀年。凡十卷。有淳熙乙未七月。量子綺後序。及紹興壬子季春。包履常跋。公邁字伯咎。號傳密居士。官右朝散郎。提舉廣東常平。據子綺序。稱族父下世後二十有四載。當紹興之辛巳。予在廣州。見公邁題名云。紹興九年。歲在己未。二月初吉。當卽以其年卒。距辛巳祇廿三載耳。予所見係南宋槧本。闕第一卷。以包跋證之。蓋唐虞三代至兩漢也。子綺字仲皓。

胡五峯皇王大紀

太史公書述五帝本紀。始于黃帝。班固古今人表。律歷志。依易繫詞。首太昊伏羲氏。炎帝神農氏。又依左氏傳。列少昊金天氏於黃帝之後。於是三皇五帝之目。五德代嬗之序。昭然其不可易矣。宋劉恕通鑑外紀。司馬光稽古錄。蘇轍古史。皆上溯伏羲。獨胡宏皇王大紀。以盤古天皇地皇人皇有巢燧人爲三皇紀。伏羲至堯舜爲五帝紀。夏商周爲三王紀。編年之書。追述上古。始盤古氏。蓋起於此。而陳桎續編因之。然陳氏書錄解題。譏宏誤取莊子寓言。及敘邃古之初。無徵不信。則當時有識者早議其後矣。羅泌路史在唐之詞。流爲丹青。蓋好奇而不學之弊。

### 東家雜記

東家雜記二卷。孔子四十七代孫右朝議大夫知撫州軍州事傅所撰。有紹興甲寅三月自序。傳於宣和六年。嘗撰祖庭雜記。其書雖不傳。猶略見于孔元措祖庭廣記中。此則從思陵南渡以後。別爲編輯。改祖庭爲東家者。殆痛祖庭之淪陷。而不忍質言之乎。攷四十九代孫玠。襲封衍聖公。其時傳已稱本家尊長。而卷中所述孔氏世系。訖于五十三代孫洙。計其時代。當在南宋之季。蓋後來別有增入矣。卷首杏壇圖說。與錢遵王所記正同。又有北山移文。繫蛇笏銘。元祐黨籍三篇。恐皆後人妄增。非傳意也。卷中管勾之勾。皆作勺。避思陵嫌名。間有不缺筆者。元初修改之葉。辨宋板者。當以此決之。傳字世文。初名若古。元祐四年。除仙源縣主簿。改今名。政和五年。以朝奉郎任京東轉運司管勾文字。宣和六年。以朝散大夫知邢

州。

孔氏祖庭廣記

孔氏祖庭廣記十二卷。先聖五十一代孫襲封衍聖公。元措夢得所編。前載元豐八年四十六代孫朝議大夫知洪州軍州事宗翰家譜舊引。宣和六年四十七代孫朝散大夫知邠州軍州事傳祖庭雜記舊序。家譜雜記本各自爲書。元措始合爲一。復增益編次。冠以圖象。并載舊碑全文。因祖庭之名。而更稱廣記。蓋仙源之文獻。至是始備。書成于金正大四年。前尙書左丞致仕張行信爲之序。此本最後有五行云。大蒙古國領中書省耶律楚材。奏准皇帝聖旨。於南京特取襲封孔元措。令赴闕里奉祀。來時不能挈負祖庭廣記印板。今謹增補校正。重開以廣其傳。壬寅年五月望日。壬寅者。元太宗六皇后稱制之年。距金亡已十年。蒙古未有年號。當宋淳祐二年也。金以開封府爲南京。元初尙沿其名。後乃改爲汴梁路。此書初刻於開封。再刻于曲阜。今何夢華所藏。紙墨古雅。的爲初印本。予嘗據漢宋元諸石刻。證聖妃當爲并官氏。今檢東家雜記及此書。并官氏屢見。無有作开字者。乃知宋元刻本之可寶。自明人刻家語。妄改爲开。沿譌三百餘載。良可喟也。

東平王世家

元永貞東平王世家。卷首一葉。載延祐四年九月初四日。拜住怯薛。第二日。嘉禧殿裏有時分。拜住司徒。

開闢解平章。將元永貞所撰東平王世家三卷進上。奉聖旨交元復初作。趙子昂寫了刊行。者麼道聖旨了也。第一卷爲孔溫窟哇。太師國王都行省木華黎事。第二卷爲國王孛魯。國王塔思事。第三卷爲太師東平武靖王霸突魯。丞相東平忠憲王安童。大司徒東平忠簡王兀都台。大司徒太常禮儀使拜住事。是時拜住尙未官丞相也。扎刺爾氏。自木華黎以後。世襲國王。此書專爲安童一支而作。故于塔思之下注云。自王至今國王朶羅解。凡十二世。別有世系譜牒。此下不復具載。今元史於塔思下襲國王者。並闕而不書。據此世家。知延祐之世。襲王者爲朶羅解也。史於木華黎。孛魯。塔思。霸都魯。安童傳。多采此文。蓋其書以刊刻得傳。它貴族譜牒。兵亂皆付之煨燼矣。仁宗於元明善。趙孟頫。字而不名。其優禮儒臣。良可稱道。此書前有元明善序。卽奉敕所作。後有王頤跋。自署夷門。則是汴梁人也。

### 聖武親征錄

皇元聖武親征錄一卷。紀太祖太宗事。不著撰人姓名。其書載烈祖神元皇帝。太祖聖武皇帝諡。攷元史。烈祖太祖諡。皆在世祖至元三年。則至元以後人所撰。故於睿宗有太上皇之稱。然紀太宗事而加太上之稱於其弟。所謂名不正而言不順者矣。所紀多開國時事。而於平金取夏頗略。平史察罕傳。仁宗命譯脫必赤顏名曰聖武開天記。其書今不傳。未識與此錄有異同否。雖不如祕史之完善。而元初事迹。亦可藉以攷證。其譯語之異者。如王孤部。卽汪古也。博羅渾那顏。卽博爾忽也。闐拜。卽沈白也。暗都刺蠻。卽奧

魯合刺合蠻也。兀相撒兀，即吾圖撒合里。耶律楚材賜名也。

孔溫窟哇子五人。忽魯虎兒、期里窟爾、木華黎、不花、帶孫、木華黎子孛魯。嗣國孛魯子七人。塔思。亦稱查

王。速渾察、襲國霸突魯、伯亦難、野蔑乾、野卜乾、阿里乞失、霸突魯子四人。安童、定童、霸虎帶、和童。襲國

安童子兀都台、兀都台一子拜住。此世家所述世次也。子向據元明善東平忠憲王碑，稱霸都魯為塔思

第二子。疑元史木華黎傳以霸都魯為孛魯子為誤。今世家所載，正與元史同。世家係拜住門客所編，又

係進呈本，當必不誤矣。元明善既奉詔為世家作序，當悉其昭穆之詳，而其撰安童碑，乃復與此牴牾，何

耶。黃潛撰鄆文忠王拜住碑，稱高祖孛魯，曾祖霸都魯，正與世家合。此書撰于延祐四年，云傳國者一百

年，稱孤者十五世。今按木華黎之後襲國王者，孛魯也。塔思也。速渾察也。忽林池也。速渾察子和童也。忽

速忽爾也。見元史乃蠻台傳朵羅解也。中間尚有七人，今無可攷矣。朵羅解即忽速忽爾之子。天歷初從

上都舉兵見殺，以脫脫之子朶兒只襲國王。後至元三年，以朵羅解之弟乃蠻台襲。至正八年卒。

平宋錄

平宋錄二卷。丞相賀平宋表。太師淮安忠武王贈諡制。淮安忠武王廟碑。劉敏中撰并書。淮安忠武王碑。

元明善撰。丞相淮王畫像贊。蘇天爵撰。以上世祖至元元年入覲。至英宗敕立碑。至正三年正月跋。失末

丞相伯顏公勳德碑。史周卿撰。至元十三年建。卅一年重立。寇元德跋。至正四年，追封淮王制。淮忠武王

廟碑。王沂撰。揭傒斯書。至正四年渡江官員。以上卷按至元十三年。詔修平宋錄十卷。相傳劉敏中所修。與此卷數不合。且當時雖以伯顏爲大將。而同事尙有阿朮。阿里海涯諸人。不應專記伯顏一人。若至正四年。追封淮王。更在敏中旣沒之後。此錄必非敏中所修之本。

四庫簡明目有平宋錄三卷。云劉敏中撰。舊題平慶安者。誤也。記至元十三年巴顏下臨安及宋幼主北遷之事。所載封瀛國公詔。巴顏賀表。及追贈河南路統軍鄭江事。皆元史所遺。

### 祕書志

元祕書志四册。承務郎祕書監著作郎王士點。承事郎祕書監著作佐郎商企翁編次。凡十一卷。分門十九。曰職制。曰祿秩。曰印章。曰麻宇。曰公移。曰分監。曰十物。曰紙劄。曰食本。曰公使。曰守兵。曰工匠。曰雜錄。曰纂修。曰祕書庫。曰司天監。曰興文署。曰進賀。曰題名。前有至正二年五月公文一道。計二百六十五葉。

### 復齋郭公言行錄及敏行錄

黃堯圃買得運使復齋郭公言行錄。及編類運使復齋郭公敏行錄各一册。郭公名郁。字文卿。汴之封邱人。金末避兵遷大名。由江淮樞密院令史。歷官福建都轉運鹽使。言行錄者。福州路教授徐東所編。敏行錄。則一時投贈詩文碑記也。兩錄皆有黃文仲。林興祖序。黃序題至順二年辛未。自來搜輯元代藝文者。皆未之及。爰表而出之。



明諸司衙門官制

明諸司衙門官制三冊。不分卷。其目錄稱天下各布政司按察司府州縣等衙門一千七百二十二處。布政司十三處。按察司十三處。府一百卅九處。州二百廿五處。縣一千一百八處。鹽運司七處。提舉司十一處。軍民府十一處。宣慰司十二處。宣撫司廿一處。招討司一處。長官司一百五十三處。不載編次年月。據末冊武職衙門所列諸陵衛名。孝陵而外。唯有長陵、景陵、獻陵、裕陵。則是成化時刊本。故蘇州府無太倉州。松江府無青浦縣也。

文獻通攷

予讀唐宋史藝文志。往往一書而重見。以爲史局不出一手之弊。若馬貴輿經籍攷。係一人所編輯。所采者不過晁陳兩家之說。乃亦有重出者。如陸德明經典釋文三十卷。見卷百八十五經解類。又見卷百九十小學類。宋敏求春明退朝錄五卷。見卷二百一故事類。又見卷二百十六小說類。小說類作三卷郭茂倩樂府詩集一百卷。見卷百八十六樂類。又見卷二百四十八總集類。李匡文資暇集三卷。見卷二百十四雜家類。而卷二百十五又有李匡義資暇三卷。不知義與文乃字形相涉而譌也。唐慎微大觀本草。與證類本草卽一書。而誤分爲二。蓋著作之家多不免此弊。彼此相笑。自昔然矣。

杜君卿通典。志州郡。避唐諱。改豫州爲荆河州。馬氏輿地攷。雖承杜典舊文。而改荆河爲豫。得其當矣。乃

於古揚州篇云分置南兖州南荊河州。又於壽州下云荊河州刺史祖約云齊因之兼置荊河州云。梁置南荊河州云尋改爲南荊河州。此數處猶沿杜本之舊。殆由卷帙重大一時失於檢照故耳。

### 永樂大典

明實錄永樂元年七月論翰林侍讀學士解縉等曰。天下古今事物散載諸書。篇帙浩穰。不易檢閱。朕欲悉采各書所載事物類聚之而統之以韻。庶幾攷索之便。如探囊取物爾。嘗觀韻府回溪二書。事雖有統而採摘不廣。紀載太略。爾等其如朕意。凡書契以來經史子集百家之書。至於天文地志陰陽醫卜僧道技藝之言。備輯爲一書。毋厭浩緜。

二年十一月翰林院學士兼右春坊大學士解縉等進所纂錄韻書。賜名文獻大成。賜縉等百四十七人鈔有差。錫宴於禮部。旣而上覽所進書。尙多未備。遂命重修。而敕太子少師姚廣孝。刑部侍郎劉季篪。及縉總之。命翰林學士王景侍讀學士王達。國子祭酒胡儼。司經局洗馬楊溥。儒士陳濟爲總裁。翰林院侍講鄒緝。修撰王褒。梁潛。吳溥。李貫。楊觀。曾棨。編修朱紘。檢討王洪。蔣驥。潘畿。王偁。蘇伯厚。張伯穎。典籍梁用行。庶吉士楊相。左春坊左中允尹昌隆。宗人府經歷高得賜。吏部郎中葉砥。山東按察僉事晏璧。爲副總裁。命禮部簡中外官及四方宿學老儒有文學者充纂修。簡國子監及在外郡縣學能書生員繕寫。開館於文淵閣。命光祿寺給朝暮膳。五年十一月太子少師姚廣孝等進重修文獻大成書。凡二萬二千二

百一十一卷。一萬一千九十五本。更賜名永樂大典。上親製序以冠之。其文曰。昔者聖王之治天下也。盡開物成務之道。極裁成輔相之宜。修禮樂而明教化。闡至理而宣人文。粵自伏羲氏始畫八卦。通神明之德。類萬物之情。造書契以易結繩之治。神農氏爲耒耜之利。以教天下。黃帝堯舜氏作。通其變。使民不倦。神而化之。使民宜之。垂衣裳而天下治。禹敝九疇。湯修人紀之數。聖人繼天之極。皆作者之君。所謂制法興王之道。非有述於人者。暨乎文武相繼。父作子述。監於二代。郁郁乎文。孔子生周之末。有其德而無其位。承乎數聖人之後。而制作已備。乃贊易序書。修春秋。集羣聖之大成。語事功。則有賢於作者。周衰。接乎戰國。縱橫捭闔之言興。家異道。而人異論。王者之迹熄矣。迄秦有焚禁之禍。而斯道中絕。漢興。六藝之教漸傳。而典籍之存可攷。由漢而唐。由唐而宋。其制作沿襲。蓋有足徵。然三代而後。聲明文物。所可稱述者。無非曰漢唐宋而已。洪惟我太祖高皇帝。膺受天命。混一輿圖。以神聖之姿。廣述作之奧。興造禮樂。制度文爲。博大悠遠。同乎聖帝明王之道。朕嗣承洪基。勗思續述。尙惟有大混一之時。必有一統之制作。所以齊政事而同風俗。序百王之傳。總歷代之典。世遠祀綿。簡編緜夥。恆慨其難一。至於攷一事之微。汎覽莫周。求一物之實。窮力莫究。譬之淘金於沙。探珠於海。戛戛乎其不可易得也。乃命文學之臣。纂集四庫之書。及購募天下遺籍。上自古初。迄於當世。旁搜博采。彙聚羣分。著爲大典。以氣者天地之始也。有氣斯有聲。有聲斯有字。故用韻以統字。用字以繫事。揭其綱而目必張。振其始而末具舉。包括宇宙之廣大。統會

古今之異同。巨細精粗。粲然明備。其餘雜家之言。亦皆得以附見。蓋網羅無遺。以存放索。使觀者因韻以求字。因字以攷事。自源徂流。如射中鵠。開卷而無所隱。始於元年之秋。而成於五年之冬。總二萬二千九百三十七卷。名之曰永樂大典。臣下請序其首。蓋嘗論之。未有聖人。道在天地。未有六經。道在聖人。六經作而聖人之道著。所謂道者。彌綸乎天地。貫通乎古今。統之則爲一理。散之則爲萬事。支流蔓衍。其緒紛紜。不有以統之。則無以一之。聚其散而兼總其條貫。於以見斯道之大。而無物不賅也。朕深潛聖道。志在斯文。蓋嘗討論其指矣。然萬幾浩緜。實資玩覽。姑述其概。以冠諸篇。將以垂示無窮。庶幾或有裨於万一云爾。賜廣孝等二千一百六十九人鈔有差。

朱國禎曰。永樂大典。乃文皇命儒臣解縉等。粹祕閣書。分韻類載。以備檢攷。賜名文獻大成。復以未備。命姚廣孝等再修。供事編輯者。凡三千餘人。二萬二千九百三十七卷。一萬一千九十本。目錄九百本。貯之文樓。世廟甚愛之。凡有疑。按韻索覽。三殿災。命左右趣登文樓出之。夜中傳諭三四次。遂得不毀。又明年。重錄一部。貯它所。國禎所謂重錄本。卽翰林院所貯。乃不言翰林。而言它所。是初寫時。本藏大內。國朝乃移于翰林也。今移貯於文華殿。



# 十駕齋養新錄卷第十四

## 太平寰宇記

予所藏太平寰宇記。寶山朱寄園所贈。其闕卷與曝書亭藏本同。其書成于太平興國中。尙無十五路之分。故仍唐十道名目。幽涿雲朔諸州。雖未入版圖。猶著於錄。亦見當日君臣志未嘗忘山前後也。是書體例。雖因李吉甫。而援引更爲詳審。閒采稗官小說。亦唯信而有徵者取之。有宋一代志輿地者。當以樂氏爲巨擘。竹垞有意貶抑。謂不若九域志。輿地記之簡要。豈其然乎。

## 輿地紀勝

王象之輿地紀勝二百卷。予求之四十年未得。近始于錢唐何夢華齋中見影宋鈔本。亟假歸。讀兩月而終篇。每府州軍監分子目十二。曰府州沿革。若有監司軍將駐節者。別敘沿革於州沿革之後。曰縣沿革。曰風俗形勝。曰景物上。曰景物下。曰古迹。曰官吏。曰人物。曰仙釋。曰碑記。曰詩。曰四六。今世所傳輿地碑記目者。蓋其一門。不知何人鈔出。想是明時金石家爲之也。此書所載。皆南宋疆域。非汴京一統之舊。然史志於南渡事多闕略。此所載寶慶以前沿革。詳贍分明。裨益於史事者不少。前有嘉定辛巳孟夏自序。及寶慶丁亥季秋李真序。及曾□鳳劄子。象之字儀父。金華人。嘗知江寧縣。不審終於何官。其自序云。少侍先君宦游四方。江淮

荆閩靡國不到。又云仲兄行父西至錦城。叔兄中甫北趨武興。南渡渝瀘。而陳直齋亦稱其兄觀之爲夔路漕。則中甫疑卽觀之字。予又記一書稱王益之字行甫。金華人。蓋卽儀父之仲兄。而其父之名。則無從攷矣。此書體裁勝於祝氏方輿勝覽。而流傳極少。又失三十二卷。想海內不復有完本也。

會稽志

會稽志二十卷。前有嘉泰元年十二月陸游序。其略云。直龍圖閣沈公作賓爲守。通判府事。施君宿首發其端。撫幹李君兼韓君茂卿爲之助。郡士馮景中。陸子虞。王度。朱鼎。永嘉邵持正。相與參正。累月乃成。沈公去爲轉運副使。猶經營此書不已。華文閣待制趙公不迹。寶文閣學士袁公說友。繼爲守。亦力成之。而始終其事者。施君也。旣成。屬游參訂其槩。且爲之序。是務觀但預參訂。而宋史藝文志旣載沈作賓。趙不迹。會稽志又載陸游。會稽志重複互異。可謂不考之甚也。攷作賓以慶元五年。由淮東總領除越守。六年除兩浙轉運副使。而不迹代之。嘉泰元年。改知潭州。而說友代之。志蓋卽始於慶元庚申。而歲事於嘉泰壬戌。前後凡閱三守。而通判尙未改秩。則宿於此志誠有功矣。作賓吳興人。淳熙十六年以承議郎知台州。有政譽。罷時民擁其轍不得行。且請留赤城志。

會稽續志

會稽續志八卷。梁國張湜撰。有寶慶元年三月自序。其提刑。提舉。進士題名。皆前志所未有。而人物一門。

亦多補前志之闕漏。吳越錢氏嘗稱越州爲會稽府。前志不載。獨見於此書。可見其留心掌故矣。志成於寶慶初。而題名訖於景定。蓋後來次弟續添也。誤作志當汪綱爲守之日。故所紀綱政迹爲詳。末卷載餘姚孫因越問一篇。亦多贊誦汪守之語。

### 赤城志

赤城志四十卷。陳耆卿壽老撰。有嘉定癸未十一月自序。稱前守黃營。命余偕陳維等纂輯。會黃去。恩恩僅就未備。束其橐十年矣。今青社齊公碩。復以命余。於是郡博士姜君容。總權之。邑大夫蔡君範。以下分訂之。又再屬陳維及林表民等採益之。又云。意所未解者。恃故老。故老所不能言者。恃碑刻。碑刻所不能判者。恃載籍。載籍之內。有漫漶不自者。則斷之以理。而折之於人情。洵得著書之體。而可爲後代法者矣。其辨誤門有一條云。台州天慶觀。有唐開元真容。應見碑。蓋開元二十九年立也。後題朝散大夫使持節臨海郡諸軍事守臨海郡太守及桐柏觀碑。天寶元年立。則作朝請大夫使持節諸軍事守台州刺史上柱國賈長源。此一人耳。所載官稱及郡號不同如此。攷唐天寶元年。改台州爲臨海郡。至乾元元年。復爲台州。不應開元二十九年便稱臨海郡。天寶元年卻稱台州。又唐武德元年。改郡爲州。太守爲刺史。至天寶元年。復改刺史爲太守。不應開元二十九年已稱臨海郡太守。而天寶元年既改太守。復號刺史。非二碑有誤。則史之誤也。予謂壽老之辨當矣。然以情理度之。不特史文無誤。卽碑刻亦未嘗誤。蓋天寶改元。



卽在開元二十九年之次年。而改州爲郡。在是歲二月。明二月以前。尙稱台州刺史也。眞容應見勅。雖在開元二十九年。而台州距長安遼遠。守臣承詔刊石。不妨遲至次年。則此刻必在桐柏觀碑之後。其稱臨海太守。亦非誤也。耆卿。臨海人。嘉定七年進士。宋史不爲立傳。攷中興館閣續錄。稱寶慶二年正月。召試館職。除祕書省正字。十一月。轉校書郎。紹定元年十二月。除祕書郎。三年十二月。除著作佐郎。六年十月。除著作郎。端平元年二月。兼國史院編修官。是月。除將作少監。赤城新志。言其官至國子司業。但不云卒於何年。亦未審壽若干也。此書經明人重刻。如第卅三卷載杜範爲史嵩之所鳩。第四十卷載蔡家橋事。皆明人竄入。殊非陳氏之舊。安得宋槧本而刊正之乎。

嚴州重修圖經

嚴州圖經。予所見者淳熙重刻本。僅存首三卷。前有紹興己未正月知軍州事董舜序。及淳熙丙午正月州學教授劉文富序。文富。蓋承郡守陳公亮之命訂正是書者也。卷首載建隆元年太宗皇帝初領防禦使詔。宣和三年太上皇帝初授節度使制。及勅書榜文二道。蓋淳熙丙午之歲。高宗尙在德壽宮。故有太上之稱。攷董舜初剏此志。本題嚴州圖經。陳公亮重修。亦仍其名。而王氏輿地紀勝。陳氏直齋書錄。馬氏文獻通考。皆作新定志。蓋宋人州志。多用郡名標題。續志載書籍。亦但有新定志。初無圖經之目。名目雖異。實非有兩本也。

新定續志

新定續志十卷。前有景定壬戌方逢辰序。編纂者。浙漕進士州學學錄方仁榮。迪功郎差充嚴州州學教授兼釣臺書院山長鄭瑤。郡守則天台錢可則也。可則字正己。景定元年。以直寶章閣知嚴州。三年。升直寶文閣。任滿。四月。升直敷文閣知嘉興府。五月。除尙左郎官。尋除直徽猷閣浙東提舉。志稱五王之胄。相國之孫。相國謂象祖也。此志成於可則莅郡之日。而卷首載咸淳元年升建德府省劄。其知州題名則可則。後續列郭自中等八人。蓋後來續有增入。宋時志乘大率如此。

琴川志

琴川志。自宋慶元初。縣令孫應時。剋始編葺。其書久失傳。淳祐十二年。龍泉鮑廉知縣事。屬邑士鍾秀實、胡淳、討論裒輯。列爲十門。曰敍縣、敍官、敍山、敍水、敍賦、敍兵、敍人、敍產、敍祠、敍文。每門又有子目。題云重修琴川志。有寶祐甲寅中元日胸山邱岳序。元至正末。知州盧鎮。購得舊本刊行之。題其後云。其成書後。凡所未載。各附卷末。今世所傳者。僅汲古毛氏重刊本。攷各卷末。別無附見之文。則亦非鎮之舊矣。鎮又有續志。紀元時事。今並湮沒無存。獨鮑氏書尙完好可讀。予所見宋縣志。若高似孫之剡錄、楊潛之雲間志、凌萬頃邊實之玉峯志。并此而四。然敍述有法。條簡適中。當以此志爲最善也。宋史新編。德祐元年二月。元兵入臨江。知軍鮑廉死之。五月。贈華文閣官其一子。是亦節義之士。常熟東鄉地。明宏治十年。割入太倉州。志所載雙鳳鄉、許浦鎮、塗崧鎮、支塘市。

甘草市、直塘市、穿山、七浦、沙頭邨，皆今太倉境。

金陵新志

張鉉金陵新志十五卷。有至正三年南臺御史索元岱序。鉉字用鼎。闕中學古書院山長。前載文移。稱浮光張鉉。則光州人也。此書本續景定建康志而作。前志所有者不具載。其於江南行御史臺建置本末。及御史大夫以下題名。最詳備。

太倉州志

太倉州志十五卷。明崇禎十五年。知州錢肅、樂虞、孫延。邑士前臨川縣知縣張采。受先刊修。分封域、營建、官師、學校、風土、選舉、水利、賦役、海運、兵防、海事、名宦、人物、藝文、瑣綴、十五門。每門各有子目。受先復社名士。於地方利病。剴切言之。洵非率爾操觚。其書常作嘗。由作繇。校作較。檢作簡。則避明諱也。予昔游四明。於范氏天一閣。見張寅太倉州志。乃嘉靖丁未刻本。頃館婁東。訪藏書家。求嘉靖志。竟不可得。卽此志亦曼患缺損。非復初印面目矣。

吳越有國時。嘗以蘇州爲中吳府。正史郡志皆失載。此志敘沿革云。五代屬錢氏中吳府。勝於郡志多矣。志又云。宋爲崑山之域。政和中陞州。屬平江府。後爲姑蘇郡。此則大誤。政和中升蘇州爲平江府。其所屬五縣如故。蘇州故有吳郡之稱。南渡後范石湖修志。尙稱吳郡。初無改名姑蘇事。如志所言。似政和升崑

山爲州其後又改州爲姑蘇郡矣豈不大可笑乎

元末遂昌鄭元祐僑居蘇州所著有僑吳集明德卽元祐字也吳仲超謂鄉賢祠鄭公明德是何許人在州志三大疑之一受先志仍收入文藝傳竟不知明德之爲元祐明人好談名節而於紀載多失討論如此者蓋不少矣

### 浙江通志

浙江通志人物傳趙孟堅字子固海鹽人系出安定郡王初以父蔭入仕後登進士第歷官集英殿修撰知嚴州遷翰林學士承旨年九十七謚文簡厲太鴻宋詩紀事亦云景定初遷翰林學士今攷周公謹齊東野語謂其終提轄左帑身後有嚴陵之名是嚴州亦未到任況入翰林乎南宋入翰林者但稱直院真除學士者已不多見若承旨則必老成久次如牟子才者始得之更非其實矣朱存理鐵網珊瑚載子固梅竹譜有葉隆禮跋云子固晚年工梅竹步驟逃禪予自江右歸將與之是正而子固死矣末題咸淳丁卯是子固之卒在丁卯以前宋猶未亡而姚桐壽樂郊私語乃謂子固入元不樂仕進從弟孟頫來訪旣退使人濯其坐具此委巷無稽之談庸足信乎

### 江西通志

江西通志選舉門載元時進士題名皆誕妄不足信予嘗見元統元年進士題名錄以此志校之志載是

年登科十五人。有兩陳植。一貫寧州。一貫永豐。據錄止有王充耘、李炳、李毅在二甲。陳植、徐邦憲、朱彬在三甲。其餘皆無之。植貫永豐。未嘗有寧州之陳植也。而三甲第廿六名艾雲中。第廿八名熊燿。並籍龍興路。此灼然可信者。而志反遺之。蓋志所采者多出於家乘墓誌。凡曾應鄉舉者。皆冒進士之名。而修志者不能別擇也。且如元之設科。始於延祐二年。而志乃有至元丙子鄉試。大德戊戌進士。大德鄉試諸人。是并元史全未寓目矣。又有因涉獵史傳而轉誤者。人物門於瑞州收元之劉秉忠。此舊志所無。采元史補入。自謂淹博。而不知其大不通也。江西之瑞州。本名筠州。至理宗朝始避諱更名。若劉秉忠久居邢臺。其先世居瑞州。而仕于遼金。則是遼金之瑞州。非宋之瑞州矣。志家不諳地理。不校時代。乃引藏春居士之先世冒籍江右。豈不令人噴飯滿案乎。

風俗通義

應氏風俗通義。隋書經籍志稱三十一卷。錄一卷。馬總意林亦云三十一卷。而新舊唐志俱作三十卷。宋史及晁氏陳氏書目皆云十卷。則已失其三之二矣。今世所傳唯元大德刊本。前有行都水監李果序。後載宋嘉定十三年丁黼跋。知其書在南宋時已難得。又言譌舛已甚。得館中本及孔寺丞本。互相參校。始可句讀。今刻之夔子。好古者或得善本。從而增改。是所望云。則其譌謬相承非一日矣。盧學士召弓嘗寓書問愆禮篇載徐孺子負笈并涉齋一盤醞。笈并二字何義。予答云。此必算字之譌。史記鄭當時傳。其餽

遺人。不過算器食。徐廣云。算竹器也。算與匱同。說文。匱。淥米籩也。士冠禮。爵弁。皮弁。緇布冠。各一匱。注。匱。竹器名。本算字。誤分爲兩字。遂不可識矣。予又嘗采輯應氏逸文一册。學士見而喜之。爲刊入羣書拾補中。頃歲讀馬總意林。僧元應一切經音義等書。續有所得。惜學士已逝。不及增入矣。

### 顏氏家訓

顏氏家訓七卷。前有序一篇。不題姓名。當是唐人手筆。後有淳熙七年二月沈揆跋。又有攷證一卷。後列朝奉郎權知台州軍州事沈揆。朝請郎通判軍州事管鈞。承議郎添差通判軍州事樓鑰。迪功郎州學教授史昌祖同校。又有監刊同校諸人銜。皆以左爲上。蓋台州公庫本也。淳熙中。高宗尙在德壽宮。故卷中構字。皆注太上御名。而闕其文。前序後有墨長記云。廉臺田家印。宋時未有廉訪司。元制乃有之。意者元人取淳熙本印行。間有修改之葉。則於宋諱不避矣。

### 容齋隨筆

洪氏容齋隨筆。續筆。三筆。四筆。各十六卷。卷首皆有自序。唯五筆僅十卷。而無序。蓋猶未成之本也。隨筆初刻於婺州。至嘉定壬申。從孫伋。由贛州守擢江西提刑。合五筆刻之。章貢有何異及邱櫛前後兩序。又十年。伋守建寧。再刻于郡齋。伋自爲跋。稱從孫朝議大夫直華文閣知建寧軍府事新除知隆興府江西安撫使。則嘉定十六年八月也。最後有紹定改元臨川周謹跋。稱贛本漫不可辨。以建本參攷。鈔梓。則第

三刻矣。今世所傳者，明季吾邑馬元調刻本。唯存何異一序。餘皆削之。此明宏治八年活字印本。板心有會通館活字銅板印兩行八字。前有錫山華煜序。正文皆作夾注。不依元刻。不如馬本之精。而序跋俱完好。勝于馬本。

揮塵錄

王明清揮塵錄四卷。後錄十一卷。第三錄三卷。餘話二卷。世所傳者，常熟毛氏津逮祕書本。予嘗見宋刻殘本。僅後錄首兩卷及第三錄三卷耳。卷首題朝請大夫主管台州崇道觀王明清姓名。又有慶元元年實錄院移秦州牒二道。並云訪聞秦州通判王明清有揮塵前後錄。而不及第三錄者。據明清自述。前錄乾道丙戌奉親會稽日作。後錄紹熙癸丑官都下作。第三錄慶元改元吳陵官舍作。吳陵卽秦州也。甫經脫稿。尙未流傳都下。故公牒未之及耳。前錄言紹興丙辰。明清甫十歲。計其生年。當在建炎元年丁未。至慶元乙卯。倅秦州。年已六十九矣。朝請大夫。蓋其所終之官。享年若干。則無從攷也。仲言習于掌故。所記載有裨正史者甚多。予嘗采宋次道及仲言所述。彙爲一編。淳熙以後。則取正史。參以它書補之。較之王圻謚法攷。所得多矣。說文無摠字。總管總領之總。皆當从糸旁。前史多作摠。或作惣。此隸體之譌變。治平改都部署爲都總管。其文从糸不从手。是爲復古。仲言轉以稽攷不審。訾之。此以不狂爲狂也。

履齋示兒編

履齋示兒編廿三卷。宋廬陵孫奕季昭撰。顧千里云。嘗見影宋鈔本。首題廬陵禮津孫奕季昭。有開禧元祀九月上浣自序。宋史無傳。不得其出處本末。予嘗見蘇州府學石刻陳襄經筵薦士章疏。稱尙書都官員外郎監泗州河南轉般倉孫奕。士行著於鄉閭。節義信于朋友。所至以善政聞。攷襄薦士疏。在熙寧十年。與開禧遠不相及。蓋別是一人。非季昭也。頃又見婺州題名有孫奕。嘉祐五年四月。以駕部員外郎知婺州。在任改虞部郎中。嘉祐與熙寧相去不遠。未審卽襄所薦否。

### 史繩祖學齋估畢

史繩祖學齋估畢四卷。前有自序。題淳祐庚戌吉月。詹山史繩祖慶長書於梓漕極堂。後有景定壬戌冬至。鄱陽郭困跋。繩祖之大父武陽府君。字子堅。精於篆隸。嘗集隸格一冊。以補洪景伯漢隸之缺。其書今不傳。所載石室壁間刻古聖賢義夫節婦及車馬人物。卽武梁祠石象也。頃錢唐黃小松郡丞於嘉祥縣之紫雲山搜得之。而繩祖謂此碑在資州宅博雅堂下。制榻又輦運真之。明新。二字疑有譌脫。是蜀中又有翻刻本亦異聞也。史氏以梁高行至范且爲第一碑。伏義至樊於其頭爲第二碑。使者長婦兒至縣功曹爲第三碑。

### 石刻鋪敘

石刻鋪敘二卷。廬陵曾宏父所作。首列紹興御書石經。益部石經。次鐘鼎彝器款識帖。祕閣前帖。卽瀋帖。長沙廬陵清江武岡諸帖。元祐祕閣前帖。汝帖。武陵帖。淳熙祕閣前帖。續帖。羣玉堂帖。而終以鳳墅前



帖、畫帖、續帖、鳳墅者、宏父所居。故自題鳳墅逸客。云前帖二十冊、畫帖二冊、續帖二十冊、皆宏父哀集宋朝名人真蹟。刻寘廬陵鳳山別墅者、宏父之父三復字無玷、官至刑部侍郎、宋史有傳、而不見宏父名。此書又不載于藝文志。唯秀水朱錫鬯曝書亭題跋有之、而誤仞宏父爲南豐曾惇之子、不知其歲月不相應也。宋時江西有三曾、皆衣冠之族、樓大防送無玷寺丞知池州詩云、我朝衣冠盛、名家數三曾、南豐暨贛川、後起參溫陵、邇來螺川族、駸駸皆簪纓、南豐之曾、顯於東都、至子固兄弟名益盛、子宣遂至宰相、贛川之曾、則茶山與其兄開、皆南渡侍從、廬陵之曾、則三復三聘、宋史皆有傳、所謂螺川族也。溫陵謂公亮、宋時曾氏宰相、自公亮始、故樓詩牽連及之。公亮閩人、非江西人也。竹垞所舉名惇字宏父者、王明清之外祖、揮塵錄屢見其名、實子宣之孫、仕紹興朝、而此宏父著書在理宗淳祐之世、相距百餘年、其非一人無疑。

癸辛雜識

周公謹癸辛雜識、今世流傳有二本、一爲商氏稗海所刻、闕落非足本、一爲毛氏汲古閣本、前集後集各一卷、續集別集各二卷、最爲完善、而魯魚亥豕之譌、難以枚舉、其最可笑者、別集上卷、兀朮石螭、修四朝國史、其贊史浩略云云、兀朮石螭四字、乃尤木石螭之譌、尤螭、理宗朝史官、木石蓋其號、別集載蔡杭事、此西山之孫、九峯之子、宋史本紀表傳並作蔡抗、予曾見石刻題名、乃是杭字、雜識固誤、宋史亦未可據。

公謹自言。先君子於紹定四年辛卯出宰富春。九月到任。壬辰歲。予實生于郡齋。則宋亡之歲。公謹僅四十有五。而書中載大德改元事。其年歲在丁酉。是六十六歲。尙無恙也。戴表元序齊東野語。述公謹之言云。我家中丞。自齊遷吳。及今四世。又云。大父侍郎公。踐歷六曹。外大父參預文莊章公。出入兩制。以湖州府志攷之。章文莊者。良能也。中丞。名祕。公謹之曾祖。至所謂大父侍郎者。志亦未之及也。

### 夢梁錄

夢梁錄二十卷。錢塘吳自牧撰。有自序。後題甲戌歲中秋日。蓋元順帝元統二年也。若前六十年。則爲宋咸淳十年。宋祚未亡。不當有滄桑之感矣。自牧事迹無可攷。但其人既目覩臨安繅華之盛。而書成於元順帝之初。則必隱遁而享高壽者矣。

### 輟耕錄

元人說部。莫善于南邨輟耕錄。然亦有傳聞失真者。如第一卷載世皇取江南。大軍次黃河。苦乏舟楫。夜夢一老叟曰。陛下欲渡河。當隨我來。引至一所。曰。此卽是已。帝遂以物標識之。乃覺。歷歷可記。明日循行河澗。尋夢中所見處。果是。方驚。顧閒。忽有人進曰。此閒水淺可渡。帝因謂曰。汝能涉否。其人乃行。大軍自後從之。無一不濟。帝欲重旌其功。對曰。富與貴。悉非所願。但得自在足矣。遂封爲荅刺罕。與五品印。撥三百戶以食之。此楊太史瑀所云也。予謂世祖取江南。初未親在行閒。其時河南久入版圖。何至濟軍無舟。

時勢絕不相應。此必太宗壬辰春由河清縣白坡渡河事。而誤以爲世祖也。金史烏林答胡土傳。正大九年正月戊子。北兵以河中一軍由洛陽東四十里白坡渡河。白坡故河清縣。河有石底。歲旱水不能尋丈。國初以三千騎由此路趨汴。是後縣廢爲鎮。宣宗南遷。河防上下千里。常以此路爲憂。河中破有言此路可徒涉者已而果然。

湧幢小品

朱國禎湧幢小品三十二卷。好談掌故。品題人物。不爲刻深之論。蓋明季說部之佳者。至于援引古書。多有差誤。如張彪稱其妻爲鄉里。見南史。而誤以爲楊彪。王文公父名益。而誤以爲蓋。止謗莫如自修。魏司空王昶語。見三國志。而誤以爲文中子。宋置顯謨閣。藏神宗御集。寶謨閣。藏光宗御集。見宋史職官志。而誤。切寶謨爲神宗閣名。元進士分左右兩榜。蒙古色目人爲左。漢人南人爲右。今元統癸酉至正辛卯兩科題名具在。左右榜各分三甲。犁然不紊。乃謂漢人不得居榜首。以第二爲狀元。則紕謬之甚矣。彼特見元本紀及選舉志。例書廷試進士賜某某等及第出身有差。漢人必在第二。故剽爲此說。而不悟其爲史家省文。且左右榜之分。選舉志有明文。朱亦不能細檢也。

日知錄

顧氏日知錄辨呂氏春秋晉文公師咎犯隨會。謂隨會不與文公同時。攷左氏傳城濮之役。舟之僑先歸。士會攝右。士會卽隨會也。正是晉文公時。通鑑載李景伯迴波詞云。迴波爾時酒卮。微臣職在箴規。侍飲已過三爵。喧譁竊恐非儀。本是六言絕句。攷孟啓本事詩載沈佺期云。迴波爾時佺期。流向嶺外生歸。又

載優人詞云。迴波爾時栲栳。怕婦也是大好。俱以迴波爾時四字開端。與景伯詞同。蓋迴波之體如此。大唐新語載景伯詩。作迴波詞持酒卮。當是傳寫之誤。顧氏轉引以爲據。且謂其體首二句三言。下三句六言。翻疑通鑑有誤。豈其然乎。

謝肇淛云。宋真宗名恆。而朱子於書中恆字獨不諱。顧氏引以爲祧廟不諱之證。謂當寧宗之世。真宗已祧。此亦非是。朱文公注論語孟子。正文遇廟諱。則缺筆而不改字。注則無不避者。其注易亦然。見於趙順孫四書纂疏。及吳革所刊易本義。班班可攷。謝在杭未見真宋本。故有此言。豈可依據。攷宋寧宗之世。太廟自太祖至光宗九世十二室。未嘗祧真廟。顧氏偶未審爾。

#### 池北偶談

王阮亭池北偶談。謂東坡詩司馬相如如作上聲。攷東坡和陶雜詩。昆蟲正相齧。迺比蘭相如。如讀去聲。與去慮住爲韻。非讀司馬相如爲上聲也。

#### 天祿識餘

天祿識餘。詹事平湖高士奇所撰。有一條云。周禮漏下三刻爲商。商音滴。按儀禮士昏禮注。日入三商爲昏。疏云。商謂商量。是漏刻之名。旣以商量爲義。則讀如參商之商明矣。商商二字。形聲俱別。豈可讀三商爲漏滴之滴。且其文出儀禮鄭注。乃誤作周禮。又妄改爲漏下三刻。是并周禮亦未嘗讀也。邵長蘅古今

韻略十二錫部商字下亦引日入三商爲昏其誤與高氏同兩君皆有文名而不讀書故涉筆便誤。

洗冤錄

洗冤集錄五卷。朝散大夫新除直祕閣湖南提刑充大行府參議官宋慈惠父編。前有淳祐丁未嘉平節前二日自序。蓋宋槧本。卻有聖朝頒降新例數葉。列于首卷之前。皆至元大德延祐開文移。則元人增入也。慈不知何郡人。其書不載于宋史藝文志。而至今官司檢驗。奉爲金科玉律。但屢經後人增改。失其本來面目。唯初刻爲可貴耳。輟耕錄記勘釘事。以爲剗聞。然此錄已先有之矣。

證類本艸

此書有兩本。其一題云經史證類大觀本草三十一卷。目錄一卷。前有大觀二年十月朔通仕郎行杭州仁和縣尉管句學事艾晟序。序後有一方記云。大德壬寅孟春宗文刊行。後題春穀王秋捐資命男大獻大成全校錄。殆明人翻元刻也。其一題云經史證類政和本草。前載政和六年康州防禦使入內醫官曹孝忠序云。蜀人唐慎微因本草舊經。衍以證類。臣親奉玉音。謂此書實可垂濟。乃詔節使臣楊戩總工刊寫。又命臣校正而潤色之。謹奉明詔。刪繁緝紊。務底厥理。凡六十餘言。請目以政和新修經史證類備用本草云。是書初刊于杭州漕司。艾晟序謂慎微不知何許人。其云大觀本草者。因校刊之年題之也。其後曹孝忠被旨校刊。乃系以政和之名。若慎微著書。實在元祐之世。不特非政和。亦非大觀也。其書本名經

史證類備急本草。大觀政和皆後來所題。而政和之名出于朝旨。則當以政和爲正。然南宋人多稱大觀本草者。政和新修之本。經汴京淪喪。不及流播東南。陳直齋所收亦祇浙漕司本。故未暇訂正耳。今所傳政和本。乃元初平陽張存惠重刻。增入寇宗奭本草衍義。亦非孝忠之舊。題記云泰和甲子下己酉冬。實元定宗后稱制之年。距金亡已十有六載矣。而存惠猶以泰和甲子下統之。隱寓不忘故國之思。或以爲金泰和刻。則誤矣。

### 星經

今世俗所傳甘石星經。不知何人僞撰。大約采晉隋二志成之。續漢書天文志注引星經五六百言。今本皆無之。是劉昭所見之星經久失其傳矣。

### 丹元子步天歌

丹元子步天歌。不著撰人姓名。相傳以爲唐王希明所撰。鄭樵獨非之。以爲丹元子隋之隱者。與希明各是一人。然歌詞淺陋。不似隋人文字。隋書經籍志亦無此書。其非隋人明矣。古天文家未有以太微天市配紫宮爲三垣者。太史公書太微屬南宮。天市屬東宮。晉隋二志則分中外宮與二十八宿爲三列。而太微天市雜敍于中宮之次。使丹元果隋人。則唐初李淳風修隋志。何不一述三垣之說乎。漁仲好異而無識。欲取俚鄙之歌。駕乎前志之上。所謂棄周鼎而寶康瓠者也。

數學九章

秦九韶數學九章十八卷。其目曰大衍。曰天時。曰田域。曰測望。曰賦役。曰錢穀。曰營處。曰軍旅。曰市易。蓋自出新意。不循古九章之舊。有淳祐七年九月自序。攷直齋書錄。有數術大略九卷。魯郡秦九韶道古撰。前二卷大衍天時二類。於治歷測天爲詳。癸辛雜識又作數學大略。蓋卽此書。而異其名耳。直齋所錄崇天紀元二歷云。近得之蜀人秦九韶道古。然則九韶先世蓋魯人。而家於蜀者也。李梅亭集有回秦縣尉九韶謝差校正啓云。善繼人志。當爲黃素之校讐。宥從吾游。小試丹鉛之點勘。秦少游元祐中嘗校對黃本書籍。九韶豈其苗裔耶。李梅亭嘗爲成都漕。九韶差校正當在其時。其任何縣尉。則無可攷矣。嘉熙以後。蜀土陷沒。寄居東南。故得與直齋往還也。予又攷景定建康志。得二事。其一通判題名。有秦九韶。淳祐四年八月。以通直郎到任。十一月。丁母憂解官離任。其一制幕題名。寶祐門九韶。爲沿江制置司參議官。又癸辛雜識稱九韶秦鳳間人。與吳履齊交尤稔。嘗知瓊州。數月罷歸。晚竄梅州以卒。合此數書觀之。九韶生平仕宦蹤跡。略可見矣。

測圓海鏡細草

元夔城李冶仁卿測圓海鏡十二卷。設問百有四十。有問有答。有法有草。皆用立天元一布算。自序謂得洞淵九容之說而衍之。今洞淵書久失傳。不知何人所作矣。書成于戊申九月。其時蒙古未有年號。洎至

元二十四年。其子克修刊刻。王德淵撰後序云。先生病且革。語其子。吾平生著述。可盡燔去。獨此書雖小數。吾嘗致力。後世必有知者。其矜重如此。郭守敬撰授時術。求周天弧度。立天元一爲半徑。卽李氏法也。明儒無通算術者。長興顧應祥得其書。謂立天元無下手處。別用句股帶縱求之。而盡削其細草。此鄭人之買櫝還珠也。

### 革象新書

趙緣督先生革象新書。元槧本。門人三衢章濬纂輯。不分卷。每葉廿六行。行廿四字。明初義烏王禕有刪本。其篇目前後。與此互異。王序謂其書有推步立成諸篇。皆載占驗之術。今檢此本初無之。豈王所見別有一本耶。邵康節元會運世之數。後儒尊信。莫敢有異議者。獨緣督譏其不可準。謂以諸家術求皇極之元。不特七政無摠會之事。抑且散亂無倫。此真通人之論。非精于推步者不能知。非胸有定見者不能言也。

### 寶祐會天歷

宋寶祐會天歷。予訪之五十年。今春始於姑蘇吳氏得見之。朱錫鬯跋引農家諺。以元日立春爲百年罕遇。予攷元世祖至元三十一年甲午歲。正月一日立春。見於周密癸辛雜識。陶九成輟耕錄。距宋理宗寶祐四年丙辰。僅卅有八年耳。夫元日立春。猶之天正朔且冬至也。以古法十九年一章之率推之。本非罕



觀之事。田家不諳推步。故有此諺。未可信以爲實也。分卦直日。以坎離震兌各六爻主二十四氣。及五日一候。皆唐大衍術。而宋因之。元授時以後。始不立求卦氣七十二候諸術。今疇人子弟。遂不知六日七分爲何語矣。崑山徐相國家宋槧本。今已不存。此從竹垞影鈔本展轉摹寫。不無脫漏譌舛。要是世間希有之物。其書元烏爲胤烏。姤爲邁。恆爲常。皆避宋諱。若八月三日下大夫登三字。當爲禾乃登之譌。

三秭撮要

吳門黃氏有宋槧三秭撮要。凡五十七葉。不題撰人姓名。又無刊印年月。而紙墨極精。攷直齋書錄解題。載此書一卷。又一本名擇日撮要秭。大略皆同。建安徐清叟云。其尊人尙書公應龍所輯。不欲著名。卽是書也。其書每日注天德、月德、月合、月空所在。次列嫁娶、求婚、送禮、出行、行船、上官、起造、架屋、動土、入宅、安葬、掛服、除服、詞訟、開店、庫、造酒、麴、醬、醋、市賈、安床、裁衣、入學、祈禱、耕種吉日。凡廿二條蓋司天監用以注朔日者。其所引有萬通秭、百忌秭、萬年具注秭、萬年集聖秭、會要秭、會同秭、廣聖秭。大率皆選擇家言也。鄭樵藝文略有太史百忌秭圖一卷。太史百忌一卷。廣濟陰陽百忌秭一卷。呂才撰廣聖秭一卷。晉苗銳集萬年秭十七卷。楊惟德撰集聖秭四卷。楊可撰今皆不傳。此書又引劉德成、方操、仲、汪德昭、倪和父諸人說。蓋皆術數之士。今無有舉其姓名者矣。

大乙統宗寶鑑二十卷。前有大德癸卯曉山老人序。其求太乙積年術。日法一萬五百。歲實三百八十三萬五千零四十八分二十五秒。予嘗詢之。元和李尙之。尙之曰。宋同州王湜易學曰。每年於三百六十五日二千四百四十分之外。有終於五分者。有終於六分者。有終於五六分之間者。終於五分。五代王朴欽天秣是也。以七千二百爲日法。終於六分者。近年萬分秣是也。以一萬分爲日法。終於五六分之間者。景祐秣法。載於太一遁甲中者是也。以一萬五百分爲日法者。此暗用授時法也。試以日法爲一率。歲實爲二率。授時日法一萬爲三率。推四率。得三百六十五萬二千四百二十五分。卽授時之歲實也。其氣朔二策。竟用授時數。則仍以一萬爲日法。不以一萬五百爲日法。所謂欲蓋彌章者也。王肯堂筆塵載此書。上元甲子。距元大德七年癸卯。歲積一千一十五萬五千二百一十九年。予所見本。積年至明正德十二年。蓋後人增改。非復大德舊本矣。

### 梅花喜神譜

宋伯仁梅花譜。宋史藝文志及諸家書目。皆不及載。唯錢遵王述古堂書目。曾列其目。今吳中黃氏有此書。分上下二卷。上卷爲蓓蕾四枝。小蕊十六枝。大蕊八枝。欲開八枝。大開十四枝。下卷爛熳十八枝。欲謝十六枝。就實六枝。凡百圖。每圖各有標目。各綴五言一絕句。題云喜神者。宋時俗語。以畫像爲喜神也。前有伯仁自序。後有向士璧。葉紹翁序跋。蓋初刻于嘉熙戊戌。此則景定辛酉金華雙桂堂重鈔本也。伯仁。

字器之。湖州人。自號雪巖耕田夫。詩載江湖小集。昔侍沈歸愚尙書。每言爛熳之熳不當从火旁。古人只用漫。攷字書實無熳字。疑始於明代。今見南宋鈔本。已作爛熳。乃知此字沿譌有自。要不得以是藉口。致貽通人之誚也。

文心雕龍

文心雕龍議對篇。春秋釋宋。魯桓務議二句。注家皆未詳。惠學士士奇云。案文當云魯僖預議。公羊經。僖二十一年。釋宋公。傳云。執未有言釋之者。此其言釋之何。公與爲爾也。公與爲爾奈何。公與議爾也。預與與同。轉寫譌爲務耳。

文選注

潘岳閒居賦注引安革猛詩。祁祁我徒。予向疑安革猛不知何人。詢之海寧陳仲魚。鱣乃知革猛爲韋孟之譌。安乃衍字也。檢漢書韋賢傳。果如仲魚言。

甘泉賦注引桓譚新論云。雄作甘泉賦一首。始成。夢腸出。收而內之。明日遂卒。文賦注引新論云。成帝祠甘泉。詔雄作賦。思精苦。困倦小臥。夢五藏出外。以手收而內之。及覺。病喘悸少氣。二注不同。當以後注爲正。蓋子雲因作賦而病。未嘗因病而卒也。前注明日遂卒。卒字殆傳寫之誤。不特非新論本文。并非李善注之舊也。何義門謂新論出于妄人附益者。蓋未檢文賦注之故。或據此注謂子雲卒于成帝之世。未嘗

仕莽何異癡人說夢邪。

文選元槧本

文選李善注元槧本。每卷首冠奉政大夫同知池州路總管府事張伯顏助率重刊。有前海北海南道肅政廉訪使余璉序。稱伯顏字曰正卿。而未詳其籍貫。頃讀鄭元祐僑吳集。有平江路總管致仕張公壙誌。蓋代其子都中作。文稱張氏長洲之相城人。公諱世昌。字正卿。以謹飭小心仕于朝。傑直殿廡。成宗賜名伯顏。由將作院判官。累任慶元路同知。延祐七年。陞奉政大夫池州路同知。泰定五年。改福寧州尹。後遷漳州路總管。告老。以平江路總管致仕。乃知伯顏爲吾吳人。宜其文雅好事。異於俗吏矣。

宋名賢五百家播芳文粹

聖宋名賢五百家播芳大全文粹一百卷。衢山精舍葉棗子實編。富學堂魏齊賢仲賢校正。每卷或析爲上下。或上中下。以前所列目計之。實不止五百人。舉其大數耳。竹垞所見崑山徐氏元槧本。稱二百卷。今吳興劉氏藏本祇百卷。豈竹垞併所析之卷計之耶。四庫全書云。今鈔本一百十卷。亦不甚合。

陸宣公集

陸宣公集廿二卷。制誥十。奏草六。中書奏議六。前有權德輿序。後載元祐八年五月七日蘇軾等劄子。其書遇構字。小書太上御名。慎字小書御名。若先代諱。但缺筆而已。蓋乾道淳熙閒槧本。錢遵王所見大字。

本卽此也。權序所述三項名目，與此刻同。惟奏草中書奏議，皆作七卷。疑轉寫譌六爲七耳。唐書藝文志所載翰苑集十卷，卽制誥。其云議論表疏集十二卷，卽奏草與中書奏議。驗其目錄，無不脗合。若晁氏所載奏議十二卷，則元祐經進之本，止取後十二卷，不及制誥也。權序雖標翰苑之名，而中書奏議實非翰苑之作。則此題宣公集者爲得之。權公序文絕不云翰苑集。殆刊書者錄權序於翰苑集之首，後來併爲一集，沿此名而不悟其非，故略爲辨正之。此書向爲徐氏傳是樓物，頃歲鮑以文得之，以贈嚴久能。今久能又以遺予，子孫其善守之。

章蘇州集

章蘇州集十卷，前有嘉祐元年王欽臣序，後附沈作喆所撰補傳，最後有拾遺三葉。其目云：熙寧丙辰校本添四首，紹興壬子校本添三首，乾道辛卯校本添一首。驗其款式，當卽是乾道槧本，而於宋諱初不回避。蓋經元人修改，失其真矣。劉禹錫太和六年除蘇州刺史，有舉章應物自代狀，與左司同姓名，而實非一人。作喆作傳，聯合爲一篇，終雖有疑詞，然失史家矜慎之義矣。

臨川集

陳少章書臨川集後云：臨川集一百卷，宋紹興中知撫州詹大和校刊，黃次山爲序。序言此集向流布閩浙，詹子自言所校，悉仍其故，先後失次，譌舛尙多。今按集中七十六卷謝張學士書，卽七十八卷與孟逸

祕校手書之五文重出而題互異。又九十九卷金太君徐氏墓誌。自夫人天性篤於孝謹。上凡脫一百七十六字。後卷又有仁壽縣太君徐氏墓誌銘一篇。具載全文。則先後失次。譌舛尙多。誠如詹守之言。它若第九卷詠叔孫通詩。載宋景文集卅卷。春江詩乃方子通作。詠叔孫通詩。吳曾漫錄已辨之。蔡條西清詩話。謂春殘密葉花枝少云云。皆王元之詩。金陵獨酌寄劉原甫。皆王君玉詩。臨津豔豔花千樹云云。皆王平甫詩。七十卷相鶴經一條。本浮邱舊文。皆荆公偶書真方冊間。而亦誤編入集。此見於困學紀聞。中吳紀聞。廣川書跋者也。據葉少蘊詩話。荆公集乃宣和中薛肇明奉敕編成。肇明名屢見公詩。則其人素出入門下。宜所編皆精審。不應有如上所疏諸條之失。或肇明所編別是一本。與閩浙刊布者異耶。馬氏經籍攷載臨川集百卅卷。與此本卷數不同。則當時有二本明矣。大昕案。少章所舉詹本之失。信矣。薛肇明卽薛昂。徽宗時以迎合蔡京執政。此小人而無學者。雖出入介甫門下。其編次庸有當乎。

### 查氏注蘇詩

查慎行注東坡和陳述古拒霜花詩。引古靈先生行狀。公名襄。字述古。文惠公堯佐長子。按古靈福州侯官人。而堯佐閩州閩中人。堯佐子名述古。而古靈字述古。兩人並非同族。豈可溷而爲一。若非行狀舛舛。則查所引誤矣。

### 滴水集

嘉慶壬戌重陽後三日訪佺山大令於雒城官署信宿東齋於架上得此集披閱再三歎其學有本原非蹈空逞辯者可比而宋史不爲立傳其事迹遂無攷今據集中可見者略言之蓋以元豐二年登進士歸里五年攝夏陽令又嘗爲耀州教授元祐紹聖間官於潞州元符二年以朝散郎管句熙河路經略安撫司機宜文字崇寧初累遷直祕閣熙河轉運使三年改知鄭州又改陳州四年移冀州其秋除河東轉運副使其後嘗爲刑部郎官奉祠又嘗知夔州再任提點雲臺觀終于集賢殿修撰其撰范恭人墓誌云熙寧二年予生十八計其生年當在壬辰而集中又有賀皇太子登寶位表則靖康丙午歲履中尙無恙其壽已七十有五不知終于何年也履中家於長安而自題趙郡蓋舉郡望而言又或自題東蒙則未詳其故矣

野處類藁

洪文敏野處類藁二卷吳門徐淡如鈔以見贈頃見戈小蓮家藏本前有自序一篇因鈔于簡端序稱甲戌之春家居臥病甲戌者紹興二十四年也然細讀此集似不出文敏之手如庚戌正月謁普照塔云重來得寓目歸枕尾殘汗當謂泗州大聖塔也公生于宣和癸卯至庚戌僅八歲卽早慧能詩不應有重來寓目之句又有呈元聲如愚起奉三兄及懷舍弟逢年時歸婺源詩與文敏兩兄字全別益可疑矣

鶴山先生大全集。宋槧本。黃孝廉蕘圃所藏。有吳淵序。吳潛後序。又有跋一篇。末題開慶改元夏五月甲子。諸生朝請大夫成都府路提點刑獄公。其下殘闕。姓名不可攷矣。細釋其文。蓋亦蜀人。登寶慶元年進士。嘗通判靖州者。此集先有姑蘇溫溪兩刻本。皆止百卷。至是始合周禮折衷。師友雅言。并它文增入。爲百有十卷。故有大全集之稱。所憾闕失十有二卷。卽存者亦不無魯魚亥豕之譌。又有合兩卷聯爲一卷者。然世閒恐無第二本矣。

師友雅言第三卷有一條云。自成都僉判主文眉山。鶴山年二十四。攷文靖生於淳熙戊戌。嘉定元年登第。年三十一。次年除成都僉判。其主文眉州。年三十四。非二十四也。

### 陵陽先生文集

牟嶽陵陽先生文集二十四卷。次子應復所編。蓋非生前手定之本。應復跋稱悉心哀輯。十未及一。卽所知如閣平章先世墓銘。程承旨藏書樓記。雪樓記。張左丞共山書院記。三省堂記。皆未得本。則其散失多矣。子家有趙子昂書松江寶雲寺記。亦獻之作。今不載集中。此可補應復之闕者也。跋稱至元丙子。卽杜門隱居。凡三十六年。八十五以終。是獻之卒於元至大四年辛亥。當生于宋寶慶三年丁亥矣。

### 石田集

石田先生文集十五卷。元槧本。凡詩賦五卷。文十卷。俱完好。集中有寄猶子山詩。卽元史之巉巉本。康里



氏子山其字也。夔與猗同乃高切。猗音亦相似。譯語無定字耳。監本夔誤作夔。乃傳寫之譌。證以石田集益信。

金華黃先生集

予初見黃文獻公集十卷。乃明嘉靖辛卯仙居張儉所刻。以意刪削。春風亭筆記。本別爲一編。雜入文集。次第紊亂。尤爲可憎。頃在吳門。聞黃堯圃收得元槧本。假讀之。雖不標日損齋之名。而合前後集數之。與行狀卷數恰合。蓋文獻手定本。以齋名爲集名。厥後門弟子校刊。改題金華黃先生。以示尊崇之意。非有兩本也。

偶桓江雨軒藁

江雨軒藁八卷。自題義易偶桓武孟。按太倉志。偶桓字武孟。少嘗接識楊維禎。倪瓚。瓚亟稱之。洪武二十四年。應秀才舉。爲崇安從事。授廣西桂林河泊大使。終荊門州吏目。致仕歸。遇淮南故人蔣文用。卽隨入京。僑居建安坊下。放情觴詠。久之乃還。卒年八十二。家桃源涇。築江雨軒。每自題瞎牛。又號海翁。志所云。桃源涇者。卽茜涇也。明初茜涇尙屬崑山縣。故黃容敍其集稱爲崑山偶武孟也。其辛卯立春日試筆詩云。野老行年七十三。是武孟生于元順帝至元五年己卯。其卒當在明永樂十八年庚子矣。武孟有自題桃花書屋詩卷。詩云。野翁家住桃源曲。手種桃花結書屋。太平老作葛天民。自喜無榮亦無辱。又有元夕

寫與寄茜上諸友詩。予所藏乃葉文莊棗竹堂鈔本。前有巡撫宣府關防印。

### 曝書亭集

朱竹垞博極羣書。題跋皆不苟下筆。百餘年來。人無閒言。然涉獵既多。未免千慮一失。如石刻鋪敘。本廬陵曾宏父撰。與南豐曾惇字宏父者。絕不相涉。而誤以爲一人。曩歲李南澗刊此書。予始爲攷正。今四庫全書目。卽采予說也。其跋宋本晞范子脈訣集解云。咸淳二年。臨川李駒子野撰。自號晞范子。其書引證周洽。當時板行。必多傳習者。而宋藝文志不載何歟。其跋濟生拔萃方。具列元時醫家。則李希范居其一。攷咸淳二年丙寅。距德祐丙子。宋亡僅十載耳。希范與晞范子明是一人。而朱別而爲二。不加訂正。亦所謂明察秋毫。不見目睫者矣。

### 崇文總目

卷四

崇文總目一冊。予友汪炤少山游浙東。從范氏天一閣鈔得之。其書有目而無敘釋。每書之下。多注闕字。陳直齋所見。蓋卽此本。題云紹興改定。今不復見題字。或後人傳鈔去之耳。朱錫鬯跋是書。謂因鄭漁仲之言。紹興中從而去其注釋。今攷續宋會要。載紹興十二年十二月。權發遣盱眙軍向子堅言。乞下本省。以唐藝文志及崇文總目所闕之書。注闕字於其下。付諸州軍照應授訪。是今所傳者。卽紹興中頒下諸州軍授訪之本。有目無釋。取其便於尋檢耳。豈因漁仲之言。而有意刪之哉。且漁仲以薦入官。在紹興之

未。未登館閣。旋即物故。名位卑下。未能傾動一時。若紹興十二年。漁仲一閩中布衣耳。誰復傳其言者。朱氏一時揣度。未及研究歲月。聊爲辨正。以解後來之惑。

郡齋讀書志

晁公武郡齋讀書志。宋時有兩本。袁州本僅四卷。淳祐庚戌。番禺黎安朝知袁州。刊之郡齋。又取趙希家藏書續之。謂之附志。衢州本二十卷。則晁之門人姚應績所編。淳祐己西南。充游鈞知衢州。所刊兩書卷數不同。所收書則衢本幾倍之。其後希弁得衢本。參校爲後志二卷。以補其闕。其與希弁同者。不復重列。蓋已非完書矣。馬氏經籍攷所引晁說。皆據衢本。不用袁本。當時兩本並行。而優劣自判。今世是通行本。皆依袁本翻刻。予培瞿生中溶。購得鈔白衢本。惜無好事者刊行之。

趙希弁讀書附志

趙希弁讀書附志。不載於宋史藝文志。攷宗室世系表。燕王德昭子魏王惟正。惟正子馮翊侯從讜。從讜子馮翊侯世潭。世潭子正議大夫令誠。令誠子右奉議郎子孟子。孟子伯崙。伯崙子師向。師向子希弁。希弁實太祖九世孫。此書稱生父師回。紹定戊子。爲衡山令。則是本師回子而爲世父後者也。其自署衡云。江西漕貢進士祕書省校勘書籍。殆家於江西者。

直齋書錄解題

陳振孫宋史無傳。癸辛雜識別集載徐元杰暴亡。或以爲史嵩之毒之而死。其妻中省乞朝廷與之伸冤。侍御鄭案率臺諫共爲一疏。少司成陳振孫察官江萬里並有疏。遂將醫官人從廚子置獄。令鄭案督之。竟不得其情。止以十數輩斷遣而已。是振孫於清祐四年官國子司業也。厲鶚宋詩紀事稱端平中仕爲浙西提舉。改知嘉興府。致會稽續志浙東提舉題名有陳振孫。端平三年二月初六日。以朝散大夫知台州兼權。八月正除。十月二十六日到任。嘉熙元年五月。改知嘉興府。是振孫由浙東提舉改知嘉興府。非浙西也。今四庫全書總目又引癸辛雜識莆田陽氏子婦一條。稱陳伯玉振孫時以倅攝郡。又陳周士一條。稱周士直齋侍郎振孫之長子。謂振孫始仕州郡。終官侍郎。不止浙西提舉。予檢汲古閣毛氏所刊癸辛雜識。無此兩條。不知總目所據何本也。

此書有隨齋批注。不著姓名。攷元時有楊益。字友直。洛陽人。官至撫州路總管。所著有隨齋詩集。或卽其人乎。

### 菴竹堂書目

菴竹堂書目者。明崑山葉文莊公所藏書也。今所傳者。其五世孫恭煥所錄。云得之周玉庵家。以文莊自序證之。殊不合。序稱書目六卷。敍列本鄱陽馬氏。其不同者。首聖制。而終以葉氏書爲後錄。此目不分卷第。自聖制而下。初不依馬氏之次。亦不載葉氏書。則非文莊手定之本也。據其六世孫國華跋云。嘗見文

莊手筆艸稿。前載此序。而卷分爲六。先聖制。終葉氏書。每部册若干。每册卷若干。今此目有册數無卷數。蓋文莊本意欲依文獻通考之例。每書記其卷數。而以葉氏書爲後錄。既未克成。而序幸傳文集中。今所傳之目。則平時簿錄所藏書。羸分門類。將有事於刊正。而未定之本也。文莊既沒。好事者從其家得此稿。傳之。故與序不相應。而國華謂此目依鄱陽馬氏者。尤爲失考矣。吳自牧夢梁錄。一見子雜。一見通志。以王氏困學紀聞人文集類。以金石錄、夷堅志、書錄解題、入類書類。其一書而本類中兩三見者。不可勝數。

元藝文志

予補撰元藝文志。所見元明諸家文集志乘小說。無慮數百種。而於焦氏經籍志、黃氏千頃堂書目、倪氏補金元藝文、陸氏續經籍考、朱氏經義考、采獲頗多。其中亦多譌踳不可據者。略舉數事。以例其餘。非敢指前人之瑕疵。或者別裁苦心。偶有一得耳。

郝經玉衡貞觀。黃倪兩家俱入故事類。此書有自序。見陵川集。山西通志列于天文類。今從之。

祝君澤古賦辨體十卷。錢遵王以爲宋人。按祝堯字君澤。延祐五年進士。官無錫州同知。其爲元人無疑。王圻續文獻通考。以石一簷五言總論入集類。考黃文獻公集有石先生墓表云。晚而覃思于易。著互言總論十卷。朱錫鬯亦收入經義攷易類。王誤互爲五。非也。

鄭起潛聲律關鍵八卷。黃倪俱以爲元人。按起潛兩宋人。淳祐中直學士院。不當在元人之列。倪氏多以宋賢誤列元人。如計有功仕于紹興朝。其所撰唐詩紀事。刻於嘉定中。今汲古閣重刊本。前載舊序甚明。趙順孫。宋季執政。未仕元而卒。黃潛集有格齋先生阡表。稱卒於至元十三年。實宋少主德祐二年。卽宋亡之歲。晉卿元臣。不敢用宋紀年耳。倪氏俱以爲元人。誤矣。王厚之。宋孝宗時人。葉隆禮。宋理宗時人。倪皆誤切爲元人。

倪志醫方類有寶默瘡瘍經驗全書十二卷。又有寶漢卿瘡瘍經驗全書十二卷。漢卿卽默字。倪不考而兩收之。或以漢卿爲宋人。亦誤。

王元杰春秋讞義十二卷。前有千文傳序。元杰。吳江人。與文傳同郡。黃氏於春秋類別有千文傳春秋讞義十二卷。顯係重出。蘇州府志藝文亦承黃氏之誤。

胡天游傲軒吟稿。天游本貫岳州之平江。而蘇州府志藝文門文收之。此以地名偶同而誤者也。

俞遠學詩管見一卷。江南通志一入經部。一入小說部。此書今已失傳。姑列之文史。當攷。朱氏經義攷亦云未見。

程魚門家藏程復心孔子論語年譜孟子年譜各一卷。不見於前人著錄。或是好事僞託。今不收。來鶴亭詩。旣白軒稿。竹洲歸田稿。皆呂誠作。今蘇州府志誤以爲吳肅。

胡方平易學啓蒙通釋二卷。前載淳熙十三年序。乃朱文公啓蒙之序也。經義攷誤切爲方平自序而載。

之。則方平爲淳熙中人矣。攷元史儒學傳。饒州沈貴寶。受易于董夢程。夢程受朱熹之易于黃榦。而方平及從貴寶夢程學。則方平爲考亭三傳弟子。

焦竑志以移刺楚材與耶律楚材爲二人。周權與周衡亦爲二人。揭傒斯與揭曼碩亦重出。

倪志之重出者。如滕賓萬邦一覽集。見史鈔類。又見地理類。而張宗說紀古演說集一卷。見霸史類。張宗道紀古演說集一卷。又見地理類。其人實名道宗。不特非宗說。亦非宗道也。

李延興。字繼本。亦分爲二人。呂誠一名肅。亦誤分爲二。

錢遵王敏求記。有天文主管釋義。以爲李泰所葺。未審泰何時人。今據鄭明德僑吳集。定爲岳熙載撰。遵王所見。或別是一書。

焦黃皆以趙孟堅入元人。蓋傳聞子固有譏松雪事。而不知非其真也。子固實卒於宋世。與元代無涉。今不取。

倪志小學類有程端蒙大爾雅。按端蒙與朱文公同時。不當在元人之列。又易類有林光世水村易鏡一卷。春秋類有章樵補春秋緜露。編年類有劉時舉續宋中興編年。光世樵時舉。俱宋人。

黃倪二目。於醫類載聖濟總錄二百卷。此宋政和中太醫局所修書也。元大德四年。嘗命集賢學士焦惠等校刊。遂誤切爲元人撰。今不取。

朱氏經義攷。有何夢中等周禮義一卷。引王圻說。謂元東陽內舍生何夢中。與弟參知政事夢然所作。按三舍法行于宋世。元時未之有也。夢然參知政事。在宋景定二年。亦非元所授官。此王氏續通攷之誤。竹垞未及辨正耳。宋以周禮試士。此必弟兄科舉之文。不當溷入經義也。

黃氏倪氏史類有尹起莘綱目發明五十卷。按趙希弁讀書附志載此書。云建康布衣尹起莘所著。別之傑帥金陵。進其書于朝。魏了翁爲之序。則非元人矣。趙志云建康布衣。而黃以爲遂安人。當攷。

倪志有孔元祚孔氏續錄五冊。注云孔子五十一代孫。予嘗見元初刻本。名孔庭廣記。十二卷。乃孔子五十一代製封衍聖公元措所撰。蓋卽是書。改措爲祚。音之譌耳。其書實五冊。

王鶚汝南遺事。雜史也。而倪志列于地理。

曾堅詩疑大鳴集。黃目列于明人。云吳江人。仕元爲禮部員外郎。徐達克元都。堅出降。仍原官。宣德初。歷官雲南左布政使。此大誤也。按四朝詩。堅字子白。臨川人。至正甲午進士。官至翰林直學士。元以經疑取士。此云詩疑大鳴者。當是科舉所用。黃以吳江同姓名者當之。失之遠矣。

朱氏經義攷禮類有葉起喪禮會記。又有喪禮會經。蓋一書而重出也。據虞伯生序。當作記。今刪其一。黃倪二家制舉類有陳悅道書義斷法六卷。按其書首帙自題鄒次陳悅道。鄒其姓。次陳其名。悅道則其字也。次陳宜黃人。其字悅道。見於吳草廬集。證據分明。今乃以陳爲姓。悅道爲名。豈其然乎。次陳一字周。



弼、有史鈔十卷。見倪志史鈔類。又有遺安集十八卷。見草廬序。  
尤侗撰明史藝文志稿。收朱公遷、史伯璿、程端禮、王惲、楊允孚、王楨、張養浩、李治、范梈、周伯琦、陸輔之、李存、吳海、皆以爲明人。潘昂霄、河源志誤作潘昂。

# 十駕齋養新錄卷第十五

## 商已孫敦

海鹽張徵君燕昌以所藏商敦出示。蓋與器各有文。其蓋文云已孫丁。其器文云孫已丁。攷薛氏鐘鼎款識第五卷載商器有已孫敦。上爲已孫。下爲孫已。南豐曾氏所藏也。又有已丁敦。蓋曰孫已丁。器曰已孫丁。不言何人所藏。此敦文上已孫。下孫已。正與曾氏已孫敦同。而曾本少丁字。或南豐摹此銘時偶失之耳。其所云已丁敦銘六字。與此敦恰同。而上下文互易。竊意薛氏所載二敦。本卽一器。曾所摹偶失丁字。而別本所記蓋器之文倒易。或轉寫之誤歟。薛氏謂商之君有以已爲號者。有以丁爲號者。然不應併銘其器。則已丁者當是其享祀之日。予謂少牢饋食禮。日用丁已。則丁爲祭日無疑。已或在孫上。或在孫下。當是其孫之號。薛氏所言。固先得我心。而已言其人。丁言其日。恐宜分別觀之。

## 睢陵家丞印

翁氏兩漢金石記載此印。文云睢陵家丞。無印字。漢郡國志。睢陵不言侯國。翁亦疑而未決。予攷晉書。王祥封睢陵公。公國有家丞一人。則此印必是晉時物。

## 晉率善侯印

海鹽黃錫蕃椒升得古銅印。駝紐文曰晉率善倭伯長。訪諸摹印家。莫知倭爲何義。昨訪予吳門。以此印出示。予謂倭必南蠻部族之稱。攷後漢書板楯蠻傳。殺人者得以倭錢贖之。章懷注引何承天纂文云。倭蠻夷贖罪貨也。予謂錢已是貨。何必更言倭。據下文云。七姓不輸租賦。餘戶歲入寶錢口四十。則寶與倭皆蠻部落之號。徵寶錢以代租賦。徵倭錢以贖罪。其義一也。章懷以倭爲贖貨之名。蓋失其旨。得此印證之。益明白矣。

唐東都尙書兵部印

魏華父跋游景仁所藏裴紹業告云。所用印以東都尙書兵部之印爲文。印文自尙之二字外。率於篆法不合。

南漢銅鐘題字

南康謝縉山巡撫廣西。好搜訪金石文字。撰粵西金石略十五卷。刻甫成而歿于官舍。故流傳頗少。所載南漢銅鐘款識二通。皆完好可喜。一在蒼梧縣光孝寺。其文云。維大漢乾和十六年太歲戊午閏六月庚辰朔十六日乙未。弟子萬華宮使桂州管内招討使特進行內侍上柱國吳懷恩鑄造鴻鐘一口。重五百觔。置於梧州雲蓋山感報寺。永充供養。上資當今皇帝龍圖永固。聖壽萬春。謹記。一在賀縣三乘寺。其文云。維大漢大寶四年歲次辛酉九月辛酉朔二十五日乙酉。鑄造銅鐘一口。重一千五百觔。於乾亨寺永

充供養。四面列名者凡數百人。文多不載。攷乾和爲南漢主劉晟之紀年。晟以十六年八月殂。而子鋹嗣之。改元大寶。卽戊午歲也。自戊午至辛酉恰四年。與鐘文合。蘊山云。戊午歲爲周世宗顯德五年。辭史及通鑑。是年閏七月。而此云閏六月。是置閏差一月也。辛酉歲爲宋太祖建隆二年。其九月壬戌朔。而此云辛酉。是朔亦差一日也。

### 宋金官印

汪秀峯收得宋金官印各一。摹其文貽予。其一曰。恩州饒陽鎮酒稅務記。大觀三年二月少府監鑄。攷宋史百官志。少府監掌鑄牌印諸記。其屬有鑄印篆文官二人。是鑄印爲少府專職。元豐九域志。恩州武城縣有饒陽鎮。宋時州縣酒稅務。或置於城內。或置鄉鎮。設監稅務官一人主之。所謂監當官也。其一曰。提控所菜字印。興定元年九月行宮禮部造。興定者。金宣宗年號。其時中都陷沒。南遷於汴。故有行宮禮部之稱。金史百官志。屢見提控字。卻未有以提控所爲專署者。菜字亦不知何義。當取周興嗣千字文編號耳。

海寧吳槎客得宋印。長二寸三分。廣二寸二分。厚六分。柱紐高一寸一分。重十二兩。其文云。拱聖下十都。虞候朱記。凡九字。紐之左右刻端拱二年四月鑄。凡七字。按宋史兵志。拱聖指揮二十一。乾德中。選諸州騎兵送闕下。立爲驍雄。後改驍猛。雍熙四年。又改拱辰。未幾改今名。蓋拱聖爲殿前司所屬禁軍之一。志

云指揮二十一。此稱拱聖下十都虞候。豈每指揮下皆有都虞候。而此印爲第十指揮下之都虞候所用乎。

大興翁宜泉得宋印。文云壯勇第一指揮第五都朱記。澶化四年九月鑄。其書壯作𠄎，不合六書正體。予塔瞿鏡濤以宋志攷之云。壯勇宋初禁軍。隸侍衛司。以招獲羣盜配近京徒役者拔立。咸平以後。遞有增補。舊止三指揮。至熙寧中始增至七。此印鑄於澶化四年。蓋禁軍壯勇營第一指揮下之第五都也。宋軍制以五百人爲一營。每營設指揮使一員。其下別爲五都。每都馬軍設軍使一員。副兵馬使一員。步軍設都頭一員。副都頭一員。此朱記殆軍使都頭所用歟。

翁宜泉有舊印一。篆文不甚可辨。似是旁差官印四字。背文無年月。但云宣差襄陽唐鄧軍稞稅所成造。左側有十字號三字。案宋官名有宣差無宣差。金元皆有宣差。但金印當有年號。而此無之。是必元初物矣。

### 日字銅牌

仁和姜怡亭寧示予銅牌拓本。長五寸許。寬不及二寸。上有穿。其一面文云。左右宿直將軍司。下有印篆。文文云左右宿直將軍司印。其一面中刻奉御二字。左刻得入第壹重門六字。右刻日字第三十二號七字。字較小。最下刻從人牌子四字。二行。予審定以爲金時物。金之奉御皆世家子弟爲之。出入禁省。號爲近侍。此牌則

奉御之從人所帶。僅得入第壹重門而已。金史百官志。左右宿直將軍從五品。掌總領親軍。凡宮城諸門衛禁。并行從宿衛之事。又云。奉御十六人。舊名入寢殿小底。奉職三十人。舊名不入寢殿小底。又名外帳小底。皆大定十二年更。然則此牌當給於大定以後也。

### 元常德路鑄造祭器題字

元常德路鑄造祭器題字。正書四行。其文云。常德路達魯花赤哈珊黑黑。鑄造祭器壹佰貳拾玖件。奉王命也。永昌路西涼州儒學永寶之。泰定甲子四月吉日誌。按元史地理志。永昌路唐涼州。宋初爲西涼府。景德中。陷入西夏。元初。仍爲西涼府。至元十五年。以永昌王宮殿所在。立永昌路。降西涼府爲州。隸焉。永昌路屬甘肅行省。而常德路屬湖廣行省。本不相統。此西涼州之祭器。乃常德守臣奉永昌王命鑄造。非常例也。諸王表不載永昌王名號。唯世祖紀。至元九年十一月。諸王只必帖木兒築新城成。賜名永昌府。然則志所云永昌王者。只必帖木兒也。只必帖木兒爲太宗第二子闊端太子之子。見於宗室世系表。然自至元九年壬申。至泰定甲子。相距已五十二載。其時嗣永昌王者。不知何人。史家漏略。無它文可證矣。食貨志。闊端太子位。至元十八年。分撥江南戶鈔常德路四萬七千七百餘戶。是常德爲永昌王分地。故有奉王命鑄祭器之事。

### 甘露寺銅鐘

北固山甘露寺有銅鐘一口。元至正九年所鑄。周遭刻心經一部。下方列鎮江路達魯花赤馬速忽、鎮江路總管李世安、鎮江路上萬戶府達魯花赤永安名。攷鎮江府志題名。失書馬速忽永安二人。又誤以世安爲達魯花赤。不知世安漢人。不當爲達魯花赤也。

豹字牌

瞿子鏡濤於元妙觀市得銅牌。上有穿。兩面有文。正面隱起作豹像。橫刻豹字。捌伯肆拾柒號。凡八字。背面文六行云。隨駕養豹官軍勇士。懸帶此牌。無牌者依律論罪。借者及借與者罪同。不署年月。予按明仁宗實錄。永樂二十二年十一月。命工部凡內府守衛軍所懸木牌。更造以銅。其文一面二十四字。凡守衛官軍。懸帶此牌。無牌者依律論罪。借者及借與者罪同。一面守衛二字。與此牌文字大略相同。則知此牌亦明時物。蓋正德間。剏立豹房。守衛軍士所帶耳。海寧吳騫槎客亦得一枚。其面文云。豹字陸伯拾號。背文形製並同。

禮器碑

漢韓敕造禮器碑。顏育空桑。洪氏隸釋引伊尹生空桑。以爲不經之甚。予謂空桑者窮桑也。左氏昭廿九年傳。遂濟窮桑。注窮桑。少暎之號也。窮桑地在魯北。定四年封於少暎之虛。注少暎虛。曲阜也。在魯城內。顏母生于曲阜。卽少昊之虛。故稱空桑。空窮古書通用。洪譏其不經。殆未攷左傳耳。

析里橋郟閣頌

析里橋郟閣頌。洪氏婁氏俱言碑在興州。卽今漢中府之略陽縣也。漢之略陽縣屬天水郡。今縣則南宋開禧三年改順政置。相去幾及千里。名雖同而地則異矣。歐陽棐集古錄目以爲仇紉書。紉字子長。墨丁人。趙峴石墨鐫華。謂是蔡邕書。特以字體與夏承碑相似。妄意之。然夏碑之出中郎手亦無確據。

廣川書跋云。郟閣頌。醜散關之潮。潔。徒朝陽之平。慘。潔當作濕。慘當作燥。醜當作易。楊用修取濕燥之說。更以潮爲潮。以醜爲釋。顧氏金石文字記亦取楊說。予謂醜之爲釋。以司隸楊孟文及縣陽令楊君碑證之。固可信矣。洪氏隸釋載此碑。本作漸。潔。無潮字。今略陽縣有此碑。雖是重刊之本。而此二語點畫分明。是漸非潮。唯歐陽集古錄誤讀爲潮。用修未見石本。故承其誤耳。漸與平對。潔與燥對。於義亦無可疑。下徒朝陽之平燥。徒亦誤字。石本作從。

郟陽令曹全碑

碑有收養季祖母之語。或云季祖母卽庶祖母。竊謂古人稱父之少弟曰季父。則祖之少弟亦可云季祖矣。季祖母猶今人稱叔祖母歟。漢書地理志。巴郡有胸忍縣。師古音胸爲劬。而廣韻謂漢胸忍縣名。在巴東郡。地下濕。多胸忍蟲。音蠢閏。徐氏校說文亦取其說。于肉部附胸忍二文。此碑出於後漢。文云。高祖父敏。巴郡胸忍令。字畫分明。胸忍蟲亦不載于爾雅。則知無稽之談不可信矣。



蜀石闕

蜀侍中楊公闕。見于牛運震金石圖。云在梓潼縣。隸體頗似漢人。予謂是褚峻僞作。蓋昭烈父子。建號成都。稱漢不稱蜀。卽李氏據蜀。前稱成。後稱漢。亦未以蜀爲國號。唯唐末王建。孟知祥。始自稱蜀耳。此闕既不似唐以後款式。何得有蜀之名乎。作僞心勞。自露破綻。不必論書法之工拙也。

楊紹買地券

周密癸辛雜識云。今人造墓。必用買地券。以梓木爲之。朱書云。用錢九萬九千九百九十文。買到某地云云。此村巫風俗如此。殊爲可笑。及觀元遺山續夷堅志。載曲陽燕川青陽墳。有人起墓。得鐵券。刻金字云。敕葬忠臣王處。存賜錢九萬九千九百九十九貫九百九十九文。此唐哀宗之時。然則此事由來久矣。頃歲山陰童二如游洛陽。得石刻一方。其文云。大男楊紹。從土公買冢地一邱。東極闕澤。西極黃滕。南極山背。北極於湖。直錢四百萬。卽日交畢。日月爲證。四時爲任。太康五年九月廿九日。對共破荊民有私約如律。卽律字令。蓋晉時所刻。乃知人家營葬。向土公買地。其說相承已久。不始於唐世。惜乎遺山草窗兩公。未得此異聞也。

馮本紀孝碑

高陵縣有唐馮府君碑。題云。大唐故亳州錄事參軍上騎都尉馮府君紀孝之碑。正議大夫□□□書少

□□朝隱撰。嗣子銀青光祿大夫留直昭文館上柱國長樂縣開國男敦直書。府君諱本。字□□長樂信都人也。以咸亨四年卒。先天元年樹碑。碑已中斷。損五十餘字。顧氏金石文字記。前載亳州錄事參軍殘碑。後載馮本殘碑。分子于咸亨先天之世。蓋得兩段拓本。而不悟其爲一石也。唐書文藝傳有閻朝隱。先天中爲祕書少監。此碑結銜有書少二字可辨。祕字亦存其半。知爲閻朝隱撰矣。

### 茹守福墓誌

茹姓始見于南北朝。不知其氏族所出。今紹舉多茹氏。予同年三樵郡丞名敦和。績學能古文。予嘗問其氏族。答云未詳。恐卽如之別體。魏有如瀆。注漢書。而未有它證也。頃見唐人墓誌題云。大唐故朝散大夫宮苑總監上柱國茹府君墓誌。文稱君諱守福。京兆人也。蓋周之遺苗。鄭之遠裔也。昔六國分峙。茹姬爲魏后之妃。七雄並爭。茹耳爲韓王之相。乃信茹如果一字。碑立于開元十一年。唐人多明譜學。良足徵信。惜乎三樵已逝。未得相與論定也。左氏傳。鄭有公子班。字子如。見成鄭公族多以王父字爲氏。故知如姓出於鄭。廣韻如姓但舉馮翊如瀆。而不云出自姬姓。茹字下但舉虜復姓普陋茹。不及漢姓。斯爲闕漏矣。守福卒于開元十一年八月。誌云享年三百三。甲子四旬有二日。蓋用絳縣紀年之法。其壽當不盈五十也。

### 北嶽神廟碑

崔鑲書北嶽神廟碑。金石文字記不得其年月。乾隆庚戌秋。予游曲陽。謁嶽廟。摩挲碑陰。後題大唐□□。三年歲次乙亥閏十一月壬午朔廿二日癸卯。蓋開元廿三年也。又王知新書修北嶽廟碑。金石文字記亦無年月。此碑上截已斷。題額無存。而未行歲在丙子十月癸亥朔數字尙可辨。其時唐亡已十年矣。王處直爲易定節度使。與河東爲唇齒。當仍稱天祐十三年矣。亭林嘗親到碑所。自言倉卒求梯不得。止就下方讀之。宜不及細審也。

雲麾將軍李秀碑

李北海書。雲麾將軍李秀碑。世所傳者。唯順天府學文信國祠斷石二片。孫承澤言。萬歷初。宛平令李蔭署中。掘地得六礎。洗視乃此碑。存者百八十餘字。碑首存唐故雲三字。因築室砌之壁閒。名曰古墨齋。後移少京兆署中。止二礎。其四礎相傳萬歷末。王京兆惟儉攜之大梁。今文信國祠中石。卽少京兆署之二礎也。嘉慶元年。予從吳縣蔣上舍元城齋。假得未斷本兩册。尙存八百餘字。神采煥然。洵希世之珍。但經裝界之後。顛倒錯亂。不能尋其句讀。而碑首唐故雲麾將軍左豹韜衛翊府中郎將遼十六字。後題天寶元載歲在壬午正月丁未朔。字尙完好。

諸暨令郭密之詩

郭密之五言詩二篇。一題□使永嘉經謝公石門山作。天寶八載冬仲月勒。一題永嘉懷古。不見年月。皆

刻于青田之石門洞崖壁。前人錄金石者皆未之及。今芸臺中丞兩浙金石記始著之。詩古淡近選體。石門尚有徐嶠張愿詩刻。皆開元天寶閒人。崖石鑿損。唯姓名厪存。詩句莫能辨識矣。

### 王顏追樹十八代祖晉司空碑

予向得此碑。攷晉書紀傳。無司空王卓名。斷爲碑誤。頃讀後漢書順帝紀。陽嘉三年十一月。光祿勳河東王卓爲司空。章懷太子注。卓字仲遼。河東解人。乃知顏所稱十八代祖者。蓋卽其人。然後漢之司空。非晉之司空也。唐人重氏族之學。而敘述先世。昧於朝代。猶若此。晉亦有王卓。襲祖爵京陵公。官止給事中。未嘗任三公。其祖父名亦與碑不同。

### 楚金禪師碑

楚金禪師碑。前題紫閣山草堂寺沙門飛錫撰。正義大夫行中書舍人翰林學士上柱國東海男賜紫金魚袋吳通微書。按唐初以中書舍人掌制命。無內外制之分。明皇始置翰林學士。掌內制。而中書舍人但掌外制。文苑英華。以中書外制。翰林內制。分爲二門。此唐宋兩制故事也。論委任之清切。則內制優於外制。而攷之史傳。往往有由學士遷舍人者。初亦不解其故。後讀洪氏翰苑羣書所載唐人題名。始豁然省悟。蓋學士一官。本無品秩。常以它官供職。自京縣尉以及常參官。諸曹郎中。員外郎。並可充選。卽遞遷至侍郎。左右丞。尙書。其內直如故。故有內相之稱。而卽爲入相之階。其掌外制者。亦多用它官兼攝。謂之知

制誥。其真除舍人者。蓋寥寥矣。舍人爲五品清要官。故常爲翰林序遷之階。由學士遷舍人。仍掌內制。非兼掌內外制。亦非左遷外制也。唐書通微傳。自壽安縣令入爲金部員外郎。召入翰林學士。尋改職方郎中。知制誥。改禮部郎中。尋改中書舍人。蓋通微以金部員外郎入院。三遷至舍人。而學士之職如故。觀此碑結銜。則知通微官爲舍人。職仍學士。非與本傳相牴牾也。

湖州府天寧寺石幢

湖州府天寧寺石幢。竹垞先生僅見其八。予嘗屬沈學士咸熙盡拓其文見詒。較竹垞所得。又益其二。今著其目。一爲會昌元年十一月胡季良書。後題幢主姚仲文等造。一爲會昌三年十月僧令洪書。大中元年十一月重建。後列湖州刺史令狐綯等名。一爲大中二年八月曹巨川書。後題湖州刺史蘇特名。一爲大中十一年四月凌渭書。後列功德主王用爲亡妣沈氏夫人建。其一亦凌渭書。年月並同。而所書者乃大佛頂首楞嚴經也。一爲咸通十年六月馮卯書。一爲咸通十一年三月建。不見書人姓名。後列軍事押衙陳珏等名。一爲乾符五年□月立。後題弟子范信爲亡妻韓氏卅二娘子建。亦無書人姓名。又二幢皆不見年月。一爲周德書。後題徐師範及母王氏名。其一殘缺。有處士胡季良姓名。疑卽季良書也。諸幢皆書尊勝陀羅尼經。唯凌渭第二幢乃大佛頂首楞嚴經。曹巨川所書乃六種真言。竹垞槩以尊勝經題之。亦未核。

### 竹林寺石幢

臨安縣西三里有海會寺。吳越之竹林寺也。寺有石幢二。其一刻佛說守護國界主陁羅尼經。其一刻佛說千手千眼觀世音菩薩廣大圓滿無礙大悲心陁羅尼經。經後皆有記。末云時寶大元年歲次甲申五月一日。最後題天下都元帥吳越國王鏐建。十一字特大。蓋雖自立年號。而不改國王之稱。亦不以吳越加于年號之上。示不敢當尊也。其後文穆嗣位。承遺命用中朝年號。然年號上亦不加大唐大晉大漢大周字。予所見蕭山化度寺石幢。題長興四年三月。無唐字。杭州下天竺開路記。題天福四年五月。天台高明寺石幢。題天福二年七月。杭州虎跑寺石幢。題天福八年。水樂洞淨北禪院記。題開運三年二月。皆無晉字。虎跑寺石幢。題乾祐二年七月。石屋洞石觀音像讚。題乾祐二年九月。皆無漢字。飛來峯滕紹宗造像。題廣順元年四月。蘇州虎邱山石幢。題顯德五載。又皆無周字。唯文穆王神道碑。爲朝廷宣賜。宰相和凝奉敕撰文。故碑首題大晉云云。若尋常文字。不繫彼國。示非所屬也。南唐龍光寺碑。題開寶紀年。而不稱宋。亦此意。

### 慈雲嶺石刻

杭州慈雲嶺石壁。有吳越鑄字八行文。文云。梁單闕之歲。興建龍山。至澹灘之年。開慈雲嶺。便建西關城宇。臺殿水閣。今勒貞珉。用紀年月。甲申歲六月十五日。吳越國王記。凡四十九字。小篆極端整。按甲申爲後

唐同光二年。梁末帝已於前一年自焚死矣。梁有國一十七載。兩值卯年。一爲開平丁卯。一爲貞明己卯。以下文甲申推之。則龍山興建必在貞明五年也。武肅於戊辰歲建元天寶。甲申歲改元寶大。此刻不用紀年。亦當不書中朝國號。且唐已滅梁。舍新興之唐號。而記已廢之梁年。其故殊難解。

吳越武肅王廟碑

會稽志。吳越武肅王廟。在府南四里三百二十六步。有巨碑。舊在廡下。今乃立荒園中。皮光業之詞也。具載唐長興七年。吳越王棄宮館。後二年。嗣王建廟於越。按長興後唐明宗年號。止於四年而崩。歷閔帝。清泰帝。凡三年。而晉高祖卽位。改元天福。若不數閔帝清泰。則七年乃天福元年。劉恕吳越紀年。稱天福元年七月乙卯。立武肅王廟於東府。今攷之碑。與紀年雖不同。其實皆歲丁酉。清泰廢閔帝爲鄂王。晉祖追貶清泰爲庶人。皆削其年號。而天福改元。以其年十一月。則十一月以前。皆長興七年矣。漢高祖削晉出帝開運之號。稱天福十二年。亦用此比也。然武肅王實以壬辰歲薨。文穆王襲位。壬辰蓋長興三年。不得云長興七年。吳越王棄宮館。後二年。嗣王建廟於越也。按五代史。及劉恕紀年開皇紀。吳越備史。皆言武肅王以三年薨。則碑爲誤。然碑當時立。光業爲其國丞相。亦不應誤繆至此。蓋皆不可知。予讀此志。蓋疑有年。近錢唐何夢華游武康。得風山靈德王廟碑。寄示。後題寶正六年。重光單闕歲。乃始豁然有悟。蓋武肅本以寶正七年壬辰薨。實後唐長興三年。光業以吳越國相。製碑刻石。其必稱寶正。不稱長興。無可疑。

者。厥後忠懿入朝。諱言改元事。乃磨去寶正。易以長興。非復元刻之舊矣。長興紀號。止于四年。其所以得有七年者。則會稽志已詳言之。蓋石敬瑭起兵并州。尙未建元。又不可用清泰之號。當時必仍用長興。如梁元帝稱太清故事。而吳越因借以掩其改元之僭。一時塗飾耳目。不暇計其事迹之不合耳。予又記王象之輿地碑目。有吳越會同十年石刻。此契丹年號。本晉開運四年。晉亡而漢尙未興。其時吳越又不改元。不得不用契丹之元矣。遼史稱太宗入汴。改會同十年爲大同元年。今據王象之所錄。兩浙福建。皆有會同十年石刻。未有稱大同者。則是契丹入汴後。頒詔天下。實用會同十年之號也。其後草草北還。旋即殂殞。雖有改元。亦無承用者。辭歐二史。所以沒而不書歟。

### 溪州銅柱記

溪州銅柱記。馬希範據湖南時所立。其誓文首云天福五年正月十九日。而不題大晉。其誓祠云蒙王庭發軍收討。又云歸明王化。又云凡是王庭差綱收買溪貨。并都幕探伐土產。不許輒有庇占。蓋其時知有藩鎮。不知有朝廷久矣。記後列銜名。吳氏十國春秋並不載。吾友武虛谷授堂題跋。始具錄之。記文空處。多攙入宋人題名。字迹較劣。而知州通判。都監。鈐轄。皆宋時官名。斷非天福元刻。虛谷未及別白也。宋史西南溪峒諸蠻傳。彭氏有文綰者。知中彭州。卽忠順州也。石刻有知忠彭軍州事彭文綰。蓋卽其人。中忠字互異。當依石刻爲正。傳稱文綰以景德二年知忠彭州。天聖三年爲彭儒猛所殺。則題名當在天聖以



前也。吳志伊未見石刻。所載記文多誤。又不錄誓文。予所藏本。乃畢尙書總制楚中時所貽。此柱今在永順府境。人跡罕至。椎拓頗不易。

石刻詩經殘本

後蜀石刻詩經殘本。起召南鵲巢。至邶風二子乘舟止。經注皆完好。經文之異于今本者。江有汜之子歸。歸上有于字。三章皆同迨其今兮。其作及。不我能愴。不下有以字。昔育恐鞠。無下育字。泄泄其羽。泄作洩。則承開成石經之舊。爲唐諱也。經注中淵字。民字亦缺筆。孟氏雖竊帝號。猶爲唐高祖太宗避諱。可見武德貞觀之澤久而未亡。而孟氏父子居心忠厚。亦有君人之量焉。碑於察字皆作察。蓋避知祥祖諱。而于知字卻不避。當依古人二名不偏諱。唯避下一字耳。歐公五代史云。知祥父名道。蜀檣杙則云名嚙。此刻道字屢見。皆不缺筆。似歐史誤也。册尾有廣仁義學圖記。蓋錢唐黃松石家所藏。厲太鴻賦詩。卽是此本。流轉它姓。今爲吳中黃蕘圃所得。惜周南十一篇及鵲巢序遺失不可問矣。蜀石經刻於開成石經之後。南宋之世。完好無恙。而元明儒從未有寓目者。殆由宋季失蜀之後。兵燹塗炭。靡有子遺。予訪求五十年。不得隻字。昨歲始見左傳殘本。僅字。今復見此刻經注。萬有餘言。真衰年樂事也。

經筵薦士章稿

陳襄經筵薦士章稿。淳祐元年。其五世從孫塏。刻石於平江憲治。不知何時移置蘇州府學。襄所薦三十

三人宋史無傳者。唯虞太熙、吳賁、吳恕、劉載、林英、孫奕、鄒何七人。虞太熙，宜興人。皇祐二年進士。官至侍講。見咸淳毘陵志。林英，元豐二年爲淮南東路提點刑獄。元祐五年五月，衛尉少卿林英提舉集禧觀。英以疾自請也。見李氏通鑑長編。孫奕名亦見毘陵志。云慶歷二年楊寘榜進士，而事迹闕如。未審卽襄所薦否。又婺州題名碑有孫奕。嘉祐五年以駕部員外郎知婺州。改虞部郎中。攷襄薦士在熙寧中。嘉祐在熙寧前十有餘載。其時階已至前行郎中。而此奏云都官員外郎監泗州河南轉般倉。資歷久而班秩轉下。疑非一人。

### 趙崇雋壙誌

嘉慶丁巳八月二十八日。予在吳門。游法螺庵。見壁間倚一石。覆視之。其額篆書橫列。宋故通判趙公壙誌。凡八字。文云。先兄通判諱崇雋。字彥伯。隸漢郎裔。孫秉義郎。累贈奉直大夫。不迷之曾孫。左朝散大夫。累贈銀青光祿大夫。善良之孫。朝議大夫。試太府卿。淮西總領。通誼大夫。汝誼之長子。卒於嘉定甲申三月五日。葬於吳縣至德鄉茶塢山之原。末題孝弟通直郎。新知湖州烏程縣。主管勸農營田公事。賜緋魚袋。崇修。按淚拜書。今以宋史宗室世系表攷之。蓋太宗子漢王元佐生密國公允言。允言生南康郡王宗立。宗立生仲琳。仲琳生士顥。士顥生不迷。崇雋爲不迷曾孫。實太宗九世孫也。系出漢王房。故云隸漢郎。善良以下三世名皆與表合。而表不書其官。蓋表所載諸人官爵。至不字輩而止。此外如汝愚、崇憲、必愿

等。勛名顯達，皆僅書名。表例如此，然亦難逃點鬼簿之誚矣。相傳崇雋爲宦光之先世，今無可攷。特書以補郡志冢墓之闕。

永清縣宋石幢

永清縣南辛溜村大佛寺有石幢。周遭鑄智炬如來心破地獄真言。其末云：大宋燕山府永清縣景隆鄉新留里王士宗奉爲亡考特建頂幢一口。亡耶耶王安、娘娘劉氏、亡父文清、母梁氏、亡伯文佐、亡叔文思、男六人、士宗、妻劉氏、士言、妻郝氏、士英、妻楊氏、士廉、妻孫氏、僧恆企、士忠、妻寇氏、女楊郎婦。維宣和七年十一月戊辰朔五日壬申日丙時建。按宋石刻所在多有，唯燕山一路不在宋疆域之內。宣和暫復，不旋踵失之。今京城內外絕無宋片碣，而此幢歸然於小邑荒邨。朱氏日下舊聞亦未采入，故表而出之。辛溜卽新留，土人相沿譌變，而音不異。其稱大父耶耶，則北人猶有此稱。大母曰娘娘，則未之聞也。又縣南信安鎮龍泉寺有金大定三年碑，其文亦有王孝子耶耶之文，當亦謂其大父耳。僧恆企一人列於六子之數，蓋出家爲僧者。

史氏墓三碑

元史史天倪、天澤、大都永清人。今縣之焦堡邨史氏墓在焉，有三碑。一爲史氏慶源之碑，前北京路行尙書六部郎中崔鉉撰。宣差五路萬戶府詳議官趙安世篆額。平元書丹。碑末題歲在庚子九月丙戌十七

日戊寅前行北京等路六部尙書史秉直立石。前義州節度使行北京都元帥史進道同立。一爲大朝故北京路行六部尙書史公神道碑。雲中劉祁撰。燕然平元書。齊西趙安世篆額。碑末題歲乙巳九月四日宣差眞定等五路萬戶男天澤同立。宣權眞定等五路萬戶男天安立石。一爲義州節度使行北京路兵馬都元帥史公神道碑。陳臺段紹先撰。燕然平元書。丹。詳議官趙安世篆額。碑末題乙巳年五月日宣差眞定河間大名濟南東平五路萬戶姪史天澤同立。宣權眞定等五路萬戶兼知中山府事姪史天安立石。其云北京路行六部尙書者。秉直也。其云北京路兵馬都元帥者。秉直之弟進道也。秉直事元史附見於其子天倪傳。而進道不見其名。且職任亦不卑。可以補正史之闕。慶源碑載其三世子女嫁娶最詳。秉直長女爲太師國王夫人。其事不見於它書。史氏父子兄弟各以功名自立。要亦連姻貴族所致。論史者不可不知也。

### 朝城縣令旨碑

朝城縣興國寺有令旨碑。一爲合刺查太子令旨。猴兒年三月初七日和林城子寺裏寫來。一爲皇子忽察大王令旨。乙巳年九月初三日合刺腦兒寫來。一爲密里吃臺太子令旨。不見年月。皆刻于一碑。合刺查者。太宗第四子哈刺察兒也。忽察者。定宗長子忽察大王也。密里吃臺者。闊端太子之子滅里吉歹王。本太宗之孫。當時亦通稱太子也。第三道旨云。據公主百戶駙馬會都地面裏朝城縣。按食貨志。鄆國公

主位丙申年分撥濮州三萬戶。朝城爲濮州屬縣。卽其分地。又公主表有瓮吉八忽公主。適赤窟孫懷都駙馬。懷都卽碑所稱會都。聲相近也。其云道與□囉歹嚴相公者。東平行臺嚴實子忠濟也。其稱匣合皇帝。在成吉思皇帝之後。□皇帝之前。則太宗也。元初風俗質朴。太祖成吉思之號。生前所上。太宗而下。皆以名稱。太宗之名。史作窩闊台。祕史作幹歌歹。予所見元聖旨碑。或作月古台。此又作匣合。譯音初無定字。當時不以爲嫌也。乙巳爲太宗六皇后稱制之第四年。定宗尙未立。而其子已稱皇子。蓋人心推戴非一日矣。猴兒年當是太宗八年丙申。而未一道亦必在定宗后稱制時。蓋憲宗時太宗子孫皆擯斥不復用事矣。

勢都兒大王令旨碑

勢都兒大王令旨碑。首云皇帝福廕裏勢都兒大王令旨。今有本投下分撥到萊州神山長生萬壽宮石真人。依舊加九陽保德純化真人。末云至元十六年七月十三日。察罕惱兒有時行。按宗室世系表。勢都兒者。太祖弟撈只哈撒兒之孫。而移相哥大王之子也。此碑在掖縣城東三十里道士石之溫墓上。掖爲萊州倚郭縣。而州又隸于般陽府路。元初以般陽路爲哈撒兒王分地。故有本投下之稱。此與朝城令旨碑。皆錢唐朱文藻朗齋所貽。

東鎮廟元碑

錢唐何元錫夢華言嘗見東鎮廟時享記云至正八年正月遣翰林學士承旨臣咬住翰林待制臣遠者圖以二月初有六日至于岱宗以初有七日至于東海咸致享焉所□非有先後之殊蓋從驛傳便也越十有四日至于東鎮沂山元德東安王廟廷其儀則香一銀盒幣二錦旛寶楮伍百兩有司具牲酒庶品以薦案祭祀志嶽鎮海瀆代祀自中統二年始凡十九處分五道後分爲東南西三道既而以驛道迂遠復爲五道東嶽東海東鎮爲東道也其禮物則每處歲祀銀香盒一重二十五兩五鎮銷金旛二鈔二百五十貫較之石刻寶楮五百兩僅得其半豈史所載爲初制其後倍增之歟順帝紀至正八年不載此事蓋史之闕也予攷古人紀日自一日至十日未有加初字者宋金石刻題名始有初一初二之稱此刻云初有六日初有七日尤復杳可笑矣

王介甫集中唯高陽郡君齊氏墓志有云五月初三月初八日餘篇無此例蓋刊校者妄益之耳



# 十駕齋養新錄卷第十六

## 詩句中有韻

詩三百篇。往往句中有韻。韻不必在句尾也。周南于嗟麟兮。句似無韻。實與章首麟之趾相應。以兩麟字爲韻也。召南于嗟乎騶虞。乎與虞韻。秦風于嗟乎不承權輿。乎與輿韻。鄘風期我乎桑中。要我乎上宮。中與宮韻。桑與上亦韻也。邶風有瀾濟盈。有鷺雉鳴。盈與鳴韻。瀾與鷺亦韻也。唐風角枕粲兮。錦衾爛兮。粲與爛韻。枕與衾亦韻也。大雅文王曰咨。咨女殷商。二句似無韻。而王與商。文與殷皆韻。咨咨亦韻。韻不必在句尾也。魏風父曰嗟。予子行役。母曰嗟。予季行役。兄曰嗟。予弟行役。子與已。止韻。季與寐。棄韻。弟與偕。死韻。此韻不在句尾之證也。

## 雙聲亦韻

雙聲亦可爲韻。小雅決拾既伙。弓矢既調。射夫既同。助我舉柴。伙柴固韻。調同雙聲。亦韻也。自有文字。卽有聲韻。虞廷賡歌。股肱叢脞。卽雙聲之權輿。皮襲美雜體詩序。以蝮螫在東。鴛鴦在梁。爲雙聲始興。何所見之不廣也。

## 古人聲韻之密



史記淳于髡傳。甌窶滿箒。汚邪滿車。五穀蕃熟。穰穰滿家。四句不獨車與家韻也。甌窶與箒韻。汚邪與車韻。穀與熟韻。蕃與滿韻。穰穰重文。亦韻。五與車家亦韻。蓋無一字虛設矣。左傳讒鼎之銘曰。昧且丕顯。後世猶怠。昧與丕。且與顯。後與猶。世與怠。皆韻也。

雙聲

六朝人重雙聲。雖婦人女子皆能辨之。自明以來。士大夫談詩。各立門戶。聚訟紛興。而於雙聲之顯然者。日習焉而不知。蓋八股取士所得。皆束書不觀。游談無根之子。衣鉢相承。轉以讀古書爲務外。能辨平側者少矣。況能究喉舌脣齒之清濁乎。

南史羊戎好爲雙聲。江夏王義恭嘗設齋。使戎布牀。須臾王出。以牀狹。乃自開牀。戎曰。官家恨狹。更廣八分。文帝好與元保戎之奕。嘗中使至。元保曰。今日上何召我耶。戎曰。金溝清泚。銅池搖颺。旣佳光景。當得劇棋。

王融詩。園蘅眩紅蘼。湖荇燁黃花。迴鶴橫淮翰。遠越合雲霞。雙聲之體始于此。

北史魏收傳。博陵崔巖。嘗以雙聲嘲收曰。愚魏衰收。源古開本作遇魏收。衰下有又有曰愚魏三字。魏答曰。顏巖腥瘦。是誰所生。

羊頤狗頰。頭團鼻平。飯房笞籠。著孔嘲玎。孔當作札。

洛陽伽藍記。隴西李元謙能雙聲語。嘗經郭文遠宅。問曰。是誰宅第。婢春風曰。郭冠軍家。元謙曰。此婢雙

聲春風曰。儂奴慢罵。

皮日休雙聲溪上思云。疎杉低通灘。冷鷺立亂浪。艸彩欲夷猶。雲容空淡蕩。唐詩紀事

溫庭筠有李先生別墅。望僧舍寶刹。作雙聲詩。栖息消心象。簷楹溢豔陽。籬櫺蘭露落。鄰里柳林涼。高閣過空谷。孤竿隔古岡。潭庭同淡蕩。髣髴復芬芳。

東坡戲作切語竹詩。隱約安幽奧。蕭騷雪藪西。交加工結構。茂密渺冥迷。引葉油雲遠。攢叢聚族齊。奔鞭迸壁背。脫箨吐天梯。煙篠散孫息。高竿拱楸枅。漏闌零露落。庭度獨螭啼。掃洗修纖筍。窺看詰曲溪。玲瓏綠醞醴。邂逅盍閒攜。

又戲和正甫一字韻詩。故居劔閣隔錦官。柑果薑蕨交荆菅。奇孤甘挂汲古綆。僥覲敢揭鉤金竿。已歸耕稼供藁秸。公貴幹蠹高巾冠。改更句格各蹇吃。姑固狡獪加開關。

又西山戲題武昌王居士。江干高居堅關扃。韃耕躬稼角挂經。篙竿繫舸菰菱隔。笳鼓過軍雞狗驚。解襟顧景各箕踞。擊劔廣歌幾舉觥。荆筭供膾愧攪聒。乾鍋更夏甘瓜羹。

又江行見月四言詩。吟哦傲岸。仰晤巖月。遇巘迎崖。銀釧玉斲。龍魚噉嚼。雁鵝噪吼。臥玩我語。齜牙岌業。姚合洞庭葡萄架詩。葡萄洞庭頭。引葉漾盈搖。皎潔鉤高掛。玲瓏影落寮。陰煙厭幽屋。濛密夢冥苗。清秋青且翠。冬到凍都凋。第四句影字非雙聲恐誤。

沈約韻不同于今韻

唐人韻以庚、耕、清同用。青獨用。相沿至今。千有餘年矣。然青之與清。實無分別。世謂今韻權輿于周沈。而休文郊居賦。以星、平、形、經、成、垌、縈、青。爲一韻。則休文初未析清青爲二也。

七言在五言之前

楚詞招魂。大招。多四言。去些只助語。合兩句讀之。卽成七言。荀子成相。荆軻送別。其七言之始乎。至漢而大風、瓠子。見於帝製。柏梁聯句。一時稱盛。而五言靡聞。其載於班史者。唯邪徑敗良田童謠。出于成帝之世耳。劉彥和謂西京詞人遺翰。莫見五言。所以李陵班婕妤好見疑于後代。又謂古詩佳麗。或稱枚叔。則彥和亦未敢質言也。鍾嶸詩品云。古詩其體源出于國風。去者日已疏。四十五首。疑是建安中陳王所製。文選所錄古詩十九首。未審卽在鍾氏四十五篇之數否。要之。此體之興。必不在景武之世。觀漢書李陵傳。置酒起舞作歌。初非五言。則知河梁唱和。出于後人依託。不待盈觴之語。觸犯漢諱。始決其作僞也。枚叔又在蘇李之前。班史不言有五言詩。其爲臆說。毋庸置辨矣。虞姬歌不見于史。漢諒亦出於依託。白頭吟見沈休文宋書。但云古辭。不言何人作。唯西京雜記。有卓文君作白頭吟自絕之語。亦不載其詞。且雜記出吳均之手。豈足信乎。

古詩律詩之別

唐人詩自開元天寶以前未有古律之分。大歷貞元詞句漸趨穩順。白樂天自言新舊詩各以類分。有諷諭詩。有閒適詩。有感傷詩。又有五言七言長句絕句。自一百韻至兩韻者。四百餘首。謂之雜律詩。是絕句亦律詩之一體。未嘗別而異之也。元微之詩亦以類相從。分爲十體。曰古諷。曰樂諷。曰古體。曰新題樂府。曰悼亡。曰豔詩。曰古豔。其聲勢沿順。屬對穩切者爲律詩。仍以七言五言爲兩體。其中有稍存寄興與諷爲流者。爲律諷。古律之別。其在元和之世乎。李漢編次昌黎集。亦分古詩。聯句。律詩爲三體。韓與元白同時。

### 陶靖節詩

陶淵明贈羊長史詩序云。左軍羊長史。銜使秦川。作此與之。羊名松齡。不見晉宋二史。其詩云。九域甫已一。逝將理舟輿。當在義熙十四年滅姚泓後。羊爲左軍長史。必朱齡石之長史矣。唯史稱齡石以右將軍領雍州刺史。而此云左軍。小異。攷宋書齡石傳。義熙十二年已遷左將軍矣。左右將軍品秩雖同。而左常居右。上齡石之鎮雍州。必仍本號。不應轉改爲右。則此云左軍者爲可信。

### 聯句

七言聯句。人各一韻。韻必七字。漢武柏梁。濫觴于始。厥後謝太傅之詠雪。殷仲堪之危語。了語。流播人口。五言聯句。陶靖節始有之。人各兩韻。所與聯者。惜之。循之。其姓與爵里不可攷。謝元暉阻雪一篇。與江秀

才革、王丞融、王蘭陵僧孺、謝洗馬吳、謝中郎綏、沈右率約聯句。又有聯句六篇。蓋在宣城作。故署府君而不名。其與聯者。何從事吳、郎陳、郎曹丞、齊舉、郎惟紀、功曹晏、稱名。唐中宗降誕日。內殿宴羣臣。聯句。帝首作潤色。鴻業寄賢才句。宰相李嶠以下。至上官婕妤。凡十四人。繼之。用柏梁故事。嗣後御大明殿。觀吐蕃騎馬。戲重爲柏梁體聯句。則韋后、長寧、安樂、太平公主皆預焉。

詩集附它人作

謝宣城集附王融、沈約、虞炎、柳惲詩。皆同詠一題。杜工部集附李邕、賈至、嚴武、高適、郭受、韋迢諸人。皆酬贈之作。唯元次山春陵行、賊退示官吏兩篇。重其詩。因重其人。故特錄之。此又一例也。

杜少陵詩用韻

杜子美石壕吏詩。暮投石壕村。有吏夜捉人。老翁踰牆走。老婦出門看。顧寧人謂下二句無韻。非也。寒、桓與魂、痕。古韻本相通。

雨晴詩。天際秋雲薄。從西萬里風。今朝好晴景。久雨不妨農。寒柳行疏翠。山梨結小紅。胡笳樓上發。一雁入高空。按廣韻。一東部無農字。乃張仲素稼如雲賦。官限農字。賦中押同功終字。全入東韻。正與杜雨晴詩同。蓋唐時東冬兩部皆有農字。後來刪去其一耳。

西川有杜鵑。東川無杜鵑。涪萬無杜鵑。雲安有杜鵑。此用古樂府魚戲蓮葉東。魚戲蓮葉西。魚戲蓮葉南。

魚戲蓮葉北體也。湯盤銘三句皆用日新。古人已開其先。後人詫爲異事矣。

### 少陵生卒年月

元微之誌子美墓云。享年五十九。而不言卒于何年。舊唐書云。永泰二年卒。永泰二年。卽大歷之元年。是歲丙午。則當生于景龍二年戊申矣。按子美追酬故高蜀州人日見寄詩。序云。大歷五年正月二十一日。則大歷庚戌春尙无恙。謂卒于永泰二年者誤也。唐詩紀事。謂先天元年癸丑生。大歷五年辛亥卒。似矣。而干支卻差一歲。蓋先天改元實壬午。大歷五年實庚戌也。吳曾漫錄。引鮑彪杜詩譜云。大歷四年己酉。年五十八。干支雖合。卻非卒年。

### 飲中八仙

范傳正撰李太白墓碑云。時人以公及賀監、汝陽王、崔宗之、裴周南等八人爲酒中八仙。按子美飲中八仙歌無周南名。蓋傳聞異詞。唐書李白傳載酒八仙人姓名。與杜詩同。

### 亞相

少陵哭韋大夫之晉詩。漢道中興盛。韋經亞相傳。漢以御史大夫爲亞相。之晉官湖南觀察使兼御史大夫。故以亞相目之。傳經雖韋氏故事。然賢與元成兩世丞相。非終于御史大夫也。

### 頻煩

頻煩、漢人語。蜀志費禕傳以奉使稱旨。頻煩至吳是也。晉書紀瞻傳。頻煩饕竊。庾亮傳。沐浴芳風。頻煩省闈。周書太祖紀。頻煩請謁。至于再三。劉知幾史通書志篇。頻煩互出。雜說篇。詔策頻煩。皆取頻仍之義。亦作頻緜。晉書王濟傳。蒙國厚恩。頻繁寵擢。繁煩同音。亦同義也。杜詩三顧頻煩天下計。正用蜀志。漢書王莽傳。非皇天所以鄭重降符命之意。師古注。鄭重猶頻煩也。古人以鄭重爲重疊之義。鄭重頻煩。皆雙聲。友于

一重一掩吾肺腑。山鳥山花吾友于。或疑友于歇後語。不可以偶肺腑。予謂唐人精於聲律。肺腑友于。雖虛實不同。而皆爲雙聲。故可屬對。猶王子安滕王閣詩序。以邱墟對已矣也。予聞之大父云。

分減

杜子美秋野詩。盤飧老夫食。分減及溪魚。梁侍御曰緝。謂分減二字見華嚴經。王阮亭。汪鈍庵兩公極稱之。以爲注家所未及。吾友惠徵士松厓云。東觀漢記。孔奮篤骨肉。弟奇在洛陽。每有所食甘美。輒分減以遺奇。見御覽四。百十七卷。此分減二字所本。華嚴唐人所譯。未可以注杜詩也。大昕按。陳書姚察傳。常以己分減推諸弟妹。分當讀去聲。

少陵用辭據詩

唐詩紀事。省署開文苑。滄浪學釣翁。薛據詩也。子美懷據詩乃云。獨當省署開文苑。兼泛滄浪學釣翁。

韋左司

韋應物詩。持索捕風。幾時得。將刀斫水。幾時斷。裴度記毛仙翁事亦云。先儒以爲繫風捕影。施肩吾詩。落盡萬株紅。無人解繫風。又攷牟融理惑論云。神仙之書。聽之則洋洋盈耳。求其效。猶握風而捕影。是漢人已有斯語。

### 乾愁乾忙

南史范蔚宗傳有乾笑字。韓退之詩。乾愁漫解。坐自累。與衆異趣。寧相親。王介甫詩。賴付乾愁酒一樽。謂空愁而無益也。偶桓詩。白首乾忙度歲時。又云。乾忙雖是紅塵冷。須聽幽禽快活吟。亦謂空忙而無用也。

### 旬

古人以十日爲旬。故旬字从日。漢魏六朝人文字。從無稱十年爲旬者。唯白樂天偶吟自慰兼呈夢得詩。有且喜同年滿七旬之句。自注。予與夢得甲子同辰。俱得七十。則其誤始于唐中葉也。夢得會昌二年卒。樂天會昌六年卒。

### 十字

白樂天詩。十字津頭一字行。十字。卽古人所云午貫也。晉書何曾傳。蒸餅非裂成十字者不食。北史李庶傳。劉家在七帝坊十字街南。水經注濟水渠水篇。並有十字溝。顏魯公家廟碑陰額云。殷夫人居十字街西北壁第一宅。劉禹錫詩。十字清波遶宅牆。

### 衛中立字退之



白樂夫詩。退之服硫黃。一病訖不痊。後人因以爲昌黎晚年惑金石藥之證。頃閱洪慶善韓子年譜。有方崧卿辯證一條云。衛府君墓誌。今本作衛之元。其實中立也。衛晏三子。長之元。字造微。次中立。字退之。次中行。字大受。誌首云兄弟三人。後只云與弟中行別。則其爲中立誌無疑。中立餌奇藥求不死。而卒死。樂天詩謂退之服硫黃者。乃中立也。近世李季可謂公長慶三年作李公墓誌。力詆六七公皆以藥敗。明年則公卒。豈咫尺之間。身試其禍哉。

苜蓿盤

薛令之爲右庶子。開元中。東宮官僚清淡。令之題詩自悼云。朝日上團團。照見先生盤。盤中何所有。苜蓿長闌干。飯澀匙難縮。羹稀筯易寬。無以謀朝夕。何由保歲寒。今人用苜蓿盤以爲州縣教職故事。非也。

杜韋娘詩

劉夢得與杜鴻漸不同時。世傳司空見慣渾閑事。斷盡蘇州刺史腸。詩爲揚州大司馬杜公鴻漸開宴作者。傳聞之妄也。

李正封

今人以李正封詠牡丹詩爲唐明皇時。攷唐詩紀事云。唐明皇好詩。大和中賞牡丹。上謂程修己曰。今京邑人傳牡丹詩誰爲首出。對曰。中書舍人李正封詩。天香夜染衣。國色朝酣酒。時楊妃侍。上曰。妝臺前宜

飲以一紫金盞酒。則正封之詩見矣。大和者。文宗年號。文宗時亦有楊妃。非天寶之楊太真也。後人因明皇有沈香亭賞牡丹事。誤改爲明皇。而不知年號之不合。又正封與韓文公鄜城夜會聯句。在元和十二年。與明皇時代隔遠。其爲文宗非明皇審矣。計氏紀事。編次目錄。列于元和長慶諸家之後。本無舛譌。校刊者以意妄改耳。

### 借韻

五七言近體第一句借用旁韻。謂之借韻。唐詩。犬吠水聲中。桃花帶雨濃。錦幃初卷衛夫人。繡被猶堆越鄂君。始啓其端。至皮陸松陵集。則舉之不勝舉矣。宋人借韻尤多。近代名家。以此爲戒。此後生之勝于前賢者。

### 唐人辨聲韻

唐人喜辨聲韻。雖尋常言語亦不苟。胡曾戲妻族語不正詩。呼十卻爲石。喚針將作眞。忽然雲雨至。總道是天因。陰如因也。

### 金昌緒

金昌緒春怨詩。打卻黃鸝兒。莫教枝上啼。幾回驚妾夢。不得到遼西。昌緒。餘杭人。一作蓋嘉運伊州歌者。非也。然此詩爲嘉運所進。編入樂府。後乃誤爲嘉運作耳。唐詩紀事。

胡釘鉸

胡令能。莆田隱者。少爲負局。餽釘之業。以所居列子之里。家貧。遇茶果必祭列子。以求聰明。或夢人剖其腹。以一卷書內之。遂能吟詠。世謂胡釘鉸者。貞元元和間人。唐詩紀事。

李義山

唐詩紀事。李商隱卒于工部侍郎。按新舊史。商隱未嘗爲此官。不知紀事何據。

晚唐詩

唐末詩人。多以綺麗纖巧爲工。所謂桑間濮上亡國之音也。而昧者轉以爲唐人正聲。謬矣。若司空圖之。解吟僧亦俗。愛舞鶴終卑。曹松之憑君莫話封侯事。一將功成萬骨枯。聶夷中之二月賣新絲。五月糶新穀。醫得眼前瘡。剜卻心頭肉。曹鄴之難將一人手。掩得天下目。趙牧之菖蒲花開魚尾定。金丹始可延君命。語近情深。有三百篇之遺意。

計敏夫云。唐詩自咸通而下。不足觀矣。氣喪而語偷。聲煩而調急。甚者忿目褊吻。如戟手交罵。大抵王化習俗。上下俱喪。而心聲隨之。不獨士子之罪也。其來有源矣。

父母官

王禹偁謫居感事詩。萬家呼父母。百里撫惇嫠。自注。民間呼令爲父母官。又贈浚儀朱博士詩。西垣久望

神仙侶。北部休誇父母官。父母官之稱。自宋初已有之矣。雖然天下無不愛子之父母。而卻有不愛百姓之官。甚至假其勢以恣其殘暴。苟有人心者。能毋顧名而慚且悔乎。唐呂溫守衡州。送毛令終句云。布帛精麤任土宜。疲人識信每先期。今朝臨別無它祝。雖是蒲鞭也莫施。此仁人之言。當官者宜日三省也。

### 王介甫詩

王介甫仁宗皇帝挽詞。厭代人間世。收神天上遊。厭代。卽厭世。莊子天地篇。千歲厭世。去而上仙。是也。一句之中。世代重出。謂介甫精於小學。吾不信也。

介甫詩。北風吹人不可出。清坐且可與君碁。明朝投局日未晚。從此亦復不吟詩。李雁湖注本凡再見。一在第四卷古詩類。一在第四十八卷絕句類。臨川集止於第三卷一見

### 蘇東坡詩

東坡戲作賈梁道詩。嵇紹似康爲有子。郝超叛鑿是無孫。而今更恨賈梁道。不殺公閻殺子元。子弱冠讀晉書宣帝紀。卽疑此詩之誤。蓋王凌爲司馬懿所殺。非司馬師也。懿字仲達。師字子元。東坡誤記此爲司馬師事耳。後廿餘年。讀查初白補注蘇詩。已先我言之矣。生平攷辨。往往有闕合前人者。皆已削稿。恐貽雷同之誚。今老矣。偶記此事。私喜小時妄下雌黃。亦有一得。故特存之。

辭士龍有左角蠻攻觸。南柯檀伐槐之句。王伯厚以爲的對。然左角南柯始于東坡。

馬上續殘夢。唐人劉駕句也。東坡亦用之。坡非肯蹈襲者。蓋關合耳。

蔡確車蓋亭詩

蔡確固是儉人。但以題車蓋亭詩文致其罪。與李定之陷東坡何異。此事起于吳處厚。處厚亦終不得志。此等人天所不祐也。以文字罪人。始于元豐。宣仁臨朝。悉改熙豐弊政。而於蔡確事不免過當。其後卒啓同文之獄。蓋去姦亦須顧大體。不可快心一時。范忠宣以諫此事能相。其識高于人遠矣。

江西派

呂本中江西詩派圖。意在尊黃涪翁。并列陳後山於諸人中。後山與黃同在蘇門。詩格亦與涪翁不相似。乃抑之入江西派。誕甚矣。元遺山云。論詩寧下涪翁拜。未作江西社裏人。又云。北人不拾江西唾。未要會郎借齒牙。遺山固薄黃體而不爲。亦由此輩尊之過當。故有此論。

鼂无咎詩

鼂无咎酬李唐臣贈山水短軸詩。大山宮。小山霍。欲識山高觀石腳。大波爲瀾。小波爲淪。欲知水深觀水津。按爾雅本以大山宮。小山五字爲句。霍一字爲句。无咎誤切爲三字句。

第一山詩

盱眙縣玻璃泉有米元章書第一山三大字。傍題絕句云。京洛風塵千里還。船頭出汴翠屏間。莫論衡霍

撞星斗。且是東南第一山。此初刻也。厥後好事者鈎摹三大字刻之。它所世遂不知此山之在盱眙矣。

### 詩詞蹈襲

兩三條電欲爲雨。七八箇星猶在天。唐人袁郊詩也。元詩載文宗皇帝自集慶路入正大統途中偶吟。亦有二。三點露滴如雨。六。七個星猶在天之句。此好事者偷竊古人句假託爲之。

樂天長相思詞。深畫眉。淺畫眉。蟬鬢髻。雲滿衣。陽臺行雨迴。巫山高。巫山低。暮雨蕭蕭郎不歸。空房獨守時。歐陽公集亦載此詞。吳融有詩云。楚王臺上一神仙。眼色相看意已傳。見了又休還似夢。坐來雖近遠于天。隴禽有恨猶能說。江月無情也解圓。更被春風送惆悵。落花飛絮雨翩翩。歐陽集亦有之。題爲瑞鷓鴣詞。歐公非竊人句爲己作者。偶寫古人句。編次公集者。誤以爲公作。而收入之。党懷英詩。雲山聊欲追螿叟。風腋何妨借玉川。劉迎集中亦有此兩句。元遺山中州集並選之。

### 一集中重複句

名登卻詵第。身著老萊衣。岑參送薛彥偉擢第東歸詩也。又見送蒲秀才擢第歸蜀詩。一樽酒盡青山暮。千里書迴碧樹秋。許渾京口閒居寄兩都親友詩也。又見秋日寄故人詩。看盡好花春臥穩。醉殘紅日夜吟多。譚用之幽居詩也。又見山中春晚寄賈員外詩。春愁寂寞天應老。夜色朦朧月亦香。高啓詠梅詩也。又見和西園公詩。春後春前曾獨采。江南江北每相思。高啓和西園公咏梅詩也。又見和衍師詩。細雨春

歸雁。深山日暮鐘。朱彝尊登觀山詩也。又見青浦道中詩。前賢得意之句。不嫌重用。

楊陸兩公年壽

楊廷秀。陸務觀詩。爲宋南渡名家。名位相若。而皆壽考。放翁以嘉定二年卒。年八十五。此見于宋史本傳者也。而直齋書錄解題云。嘉定庚午。年八十六而終。庚午則嘉定三年也。與本傳殊不合。攷劖南詩集有絕句云。嘉定三年正月後。不知更醉幾春風。則庚午春放翁尙無恙。當以直齋爲正矣。

誠齋以開禧二年卒。年八十三。亦見宋史本傳。據開禧二年。歲在丙寅。則當以宣和六年甲辰生矣。而周益公題三老圖詩自注。乘成兄生於乙巳。予丙午。誠齋丁未。見孫奕示兒編與傳不合。當更攷之。

放翁論詩

陸務觀云。詩欲工。而工亦非詩之極也。鍛鍊之久。乃失本指。斲削之甚。反傷正義。纖麗足以移人。夸大足以蓋衆。故論久而後公。名久而後定。何君墓表

百家姓

陸放翁詩。兒童冬學鬧比鄰。據案愚儒卻自珍。授罷村書閉門睡。終年不著面看人。自注。農家十月乃遣子入學。謂之冬學。所讀雜字百家姓之類。謂之村書。今鄉村小兒所習百家姓一書。蓋猶宋人所習。以趙爲首。尊國姓也。

楊誠齋詩

轎子始于宋時。而詩家罕用。此字楊誠齋獨喜用之。如行到深邨麥更深。放低小轎過桑陰。詩卷且留燈下看。轎中只好看春光。總將枝上雨。灑入轎閒衣。曉過新橋啟轎牕。要看春水弄春光。行到笊橋中半處。鍾山飛入轎窗籬。暖轎行春底。見春遮攔春色不教親。急呼青繖小涼轎。又被春光著莫人。

蠶苴

楊誠齋野薔薇詩。紅殘綠暗已多時。路上山花也則稀。蠶苴餘春還子細。燕脂濃抹野薔薇。按廣韻引玉篇云。蠶苴。泥不熟。貝。蠶。盧下切。湯若士還魂記。有春色蠶苴句。蓋用誠齋詩。

宋正甫

王伯厚記宋正甫詩。三聖傳心唯主一。六經載道不言真。正甫爵里未詳。按虞伯生鶴山書院記。序其大父講學諸人。有唐安宋正仲德之。未審卽正甫否。當攷。

迎富

今人但知送窮。不知迎富。亦有故事。魏華父有二月二日遂寧北郭迎富故事詩云。才過結柳送貧日。又見簪花迎富時。誰爲貧驅竟難逐。素爲富逼豈容辭。貧如易去人所欲。富若可求吾亦爲。里俗相傳今已久。謾隨人意看兒嬉。此蜀中舊俗。不知今尙行之否。



後村詩

詩家詠古。但取對偶精工。不計事迹之然否。如後邨詩。未必朱三能跋扈。祇因鄭五欠經綸。真耳食之論也。朱溫之跋扈久矣。昭宗始立。頗有削平方鎮之志。乃誤用張濬爲相。欲倚汴以圖并。及濬出師。擗。温竟未遣一卒。唐之亡。濬之罪也。鄭繁之相。在乾寧元年。其時國事已不可爲。尋卽辭疾去官。繁於出處無玷矣。歎後作相。時事可知。乃繁自謙之詞。平情論之。則昭宗一朝相臣無出其右者。後邨道聽塗說。豈真有論世之識哉。

論詩絕句

元遺山論詩絕句。效少陵庾信文章老更成。諸篇而作也。王貽上仿其體。一時爭效之。厥後宋牧仲、朱錫鬯之論畫。厲太鴻之論詞論印。遞相祖述。而七絕中又別啓一戶牖矣。

律詩失粘

王阮亭斑管題詩。吳祭酒紅顏顧曲。袁荊州人多笑其失粘。然亦有所本。楊誠齋送何一之右司出守平江詩。人物只今何水部。風流不減章蘇州。一篇八句。獨此句拗。阮亭蓋用其體。前輩一時失檢。卽爲後人文過把柄。如陸放翁字務觀。觀本讀去聲。而當時卽有押入平聲。爲放翁所譏者。朱錫鬯詩。石湖居士范成大。鑑曲詩。人陸務觀。正用此事。所謂明知故犯。欲自矜其奧博也。

水田衣

釋子以袈裟爲水田衣。今杭州神尼塔下有唐杭州刺史盧元輔磨厓刻七言詩。首句云。水田十里學袈裟。阮亭水田一帶學僧衣之句。蓋本於此。

上下澗

水經注。蔡洲大岸西有澗湖。停水數十畝。長數里。廣減百步。水色常淥。楊儀居上澗。楊禺居下澗。朱錫鬯詩。屢滿西南戶。堂臨上下澗。蓋用此事。近人注曝書亭詩者。引爾雅逆流而上曰泝澗。順流而下曰泝游。實之失其旨矣。

魍魎

廣韻。魍魎。斑鼠也。兩字皆在十九青部。玉篇。魍。公莖切。斑鼠也。魎。力令切。魍屬。魍亦作魍。白香山游悟真寺詩。魍魎上不得。豈我能攀援。是也。古人以鼠鬚製筆。故筆有魍魎之稱。或作蚺蚺。然字書本無蚺字也。朱錫鬯作曹侍郎挽詩云。硯憐鸚鵡潤。筆有蚺蚺拋。誤蚺爲魍。魍卽蠶字。說文。知聲蟲也。恐無與魍通用之理。

三橋

朱錫鬯風懷詩。路豈三橋阻。屏還六扇僂。上句用李商隱明日詩。誰言整雙履。便是隔三橋也。注家不諳

引。

躡與踳異

說文舛或作踳。踳从舛。舛聲相近。故有舛音。古書舛駮字多作踳。又廣韻三鍾部有踳字。踢也。書容切。躡从舛。躡从舛。音義迥殊。朱錫鬯齋中讀書詩。漢士守一經。其義或駮踳。真儒起北海。卓哉鄭司農。似誤。切爲一字。

辨邵堯夫水火土石

沈作喆寓簡謂五行者經世之用。紀歲時行氣運不可闕一。邵堯夫皇極經世用揚雄之四數。加以本無之一。而去其本有之二。爲不合于古。朱錫鬯齋中讀書詩第四首云。奈何洛下儒。侮聖不知懼。用三去其二。變一成百悟。蓋用沈氏說。注家未有引此者。

查初白

查初白贈湯西厓詩。敢擬微之並樂天。才名官職兩殊懸。只餘一事差相似。恰比先生老七年。自注謂樂天長于微之七歲。按唐詩紀事云。樂天生于代宗大歷七年壬子。微之生于德宗建中元年庚申。少樂天八歲。非七歲也。

李陵答蘇武書。東坡譏爲齊梁人作。然劉知幾已言其文體不類西漢人。殆後來所爲。假稱陵作矣。予謂魏晉人喜僞造文字。如王肅之家語。梅賾之古文尙書。汲郡之紀年。不一而足。此書當是魏晉初高手爲之。齊梁人不能辦也。太史公報任安書。不敢言漢待功臣之薄。此篇於韓彭周魏李廣諸人之枉。痛切言之。示誠後代。昭明采而錄之。非無謂也。

梁世崇尚浮屠。一時名流詩文。大半佞佛之作。昭明一槩不取。唯錄王簡栖頭陀寺一篇。以備斯禮。簡栖名位素卑。不爲當時所重。而特取之。明非勝流所措意也。此等識見。遠出後世詞人之上。

### 御覽載孔融語

孔融爲北海相。告高密縣爲鄭康成特立一鄉。名鄭公鄉。其推許甚至。而太平御覽載融與諸卿書云。鄭康成多臆說。人見其名學。爲有所出也。證案大較要在五經四部書。如非此文。近爲妄矣。若子所執。以爲郊天之鼓。必當麒麟之皮也。寫孝經本當曾子家策乎。見御覽卷六百八予謂此必非孔文舉之言。殆魏晉以後習王肅學者僞託耳。晉荀勗中經簿。始有四部之分。文舉漢人。安得稱四部書。且鄭君注三禮。初無麒麟皮冒鼓之說也。范蔚宗書。及章懷注。皆無此語。不可執無稽之談。以誣盛德。

### 庾闡揚都賦

庾闡字仲初。晉給事中。領著作。作揚都賦。爲世所重。見晉書文苑傳。張守節史記正義說三江。引庾仲初

揚都賦注。蓋賦成又自爲注。謝康樂山居賦有注。殆取仲初之例乎。蔡仲默書集傳。初庾爲唐。又以揚都爲吳都。固失之不攷。胡朏明以庾杲之當之。亦未讀晉書矣。

范縝神滅論

齊梁文人多好佛。劉彥和序文心雕龍。自言夢見宣尼。而晚節出家。名慧地。可謂咄咄怪事。顏之推累世儒家。而家訓歸心一篇。見譏後代。范子真神滅論。其中流之砥柱乎。

文筆

劉彥和云。今之常言。有文有筆。以爲無韻者筆也。有韻者文也。文心雕龍總術篇按南史顏延之傳。宋文帝問延之諸子才能。延之曰。竣得臣筆。測得臣文。任昉傳。尤長載筆。王公表奏。無不請焉。旣以文才見知。時人云。沈詩任筆。殷璠云。歷代詞人。詩筆雙美者鮮矣。杜牧之詩。杜詩韓筆愁來讀。似倩麻姑癢處抓。

庾子山賦

古人文字不以重複爲嫌。庾信哀江南賦。杜元凱兩見。陸士衡一見。陸機兩見。班超兩見。白馬三見。西河兩見。驪山兩見。七葉兩見。暮齒兩見。秦庭金陵。南陽釣臺。七澤全節。諸侯荒谷。皆兩見。未深思于五難。本無情於急難。一段之中。重押難字。

過漂渚而寄食。託蘆中而度水。上句用韓信事。下句用伍子胥事。顧亭林謂漂當作溧。溧渚卽瀨渚。亦用

子胥事。子謂子山由金陵赴楚。溧水非經過之地。不應連用子胥事。且漂母進食。具有典故。寄食二字。亦見淮陰侯傳。無庸破漂爲溧也。

### 傅奕詆浮圖法

唐傅奕上疏詆浮圖云。五帝三王。未有佛法。君明臣忠。年祚長久。至漢明帝。始立胡祠。然惟西域沙門。自傳其教。西晉以上。不許中國髡髮事華。及弛厥禁。主庸臣佞。政虐祚短。梁武齊襄。尤足爲戒。此韓退之佛骨表之藍本也。

### 陋室銘

崔沔嘗作陋室銘。在劉禹錫之前。李德裕有秋聲賦。在歐陽公之前。梁元帝金樓子有一條云。桓譚有新論。華譚又有新論。揚雄有太元經。楊泉又有太元經。談者多誤。動形言色。或云桓譚有新論。何處復有華譚。揚子有太元經。何處復有太元經。此皆由不學使之然也。

### 宋子京喜韓柳文

宋子京好韓退之。柳子厚文。其修唐書。於韓傳載進學解。佛骨表。潮州謝上表。祭鱷魚文四篇。潘鎮傳載平淮西碑。陳京傳載禘祫議。孝友傳載復讐議。許遠傳載張中丞傳後序。李渤傳載愈所與書。張籍傳載愈答書。甄濟傳載愈答元微之書。韋丹石洪傳亦皆取愈所撰墓誌也。於柳傳載與蕭翰林俛。許京兆孟

容書、貞符、懲咎賦四篇。孝友傳載駁復讐議、孝門銘、宗室傳載封建論、貞行傳載與何蕃傳、段秀實傳亦采宗元逸事狀增益之。趙宏智傳附矜事，亦采宗元所撰墓誌也。

原道

原道二字出淮南原道訓。劉氏文心雕龍亦有原道篇。

老氏云：失道而後德，失德而後仁，失仁而後義。又云：大道廢，有仁義。所謂去仁與義言之也。孟子曰：堯舜之道，孝弟而已矣。仁之實，事親是也。義之實，從兄是也。道在邇而求諸遠，事在易而求諸難，人人親其親，長其長，而天下平。所謂合仁與義言之也。退之原道一篇，與孟子言仁義同功。仁與義爲定名，道與德爲虛位，二語勝于宋儒。

諱辨

諱辨一篇，引二名嫌名律最明白，而舊唐書譏之。然細讀此文，亦多可議。呂后名雉，雉在上聲，旨部，不與治同音。治有兩讀，一平聲，直之切，一去聲，直吏切，非上聲也。且其字爲高宗諱，卽云元和之世，親盡不避於義終未安。曾子之父名點，不名皙，杜操字伯度，後人避魏武諱，追改見資暇集，杜與度亦不同音。

河間傳

漢書原涉曰：子獨不見家人寡婦邪？始自約敕之時，意乃慕宋伯姬及陳孝婦，不幸壹爲盜賊所汙，遂行

淫失。知其非禮。然不能自還。吾猶此矣。柳子厚河間傳。蓋本於此。而詞太穢褻。此等文不作可也。

### 古人文字不宜學

李翱述其大父事狀。題云皇祖實錄。當時不以爲怪。若施之後代。則犯大不韙矣。唐宋人碑誌。稱其父曰皇考。歐陽公瀧岡阡表。亦稱其父皇考。宋徽宗始禁止之。南宋以後。遂無敢用者。好古之士。當隨時變通。所謂禮從宜也。

### 文集須良友刪削

白樂天云。凡人爲文。私於自是。不忍于割截。或失于繁多。其間妍媸。益又自惑。必待交友有公鑒無姑息者。討論而削奪之。然後緜簡當否。得其中矣。

### 曾王晚年異趣

王安石韓子詩。紛紛易盡百年身。舉世何人識道真。力去陳言誇末俗。可憐無補費精神。李壁注云。觀公此詩。尙謂退之未識道真也。予在臨川。聞之曾氏子弟。載南豐語云。介甫非前人盡。獨黃帝老子未見非耳。譏其非人太多也。如李季章說。是南豐亦不滿于安石也。安石與子固交最厚。及居相位。未嘗引居要職。知其晚年異趣矣。大抵好詆毀人者。必非忠信篤敬之士。於古人且不能容。況能容同時之善士乎。安石心術不正。卽在好非議古人。子固窺破此等伎倆。故始密而終疏。



七大家

李紹序蘇文忠公集云。古今文章作者非一人。其以之名天下者。唯唐昌黎韓氏。河東柳氏。宋廬陵歐陽氏。眉山二蘇氏。及南豐曾氏。臨川王氏七大家。明成化四年。江西吉安府重刊大蘇七集。紹爲之序。紹廬陵人。官禮部侍郎。

老蘇族譜引

蘇明允族譜引。唐神堯初。長史味道刺眉州。卒于官。一子留于眉。眉之有蘇氏。自此始。神堯者。高祖諡也。而味道非高祖朝臣。唐書味道傳。貶眉州刺史。在中宗之世。則神堯殆神龍之誤歟。老蘇以古文名家。自述先世。不應差誤。或傳刻失之也。味道相武后。有模稜之譏。然劉夢得言。宋廣平在下僚。以梅花賦投蘇。蘇盛稱之。自是方列于聞人之目。其推獎後進。有過人者。宜其後裔多文人也。

東坡跋語誤

東坡跋晉桓溫書云。蜀平。天下大慶。東兵安其理。當早一報。此桓元子書蜀平。蓋討譙縱時也。僕喜臨之人間。常有數百本也。按桓溫所云蜀平。謂滅李勢也。譙縱之平。在安帝義熙中。不與桓溫同時。此東坡記憶之誤。

喜雨亭記

喜雨亭記末皆韻語。太守不有。歸之天子。子與有韻。從古音也。天子曰不。歸之造物。物與不韻。讀不爲弗。

從廣韻也。俗本不下多然字。蓋淺人妄增。

### 東坡學韓柳

表忠觀碑。仿子厚義門銘也。萬石君羅文傳。仿退之毛穎傳也。蓋公堂記。用子厚郭橐駝傳之意而變其面目。

### 父子共一碑

石元懿公熙載。與其子文定公中立同一碑。其文蘇魏公所爲也。陸務觀撰詹朝奉靖之墓表。兼述其子長民事。蓋用石家故事。

### 歸震川

歸震川文集後。附王文肅錫爵所撰墓誌。予初讀之。歎其波瀾意度。頗與熙甫相近。後讀唐叔達集有此文。知爲叔達代作。叔達父名欽堯。震川高弟。其淵源有自矣。

### 顧寧人

顧寧人文集。初印本有讀隋書一篇。本馬貴與之說。載在文獻通考。寧人手鈔之。意欲采入日知錄。潘次耕誤切爲顧作。乃以讀隋書爲題。收入集中。今本無此篇。以它文易之。則次耕已覺其謬矣。

### 開化寺碑

朱錫鬯開化寺碑。一刻于竹垞文類。再刻于曝書亭集。而陸清獻三魚堂集亦載此文。蓋清獻愛其文。鈔置篋笥。其後門下士編次文集。誤仞爲清獻作。

四六

駢儷之文。宋人或謂之四六。謝伋字景思四六談塵。王銍字性之四六話。是也。攷文心雕龍章句篇有云。筆句無常。而字有常數。四字密而不促。六字格而非緩。或變之以三五。蓋應機之權節也。則梁時文筆已多用四字六字矣。

文人避家諱

古人重家諱。太史公父名談。故改談爲同。取其聲相近也。司馬溫公父諱池。每與韓持國書。改持爲秉。取其義相近。然禮不諱嫌名。池直離切。持直之切。又非同部。雖不避無妨也。眉山蘇氏諱序。故明允文改序爲引。東坡不爲人作序。或改用敘字。

題諱填諱

彭王傅徐浩碑。浩次子峴所書。碑末有表姪河南府參軍張平叔題諱十二字。題諱。卽今人所云填諱也。周益公跋初寮王左丞贈曾祖詩。末題通直郎田橡填諱。是宋人已稱填諱矣。元刻麻衣子神字銘。字述魯。狝撰。二子字述魯。遠書。南陽貢士李珩填諱。正用徐峴之例。字兪魯三字。姓也。石刻。兪作述。諱音無定字。

# 十駕齋養新錄卷第十七

## 圓經周率

古之九數。圓周率三。圓徑率一。其術疏舛。自劉歆、張衡、劉徽、王蕃、皮延宗之徒。各設新率。未臻折衷。宋末南徐州從事史祖沖之。更開密率。以圓徑一億爲一丈。圓周盈數三。刻本作二。誤。丈一尺四寸一分五釐九毫二秒七忽。臆數三丈一尺四寸一分五釐九毫二秒六忽。正數在盈臆二限之間。密率圓徑一百一十三。圓周三百五十五。約率圓徑七。周二十二。又設開差羃。開差立。兼以正圓參之。指要精密。算氏之最者也。隋書律孫志。西洋人割圓六宗三要之說。窮極幼眇。所得徑一周三一四一五九二六五。正在沖之所定盈臆二數之間。世閱古今。地分中外。而布算若合符節。用以步天。宜若確乎不可易矣。予族子江寧教授唐。瀆亭。獨疑之。謂圓周曲線也。圓徑直線也。以各等邊線用勾股法取其弦遞析之。愈析愈細。終無合爲一線之理。則所謂密率者。猶未密也。今試以木製大圓輪。其徑一丈。以長竹篾刻尺寸分秒度之。得實周三丈一尺六寸有奇。乃知沖之密率猶失之弱。蓋以直求曲。勢必不能密合。非算之不精。於理有未盡也。昨元和。李生銳。字尙告予云。秦九韶數學九章卷三。環田三積問術。以圓徑自乘進位爲實。開平方得周。設徑一億。依術推之。得周三億一千六百二十二萬七千七百六十六奇。與漑亭之說合。則古人已有先覺者。

王深寧引九章有誤

王深寧引九章算術。五雀六燕。飛集于衡。衡適平。一雀一燕。飛而易處。則雀重而燕輕。見困學紀聞卷十九按九章方程篇云。今有五雀六燕。集稱之衡。雀俱重。燕俱輕。一雀一燕交而處。衡適平。王氏所引。不特文句有異。以算求之亦不合。

夕桀

周禮保氏九數。鄭司農云。今有重差。夕桀。句股。釋文謂夕桀二字非。鄭注。後人附益也。夕桀未詳何義。疑是互棗之譌。

六壬推行年

六壬起行年法。男子從寅順行。女子從申逆行。按說文。元氣始於子。子。人所生也。男左行三十。女右行二十。俱立於巳。爲夫婦。裏妊於巳。巳爲子。十月而生。男起巳至寅。女起巳至申。故男年始寅。女年始申也。則行年之說。由來古矣。

六壬十二神

論衡難歲篇。或上十二神。登明。從魁之輩。工伎家謂之皆天神也。常立子丑之位。俱有衝抵之氣。案此十二神。六壬家所用。論衡雖引其說。而未悉數其名。登明。亥也。從魁。酉也。寅爲功曹。亦見論衡遭虎篇。

六壬家又有貴人、騰蛇、朱雀、六合、句陳、青龍、天空、白虎、太常、元武、太陰、天后、十二神分布十二方位。攷論衡解除篇云：宅中主神有十二焉。青龍、白虎、列十二位。雖不詳列十二之名。當與六壬家不異。

### 太一

後漢書高彪傳：天有太一五將三門。注：太一式。凡舉事皆欲發三門。順五將。三門者：開門、休門、生門。五將者：天目、文昌等。

### 天一家

褚先生云：孝武帝時聚會占家問之。某日可取婦乎。五行家曰：可。堪輿家曰：不可。建除家曰：不吉。叢辰家曰：大凶。歷家曰：小凶。天人家曰：小吉。太乙家曰：大吉。辯訟不決。以狀聞。制曰：避諸死忌。以五行爲主。按天人家不見于漢藝文志。當是天一之譌。漢志五行三十一家。天一六卷。蓋其一也。

### 算盤

古人布算以籌。今用算盤。以木爲珠。不知何人所造。亦未審起于何代。案陶南村輟畊錄：有走盤珠算盤珠之喻。則元代已有之矣。

### 蓋天

古之言天者。有蓋天、宣夜、渾天三家。宣夜之學。久失其傳。周髀則蓋天之術也。其書出於周公。商高所授。

乃算術之最古者。自揚子雲著論。抑蓋申渾。其後蔡邕葛洪之徒。咸宗其說。而蓋天之義。久置不講。近世歐邏巴人入中國。製器有渾蓋通憲之名。而後步天家知蓋之不殊於渾。而平儀之用。視渾儀尤簡而易曉。然攷之梁代崔靈恩已有渾蓋合一之論。北齊信都芳亦云。渾天覆觀。以靈憲爲文。蓋天仰觀。以周髀爲法。覆仰雖殊。大歸是一。則古之人早有先覺者矣。

### 九魁

劉向九歎。訊九魁與六神。注。九魁。謂北斗九星也。按說文無魁字。當爲魁之譌。古書斗爲斤。與斤相似。因誤爲魁。并讀如祈音。失其義矣。北斗九星。魁居其首。故有九魁之稱。

### 河圖闔苞受

續漢書天文志云。黃帝始受河圖。闔苞授。規日月星辰之象。干伯厚謂闔苞似是人名氏。案文選李善注。引河圖闔苞受曰。第感苗裔出應期。闔苞受蓋河圖篇名。漢志誤闔爲闕。非人名也。授與受通。

### 霜月

韓勅造禮器碑云。青龍在涪歎。霜月之靈。皇極之日。說金石者。不曉霜月爲何語。予謂霜月者。相月也。爾雅釋天篇。七月爲相。

### 咸池

西嶽華山亭碑。光和元年。歲在戊午。名曰咸池。按淮南天文訓。咸池爲大歲。二月建卯。月從右行。四仲終而復始。歲在子卯午酉。則歲所直之月。正當咸池之位。如卯年卯月咸池在卯午年午月咸池在午酉年酉月咸池在酉子年子月咸池在子故名曰咸池也。咸池大歲。與斗杓小歲相對。洪氏隸釋引作太歲。誤也。洪氏又引天官書。西宮咸池曰天五潢。奎婁胃昴畢觜參居之。敦牂歲。歲星以五月與胃昴畢晨出東方。蓋三宿在西宮之中。而歲星以午年舍其分。故以咸池爲名。此則誤會史記之意。史記所謂歲陰在午。星居酉者。謂太陰在午。非太歲在午也。若太歲在午。則歲星當以五月與東井輿鬼晨出東方。與咸池無涉矣。

### 太陰

漢初多以太陰紀歲。淮南天文訓。太陰在寅。歲名曰攝提格。太陰在卯。歲名曰單闕之類。皆謂太陰。非太歲也。淮南又云。太陰在四仲。則歲星行三宿。太陰在四鉤。則歲星行二宿。二八十六。三四十二。故十二歲而行二十八宿。四仲謂子午卯酉也。四鉤謂丑寅辰巳未申戌亥也。太陰在卯。歲星舍須女虛危。太陰在午。歲星舍胃昴畢。太陰在酉。歲星舍柳七星張。太陰在子。歲星舍氐房心。是爲四仲行三宿。太陰在寅。歲星舍斗牽牛。太陰在辰。歲星舍營室東壁。太陰在巳。歲星舍奎婁。太陰在未。歲星舍觜臙參。太陰在申。歲星舍東井輿鬼。太陰在戌。歲星舍翼軫。太陰在亥。歲星舍角亢。太陰在丑。歲星舍尾箕。是爲四鉤行二宿。此在淮南書。信而有徵者也。漢書天文志晉灼注云。太歲在四仲。則歲星行三宿。太歲在四孟四季。則歲



星行二宿。史記正義引晉灼說亦同。本據淮南之文而改太陰爲太歲。則失淮南之旨。蓋古法太陰與太歲不同。太歲

與星歲左右行不同而常相應。如歲星在星紀則太歲必在子。歲星在元枵則太歲必在丑。推之十二辰皆然也。今云歲星舍斗牽牛是星紀之次也。太歲當在子而卻云在寅。歲星舍須女虛危是元枵之次也。太歲當在丑而卻云在卯。是淮南所云太陰非卽太歲矣。如果太歲在寅則歲星當舍營室東壁不當在斗牽牛。果太歲在卯則歲星當舍奎婁不當在須女虛危也。淮南雖不言太歲而卽歲星以見太歲。此古人舉一反三之例也。太史公天官書多承淮南之文。唯改太陰爲歲陰。其說歲星晨出之月與淮南常差兩月。一舉夏正一用天正。似異而實同。太史公亦以歲陰紀年。如太初元年闕逢攝提格。其明證矣。自太初改憲以後。劉子駿三統術。但有推太歲所在法。別無言太陰者。蓋疇人子弟失其傳已非一日。班氏天文志雖承史公之文而改歲陰爲太歲。不復言太陰。是東漢人已不知太陰太歲之有別矣。晉灼晉人宜其初太陰爲太歲也。

漢志言歲星晨出東方之宿。兼取石氏、甘氏、太初三家。其云石氏者。大約與史公同。而與太初常差兩次。甘石以太陰紀年。太初以太歲紀年。兩家本不能強合。班氏昧于太陰太歲之別。乃謂甘氏太初所以不同者。以星羸縮在前。各據後所見也。不知歲星每一年而行一次。卽有羸縮。斷無差至兩次之理。甘石之不同。可以羸縮解之。豈可例諸太初乎。

## 六曆

古曆存於漢者有六家。黃帝、顓頊、夏、殷、周、魯是也。祖沖之言：古之六曆，並同四分。四分之法久，則後天以食檢之，經三百年，輒差一日。古曆課今，其甚疏者，朔後天過二日有餘，以是推之，古曆之作，皆在漢周末。理不得遠，且卻較春秋朝並先天，則非三代以前明矣。書正義：古時真曆，遭戰國及秦而亡，漢存六曆，雖于五紀之論，皆秦漢之際，假託爲之。詩正義云：今世有周曆、魯曆，蓋漢初爲之，其交無遲速盈縮，攷日食之法，而年月往往參差。

## 歲星超辰

古法歲星百四十四年而行百四十五次，是爲超辰之率。漢以後歲星之行漸速，如王莽傳：建國五年，歲在壽星。倉龍癸酉，始建國八年。即天鳳三年歲躔星紀。天鳳七年。即地皇元年歲在大梁。倉龍庚辰，厥明年，歲在實沈。倉龍辛巳，此漢史所記也。三國志注：載博士蘇林董巴上表，稱光和七年，歲在大梁。武王始受命，爲將討黃巾，是歲改年爲中平元年。建安元年，歲復在大梁。始拜大將軍。十三年，復在大梁。始拜丞相。今二十五年，歲復在大梁。攷地皇元年庚辰，至建安五年庚辰，僅一百八十年，以古超辰率計之，建安元年丙子，歲星但當在元枵耳。今乃越詭訾，降婁而至大梁，則是百八十年之間，歲星已超三辰也。歲星之行，不能與太歲相應，而太歲亦無超辰之率，蓋起于東漢，至今因之。

置閏

古法用平朔。率三十二月而一閏，間有相距三十三月者。唐宋以來，皆用定朔，則或相距至三十四月。如宋祥符乙卯歲閏六月，至天禧戊午閏四月是也。今時憲書用定氣，每氣修短，四時不等，由是置閏近者相距或二十八月。如乾隆丙寅閏三月，遠者相距或三十五月。如雍正甲辰閏四月。而正月十一月十二月亦從未置閏。以乾隆戊戌年時憲書攷之，此六十年中，閏四月者四，閏五月者四，閏六月者四，閏七月者三，閏九月者二，閏十月者一，閏二月者一。

二十四時

一日分十二時，每時又分爲二，曰初，曰正，是爲二十四小時。而選擇家以子初爲壬時，丑初爲癸時，寅初爲艮時，卯初爲甲時，辰初爲乙時，巳初爲巽時，午初爲丙時，未初爲丁時，申初爲坤時，酉初爲庚時，戌初爲辛時，亥初爲乾時。今時憲書寅申巳亥月，宜用甲丙庚壬時，卯酉子午月，宜用艮巽坤乾時，辰戌丑未月，宜用癸乙丁辛時是也。予在都門游法源寺，見遼舍利函記，後題甲時，又云戒壇寺見遼法均禪師碑，後題乾時，又遼石幢二，其一題庚時，一題坤時。潭柘寺見金了公禪師塔銘，亦題庚時。蓋遼金石刻，多用斯語。武虛谷撰授堂題跋載四嶽題名，有天禧四年某月日已後午前丙時豎立，又北嶽廟有大中祥符五年題名，云閏十月二十五日卯後四刻乙時，是宋石刻亦有之。後讀舊唐書呂才傳，言若依葬書，多用乾艮二時，則隋唐以前已有此稱。又攷晉書載魏太史令許光議，黃初二年六月

加時未日蝕黃初以爲加辛強又二年七月日加壬月景蝕景卽丙字避唐諱改是以干命時之證也又云三年正月加時申北日蝕十一月加時西南維日蝕言申北言西南維而不言坤則知以乾坤艮巽代四維魏晉以前未有此稱矣

### 夜子時

宋紹熙二年正月三日壬子其夜子時立春洪文敏以劄子白廟堂云日辰自古以子時爲首今旣子時立春則當是四日癸丑謂太史之誤見寶退錄宋史歷志不載其事是文敏有此議而廟堂未之行也頃見寶祐四年會天歷是歲立夏四月三日甲子其夜子初二刻則子初系前一日終宋世未嘗改易元明至今猶承其舊洪氏於推步本非專門輒譏太史爲誤非也

### 回回算術

明史載回回歷法天周度三百六十每度六十分宮十二每宮三十度日周分一千四百四十每時六十分刻九十六每刻十五分其法不用閏月以三百六十五日爲一歲歲十二宮宮有閏日凡百二十八年而宮閏三十一日戴東原曰百二十八年閏三十一日是每歲三百六十五日之外又餘百二十八分日之三十一也以萬萬乘三十一滿百二十八而一得二千四百二十一萬八千七百五十此是回回舊法明季西洋人弟谷測春分時刻定歲實三百六十五日二十三刻三分四十五秒以十五通二十三刻納三分再以六十

通之。納四十九秒。共二萬九百二十五秒。是爲八萬六千四百分日之二萬九百二十五也。以萬萬平之。亦得二千四百二十一萬八千七百五十。乃知弟谷所定歲實。雖云測驗得之。實暗用回回法耳。

國朝時憲書。初用歲實三百六十五日二四二一八七五。與弟谷所定同。乾隆間。更定歲實三百六十五日二四二三三四四二。比前率稍強。

回回歷。又以三百五十四日爲一周。所謂太陰年也。周十二月。月有閏日。凡三十年。月閏十一日。凡月分一月大。

二月小。三月大。四月小。以次相閒。月大三十日。月小二十九日。凡三百五十四日。遇月分有閏之年。於第十二月增一日。凡三百五十五日。按月周一大一小相閒。又三十年而閏十一日。是每月二十九日有半。又贏三百六十分之十一也。

十干配合

十干配合之說。本於易繫辭及春秋左氏傳。而漢書五行志。衍其義尤詳。云天以一生水。地以二生火。天以三生木。地以四生金。天以五生土。五位皆以五而合。而陰陽易位。然則水之大數六。火七。木八。金九。土十。故水以天一爲地二。牡。木以天三爲土十。牡。土以天五爲水六。牡。火以天七爲金四。牡。金以天九爲木八。牡。陽奇爲牡。陰耦爲妃。故曰。水。火之牡也。火。水妃也。左氏昭八年傳文。今按水一爲火二。牡者。壬與丁合也。天一壬。水。地木三爲土十。牡者。甲與己合也。天三。甲木。土五爲水六。牡者。戊與癸合也。天五。戊土。地六。癸水。火七爲金四。

牡者丙與辛合也。天七丙火地四辛金。金九爲木八牡者庚與乙合也。天九庚金地八乙木。

### 刑德

翼氏風角云。木落歸本。水流歸末。故木刑在亥。水刑在辰。今本漢書翼奉傳注。兩刑字皆作利。傳寫之譌也。金剛火彊。各歸其鄉。故火刑於午。金刑於酉。按亥辰午酉。今人所謂自刑也。木生亥。壯于卯。窮于未。木落歸本。故木刑于亥。水生于申。壯于子。窮于辰。水流歸末。故水刑于辰。火生于寅。壯于午。窮于戌。金生于巳。壯于酉。窮于丑。故火刑于午。金刑于酉也。古法巳亥寅申爲四孟。亥爲自刑。則寅巳申相刑。故曰寅刑巳。巳刑申。申刑寅也。子午卯酉爲四仲。午酉皆爲自刑。則子卯相刑。故曰子刑卯。卯刑子也。辰戌丑未爲四季。辰爲自刑。則丑戌未相刑。故曰丑刑戌。戌刑未。未刑丑也。

### 河戒本河戍之譌

史記天官書。東井西曲星曰鉞。鉞北北河。南南河。漢書天文志。鉞作戍。今刊本作戍。誤。志又云。元封中。星孛于河。戍占曰。南戍爲越門。北戍爲胡門。今本戍作戍。亦轉寫之譌。蓋戍星在南北河之間。故曰河戍。南戍卽南河。北戍卽北河也。天官書。星孛于河戒。戒亦戍之譌。小司馬引漢志。星孛于河戒。其占曰。南戒爲越門。北戒爲胡門。則并漢志戍亦誤改爲戒矣。唐一行大衍術議。謂天下山河之象。存乎兩戒。蓋由誤讀史漢。後人又承一行之誤。而南北戒之說。牢不可破。真所謂郢書燕說也。小司馬氏。張氏。皆與一行同時。習聞其說。故索隱正

義、多用戒字。

電父

今人稱電神曰電母。古人則稱電父。管輅別傳云：天昨檄召五星，宣布星符，刺下東井，告命南箕，使召雷公電父，風伯雨師。

雷公

論衡雷虛篇：圖畫之工，圖雷之狀，纍纍如連鼓之形。又圖一人若力士之容，謂之雷公，使之左手引連鼓，右手推椎，若擊之狀。王逸注招魂云：欲涉流沙，則回入雷公之室。

大將軍

隋李康清德頌，後題歲在辛亥，大將軍在西。歐陽公謂大將軍之說出於陰陽家，前史不載，而此碑見之。吳仁傑以爲卽張晏所謂歲後二辰爲太陰者，抱朴書有諾皋太陰將軍之稱，碑用其說。見兩漢刊誤補遺。子謂仁傑強作解事，於方術本未究心，其言絕無根據。案堪輿家，大將軍居子卯午酉四正方，三年一徙，十二年而一周，亥子丑歲在西，寅卯辰歲在子，巳午未歲在卯，申酉戌歲在午，與太陰之順行十二辰者，迥不相合。唯寅申巳亥四年，偶與太陰相值，吳氏欲以附會太陰將軍之名，甚不然矣。周公謹亦主太陰將軍之說，與吳仁傑同。

孤虛

史記日辰不全。故有孤虛。龜策傳裴駙云。甲乙謂之日。子丑謂之辰。六甲孤虛法。甲子旬中無戌亥。戌亥即

為孤。辰巳即為虛。甲戌旬中無申酉。申酉為孤。寅卯為虛。甲申旬中無午未。午未為孤。子丑為虛。甲午旬

中無辰巳。辰巳為孤。戌亥為虛。甲辰旬中無寅卯。寅卯為孤。申酉為虛。甲寅旬中無子丑。子丑為孤。午未

為虛。劉歆七略。有風后孤虛二十卷。吳越春秋。計硯曰。孤虛。謂天門地戶也。與裴說似異。

歸忌

陰陽書秬法曰。歸忌日。四孟在丑。四仲在寅。四季在子。其日不可遠行歸家及徙也。後漢書郭躬傳注

反支

凡反支日用月朔為正。戌亥朔一日反支。申酉朔二日反支。午未朔三日反支。辰巳朔四日反支。寅卯朔

五日反支。子丑朔六日反支。見陰陽書也。後漢書王符傳注

奇門

奇門之式。古人謂之遁甲。即易八卦方位。加以中央。與乾鑿度太一下行九宮之法相合。史記龜策傳載。宋元王召博士衛平語所夢。衛平乃援式而起。仰天而視月之光。觀斗所指。定日處鄉。規矩為輔。副以權衡。四維已定。八卦相望。視其吉凶。介蟲先見。乃對元王曰。今昔壬子。宿在牽牛。云云。此遁甲式也。日在牽



牛冬至之候。蓋冬至後壬子日。庚子時。子爲夜半陽遁第一局。甲午爲旬首。在巽宮。杜門爲直使。時加子。子爲元武。故云介蟲先見也。規、矩、權、衡、謂坎、離、震、兌。四正之位。漢書魏相傳。東方之神執規。司春。南方之神執衡。司夏。西方之神執矩。司秋。北方之神執權。司冬。是其義也。加以四維。故云八卦相望也。

九宮之神

九宮之神。一天蓬。二天芮。三天衝。四天輔。五天禽。六天心。七天柱。八天任。九天英。按素問刺法論。岐伯曰。木欲升而天柱窒抑之。火欲升而天蓬窒抑之。土欲升而天衝窒抑之。金欲升而天英窒抑之。水欲升而天內窒抑之。注云。天柱。金正之宮。天蓬。水正之宮。天衝。木正之宮。天英。火正之宮。天內。土神之應宮也。抱朴子內篇。引遁甲中經云。欲求道。以天內日天內時。劾鬼魅。施符書。以天禽日天禽時。天內。卽天芮也。然則九星之名。由來古矣。

六壬

六壬之占。載於正史者。晉書戴洋傳。咸康五年。傳賊當來攻城。洋曰。十月丁亥夜半時。得賊問。干爲君。支爲臣。丁爲征。西府亥爲郟城功曹。爲賊神。加子時。十月水王木相。王相氣合。賊必來。寅數七。子數九。賊高可九千人。下可七千人。從魁爲貴人。加丁下剋上。有空亡之象。不敢進武昌也。案六壬式。以月將加所得時。視干支所加神。以決休咎。十月月將在寅。日躔之次。謂之月將。十月建亥。日躔析木爲寅位也。寅爲功曹。夜半爲子時。以寅加子。

故以寅子決賊之衆寡。於占例。甲己子午數九。乙庚丑未數八。丙辛寅申數七。丁壬卯酉數六。戊癸辰戌數五。巳亥數四。故云寅數七。子數九。隋書庚季才稱甲數九。子數又九。十干寄位於支。未爲丁寄位。酉爲從魁。加於丁。丁火剋酉金。故云下剋上。甲申旬空。午未申亥在甲申旬中。丁在未位。故云有空亡之事也。古法有日辰四課。而無三傳。史但云洋善風角。亦不稱六壬。

天乙酉丁

戊天后

亥太陰

子元武

丑太常

太陰亥酉

酉天乙

寅白虎

太常丑亥

申騰蛇

卯天空

天空卯丑

未朱雀

午六合

巳旬陳

辰青龍

隋書經籍志五行類有六壬式經雜占九卷。梁有六壬式經三卷亡。六壬釋兆六卷。六壬之名始見於此。



# 十駕齋養新錄卷第十八

道

中庸言道之書也。曰天命之謂性。率性之謂道。是道本于天也。又曰天下之達道五。君臣也。父子也。夫婦也。昆弟也。朋友之交也。是道不外乎五倫也。唯道不外乎五倫。故曰道不遠人。又曰道也者。不可須臾離也。道不虛行。有天地而後有天地之道。有聖人而後有聖人之道。學聖人者。爲君子之道。反是。則小人之道。非吾所爲道矣。孟子曰。夫道若大路然。豈有索之虛。無以爲道者哉。唯老氏五千言。始尊道于天地之上。其言曰。有物渾成。先天地生。吾不知其名。強名之曰道。人法天。天法道。道法自然。于是求道於窈冥恍惚。不可名象之中。與孔孟之言道。柄鑿不相入矣。

張無垢曰。道非虛無也。日月而已矣。以虛無爲道。足以亡國。以日用爲道。則堯舜三代之勳業也。韓康伯注易一陰一陽之謂道云。道者何。无之稱也。其注太極云。夫有必生于无。故太極生兩儀也。正義申之云。太極謂天地未分之前。元氣混而爲一。卽是太初太一也。老子云。道生一。卽此太極也。混混既分。卽有天地。故曰太極生兩儀。卽老子云。一生二也。晉人以老莊說易。後儒知其非。而終不脫此窠臼。所謂道在邇而求諸遠也。

五倫

人之所以異于禽獸者。以其有五倫也。唯人皆有孝弟之心。故其性無不善。堯舜使契爲司徒。教以人倫。欲其自別于禽獸也。孟子曰。孩提之童。無不知愛其親也。及其長也。無不知敬其兄也。此之謂良知良能。此之謂性善。釋氏棄其父母昆弟而不知養。雖日談心性何益。

忠恕

有諸己而後求諸人。無諸己而後非諸人。帝王之忠恕也。躬自厚而薄責于人。聖賢之忠恕也。離恕而言仁。則爲煦煦之仁。舍忠而言信。則爲硜硜之信。故曰。夫子之道。忠恕而已矣。又曰。有一言而可以終身行之者。其恕乎。

孟子曰。自反而仁矣。自反而有禮矣。其橫逆猶是也。君子必自反也。我必不忠。是忠爲仁禮之本也。春秋傳曰。上思利民。忠也。論語曰。言思忠。又曰。主忠信。子張問政。則曰。行之以忠。子貢問友。則曰。忠告而善道之。曾子曰。吾日三省吾身。爲人謀而不忠乎。蓋自天子以至庶人。未有舍忠而能行者。後人但以忠爲臣道。又以捐軀殉國者爲忠。而忠之義隘矣。

言動

衣冠中。動作慎。不苟訾。不苟笑。非禮勿言。非禮勿動。儒者之事也。言輕則招憂。行輕則招辜。貌輕則招辱。

好輕則招淫。出注何晏粉白不去手。行步顧影。終以亡身。王安石囚首喪面而談詩書。亦足以禍國。

### 謙讓

孟子曰。無辭讓之心。非人也。又曰。辭讓之心。禮之端也。恭敬之心。禮也。恭敬辭讓。本非兩事。舍讓而言敬。則空虛無所著。雖曰言敬。而去禮愈遠矣。禮者自卑而尊人。人與己相接。而不知退讓。則橫逆及之矣。天道虧盈而益謙。鬼神害盈而福謙。孔子至聖。賢於堯舜。而自言竊比老彭。謙之至讓之至也。有禮者敬人。敬人而人恆敬之。舍謙讓何以哉。

### 義利

古之士無恆產而有恆心。今之士卽有恆產。獨不能保其有恆心也。況無恆產乎。臨財苟得。臨難苟免。好利而不好名。雖在庠序。其志趣與市井胥徒何以異哉。

王伯厚云。尙志謂之士。行己有恥謂之士。否則何以異乎工商。特立獨行謂之儒。通天地人謂之儒。否則何以異乎老釋。無其實而竊其名。可以欺其心。不可以欺其鄉。

### 廉恥

禮義廉恥。謂之四維。此言出於管子。而賈生亟稱之。獨柳子厚著四維論。謂廉恥卽義。不當列爲四。此非知道之言也。孔子論成人。則取公綽之不欲。論士。則云行己有恥。廉恥與禮義本同一源。而必別而言之。

者以行事驗之而決其有不同也。知禮則不妄動。知義則不妄交。知廉則不妄取。知恥則不妄爲。古人尙實事而不尙空言。故覘國者以四維爲先。人有士田。女反有之。是不廉也。巧言如簧。顏之厚矣。是無恥也。觀二雅之所刺。知管子之言必有中矣。

宋鄧綰以頌王安石得官。謂其鄉人曰。笑罵從汝。好官須我爲之。綰雖無恥。猶知人笑罵也。章惇召入相。人問當國何先。曰。司馬光姦邪。所當先辨。小人無忌憚。曾綰之不若矣。

方正

王義方彈李義府疏。昔事馬周。分桃見寵。後交劉洎。割袖承恩。義府小人。固不足責。馬劉貞觀名臣。乃亦有比匪之傷乎。

儉

嗇于己不嗇于人。謂之儉。嗇于人不嗇于己。謂之吝。嗇于人并嗇于己。謂之愛。儉者君子之德也。愛與吝。小人之事也。晏子春秋

奢者富不足。儉者貧有餘。奢者心常貧。儉者心常富。譚子化書

李元衡儉說云。貪饕以招辱。不若儉而守廉。干請以犯義。不若儉而全節。侵牟以聚仇。不若儉而養福。放肆以逐欲。不若儉而安性。

止謗

止謗莫如自修。王文舒之言也。何以止謗。曰無辨。文中子之言也。謗之無實者。付之勿辨可矣。謗之有因者。非自修弗能止。

改過

過者。聖賢所不能無也。自以爲無過。而過乃大矣。自以爲有過。而過自寡矣。孔子曰。五十以學易。可以無大過矣。言大過而不言小過。是聖人猶未敢言小過之必無也。顏氏之子。有不善。未嘗不知。知之。未嘗復行。故能不貳過。而入聖域。仲由喜聞過。令名無窮焉。聖賢之學。教人改過遷善而已矣。後之君子。高語性天。而恥言改過。有過且不自知。與聖賢克己之功遠矣。

易傳曰。无咎者。善補過也。君子改過。以全其名。小人文過。以益其恥。

陸宣公上疏。言聖賢以改過爲能。不以無過爲貴。陛下若納諫不違。傳之適足增美。若違諫不納。又安能禁之勿傳。

重人不重位

晉書蔡謨傳。陳留時爲大郡。號稱多士。王澄行經其界。太守呂豫遣吏迎之。澄入境。問吏曰。此郡人士爲誰。吏曰。有蔡子尼。江應元。是時郡人多居大位者。澄以其姓名問曰。甲乙等非君郡人邪。吏曰。是也。曰。然



則何以但稱此二人。吏曰：向謂君侯問人，不謂問位。

公慙卿，卿慙長。子孫雖達，士論不可欺也。第五之名，何減驃騎。弟兄殊趣，物議不少貶也。謝何皆希高隱，謝出何不出，而何優于謝矣。元白均稱才子，元相白不相，而元劣于白矣。

語錄

佛書初入中國，曰經，曰律，曰論，無所謂語錄也。達磨西來，自稱教外別傳，直指心印，數傳以後，其徒日衆，而語錄興焉。支離鄙俚之言，奉爲鴻寶，併佛所說之經典，亦束之高閣矣。甚者訶佛罵祖，略無忌憚，而世之言佛者，反尊尙之，以爲勝於教律僧，甚矣人之好怪也。

釋子之語錄，始于唐，儒家之語錄，始于宋。儒其行而釋其言，非所以垂教也。君子之出辭氣，必遠鄙倍，語錄行，而儒家有鄙倍之詞矣。有德者必有言，語錄行，則有有德而不必有言者矣。

名

孔子贊易曰：善不積，不足以成名。於孝經曰：立身行道，揚名於後世，於論語曰：君子去仁，惡乎成名。又曰：君子疾沒世而名不稱焉。聖人以名立教，未嘗惡人之名也。孟子云：令聞廣譽施於身，所以不願人之文繡也。令聞廣譽，非名而何。唯聲聞過情，斯君子恥之耳。趙岐注好名之人，章云：好不朽之名者，能讓千乘。伯夷、季札是也。誠非好名者，爭簞食豆羹，變色，訟之致禍。鄭公子染指龜羹之類是也。朱文公不用趙注。

乃取蘇子瞻人能破千金之璧而不能無失聲于瓦缶爲說。恐非孟子本旨。上云好名之人。下云苟非其人。則其人卽好名之人無疑矣。且自古斷無能讓千乘之國而猶變色於簞豆者。稽之於古。旣無其人。度之於情。恐無其事。陳義雖高。不如古注之似淺而實當也。

道家以無爲宗。故曰。聖人無名。又曰。無智名。無勇功。又以伯夷死名與盜跖死利並言。此悖道傷教之言。儒者所弗道也。荀卿儒家。乃云。盜名不如盜貨。田仲史黜。不如盜也。斯言過矣。儒而未醇。未免雜以老莊之旨。

范文正公曰。士不愛名。則聖人之權去矣。

鼂氏客語云。名利皆不可好也。然好名者比之好利差勝。好名則有所不爲。好利則無所不爲也。

薛季宣上孝宗言。近或以好名棄士大夫。夫好名特爲臣子學問之累。人主爲社稷計。唯恐士不好名。誠人人好名畏義。何鄉不立。

陳埴言好名。孟子所不取。就求士於三代之前。惟恐其好名。求士於三代之下。惟恐其不好名耳。

魏了翁奏議。好名之說。此乃隋煬帝唐德宗以來。爲是以拒諫。今正患士大夫之不恤公議。而非好名之當慮也。

顧寧人曰。昔人之言。曰名教。曰名節。曰功名。不能使天下之人以義爲利。而使之以名爲利。雖非純王之

風亦可以救積滂之俗。

功過相除

鄭康成云。士有百行。可以功過相除。見詩氓箋正義云。士有大功。則掩小過。故云可以功過相除。

公羊傳云。春秋責賢者備。以其爲賢者。故責之。責之雖備。而其賢自在。所以爲忠厚也。管仲器小。不害其爲仁。臧武要君。不害其爲知。孟公綽不可爲滕薛大夫。不害其爲廉。宰我。冉有。論語屢責之。不害其爲十哲。聖人議論之公。而度量之大如此。王者知此道。則可無乏才之嘆。儒者知此道。則必無門戶之爭矣。忠臣不事二君。而不事二君者。未必皆忠。烈女不更二夫。而不更二夫者。未必皆烈。逢君以危社稷。雖捐軀不爲忠也。制夫以絕似續。雖守寡不爲烈也。

朱文公議論平實

朱文公云。近日學者。病在好高。論語未問學而時習。便說一貫。孟子未言梁惠王問利。便說盡心。易未看六十四卦。便讀繫辭。此皆躐等之病。又云。聖賢議論。本是平易。今推之使高。鑿之使深。

朱文公謂六朝人多精於禮。當時專門名家有此學。朝廷有禮事。用此等人議之。嘗與人言。讀書玩理外。攻證別是一種工夫。某向來不曾做。文公窮理精而好學篤。故不爲過高之論。若金谿諸子。則以爲支離而不足學矣。

陳止齋不好辯

四朝聞見錄。考亭先生晚注毛詩。盡去序文。以彤管爲淫奔之具。以城闕爲偷期之所。止齋得其說而病之。謂以千七百年女史之彤管。與三代之學校。爲淫奔之具。偷期之所。私竊有所未安。獨藏其說。不與考亭辯。考亭微知其然。嘗移書求其詩說。止齋答以公近與陸子靜鬪辯無極。又與陳同父爭論王霸矣。且某未嘗注詩。所以說詩者。不過與門人學子講義。今皆毀棄之矣。蓋不欲佐陸陳之辯也。

宋儒經學

王伯厚曰。自漢儒至于慶歷間。談經者守訓故而不鑿。七經小傳出。而稍尙新奇矣。至三經義行。視漢儒之學。若土梗。古之講經者。執卷而口授。未嘗有講義也。元豐間。陸農師在經筵。始進講義。自時厥後。上而經筵。下而學校。皆爲支離曼衍之詞。說者徒以資口耳。聽者不復相問難。道愈散而習愈薄矣。予嘗見景定建康志。有明道書院講義一卷。皆王氏所謂支離曼衍之詞也。

宋初儒者皆遵守古訓。不敢妄作聰明。宋景文唐書儒學傳。於啖助贊深致貶斥。蓋其時孫復石介輩。已有此等議論。而歐陽公頗好之。故於此傳微示異趣。以防蔑古之漸。其後王安石以意說經。詆毀先儒。略無忌憚。而輕薄之徒。聞風效尤。競爲詭異之解。如孫奕說詩。黽勉以黽爲蛙。說論語。老彭以彭爲旁。示兒羅璧謂公羊穀梁皆姜姓。識真可入笑林矣。

道統

道統二字始見於李元綱聖門事業圖。其第一圖曰傳道正統。以明道、伊川、承孟子。其書成於乾道壬辰。與朱文公同時。

太極

易上繫云。易有太極。是生兩儀。有易而後有太極。非太極在天地之先也。韓康伯謂有必生於无。故太極生兩儀。有生於无。語出老子。康伯以老莊說易。故云爾也。濂溪言無極而太極。又言太極本無極。蓋用韓康伯義。無極二字亦見老子。復歸于无極。六經初未之有也。陸子靜疑太極圖說非濂溪作。又謂極訓中。不訓至。合于漢儒古義。較朱文公似勝之。

六經注我

林艾軒云。日用是根株。文字是注腳。此爲無實而好著書者言之。其語本無病也。陸子靜云。六經皆我注腳。又云。六經注我。我注六經。則誕而妄矣。仲尼大聖。猶云好古敏以求之。子靜何人。敢以六經爲我注腳乎。尊心而廢學。其弊必至於此。

引儒入釋

朱文公答孫敬甫書。少時喜讀禪學文字。見杲老與張侍郎書云。左右旣得此櫛柄入手。便可改頭換面。

卻用儒家言語說向士夫。接引後來學者。

黃勉齋云。近世求道而過者。病傳注誦習之煩。以爲不立文字。可以識心見性。不假修爲。可以造道入德。守虛靈之識。而昧天理之真。借儒者之言。以文佛老之說。學者利其簡便。詆訾聖賢。捐棄經典。猖狂叫呼。側僻固陋。自以爲悟。

道術之分久矣。自西晉以來。於吾道之外。別爲二氏。自南宋以來。於吾道之中。自分兩歧。又其後則取釋氏之精蘊。而陰附于吾道之內。又其後則尊釋氏之名法。而顯出於吾道之外。馮琦奏疏

### 知人之難

人不易知。知人亦未易。荀卿門人有李斯。程氏門人有邢恕。章惇從學于邵堯夫。秦檜見稱于游定夫。大姦若忠。君子不能保其終也。鄭漁仲爲秦熿所薦。吳康侯爲石亨所薦。當辭而不辭。於出處之義有遺憾矣。

### 法後王

荀卿法後王之說。王伯厚深詆之。愚以爲王氏似未達荀子之意也。孔子曰。吾學周禮。今用之。吾從周。孟荀生于衰周之季。閱戰國之暴。欲以王道救之。孟言先王。與荀所言後王。皆謂周王。與孔子從周之義不異也。荀卿豈逆料李斯之仕秦。而令其用秦法哉。七國僭號。名雖王。實諸侯也。孰可以當後王之名。而荀

子乃冒法之耶。方是時老莊之言盛行。皆妄託于三皇。故特稱後王。以鍼砭荒唐謬悠之談。非謂三代不足法也。王安石以本朝制度爲流俗。謂祖宗之法不足守。口談堯舜。躬行商韓。此宋之所以亡也。後儒好爲大言。不揆時勢。輒謂井田封建可行於後代。徒爲世主輕儒者藉口。是不如法後王之說爲無弊矣。要非苟卿立言之本旨。

臣道

人臣以責難於君爲恭。陳善閉邪爲敬。故汲黯之戇。勝于張湯之從。臾朱雲之狂。賢于孔光之謹慎。

大臣不親細務。錢穀刑名自有主者。非宰相職也。陳平好陰謀。非以儒進。而去古未遠。尙識大體。自王安石以新法致宰相。專以理財用刑。熒惑人主。甚且謂天變不足畏。而變理陰陽之職。置勿講矣。

東坡云。古之君子。必憂治世而危明主。明主有絕人之資。而治世無可畏之防。夫有絕人之資。必輕其臣。無可畏之防。必易其民。此君子之所甚懼也。田表聖奏議序漢文帝。唐太宗。可謂明主矣。而賈誼。魏徵。上書多憂危之言。所以爲良臣。

薦賢

司馬溫公有薦士錄。自至和逮熙寧。凡百有六人。皆公手錄。其外題曰舉賢能。亦公所作。隸古也。前輩薦賢報國。誠篤懇切如此。見李獻陵陽居士集近世大臣。有終身不薦一人。而轉得公正之譽者。豈古今時勢不同歟。

身家之念重。而忠愛之意薄也。

### 黨籍

元祐黨籍三百九人。不皆粹然正人也。而至今與馬呂並傳者。蔡京擠毀以成其名也。建文姦黨諸人。非皆凜然忠臣也。而至今與方練俱傳者。成祖肆刑以成其名也。姦臣暴君。快意于一時。而被其毒者。流芳於百世。心愈狠而計愈拙。當時無惻隱羞惡之心。後世豈無是非之心哉。徐健庵云。做官時少。做人時多。做人時少。做鬼時多。此輩惜未聞斯語。

### 沈圭說

婦人以不嫁爲節。不若嫁之以全其節。兄弟以不分爲義。不若分之以全其義。此至正直記所述沈教授圭之言也。沈云。聞諸傳記。未暇攷其詳。雖爲下等人說。然卻是救時名論。

### 六先生

琴川志。端平初。元令王燾。于縣學東建六先生祠。

濂溪、橫渠、明道、伊川、晦庵、南軒。

玉峯續志。淳祐辛丑朝旨。州縣學各建六先生祠。崑學正繪濂溪、伊川、明道、晦翁、橫渠、南軒之像於從祀壁間。己酉。權令吳堅始建祠。咸淳丁卯。增祀康節、涑水、東萊。共爲九人。

至元嘉禾志。尊經閣之下。奉安先聖燕居像。兩旁則祠十先生焉。謂濂溪、康節、涑水、明道、伊川、橫渠、晦庵。



南軒、上蔡、東萊也。

宋史禮志。淳祐元年正月。以周敦頤、張載、程顥、程頤、朱熹從祀。景定二年。以張栻、呂祖謙從祀。咸淳三年。以邵雍、司馬光從祀。

### 士大夫不說學

士大夫不可以無學。不殖將落。原氏所以先亡。數典忘祖。籍父所以無後。董昭言。當今年少。不復以學問爲本。專以交游爲業。曹魏所以不永也。史洪肇言。但事長槍大劍。安用毛錐。乾祐所以失國也。蔡京禁人讀史。以通鑑爲元祐學術。宣和所以速禍也。

### 清慎勤

王隱晉書載李秉家誠云。昔侍坐於先帝。時有三長吏俱見。臨辭出。上曰。爲官長當清、當慎、當勤。修此三者。何患不治。見魏志李秉所稱先帝者。司馬昭也。昭雖篡弑之賊。其言不可以人廢。今人謂清慎勤三字出于呂氏官箴。由未讀裴松之三國志注也。

### 居官忌二事

施彥執云。有官君子最忌二事。在己則貪。在公家則聚斂。它罪猶可免。犯此二者。終身不可齒士大夫之列。今人或有處身最廉。然培克百姓。上以媚朝廷。下以諂權貴。輒得美官。雖不入己。其入己莫甚焉。暗中

伸手。此小偷也。公然聚斂。以期貴顯。真劫盜也。北窗  
炙輶

### 科場

科場之法。欲其難不欲其易。使更其法而予之以難。則覬倖之人少。少一覬倖之人。則少一營求患得之人。而士類可漸以清。抑士子知其難也。而攻苦之日多。多一攻苦之人。則少一羣居終日言不及義之人。而士習可漸以正矣。日知錄

鄉會試雖分三場。實止一場。士子所誦習。主司所鑑別。不過四書文而已。四書文行之四百餘年。場屋可出之題。士子早已預擬。每一榜出。鈔錄舊作。幸而得雋者。蓋不少矣。今欲革其弊。易以詩賦論策。則議者必譁然沮之。以爲聖賢之言。不可不尊。士子所習。難以驟改。其說必不行。其弊終難革也。竊謂宜以五經文爲第一場。四書文爲第二場。五經卷帙既富。題目難以預擬。均爲八股之文。不得諉爲未習。如此則研經者漸多。而勦襲雷同之弊庶幾稍息乎。

### 河防

禹之治水也。使由地中行。無所謂防也。言防而勞費無已。遂爲國家之大患矣。河爲北條之川。由絳水大陸播九河。同爲逆河。以入海者。禹之故迹。今運道臨清至天津者是也。東漢以後。河由千乘入海。卽今之大清河也。千乘郡。今武定府。自唐至宋金。皆由此道。金元之閒。河漸南決。始合汴泗淮以入于海。與禹河入海之

口相去幾二千里。而北條之水改爲南條矣。其兩岸之隄。歲增月益。高於民田廬舍。且與城平矣。水之性就下。不使由地中。而使出地上。欲其無決溢之害。不亦難乎。今之言河防者。以潘季馴爲師。季馴治河之法。不過曰清水可蓄。不可洩。黃河宜合不宜分而已。夫清水之當蓄。固不待言。黃河之宜合。則季馴一人言之。非古有是言也。禹之治河。釀爲二渠。疏爲九道。順其性而導之注海。何嘗不可分乎。塞其支流。束之使歸於一。欲藉河水之力。以刷海口之沙。其計固已左矣。古人云。川壅而潰。傷人必多。謂河不宜分。而增隄以禦之。一朝潰溢。隄不能禦。又糜國帑以塞之。僥倖成功。而官吏轉受重賞。此國之巨蠹也。季馴之法。守之百五十年。而其效如此。謂之習知河務。吾不信也。

顧寧人曰。天啓以前。無人不利于河決者。侵剋金錢。則自總河以至于闡官。無所不利。支領工食。則自執事以至于游閒無食之人。無所不利。日知錄今之官吏。其好利猶昔也。隄防日增。決溢屢告。竭海內之膏脂。飽若輩之囊橐。賞重罰輕。有損無益。其何能淑。載胥及溺。深可慮也。

通鑑多采善言

司馬溫公通鑑目錄極簡括。而多采君臣善言。如明主愛一嘖一笑。韓昭侯無德而富貴。謂之不幸。班固治亂民猶治亂絲。不可急也。龔遂明主可爲忠言。趙充國動民以行。不以言。應天以實。不以文。王嘉忠臣不和。和臣不忠。任延文吏習其欺謾。廉吏清在一己。皆無益百姓。宗均以身教者從。以言教者訟。第五倫遣將帥不如任州郡。

李刑罰者治亂之藥石。德教者興平之梁肉。崔物速成則疾亡。晚就則善終。救寒莫如重裘。止謗莫如自

修。王人非堯舜。何得每事盡善。述便宜者。便於公宜于民也。顧憲史不書惡。人君何所畏忌。魏孝朝堂非

殺人之所。殿廷非決罰之地。高人主兼聽則明。偏聽則暗。魏循正而行。自與志會。唐太執政不能受諫。安

能諫。人人臣納諫。與冒白刃何異。全明主貴忤。以收忠賢。惡順以去佞邪。法貴簡而能禁。刑貴輕而必行。

楊相天下本無事。但庸人擾之。陸象士名重于利。吏利重于名。劉論大計者不可惜小費。全六經言禍福

由人。不言盛衰有命。實事未必知。知事未必實。天不以地有惡木而廢發生。天子不以時有小人而廢聽

納。諫者有爵賞之利。君亦有理安之利。諫者得獻替之名。君亦得采納之名。諫者當論理之是非。豈論事

之大小。帝王之道。寧人負我。無我負人。有責怒而無猜嫌。有懲沮而無怨忌。財匱于兵衆。力分于將多。怨

生于不均。機失于遙制。皆陸萬國耳目。豈可以機數欺之。韓皆古今不易之論。以資治名其書。斯無媿矣。

### 古語多有本

朱新仲云。鷲鳥累百。不如一鶚。人知爲禰衡。不知本鄒陽書也。予謂豺狼當道。安問狐狸。人知爲張綱語。

不知本於孫寶傳。拜爵公朝。謝恩私室。人知爲羊祜語。不知本於王莽傳。後之視今。亦猶今之視昔。人知

爲王羲之蘭亭序。不知本於京房傳。房云今瞻欲大。心欲小。智欲圓。行欲方。人知爲孫思邈語。不知本于

文子。文子云。心欲孔席不暇煖。墨突不得黔。人知出韓愈爭臣論。不知亦本文子。孔子無黔突。求忠臣必

于孝子之門。人知爲韋彪語。不知本于孝經緯。非澹泊無以明志。非寧靜無以致遠。人知爲諸葛亮語。不知本于淮南子。淮南志作德

安身莫若無競。修己莫若自保。守道則福至。求祿則辱來。宋史以爲李孟傳語。不知本於王輔嗣注易。獨行不愧影。獨寢不愧衾。宋史以爲蔡元定語。不知本於劉子。劉云。獨立不慚。影。獨寢不愧衾。

清談

魏晉人言老莊清談也。宋明人言心性亦清談也。孔子言吾道一以貫之。忠恕而已矣。孟子言良知良能。孝弟而已矣。故曰道不遠人。後之言道者。以孝弟忠信爲淺近。而馳心於空虛竊遠之地。與晉人清談奚以異哉。顧寧人云。晉之清談。談老莊。今之清談。談孔孟。王安石之新經義亦清談也。神京陸沈。其禍與晉等。趙鼎言。王安石以虛無之學敗壞人才。今人但知新法之害百姓。不知經義取士之害士習。

文字不苟作

顧寧人曰。文須有益于天下後世。若怪力亂神之事。無稽之言。勦襲之說。諛佞之文。有損于己。無益于人。多一篇多一篇之損矣。

處患難者。勿爲怨天尤人之言。處貴顯者。勿爲矜己傲物之言。論學術。勿爲非聖悖道之言。評人物。勿爲黨同醜正之言。

文人勿相輕

杜子美詩所以高出千古者。不薄今人愛古人也。王楊盧駱之體。子美能爲而不屑爲。然猶護惜之。不欲人警議。且曰。汝曹身與名俱滅。不廢江河萬古流。其推挹如此。以視詩未有劉長卿一句。已呼阮籍爲老兵。語未有駱賓王一字。已罵宋玉爲罪人者。猶鷓鴣之與蚍蜉矣。

薛能小有才。而妄自稱詡。其論詩有李白終無取之句。又云。我生若在開元日。不遣名爲李翰林。真令人絕倒矣。能從事蜀川日。每短諸葛功業。有詩云。陣圖誰許可。廟貌我擲揄。又云。焚卻蜀書宜不讀。武侯無可律吾身。其狂惑喪心如此。宜乎不令終也。

杜牧之著論。言近有元白者。喜爲淫言嫖語。鼓扇浮囂。吾恨方在下位。未能以法治之。牧之可謂失言矣。元白諷諭詩。意存讜直。豈皆淫嫖之詞。若反脣相稽。牧之獨無嫖語乎。無諸已而後非諸人。立言者其戒之。

文人浮薄

唐士大夫多浮薄輕佻。所作小說。無非奇詭妖豔之事。任意編造。誑惑後輩。而牛僧孺周秦行紀。尤爲狂誕。至稱德宗爲沈淩兒。則幾于大不敬矣。李衛公窮愁志載其文。意在族滅其家而始快。雖怨毒之詞。未免過當。而僧孺之妄談。實有以招之也。或云。僧孺本無此記。衛公門客僞造耳。宋元以後。士之能自立者。皆恥而不爲矣。而

市井無賴。別有說書一家。演義盲詞。日增月益。誨淫勸殺。爲風俗人心之害。較之唐人小說。殆有甚焉。

詩文盜竊

皎然詩式。著偷語、偷義、偷勢之例。三者雖巧拙攸分。其爲偷一也。後代詩文家。能免於三偷者寡矣。向秀注莊子。郭象竊之。郗紹著晉中興書。何法盛竊之。姚察撰漢書訓纂。後之注漢書者。隱沒名字。將爲己說。顧寧人謂有明一代之人。所著書無非盜竊。語雖太過。實切中隱微深痼之病。

唐張懷慶好偷竊。名士文章。時人爲之語曰。活剝張昌齡。生吞郭正一。今之舉業文字。大率生吞活剝。其詞必己出者。百無一二。士習之不端。於作文見之矣。

釋氏輪迴之說

列子天瑞篇。林類曰。死之與生。一往一反。故死於是者。安知不生於彼。釋氏輪迴之說。蓋出於此。列子書。晉時始行。恐卽晉人依託。

釋道俱盛于東晉

晉書何充傳。性好釋典。崇修佛寺。供給沙門以百數。糜費巨億。而不吝也。親友至于貧乏。無所施遺。以此獲譏于世。于時郗愔及弟曇。奉天師道。而充與弟準。崇信釋氏。謝萬譏之云。二郗諂于道。二何佞于佛。王坦之與沙門竺法師甚厚。每共論幽明報應。便要先死者當報其事。後經年師忽來云。貧道已死。罪福皆

不虛。惟常勤修道德。以升濟神明耳。言訖不見。坦之尋亦卒。坦之傳。殷仲堪少奉天師道。又精心事神。不吝財賄。而怠行仁義。嗇于周急。及桓元來攻。猶勤請禱。仲堪傳。王氏世事張氏五斗米道。疑之彌篤。孫恩之攻會稽。寮佐請爲之備。凝之不從。方入靖室請禱。出語諸將曰。吾已請大道鬼兵相助。賊自破矣。既不設備。遂爲孫恩所害。王羲之傳。郗愔事天師道。子超奉佛。郗超傳。杜子恭世傳五斗米道。南史杜京產傳。當時士大夫好尙迂怪如此。此晉之所以日衰也。王導江左夷吾。而世說載其拜揚州刺史。過胡人前。彈指云。蘭閣蘭閣。導之孫珣。珣以法護。僧彌爲小字。珣又捨宅爲寺。則王氏亦好佛矣。

### 治生

清波雜志云。頃侍鉅公語及常產。公云。人生不可無田。有則仕宦自如。可以行志。不仕則仰事俛育。蠶了伏臘。不致喪失氣節。有田方爲福。蓋福字從田從衣。大昕案。福从示。不从衣。宋人不講小學。故多誤解。

許魯齋言。爲學者治生最爲先。苟生理不足。則于爲學之道有所妨。彼旁求妄進。及作官嗜利者。殆亦窘于生理之所致也。諸葛孔明。身都將相。死之日。廩無餘粟。庫無餘財。其廉至于如此者。以成都桑土子孫衣食自有餘饒耳。

與其不治生產而乞不義之財。毋寧求田問舍而卻非禮之饋。故井上之李。甘于彈鋏之魚。五侯之鯖。劣于墻東之儉。





# 十駕齋養新錄卷第十九

宋槧本

今人重宋槧本書。謂必無差誤。卻不盡然。陸放翁跋歷代陵名云。近世士大夫。所至喜刻書版。而略不校讐。錯本書散滿天下。更誤學者。不如不刻之愈也。是南宋初刻本。已不能無誤矣。張洎儀禮識誤。岳珂九經三傳沿革例。所舉各本異同甚多。善讀者當擇而取之。若偶據一本。信以爲必不可易。此書估之議論。轉爲大方所笑者也。

蘇子瞻云。近世人輕以意改書。鄙淺之人。好惡多同。故從而和之者衆。自予少時。見前輩皆不敢輕改書。故蜀本大字書皆善本。

予向見宋槧本。有避亶字。注从亶。从旦於下。未審其故。頃見岳倦翁愧郟錄。有一條云。紹興文書。令廟諱舊諱正字皆避之。故哲宗孝宗之舊諱單字者三。皆著令改避。唯欽宗舊諱二字。一則從六。從回。從旦。一則從火。從亶。今皆用之不疑。乃知亶字迴避。由於欽宗舊諱。但倦翁著此書。在嘉定甲寅。其時尙未避亶烜二字。不知何時著令。何人陳奏也。

借書

許慈與胡潛並爲博士。更相克伐。謗讟忿爭。書籍有無。不相通借。遂以矜己妒彼見譏于世。蜀志崔慰祖聚書至萬卷。鄰里年少好事。來從假借。日數十裘。慰祖親自取與。未嘗爲辭。南史劉峻苦所見不博。聞有異書。必往祈借。清河崔慰祖謂之書淫。同上裴漢借異書。躬自錄本。北史蘇東坡在黃州。有岐亭監酒胡定之。載書

萬卷隨行。喜借人看。見與秦太虛書

唐杜暹家書末自題云。清俸買來手自校。子孫讀之知聖道。鬻及借人爲不孝。鬻爲不孝。可也。借爲不孝。過矣。清波雜志然世固有三等人不可借。不還。一也。污損。二也。妄改。三也。守先人之手澤。擇其人而借之。則賢子孫之事也。

引書記卷數

余蕭客仲林云。引書注某卷。向謂始於遼僧行均龍龕手鑑。宋程大昌演繹露兩書。然亦偶有一二條耳。後讀江少虞事實類苑。竟體注卷。在程大昌前。頃閱道藏。見王懸河三洞珠囊。每卷稱某書某卷。懸河唐人。又在江少虞之前矣。四庫全書總目謂李匡又資暇集引通典多注出某卷。匡又亦唐人。

下走

鄭朋奏記。蕭望之自稱下走。應劭曰。下走。僕也。師古曰。下走者。自謙言趨走之役也。司馬遷與任安書。稱太史公牛馬走。牛馬走卽下走也。上稱官名。下則自謙之詞。或解爲太史公之牛馬走。則迂而鑿矣。

陳椽

史記貨殖傳。故楊平陽陳椽其閒。得所欲。小司馬以陳椽爲經營馳逐之意。予謂史記多古語。陳椽猶馳逐。皆雙聲。

關穿

論衡程材篇。春秋五經。義相關穿。關穿。猶言貫穿也。

佻脇

論衡骨相篇。晉公子重耳。佻脇。爲諸侯霸。張儀。佻脇。亦相秦魏。佻脇。卽駢脅也。佻駢聲相近。

奧懷

南史王敬則傳。有懷濃字。一切經音義。懷濃。今皆作惱。同奴道反。懷濃。憂痛也。予謂農惱聲相近。詩。遭我乎狷之閒。漢書狷作嘽。

佚蕩

揚雄傳。爲人簡易佚蕩。張晏曰。佚音鐵。蕩音讜。晉灼曰。佚蕩。緩也。宋祁校本云。蕭該音義。蕩。亦作傷。韋佚爲替。傷蕩爲黨。晉音鐵讜。司馬遷傳。倜儻非常之人。與晉音亦相近。說文。跌。踢也。亦佚蕩之異文。

翠

陸務觀記東坡詩翠欲流。謂蜀語鮮翠猶言鮮明也。案說文澤新也。七罪反。與翠同音。故謂鮮新爲鮮翠。

閒介

閒介雙聲字。出孟子山徑之蹊閒介。馬融長笛賦。閒介無蹊。李善注引孟子證之。朱文章句始以山徑之蹊閒爲句。介字屬下句。王伯厚謂閒介出長笛賦。是數典而忘祖也。

易

予向謂漢儒讀經字有異義。無異音。今又得一證。易鑿度云。易一名而含三義。所謂易也。變易也。不易也。鄭康成作易贊及易論。申其義云。易簡一也。變易二也。不易三也。是鄭讀易簡與變易。不易。初無兩音。晉宋以後。分去入兩讀。而周簡子名宏遂不用易簡義。謂易者易也。音易。有無相代。彼此相易。皆是易義。若然。則易與變易。更何分別。不應列爲三義矣。自一字分數音。而經學益多穿鑿之解。葛稚川諸人。不得不任其咎也。

賈誼書引顯頊曰。功莫美于去惡而爲善。罪莫大于去善而爲惡。故非吾善善而已也。善緣善也。非惡惡而已也。惡緣惡也。今人讀善惡各分兩音。苟知緣善而善。緣惡而惡之義。則分之無可分矣。

夫差

前卷言吳王夫差之差。可押麻韻。引羅虬比紅兒詩。按宋之問浣紗篇。越女顏如花。越王問浣紗。國微不

自寵。獻作吳宮娃。山藪半潛匿。苧羅更蒙遮。一行霸句踐。再笑傾夫差。豔色奪人目。效顰亦相誇。是唐初人已讀此音。

### 非三公而稱公

史家之例。非三公不稱公。顧氏日知錄言之詳矣。晉宋以後。卽有不盡然者。南史謝朓傳。臨終謂門賓曰。寄語沈公。君方爲三代史。亦不得見沒。朓死於齊代。休文未嘗位三公也。虞愿傳。王秀之與朝士書曰。此郡承虞公之後。善政猶存。虞寄傳。或謂陳寶應曰。虞公病篤。言多錯謬。及寶應敗走。謂其子曰。早從虞公計。不至今日。丘靈鞠傳。王儉謂人曰。丘公仕宦不進。才亦退矣。

### 代友改字

范滂父之母。夢鄧禹來而生滂。父故名祖禹。字夢得。司馬溫公與之帖云。按鄧仲華傳。仲華內文明篤。行滂備。輒欲更表德曰滂備。旣協吉夢。又可正譌。且與令德相應。未審可否。次日范復一帖云。昨夕再思。滂備字太顯而盡。不若單字滂。臨時配以甫子而稱之。五十則稱伯仲。亦猶子路或稱季路。如何如何。見梁按夢得字與劉賓客同。而名又有禹字。當時必有以爲慕劉者。故溫公帖有正譌之語。裕漫

### 宮中稱呼

宋太祖稱杜太后爲娘娘。見鐵圍山叢談高宗稱徽宗爲爹爹。稱章太后爲大姐姐。太后稱帝爲哥。內禪後稱孝

宗爲大哥。見四朝聞見錄。

婦人稱阿

漢魏婦女有稱阿者。如陳皇后小字阿嬌。及寡婦左阿君。見於游俠傳。荀攸妾阿鶯。見魏志。朱建平傳。六朝多以阿系姓。如晉書中。晉室中興。乳母阿蘇。有保元帝之功。賜號保聖君。舊唐書。周盤龍愛妾杜氏。上送金釵二十枚。手敕曰。餉周公阿杜。南齊書。隋獨孤后謂雲昭訓爲阿雲。唐蕭淑妃謂武后爲阿武。韋后降爲庶人。稱阿韋。劉從諫妻裴氏稱阿裴。吳湘娶顏悅女。其母焦氏稱阿顏阿焦。唐書安樂公主傳。阿武子尙爲天子。洪景伯云。今閭巷之婦。以阿挈其姓。則南宋猶然。今則公私俱無此語矣。北史隋房陵王勇傳。昭訓雲嬖幸。皇后忿怒曰。睨地伐專寵阿雲。有如許豚犬。至尊千秋萬歲後。遣汝等兄弟向阿雲兒前再拜問訊。此是幾許苦痛邪。

婦人稱奴

婦人自稱奴。蓋始於宋時。嘗見猗覺寮雜記云。男曰奴。女曰婢。故耕當問奴。織當問婢。今則奴爲婦人之美稱。貴近之家。其女其婦。則又自稱曰奴。是宋時婦女。以奴爲美稱。宋季二王航海。楊太后垂簾。對羣臣猶稱奴。此其證矣。予按六朝人多自稱儂。蘇東坡詩。它年一舸鴟夷去。應記儂家舊姓西。儂家猶奴家也。奴卽儂之轉聲。唐詩紀事。載昭宗菩薩蠻詞。何處是英雄。迎奴歸故宮。則天子亦以此自稱矣。或云安得有英雄迎

歸大內中。蓋後人嫌其俚。改之。

老

今世友朋相狎。呼其姓加以老字。亦有本。白樂天詩。每被老元偷格律。謂微之。試覓老劉看。謂夢得。北史。石曜持絹一匹。謂斛律武都曰。此是老石機杼。聊以奉贈。是北齊人嘗以老石自稱矣。若老杜老蘇。別於小杜大蘇言之。非當時相稱。

又有稱其人字者。蘇東坡詩。老可能爲竹寫真。謂文與可也。今人多稱其上一字。僧亦稱下一字。東坡詩。不知老裝幾時歸。謂元裝。

小名鐵柱

北方小兒乳名多稱柱兒。或稱鐵柱兒。予讀辛稼軒清平樂詞。爲兒鐵柱作也。其詞云。靈皇醮罷。福祿都來也。試引鶴雛花樹下。斷了驚驚怕怕。從今日日聰明。更宜潭妹嵩兒。看取辛家鐵柱。無災無難公卿。則鐵柱之名。宋時已有之矣。

五行命名

今人好以五行偏旁命名。遞及子孫。取相生之義。蓋盛於宋時。尹源弟洙。源子林。林子焯。洙子構。秦檜兄梓。弟棣。檜子焯。孫塤。塤曾孫鉅。元孫浚。灑。朱松子熹。孫塾。塾在曾孫鉅。鈞。鑑。鐸。銓。元孫淵。洽。潛。濟。濬。澄。李





之義。案天竺多兩名。雨安居。從五月十五日至八月十五日也。土火羅諸國。至十二月安居。今言臘者。亦近是也。此方言夏安居。各就其事制名也。卷十杜子美舊雨來。今雨不來之語。蓋取諸此。

### 漢唐金價

履齋示兒編云。公羊傳隱五年曰。百金之魚。注云。百金。猶百萬也。古者以金重一斤。若今萬錢矣。漢食貨志亦云。黃金一斤直萬錢。則知文帝言百金中人十家之產。卽是金百斤爲錢百萬也。高祖善家令之言。賜金五百斤。命陳平爲反間。捐金四萬斤。使漢金不賤。何以至此。如唐時必貴。太宗以子志寧。孔穎達能諫太子。賜金一斤而已。非貴則不如是之少也。野客叢書云。緡素雜記引一金萬錢。以證晉王導所市練布之價。則是一金萬錢。不但秦漢爲然。自三代至晉。莫不皆然。

日知錄云。洪武八年。金一兩當銀四兩。十八年。一兩當銀五兩。永樂中。一兩當銀十兩。幼時見萬歷中赤金止七八換。崇禎中十換。江左至十三換矣。

### 大斗大兩大尺

唐律疏義引雜令。量以北方秬黍中者。容一千二百爲侖。十侖爲合。十合爲升。十升爲斗。三斗爲大斗。一斗十斗爲斛。稱權衡。以秬黍中者百黍之重爲銖。二十四銖爲兩。三兩爲大兩。一兩十六兩爲斤。度以秬黍中者一黍之廣爲分。十分爲寸。十寸爲尺。一尺二寸爲大尺。一尺十寸爲丈。唐六典與雜令同。又云。凡積秬黍爲度量權衡者。調

鍾律測晷景合湯藥及冠冕之制則用之內外官司悉用大者據隋書律稭志開皇以古斗三升爲一升古稱三斤爲一斤則大斗大兩始于隋開皇閒唐初沿而不改耳

元寶

輟耕錄銀錠上字號揚州元寶乃至元十三年大兵平宋回至揚州丞相伯顏號令搜檢將士行李所得撒花銀子銷鑄作錠每重五十兩歸期獻納世祖大會皇子王孫駙馬國戚從而頒賜或用貨買所以民間有此錠也後朝廷亦自鑄至元十四年者重四十九兩十五年者重四十八兩遼陽元寶乃至元二十三年二十四年征遼東所得銀子而鑄者是元寶重五十兩起于元世也

金史食貨志舊例銀每錠五十兩其直百貫民間或有截鑿之者其價亦隨低昂遂改鑄銀名承安寶貨一兩至十兩分五等每兩折錢二貫公私同見錢用是金時銀錠已有重五十兩者但當時無元寶之名

錠

古人稱金銀曰錠今用錠字按廣韻錠有兩音一丁定切豆有足曰錠無足有鐙一徒徑切錫屬俱與銀錠義不協元時行鈔法以一貫爲定後移其名于銀又加金旁

浙東斗尺

至正直記浙東斗尺皆存故宋遺製斗謂之百合足比今之官數八升也謂官數百三十分尺謂之百分比今之

官數八寸。吾鄉絕無此樣。皆用官樣。至宜興則開有之。杭城又有七升斗七寸尺者。謂之小百合。小百分也。鄞俗則有二樣。二斗五升者曰料。五斗曰菁。料音勞去聲。

#### 四柱

今官司錢糧交代。必造四柱冊。四柱者。舊管、新收、開除、實在也。至正直記云。人家出納財貨者。謂之掌事。謂算私籍。其式有四。一曰舊管。二曰新收。三曰開除。四曰見在。則元時已有此名目。

#### 火耗

元史刑法志。諸產金之地。有司歲徵金課。其有巧立名色。廣取用錢。及多稱金數。剋除火耗。爲民害者。從監察御史廉訪司糾之。火耗兩字。見於史始此。

#### 孝弟

古人惟子孫稱孝。詩。綏予孝子。孝孫徂位。皆廟中之稱。後代以弟承兄。則有稱孝弟者。續通鑑長編。載嘉祐八年孫抃等議云。太祖之廟。太宗稱孝弟。眞宗稱孝子。大行皇帝稱孝孫。是也。俚俗之稱。更有可笑者。蘇州府圓妙觀前甌塔。近年傾圮。土人拾得一甌。其文云。條坊巷街。北面南居。清信崇奉三寶女弟子。孝妻傅氏妙喜。同孝男虞宗臣。宗禱。宗孟等。蓋宋時所刻。又盤門內西泮環巷石井闌上。有孝夫某爲亡妻何氏四乙娘字。嘉泰元年正月刻。又府前西米巷石井闌。有孝夫某爲亡前妻黃氏十四娘字。嘉定十七

年十二月刻。是宋時有孝夫孝妻之稱。

契姪

陸子靜集有楊承奉墓碣。末題契姪臨。

褒成侯未嘗徙封

後漢書孔僖傳。建武十三年。世祖封孔志爲褒成侯。志卒。子損嗣。永元四年。徙封褒亭侯。損卒。子曜嗣。曜卒。子完嗣。世世相傳。至獻帝初國絕。是永元以後孔氏嗣侯者。皆當稱褒亭。不當云褒成矣。乃安帝紀。延光三年。賜褒成侯帛。而曲阜孔廟孔龢碑。載元嘉三年。司徒雄等奏稱。褒成侯四時來祠。又韓敕碑。立于永壽二年。其陰有褒成侯孔建壽名。皆在永元之後。而稱褒成侯如故。洪氏隸釋以爲損未嘗徙封。固信而有徵矣。後漢侯爵。有縣侯。都鄉侯。鄉侯。都亭侯。亭侯五等。而褒成侯國不見于郡國志。則褒成殆亭侯而非縣侯。依史例。當云褒成亭侯。舊史偶脫成字。蔚宗遂誤。切爲徙封耳。攷魏黃初二年詔。亦稱褒成之後。絕而莫繼。可證漢世無徙封褒亭之事也。

嘉祥縣南武山

日知錄。成化中。或言嘉祥之南武山。有曾子墓。有漁者。陷入其穴。得石碣。而封志之。疑周世未有石碣。科斗古文。亦非今人所識。予謂嘉祥漢任城縣地。南武山當因武氏所居得名。漁者所見。殆卽漢武氏石室。

也。

### 錢讓

錢讓事不見於史冊。湖州府長興縣志皆列入人物。所載事迹未可盡信。如征東大將軍漢時未有此官。又云天子臨喪哀慟。給兵吏加威儀。還葬故鄉。恐亦非實。漢世天子臨大臣喪。事不恆有。讓位非公。世非外戚。何緣邀此異數。藉令有之。何以史不一見其名乎。唯爲郡將。訴冤一事最可稱。而吳郡志牧守未見辭固名。不知志何所據也。錢氏舊譜又載九江寇周生。范容。擾淮泗。徐揚間。詔拜讓廣陵太守。征東大將軍都督江左六州諸軍事。斬賊帥徐鳳。謝安于陣。而范容周生等自縛款首。桓帝旌其功。封富春侯。以范史證之。俱無影響。大率後人附會之詞。攷鄭樵氏族略云。漢哀平間。錢遜爲廣陵太守。避王莽亂。徙居烏程。而讓亦官廣陵太守。意者讓遜本卽一人。夾漈避宋濮安懿王諱。改讓爲遜乎。

### 錢珣

唐詩紀事以錢珣爲吏部尙書徽之子。攷唐書徽傳。徽子可復。方義之下。乃云子珣。是珣爲方義之子。非徽子矣。珣以宰相王搏薦。知制誥。進中書舍人。搏得罪。珣貶撫州司馬。攷王搏罷相。在昭宗乾寧三年丙辰。珣之貶斥。當在此時。而韓文公薦錢徽自代狀。稱其年輩皆在臣前。文公生于大歷戊申。至乾寧丙辰。已百二十九年矣。而徽又長于文公。其子恐無逮事昭宗者。計有功殆誤會唐書之文也。唐書珣字

瑞文與名相應。而紀事作端文亦誤。

袁高題名

唐詩紀事載袁高茶山詩。又云。唐制。湖州造貢茶最多。謂之顧渚貢焙。歲造一萬八千四百斤。大歷後始有進奉。建中二年。高刺郡。進三千六百串。并此詩一章。刻石在貢焙院。是詩爲建中二年所作矣。頃得高題名於長興之小石山。卽顧渚支峯。其文云。大唐州刺史臣袁高奉詔修茶。訖。至。山最高堂。賦茶山詩。興元甲子歲。三春十日。則是賦詩在興元元年。非建中二年也。其詩云。皇帝尙巡狩。東郊路多堙。周迴遶天涯。所獻愈艱勤。蓋興元春。朱泚竊號長安。德宗西幸奉天。故有此語。若在建中二年。則不得云皇帝尙巡狩矣。唐史袁高傳。失載刺湖州事。李吉甫茶山詩述碑陰記。述高所歷官云。德宗嗣位。累遷尙書金部員外郎。右司郎中。權御史中丞。爲杞所忌。貶韶州長史。尋刺湖州。收復之歲。徵拜給事中。以卒。則高之徵拜給事中。卽在興元甲子冬也。

于頔茶山詩述

金石錄第一千六百十六。唐茶山詩。并詩述。詩。袁高撰。詩述。于頔撰。徐璣正書。第一千六百十七。唐詩述碑陰記。李吉甫撰。徐璣正書。貞元十年正月。此碑久亡。而于頔題名尙存。在長興縣小石山。正書十五行。文云。使持節湖州諸軍事。刺史臣于頔。遵奉詔命。詣顧渚茶院。修貢畢。登西顧山最高堂。汲巖泉。□□□

似是茶字。□□似。前刺史□□袁公留題□□刻字。茶山詩于石。大唐貞元八年。歲在壬申春三月。蓋茶山詩述之刻。卽在是年。又逾二載。而吉甫爲文記之。則袁高已卒矣。唐詩紀事。謂高卒于憲宗時。亦非也。唐書高傳云。憲宗時。李吉甫言其忠饒。贈禮部尙書。非謂卒于憲宗時。瞿鏡濤云。袁高于頤兩題名。茶字凡五見。皆作茶。唐人精于六書。不芻輕作俗字如此。

### 六先生

朱文公有六先生贊。謂濂溪、明道、伊川、橫渠、康節、涑水也。端平初。常熟令王燾。于縣學建六先生祠。祀濂溪、橫渠、明道、伊川、晦庵、南軒。酒祐辛丑。命州縣學各建六先生祠。其後有稱九先生者。則於六人之外增康節、涑水、東萊也。又有稱十先生者。則於九人之外增上蔡一人也。

### 生日

古有上壽之禮。無慶生日之禮。漢書。盧綰與高帝同日生。里中以羊酒賀兩家。祇是賀生子。非賀生日也。唐中宗景龍三年十一月十五日。帝誕辰。內殿宴羣臣聯句。册府元龜。載唐開元十七年八月癸亥。以降誕之日。大置酒張樂。宴百寮於花萼樓下。終宴。尙書左丞相源乾曜。右丞相張說。率文武百官上表。請以八月五日爲千秋節。著之甲令。布于天下。咸令宴樂休假三日。羣臣以是日獻甘露醇酎。上萬歲壽酒。此帝王生日上壽之始也。宋史禮志。大中祥符五年十一月。以宰相王旦生日。詔賜羊三十口。酒五十壺。米



麵各二十斛。令諸司供帳。京府具衙前樂。許宴其親友。且遂會近列及丞郎給諫修史屬官。俄又賜樞密使副參知政事羊三十口。酒三十壺。米麪各二十斛。其後以廢務非便。奏罷會。而賜如故。此大臣生日宴會之始也。攷容齋三筆。載馮道在晉。天福中爲上相。詔賜生辰器幣。道以幼屬流離。早喪父母。不記生日。懇辭不受。則宰相生日有賜。不始於宋矣。王明清揮塵錄。賜生辰器幣。起於唐。以寵藩鎮。五代至遣使命。周世宗眷遇魏宣懿。始以賜。自是執政爲例。禮志載紹興十三年十二月二十三日。賜宰臣秦檜辭免生日。賜宴詔。是南渡復有生日賜宴之例也。

東坡內制集。具載賜生日詔。自宰相執政而外。又有賜皇叔祖安康郡王宗隱生日禮物口宣。賜皇叔祖華原郡王宗愈生日禮物口宣。賜皇叔祖漢東郡王宗瑗生日禮物口宣。賜皇伯祖高密郡王宗晟生日禮物口宣。賜皇叔揚王顥生日禮物口宣。賜皇弟大寧郡王佖生日禮物口宣。賜皇弟祚國公偁生日禮物口宣。賜皇弟咸寧郡王俱生日禮物口宣。賜建安郡王宗綽生日禮物口宣。賜皇叔荆王頴生日禮物口宣。賜嗣濮王宗暉生日禮物口宣。賜皇弟遂寧郡王佖生日禮物口宣。賜皇弟普寧郡王似生日禮物口宣。賜濟陽郡王曹佾生日禮物口宣。是宋時親王等生日。均有賜禮物之例。不特宰相也。

生日獻詩詞

西清詩話。謂公卿誕日。以詩爲壽。見於唐末。

履齋示兒編云。魏仲先壽萊公詩云。何時生上相。明日是中元。

明道雜志。潞公以太尉鎮洛師。遇生日。僚吏皆獻詩。孔毅夫野史。文潞公守太原。辟司馬溫公爲通判。夫人生日。溫公獻小詞。爲都漕。唐子方峻責。此事雖未可信。然生日獻詩詞。蓋盛於北宋時矣。

東坡集有生日王郎以詩見慶次其韻詩。有生日劉景文以古畫松鶴爲壽且貺佳篇次韻爲謝詩。有子由生日以檀香觀音像及新合印香銀篆盤爲壽詩。有以黃子本拄杖爲子由生日之壽詩。又有表弟程德儒生日詩。趙倅成伯母生日口號。樂全先生生日以鐵拄杖爲壽詩。

吳曾漫錄。秦益公生日。四方賀詩尤多。嘗取其三聯云。朝回不入歌姬院。夜半猶看寒士文。虜人爭問年今幾。天子恨無官可酬。建鄴三公今始有。靖康一節古來無。蓋取其親切耳。蜀人李善詩。無窮基有無窮聞。第一人爲第一官。其後言者以爲過。有時禁之。仍著令。然前輩類多有之。如荆公、東坡、皆有曾魯公、張文定生日詩。

朱彥可談云。近世長吏生日。寮佐畫壽星爲獻。例只受文字。其畫卻回。但爲禮數而已。王安禮自執政出知舒州。生日屬吏爲壽。或無壽星畫者。但有它畫軸。紅繡囊絨之。謂必退回。王忽令盡啓封。掛畫於廳。事標所獻人名銜於其下。良久引客燕香。共相瞻禮。其閒無壽星者。或用佛像。或神鬼。唯一兵官乃崔白畫二猫。既至前。慚懼失措。

禁見任官生日受所屬禮物

紹興二十六年閏十月壬寅詔內外見任官因生日受所屬慶賀之禮及與之者各徒三年賊重者依本法自秦檜擅權四方皆以其生日致饋其後州郡監司率受此禮極其僭侈太學錄范成象面對以爲言

故立法見繫年要錄

魏華父云人主生日爲樂始於唐士大夫生日之盛則始於近世故前輩詩集唯少陵示宗武生日與東坡爲同氣之親或知己偶有所賦而它集罕有若用之公卿貴人則無之直自京檜以來此風日甚

爵里刺

釋名爵里刺書其官爵及郡縣鄉里也世語夏侯榮七歲誦書日千言經目輒記文帝聞而請焉賓客百餘人人一奏刺悉書其鄉邑名氏世所謂爵里刺也客示之一寓目使之徧談不誤一人三國志注後漢書禰衡傳建安初來游許下始達潁川乃陰懷一刺旣而無所之適至於刺字漫滅井丹傳未嘗修刺候人仇覽傳齋刺就房謁之童恢傳掾屬悉投刺去皆在東漢之世而王充論衡稱韓生通刺倪寬結膠漆之交則西京已有之

宋名刺

張世南游宦紀聞云士大夫謁見刺字古制莫詳世南家藏石本元祐十六君子墨迹其間有觀敬賀子

允學士尊兄。正旦高郵秦觀手狀。庭堅奉謝子允學士同舍。正月日江南黃庭堅手狀。未謹候謝子允學士兄。二月日著作郎兼國史院檢討張耒狀。補之謹謁謝子允校書同舍尊兄。正月日昭德晁補之狀。汝礪參候子允校書同舍。以次凡十六人。皆元祐四年。時惟彭公爲中書舍人。餘皆館職也。刺字或書官職。或書郡里。或稱姓名。或只稱名。既手書之。又稱主人字。且有同舍尊兄之目。風流氣味。將之以誠。今人觀之。宜泚頰矣。

周輝清波雜志云。大父有手札藥方。乃用舊門狀爲策。讀見元祐間。雖僧道謁刺。亦大書謹。祇候起居某官。伏聽處分。或云謹狀。官稱不過呼。紹興初。士大夫猶有以手狀通名。止用小竹紙親書。往還多以書簡。莫非親筆。小官於上位亦然。自行劄子。禮雖至矣。情則反疏。

### 齊物

王伯厚謂莊子齊物論。非欲齊物也。蓋謂物論之難齊也。是非毀譽。一付於物。而我無與焉。則物論齊矣。邵子詩。齊物到頭爭恐誤。按左思魏都賦。萬物可齊于一朝。劉涓林注云。莊子有齊物之論。劉琨答盧諶書云。遠慕老莊之齊物。近嘉阮生之放曠。文心雕龍論說篇云。莊周齊物。以論爲名。是六朝人已誤以齊物兩字連讀。唐人多取齊物兩字爲名。其誤不始康節也。

### 梓潼神

梓潼之神相傳晉時張惡子唐天寶十年監察御史王岳靈撰張惡子廟碑見唐詩紀事李商隱題張惡子廟詩下馬捧椒漿迎神白玉堂如何鐵如意獨自與姚萇

王鐸謁梓潼張惡子廟詩盛唐聖主解青萍欲振新封濟順名夜雨龍拋三尺匣青雲鳳入九重城劍門喜氣隨雷動玉壘韶光待賊平唯報關東諸將相柱天功業賴陰兵判度支蕭遇和云青骨祀吳誰讓德紫華居越亦知名未聞一劍傳唐主長擁千山護蜀城斬馬威稜應掃蕩截蛟鋒刃俟昇平鄼侯爲國親簫鼓堂上神籌更布兵時僖宗解劍贈神故二公賦詩

吳自牧夢梁錄梓潼帝君在吳山承天觀此蜀中神專掌注祿籍凡四方士子求名赴選者悉禱之封王爵曰忠文英武孝德仁聖王是南宋行都已立此祠也新定續志載葉夢鼎梓潼真君祠記云世言帝命司桂籍主人閒科級是南宋之季外府州亦立此祠矣

虞集廣州路右文成化廟記天官書以斗魁戴匡六星爲文昌之宮徵文治者占焉或曰降靈吾蜀之梓潼者則其神也是以縉紳大夫士多信禮之而文昌之祠遂徧郡邑皇元延祐中書詔加封號其祠曰右文成化贊詞具在而朝廷設進士科以取士文風大行人謂神實主之

### 魁星

學校祀魁星於古未之聞也按新定續志學校門云魁星樓爲一學偉觀前知州吳槩旣勤樸斲今侯錢

可則始丹堊其上。以奉魁星。郡人方逢辰書其扁。是南宋已有之矣。顧氏日知錄謂奎爲文章之府。故立廟祀之。而改奎爲魁。又謂魁非佳語。皆非也。北斗以魁爲首。故有九魁之稱。而凡物之首。人之帥。皆以魁名之。斗魁戴筐六星。曰文昌。魁下六星。兩兩相比。曰三台。揚雄甘泉賦。冠倫魁能。能古台字。魁能卽魁台也。杜子美詩。君家最近魁三象。時論同歸尺五天。謂其爲宰相之門也。魁士名人之語。見于呂氏春秋。而史記云。狀貌魁梧奇偉。皆非不美之詞。宋人稱狀元爲廷魁。見石刻上舍第一人爲上舍魁。見文獻通考由來已久。無可置議。天官書。奎爲封豕。爲溝瀆。不云文章之府。宋初五星聚奎。說者謂孔子魯人。奎婁爲魯分野。儒教當興之象。特史官傳會之詞。學校祀魁星。雖非古禮。證之新定志。則爲斗魁非奎宿明矣。奎爲西方之宿。而顧以爲北方元武之宿。亦誤。

### 道人道士之別

六朝以道人爲沙門之稱。不通於羽士。南齊書顧歡傳。道士與道人戰儒墨。道人與道士辯是非。南史陶貞白傳。道人道士。並在門中。道人左。道士右。是道人與道士較然有別矣。南史宋宗室傳。前稱慧琳道人。後稱沙門慧琳。是道人卽沙門。

### 天師

天師之稱。始見于莊子。特一時尊敬之詞。非以爲號也。後漢張陵。始以五斗道誑惑漢沔間。其孫魯。據有

漢中魏武授以侯爵。後來習其教者。妄稱陵爲天師。水經注沔水篇云。灑水又南逕張魯治東。水西山上。有張天師堂。於今民事之。又江水篇云。平都縣有天師治。皆謂張陵也。晉南渡後。士大夫多有奉五斗米道者。或謂之天師道。晉書何充傳。時郗愔及弟曇。奉天師道。殷仲堪傳。少奉天師道。王恭傳。淮陵內史虞琬子妻裴氏。有服食之術。常衣黃衣。狀如天師。由是妖妄之稱。始登正史。魏書釋老志。載寇謙之遇大神。稱太上老君。謂自天師張陵去世已來。地上曠誠修善之人。無所師授。故來授汝天師之位云云。益誕謾可笑矣。

碁局

韋昭博奕論。枯碁三百。孰與萬人之將。李善注引邯鄲瀆藝經。碁局縱橫各十七道。合二百八十九道。白黑碁子各一百五十枚。沈存中云。弈碁古局用十七道。合二百八十九道。與後世法不同。今世碁局縱橫各十九道。未詳何人所加。予嘗見李逸民忘憂清樂集。碁譜也。首載孫策賜呂範。晉武帝賜王武子兩局。皆十九道。疑後人假託也。

籤詩

今神廟皆有籤詩。占者以決休咎。其來久矣。祠山事要去。祠山籤語一百二十八首。紹興十一年。郡人勇樞。經從毘陵之無錫。遙見山顛有祠宇甚麗。指問路人云。張王廟。勇因致敬。得此籤語。已而下山。回顧卽

無所有。既歸。寫置祠山。此祠山張王之籤也。老學庵筆記云。遣僧則肇。乞籤於射洪白崖陸使君祠。使君以杜詩爲籤。得全家隱鹿門之篇。此射洪神之籤也。皆在南宋初。周密癸辛雜識載太學忠文廟祠銀瓶娘子。其籤文與天竺一同。





# 十駕齋養新錄卷第二十

## 吳郡志沿革之誤

范石湖吳郡志云。項羽封英布爲九江王。漢改九江爲淮南。卽以封布十一年。布誅。立皇子長爲淮南王。後封兄子濞爲吳王。以上三國。盡得揚州之地。吳與會稽。皆在封域中。大昕案。志所云三國者。謂九江。淮南。吳也。今攷之。殊不然。項羽封英布爲九江王。都六。布所得者。僅壽春以西耳。若彭城。廣陵以南。至吳會稽。皆屬項羽。在梁楚九郡之內。漢滅項氏。封韓信爲楚王。其時吳會稽蓋屬楚。及韓信廢。分其地爲荆楚兩國。始改屬荆王劉賈。賈爲英布所殺。改封兄子濞爲吳王。始屬吳。然則吳會稽之地。漢初屬楚。繼屬荆。繼屬吳。史文班班可攷。與九江。淮南。了不相涉。英布雖曾殺賈。不旋踵爲漢所誅。初不能有其地。吳郡志舍荆楚而繫之淮南。可謂謬之甚也。

## 吳地記

陸廣微事迹無可攷。所撰吳地記云。自周敬王六年。至今唐乾符三年。則是唐僖宗朝人。而唐藝文志不載此書。至宋志始著于錄。吳江一縣。吳越有國日始置。而卷內有續添吳江縣云云。殆後人闕入。

## 姑蘇志

王文恪撰姑蘇志成。楊南峯詆爲不通。謂當稱蘇州府志。不可用古地名。又不可以一地該一郡。此語流傳到今。僉以爲不可易矣。予謂南峯知其一。未知其二。昔梁克家撰三山志矣。不云福州志也。陳耆卿撰赤城志矣。不云台州志也。文恪亦行古之道耳。志蘇州而名以姑蘇。豈遂爲大失哉。

長洲

王伯厚謂長洲名縣。始于唐武后時。漢郡國志。廣陵郡東陽縣有長洲澤。吳王濞太倉在此。東陽今盱眙縣。枚乘說吳王云。長洲之苑。謂廣陵之吳。非今長洲縣。其說信矣。然吳自有長洲。盧熊蘇州府志。引越絕書。闔閭走犬長州。西漢書。王莽始建國四年。臨淮民田儀等爲盜賊。依阻會稽長洲。又魏武帝對吳使徐詳云。孤願越橫江之津。與將軍游姑蘇之上。獵長洲之苑。左思賦云。佩長洲之茂苑。元和郡縣志。長洲縣取長洲苑爲名。在縣西南七十里。或云在太湖北岸。闔閭游獵處。圖經亦云。吳縣西南七十里。有長洲鄉。則吳之有長洲舊矣。左太沖所賦。蓋孫吳之都。其時廣陵不在吳境。則今人稱長洲爲茂苑。未可厚非也。

松江

唐人詩文稱松江者。卽今吳江縣地。非今松江府也。松江首受太湖。經吳江、崑山、嘉定、青浦。至上海縣合黃浦入海。亦名吳松江。唐時未有吳江縣。則松江上流爲吳縣南境。士大夫游宦。自蘇至湖杭二州。皆取道焉。吳地記。松江一名松陵。又名笠澤。張翰在京師。思松江鱸魚膾。張志和漁父詞。松江蟹舍主人歡。陸

龜蒙松江蟹舍賦。杜牧松江夜泊詩。震澤平蕪岸。松江落葉波。皆謂吳江也。韓退之撰王仲舒碑文云。在蘇州隄松江。路害絕阻滯。蓋爲隄於吳江。非華亭也。元升華亭縣爲松江府。自是松江之名移於華亭。世遂不知吳江之爲松江矣。今之吳江縣。吳越錢氏時謂之南北兩城防遏所。見北山小集

### 沈恭子

顏魯公書清遠道士同沈恭子游虎丘詩。本刻于虎丘山巖。今不復存矣。皮陸松陵集有補沈恭子詩。不知恭子何人。予按南史。沈炯。字初明。吳興武康人。仕梁爲尙書左戶侍郎。吳令。御史中丞。陳受禪。加通直散騎常侍郎。加明威將軍。遣還鄉里。以疾卒于吳中。贈侍中。諡恭子。六朝文臣。無封爵而得諡者。例稱子。如任昉稱敬子。周宏正稱簡子之類。不一而足。則沈恭子必初明無疑矣。南史儒林傳。顧越棲隱于虎丘山。與吳興沈炯。同郡張種。會稽孔奐等。每爲文會。則虎丘固恭子觴詠之地。其字初明。或作禮明。未審孰是。

### 陸德明

陸德明經典釋文自序。粵以癸卯之歲。承乏上庠。或謂癸卯爲唐太宗貞觀十七年。今攷唐書本傳。但云高祖釋奠。賜帛五十四匹。遷國子博士。封吳縣男。卒。又云後太宗閱其書。嘉德明博辯。以布帛二百段。賜其家。是元朗卒高祖朝。不及事太宗也。元朗嘗從學於周宏正。宏正卒于陳高宗太建六年甲午。至後主至

德元年癸卯相距十載。元朗年當在三十左右。若貞觀癸卯尙存。則耄耄頽齡。恐不能著書矣。又此書所錄注解傳述人多是南士沈重晚雖仕周。其書久行江左。此外北方學者絕不齒及。可證元朗著此書在陳而不在隋唐也。

陸暢

陸暢字達夫。吳郡人。入蜀謁章臬。作蜀道易詩云。蜀道易。易于履平地。臬大喜。臬薨。朝廷欲繩其既往之事。復閱先進兵器。上皆刻定秦二字。不相與者。因造成罪名。暢上疏理之曰。臣在蜀日。見造所進兵器。定秦者。匠名也。由此得釋。初娶董溪女。每旦婢進澡豆。暢輒沃服之。或曰。君爲貴門女婿。幾多樂事。陸曰。貴門多禮法。俾予食辣麩。殆不可過。張籍贈暢詩。共踏長安街裏塵。吳洲獨作未歸身。胥門舊宅今誰住。君過西塘與問人。

徐半千

宋太宗實錄。雍熙四年九月壬戌。賜殿前承旨徐半千同進士出身。仍賜綠袍。及錢十萬。以其上章言時政也。端拱元年三月。先是蘇州人徐半千詣闕上書言事。上召見與語。頗奇之。因賜名巖叟。擢爲陳州戶曹掾。巖叟請告歸鄉里迎妻子。因恐喝州郡恣爲不法事。本路轉運使以聞。上怒。杖巖叟。流海島。巖叟事不見宋史。而郡志亦不載入。今舉以補備鄉邦舊聞。

黃策

紹興元年七月壬戌。宣教郎新通判嚴州黃策直祕閣策。吳縣人。元符末。以上書入籍坐廢。久之。上方錄用黨人。策因上疏。言昭慈獻烈皇后。既過瑤華秦陵。嘗有悔意。以蔡京所錄上皇聖語親札上之。故有是命。二年四月。直祕閣通判嚴州黃策罷。先是桐廬淳安二縣令。以賊爲漕臣所劾。而策庇之。械繫其告者。漕臣徐康國等言于朝。命按其事。既而策亦以賊廢。繫年要錄

張伯顏

文選李善注六十卷。元同知池州路事張伯顏所刊。伯顏未詳其籍貫。頃讀鄭元祐僑吳集。有平江路總管致仕張公壙誌。蓋代其子都中作。文稱張氏長洲之相城人。公諱世昌。字正卿。以謹飭小心仕於朝。倣直殿廡。成宗賜名伯顏。大德五年。授將作院判官。十年冬。出爲泉州路治中。至太初。陞邵武路同知。明年。改兩浙都運鹽使司同知。丁內艱。服闋。延祐元年。除慶元路同知。七年。陞奉政大夫池州路同知。泰定五年。進階朝散大夫福寧州尹。至順二年。超遷大中大夫漳州路總管。至元二年。年六十有五。告老於朝。乃以正議大夫平江路總管致仕。三年六月十四日。卒於相城私第。葬同邑益地鄉謝澤原清河侯之兆。乃知伯顏爲吾吳人。宜其文雅好事。異於俗吏也。伯顏父顯。官至江淮財賦副總管。追封清河郡伯。伯顏所授平江路總管。乃是致仕所加虛銜。不當列於郡守題名表。至其父子葬地。當見於冢墓門。而府志俱闕。

之。

胡惠齋

黃由瀋縣八年狀元妻平江湖氏。號惠齋。給事胡公女也。胡名晉臣。見游宦紀聞。能艸書。今西山玉隆宮有題詩一首。世又有艸書禊序四幅。字雖未合法。然大書橫放。亦婦人所難。見董史書錄。又云。黃子由尙書帥蜀中。夫人胡氏偕行。過黃州雪堂。胡氏行書赤壁賦於壁間。劉改之題沁園春一闕于後。云。按轡徐驅。兒童聚觀。神仙畫圖。正芹塘雨過。泥香路軟。金蓮自拆。小小籃輿。傍柳題詩。穿花覓句。麝蕊扳條得自如。經行處。有蒼松夾道。不用傳呼。清泉怪石盤紆。信風景江淮各異殊。想東坡賦就。紗籠素壁。西山句好。簾卷晴珠。白玉堂深。黃金印大。無此文君載後車。揮毫處。看淋漓雪壁。眞艸行書。相傳惠齋嘗因几上凝塵。戲畫梅一枝。仍題百字令其上云。小齋幽僻。久無人到此。滿地狼籍。几案塵生。多少憾。把玉指親傳蹤跡。畫出南枝。正開側面花蕊。俱端的。可憐風韻。故人難寄消息。非共雪月交光。這般造化。豈費東君力。只欠清香來撲鼻。亦有天然標格。不上寒窗。不隨流水。應不鈿宮額。不愁三弄。只愁羅袖輕拂。

李諒

唐長慶四年。李諒爲蘇州刺史。元日郡齋感懷寄越州元相公杭州白舍人詩。有首開三百六句秣。新知四十九年非。當官補拙猶勤慮。游宦量才已息機之句。白樂天答詩云。領郡慙當潦倒年。鄰州喜得平生

友。又云。憑鴛傳語與李六。倩鴈將書寄元九。莫歎一日日催人。且喜一年年入手。微之和韻云。自驚身上添年紀。休繫心中小。是非貴富祝來何所遂。聰明鞭得轉無機。自注。祝富貴。鞭聰明。皆正旦童稚故事。諒字復言。嘗官中丞。白樂天以是年罷杭州。以太子左庶子分司東都。明年改元寶曆。三月除守蘇州。當即與李交代也。劉夢得以大和六年守蘇州。與樂天相去六七年矣。

### 滕甫知蘇州年月

吳郡志。牧守題名。滕甫。龍圖閣學士右光祿大夫。在治平間。據本傳。甫於英宗朝未嘗授外任。且右光祿大夫亦是元豐以後官。不應治平中有之。其說固未可信。今府志則云。熙寧八年。以翰林侍讀學士知湖州。改任。十一月。改知揚州。以本傳攷之。甫以翰林侍讀學士出知鄆州。歷青州。應天府。齊鄆二州。此是熙寧間事。蓋未嘗除揚州也。其後黜爲池州。改安州。又貶居筠州。上章自訟。神宗覽之惻然。即以爲湖州。哲宗登位。徙蘇揚二州。攷哲宗以元豐八年卽位。則甫之除蘇州。當在元豐八年。必非熙寧矣。潮亦必湖字之誤。東坡集載滕公墓誌。正作湖州。案續通鑑長編。熙寧八年二月。知青州翰林侍讀學士滕甫。移知齊州。尋命甫知鄆州。閏四月。知鄆州。滕甫。移知濶州。甫遭父喪。不果赴。是月壬子。詔前翰林侍讀學士禮部侍郎滕甫。落職。候服闋。與知州。是熙寧八年十一月。乃甫持服家居之日。安得有自蘇移揚之事乎。

### 程師孟無知蘇州事

吳郡志。牧守題名。有程師孟。熙寧中任。按宋史。師孟傳。但云知南康軍。楚州。洪州。福州。廣州。越州。青州。未



嘗有知蘇州事。朱長文吳郡圖經續記。臚舉牧鄉郡者。亦不及師孟名。蓋石湖修志時。唯南渡牧守題名。碑石具在。其餘皆爲兵火所燬。雖廣爲採訪。固不能無舛譌矣。或係之熙寧六年。攷其時師孟正在廣州。子家藏諫議程公禱雨記石刻。年月分明。無緣至蘇也。

章帖

吳郡志章帖事凡三見。第二卷風俗門。記元豐閒章帖守郡。與郡之長老爲十老會。十老會中有程師孟。師孟以元豐四年方致仕熙寧中。尚未歸田也。米黻爲之序云。中散大夫河閒公。靜鎮吳國。四周星紀。第十一卷牧守門云。章帖。元豐中以朝議大夫守郡。剛介不可屈。人目之曰章硬頸。又題名門云。章帖。朝議大夫。元豐五年。據此三條。帖守郡實在元豐閒。其寄祿官或云朝議大夫。或云中散大夫。蓋由朝議轉中散也。今府志題名。前云章帖熙寧五年。以中散大夫知軍州事。中閒隔程師孟。王誨。胡宗愈三人。又云章帖熙寧七年再任。八年八月提舉崇禧觀。則大誤矣。據續通鑑長編。章帖以熙寧八年十月二十六日除兩浙轉運。則未嘗奉祠也。朝議中散。皆元豐改官制以後之稱。若帖果以熙寧中莅郡。當以卿監繫銜。不當云中散也。宋制。知州三年爲一任。任滿受代去。亦有再留一任者。據米黻序。有四周星紀之語。則帖任滿之後。又復留任。非去而復來也。府志誤以元豐爲熙寧。又無處安王誨等。乃分爲前後兩任。此誣妄之甚者也。朱長文吳郡圖經續記序。章公治郡三年。以政最被命再任。序末題元豐七年。計其初任必元豐四年也。楊景略當卽代章帖者。滕甫想卽在景略之後。

楊景略

吳郡志郡守題名。楊景略繫於元豐朝。今府志云。熙寧八年十一月。以朝散郎龍圖閣學士知揚州。改任。元祐元年五月。仍改知揚州。此亦誤。以元豐爲熙寧也。按蘇子容集有楊景略墓志云。元豐七年。避親嫌。知揚州。移蘇州。復徙維揚。元祐元年八月卒。是景略守蘇在元豐七年以後之明證。宋制郡守三年一代。豈有熙寧八年乙卯至元祐元年丙寅中隔十餘年不易任之理乎。新志亦疑其誤。而不能質言。今當據墓誌改正。

豐稷

吳郡志牧守題名有豐稷。云樞密直學士。建中靖國元年十一月到。崇寧元年二月知越州。此據壁記所載。年月分明。今府志削而不書。殆以宋史本傳但云知越。不言知蘇。故略之歟。然所帶樞密直學士之職。與史未嘗不合。蓋先除蘇而後改越耳。史傳於本人歷任。偶有遺漏。正當據碑刻以補之。況豐清敏元祐正人。莅任已三四月。前志所有。後人輒以意去之。非也。

岑仲翔

唐岑羲字伯華。爲金壇令。弟仲翔。長洲令。仲休。溧水令。宗楚客語本道巡察御史曰。毋遺江東三岑。

賀方回家藏書

紹興二年正月甲子。詔平江府守臣市賀鑄家所鬻書以實三館。二月戊午。將仕郎賀廩獻書五千卷。詔吏部添差廩監平江府糧料院。仍官其家一人。廩鑄子也。繫年要錄方回本越人。徙居吳之醋坊橋。

程公闢

程師孟字公闢。吳郡人。見宋史循吏傳。王介甫有送程公闢得謝還姑蘇詩云。東歸行路歎賢哉。碧落新除寵上才。白傅林塘傳畫去。吳王花草入詩來。唱酬自有微之在。談笑應容逸少陪。除此兩翁相見外。不知三徑爲誰開。自注云。少保元絳謝事居姑蘇。王中甫善歌詞。與相唱酬。案中甫者。王介也。微之。逸少。皆取古人同姓者相況。公闢自知青州告老。以正議大夫致仕。時元豐四年也。正議視六曹侍郎。故用碧落字。

程氏蝸廬

程俱。蒼蝸廬。吳下。用葉翰林見寄詩韻作。四海無廬置此翁。故營松竹儘囊空。明知計出柏馬下。正擬身全木。鴈中。東郭易成生艸舍。南村先怯卷茅風。向來豪氣今如此。敢與元龍較長雄。自注云。張志和結廬東郭。茨以生艸。予結廬皆竹椽松柱。故有松竹之句。小齋曰勝義。

建中靖國元年。以修奉景靈西宮。下吳興吳郡採太湖石四千六百枚。而吳郡實採於包山。程俱有採石賦。頗寓諷諫之旨。

韓世忠宅

紹興四年二月淮南東路宣撫使韓世忠乞承買平江府朱勳南園及請佃陳滿塘官地一千二百畝詔以園地賜世忠。繫年錄

范良器非翰林學士

翰林學士范良器墓在楞伽山案良器名不見史傳據樓鑰義莊記知爲文正長子監簿五世孫又知其爲之柔之兄又知其有興復義莊之功然樓記但云良器一布衣安得有翰林學士之稱宋制翰林又不爲贈官蓋舊志所書官名誤也

惠元祐事不足信

文淵閣學士鄧州總管惠元祐墓按元祐不見於舊志唯新志冢墓門附載王居正所撰傳云元祐字吉甫扶風人元符詔求直言元祐表陳治亂安危所係事宜十條帝喜之授國子監直講加文林閣學士淵聖卽位晉文淵閣學士兼領鄧州路幹離不圍京師守帥大戰於幕天坡元祐爲左翼命神臂弓射卻之一軍獨全睿聖卽位揚州金人大舉入寇元祐與內侍鄺詢翼帝出至瓜洲遇小舟得渡繼繼從王忠勞備著卒葬平江塘城元祐少好孫吳學及居洛陽與尹焞遊更向儒術崇寧初以劾朱勳忤蔡京意削籍歸紹興初秦檜用事元祐乞身居湖州大港絕口不言國事少識岳飛於微賤約爲死友靖康初睿聖

次湘州。湘當作相。薦飛於王。後聞飛死。不食數日而卒。此傳未審出自何書。要是誕妄不足信。略舉數端證之。如文林閣學士。文淵閣學士。宋時無此官名。亦不聞建此閣。其不足信一也。宋世文武各有流品。不相雜用。元祐既少習孫吳。及聞尹和靖之學。改就儒術。官至國子直講。則是文資。何緣卻爲鄧州總管。其不足信二也。朱勳以花石得幸。在政和宣和之世。若崇寧初。勳猶未列仕路。何得有勳之事。其不足信三也。宋史岳飛傳。康王至相。飛因劉浩見。不聞又有元祐薦之。其不足信四也。當姑存鄧州總管職名。而刪文淵閣學士五字。

富巖墓

富氏世家河南。司空巖。嘉祐中以祕書監守蘇州。秩滿。上章告老。既得請。將歸河南。吳人爭挽留。父老前曰。公之惠愛在此邦。邦人懷思。將無窮。願毋去我。百歲後。吳人謹烝嘗。護松檟。當世世如桐鄉朱仲卿也。公平時固已樂吳中風物之美。因留居不去。沒葬吳縣之寶華山。子孫遂爲吳郡人。北山小集富延年墓誌。

蔣彝墓

朝散郎直祕閣贈徽猷閣待制蔣彝墓。在吳縣至德鄉報恩山之原。程俱撰誌銘。見北山小集。

彝字子有。禮部侍郎堂之子。父長源。朝奉大夫。彝以父遺表恩。調秀州崇德令。政和二年。蔡京復當國。令權提轄陝西坑冶。催促鑄錢事。累遷至承議郎。六年。權發遣提舉兩浙常平事。是冬除代赴闕。未行。

詔復留八年。移永興軍路。未行。改直祕閣權兩浙路計度轉運副使。累遷朝散郎。二浙戶餽。率隱丁口。避更賦。丁簿不得實。前使者鈎括釐正。追償所失。丁錢別儲爲羨餘。遠或至數十年。編戶氓鮮獲免者。錮繫相屬。或破產失業。公至。具奏。二浙比歲不登。今所追久遠。不勝治。又多貧下戶。急之必且逃徙。顧一切蠲之。而名籍。丁錢。斷自今始。已追錢歸之。有司充歲用。奏聞。報可。吳人德之。發運司以逋滯劾。詔免所官。落職。予筦庫。已而御筆除直祕閣。管句亳州明道宮。累遷朝奉大夫。宣和四年。起知明州。卒於官。明年。特贈徽猷閣待制。

### 鄭絳墓

吏部員外郎鄭絳墓。在吳縣長洲鄉龍館山之原。其妻安人錢氏合葬。程俱撰誌銘。北山小集

安人錢氏。吳越武肅王之子。曰廣陵王元璩。爲中吳軍節度使。死。葬吳。因家焉。其孫喆。太子左贊善大夫。贈太常少卿。有子曰中孚。以集賢殿修撰爲梓州路計度轉運使。贈中散大夫。中散子承。爲通州軍事判官。安人通州之仲女也。年十八。歸同鄉鄭公絳。仕至尙書吏部員外郎。封夫人。桃源縣君。改封安人。靖康元年六月卒。男曰作肅。奉議郎。前鎮江府府學教授。曰作乂。從政郎。光州定城縣令。曰知章。蚤卒。孫男曰烈。曰勳。曰然。曰熊。曰照。曰庶。作肅登進士第。作乂預薦書。皆好學。自持。

### 朱耜墓

宣義郎知江陰縣朱耜墓。在吳縣至德鄉南峯山龍池之西。程俱撰誌銘。北山小集

耜字元益。吳人。曾大父億。內殿崇班。閣門祇候。知邕州。贈刑部尚書。大父公綽。光祿卿。贈特進。父長文。祕書省正字。博學篤行。以道出處。爲時老儒。吳人尊之。號樂圃先生。元益以大父任補太廟齋郎。調婺州東陽主簿。丁父憂。終喪。爲杭州鹽官尉。坐蝗蝻生境內免。再調鄂州江夏尉。以捕盜功遷宣義郎。丁母憂。終喪。爲太原府司錄。不行。改知常州江陰縣事。秩滿代還。卒京師。實政和七年四月四日。宣和元年二月葬。其弟通直郎宗子學錄發。以狀請銘。

楊懿孺墓

承奉郎楊懿孺墓。在長洲縣武邱鄉祖興墩之原。程俱撰誌銘。其略云。懿孺。字彝父。世爲建州浦城人。會祖有證。贈太僕少卿。祖伉。贈光祿卿。父諱。尚書屯田員外郎。屯田始葬常州無錫縣。諸孤因家長洲。遂爲吳郡人。三預鄉貢。五試禮部。卒不第。崇寧二年。特奏名。始授簡州文學。監杭州富陽縣茶場。遇郊恩。以將仕郎權亳州城父縣主簿。八寶汛恩。遷登仕郎。調洪州南昌縣主簿。居一年。忽載妻子歸吳下。且告老。以承奉郎致仕。又七年。乃卒。年七十有六。宣和四年九月辛酉葬。北山小集

程北山云。吳郡有二老焉。或仕或不仕。皆隱者也。居城之東北。曰方公惟深。居城之東南。曰楊公懿孺。余少壯客吳下。獲交焉。宣和四年春。二老相繼歿。皆誌其墓。

趙崇雋墓

通判趙崇雋墓。在吳縣至德鄉茶塢山。弟崇修撰文并書。誌石今在法螺庵。

同年醜唱詩

府學儀門有石刻同年醜唱詩。宋紹熙元年。提刑建陽袁說友起巖。提舉常平建陽張體仁元善。招集同年之在吳者於姑蘇之臺。起巖首賦唐律一章。而元善依韻和之。同作者。成欽亮仲鄰。章澥仲濟。唐子壽致遠。王藝文卿。陳德明光宗。周承助晞稷。胡元功國敏。趙彥衛景安。趙彥真從簡。舊名彥能趙彥瓊中玉。章題浦城。陳題三山。周題桐川。三趙皆宗室。題浚儀。至成。王。胡。皆題胥臺。則吳人也。唯子壽不署里居。以吳郡志證之。亦是吳人。序之者。石湖居士范成大。書之者。歷陽龔頤正。亦家於吳者也。宋史列傳有詹體仁。卽碑之張體仁。葉水心爲體仁誌墓。述其改姓事。史家失書。攷古者必疑其非一人也。說友官至執政。其帥蜀時。嘗撰成都文類。亦風雅好事者。攷吳郡進士題名。章。胡。唐。王。成。五人。皆隆興元年本待問榜登第。

吳江學宋元碑

吳江縣學有宋淳熙五年重修縣學記。趙孟覲書。撰人姓名。以石斷裂不可見。其官則權知饒州也。又嘉定八年正月重修大成殿記。寶謨閣學士提舉玉隆萬壽宮黃由撰。權刑部尙書兼侍讀范之柔正書。又元碑二通。一爲至正十一年五月吳江州興修儒學記。陸居仁爲文。朱庭珪正書。一爲至正十三年十月



吳江州儒學大成樂記許從宣撰林鏞正書

渡僧橋石刻

閩門外渡僧橋當水陸之衝予往來者數矣曩王西泚語予曾見宋碑訪之廿年未得瞿塔鏡濤於吳市買得一紙蓋咸清十年十月僧元愷等募緣重修記首云渡僧橋建在至道年間緣起得名具載舊記所謂舊記者久已湮沒卽此石亦不知所在矣其云判府提舉節制閣學潛尙書者潛說友君高也前判府倪侍郎者倪普君澤也記文與書俱不甚佳然郡橋梁旣不詳言金石者亦未之及故識其略云

蘇州府儒學誌

蔡昂蘇州府儒學誌四卷前有徐源吳寬王鏊沈杰林庭樞諸序刻成于正德癸酉有祝允明跋昂字惟中吳縣人由歲貢官九江府推官書成時已踰七望八矣誌頗載石刻黃山谷食時五觀帖慶元三年趙彥逾摹刻於建康之玉麟堂次年虞儔又刻于浙西憲司之明清堂蘇州卽浙憲治所也明正德中此碑尙在郡學今訪之不可得矣

先大父生平著述久已風行海內是書刻成于乙丑歲未及十年而刷印日繁閒有磨滅數十條不能辨字雨窗長夏並取舊本及金石跋尾中漫漶者付之梓人悉加補葺庶爲完善嘉慶十六年五月六日孫男師康百拜謹記

# 十駕齋養新餘錄總目

## 卷上

簪當作載

武王克殷之年

左傳服杜之學

太歲超辰立成

譙周注論語

諸經音

昏當從唐本說文作昏

古今音異

## 卷中

史漢目錄

太史公李延壽

十駕齋養新餘錄 總目

像

蜀石經毛詩

春秋十二公紀年

春秋正義宋槧本

孟季子問公都子

大題在下

思

諸史目錄皆後人增加

史記年表

四七九

漢書王子侯誤字

漢人異讀

三國志注

晉書地理志之誤

朱序傳誤

孟康

王劭齊隋二史

隋書經籍志遺漏

謝吳

紘

耿炳文

東林

卷下

帝王大度

蘇林音胥爲暨

續漢書百官志注譌字

史傳稱人字

毛寶傳誤

劉逵

何法盛書

隋五行志多讎言

一字三字石經

南宋事略

哀宗紀

江西人

齊楚浙三黨

白樂天文集

歐公誤用不識撐犁

東坡在元祐時已有詆誣之者

呂升卿通判海州

曾文肅帥青社

章惇事邵康節胡安國稱秦檜

程伯淳語

朱文公語

何道夫語

陸象山疑有子

呂東萊讀史多

晏元獻夫人

韓奉常妻

藏書之厄

南監板經史

南雍經史板

翻刻古書易錯

羣書治要

石刻詛楚文

李伯時畫古器圖

元會運世

避諱改姓

姓隨音變

京房吹律定姓

陸羽從僧姓

司馬康

番陽洪氏

郭叔誼

修容

十駕齋養新餘錄 總目

捉筆

花木瓜

章硬頸

金毛鼠

賽仁孝

捕風

雞鴨諫議

笑面夜叉

滿朝歡

# 十駕齋養新餘錄卷上

簪當作戠

朋盍簪。古文簪作貸。京作攢。馬作臧。荀作宗。虞作戠。戠，叢合也。予謂三代以前無簪字。當以戠爲正。與上大有得句協韻。攢、臧、宗、簪，皆聲之轉。唯古文貸無義。常是轉寫誤耳。戠與埴同。禹貢厥土赤埴墳。孔傳：士黏曰埴。鄭康成本作戠。徐、鄭、王皆讀曰熾。攷工記搏埴之工。鄭亦訓埴爲黏土。是戠埴同物。皆取黏義。黏與合、義相成也。

像

象也者。像此者也。象也者。像也。兩像字。唐石經初刻皆作象。此古本也。後人添人旁。當以初本爲善。古人以義訓名。不嫌同文。如孟子徹者徹也。上下兩徹。無異形。亦無異讀也。

武王克殷之年

武王克殷。國語以爲歲在鶉火。古法歲星與太歲恆相應。星在鶉火。則太歲必在未。孔穎達詩正義謂是歲辛未。此用古法超辰之率定之。後世不用超辰。則斷以爲己卯。干支雖有不同。於積算元無多少。似異而實非異也。竹書周武王十二年辛卯伐紂。十七年陟。皇甫謐云。武王定位元年。歲在乙酉。六年庚寅崩。

見史記集解。唐一行以康王十一年歲在甲申。上溯武王克商之歲。當在壬辰。唐書三說皆非是。自武王克商。至魯隱公之元。四百年。春秋二百四十二年。春秋後又二百二十五年。而爲秦所滅。凡八百六十七年。太史公年表。始于共和以前。周諸王之歷年。蓋已難攷。班孟堅漢書載劉歆三統術。依魯歷及世家。推得周初以來紀年。敘而次之。夏殷以前。經典無明文。子長孟堅所不論。後儒妄說。皆未可信。

蜀石經毛詩

江有汜三章。皆有之子歸句。蜀石經歸上並有于字。予攷三百篇中。云之子于歸者不少矣。之子于征。之子于苗。之子于狩。之子于釣。皆四字句。此篇亦當依蜀本有于字。昔育恐育鞠。蜀石經無下育字。以四字成句。亦視它本爲勝。

左傳服杜之學

南史儒林崔靈恩傳。靈恩先習左傳服解。不爲江東所行。乃改說杜義。每文句常申服以難杜。遂著左氏條義以明之。時助教虞僧誕又精杜學。因作申杜難服。以答靈恩。世並傳焉。王元規傳。自梁代諸儒相傳。爲左氏學者。皆以賈逵服虔之義。難駁杜預。凡一百八十條。元規引證條析。無復疑滯。

春秋十二公紀年

春秋正義於十二公之首必云是歲歲在某次。因此可知太歲所在。此必先儒相承之舊文。非孔沖遠所能及也。

隱公元年歲在豕韋。太歲當在甲寅。今日己未。  
桓公元年歲在元枵。太歲當在乙丑。今日庚午。  
莊公元年歲在鶉火。太歲當在癸未。今日戊子。

案莊公卽位卅二年。以常率計之。其末年太歲當在甲寅。歲星應在豕韋。而正義云。隱公元年歲在大梁者。依三統術。莊廿三年入歲星歲數。正在超辰之限。太歲超乙巳入丙午。歲星亦超實沈入鶉首矣。依此算到莊公末年。星已至降婁。則閔公初年。正在大梁也。此非精于算術者不能知。孔氏於三統元起丙子之故。全然未曉。轉信虞恭諸人說。以庚戌爲上元。詩疏所引三統術。率與本術不合。安能精思及此。

閔公元年歲在大梁。太歲當在丙辰。今日庚申。  
僖公元年歲在鶉首。太歲當在戊午。今日壬戌。  
文公元年歲在降婁。太歲當在辛卯。今日乙未。  
宣公元年歲在壽星。太歲在己酉。今日癸丑。



成公元年歲在降婁。太歲在丁卯。今日辛未。

襄公元年歲在壽星。太歲在乙酉。今日己丑。

昭公元年歲在大梁。太歲當在丙辰。今日庚申。

昭十五年距莊廿三年。滿百四十四歲。又值超辰之限。歲星超鶉首入鶉火。太歲超庚午入辛未。服子慎所謂有事于武宮之歲。龍度天門是也。自此年歲在鶉火。算至卅二年。正在星紀。故有越得歲而吳伐之之占。歲星超辰。在左氏固有明文矣。

定公元年歲在元枵。太歲當在己丑。今日壬辰。

哀公元年歲在大梁。太歲當在甲辰。今日丁未。

春秋十二公。二百四十二年。太歲干支與今人所推不同。前後亦分三段。自莊廿三年以前。相差五辰。如隱元年本甲寅。而今人以爲己未。是也。昭十五年以前。相差四辰。如襄廿一年本乙巳。而今人以爲己酉。是也。昭十五年以後。相差三辰。如哀十六年本己未。而今人以爲壬戌。是也。

王伯厚曰。嘗攷通鑑。皇極經世。秦始皇八年歲在壬戌。而呂氏春秋云。維秦八年歲在涓灘。申有二年之差。予謂呂不韋以秦相國紀秦年。所用卽秦歷也。而以今法上推。有兩辰之差者。古術太歲與歲星皆百四十四年而超一辰。自周訖秦漢皆然。東漢始不用此法。故太初元年太歲在丙子。而後人以爲丁丑。已

差一算。秦始皇在太初前百三十餘年。固宜差二算矣。溯而上之。春秋二百四十二年間。或差三算。或差四算。五算。又溯而上之。至周武王伐紂。本辛未。而後人以爲己卯。則差八算矣。世愈遠。則差愈多。皆由超辰使然。要于積年。元無增減。似異而實同也。閻若璩不知古有超辰法。遂謂呂書涿灘當爲淹茂。失之甚矣。

### 太歲超辰立成

三統術。太歲與歲星恆相應。歲星起星紀。百四十四年而超一次。太歲起丙子。亦百四十四年而超一辰。凡千七百二十八年。而周十二辰。是爲歲星歲數。孔穎達春秋正義云。三統以庚戌之歲爲太極上元。則已昧其根本。唯歲星超辰。不能不用服虔龍度天門之說者。以昭十三年歲在大梁。與卅二年越得歲二文。非用超辰。便多齟齬耳。今以歲數分爲十二篇。俾言太歲者有所折衷焉。

### 丙子篇第一

滿百四十四歲爲一篇。

### 辛丑篇第二

此第百四十五年也。太歲超庚子入辛丑。歲星超星紀入元枵。

### 丙寅篇第三

此二百八十九年也。太歲超乙丑入丙寅。歲星超元枵入豕韋。

### 辛卯篇第四

此四百三十三年也。太歲超庚寅入辛卯。歲星超豕韋入降婁。魯公伯禽五年入辛卯篇。

### 丙辰篇第五

此五百七十七年也。太歲超乙卯入丙辰。歲星超降婁入大梁。魯微公廿六年入丙辰篇。

### 辛巳篇第六

此七百二十一年也。太歲超庚辰入辛巳。歲星超大梁入實沈。魯懿公元年入辛巳篇。

### 丙午篇第七

此八百六十五年也。太歲超乙巳入丙午。歲星超實沈入鶉首。春秋莊公廿三年入丙午篇。

### 辛未篇第八

此一千零九年也。太歲超庚午入辛未。歲星超鶉首入鶉火。魯昭公十五年入辛未篇。

### 丙申篇第九

此一千一百五十三年也。太歲超乙未入丙申。歲星超鶉火入鶉尾。魯穆公廿七年。周安王十九年入丙申篇。

### 辛酉篇第十

此一千二百九十七年也。太歲超庚申入辛酉。歲星超鶉尾入壽星。秦始皇八年入辛酉篇。

### 丙戌篇第十一

此一千四百四十一年也。太歲超乙酉入丙戌。歲星超壽星入大火。

### 辛亥篇第十二

此一千五百八十五年也。太歲超庚戌入辛亥。歲星超大火入析木。

### 春秋正義宋槧本

吳門朱文游家藏宋槧春秋正義三十六卷。云宋淳化元年本。實則慶元六年重刊本也。每葉前後各八行。行十六字。卷末有馮嗣祖、趙彥謙等校勘字。今通行本哀公卷首正義全闕。獨此本有之。文游嘗許予借校。會予北上未果。今文游久逝。此書不知轉徙何氏矣。

### 譙周注論語

譙周論語注十卷。梁時尙存。劉昭注續漢書曾一引之。鄉人儼注儼卻之也。以葦矢射之。

### 孟季子問公都子

告子以義爲外。病在以長爲義。孟季子習聞其說。故亦以義爲外。公都子雖以行吾敬曉之。但以伯兄之親而仍爲鄉人之長所奪。是敬不敵長矣。敬卽在內。長實在外。卽曰斯須之敬。而此敬終從彼長而起。安

得云在內。此公都子所以不能答也。及孟子有敬叔父與敬弟之難。叔父之敬。以分不以年。而弟則幼于我者。弟非長而亦有當敬之時。則義在敬不在長。而彼長而我長之之說。不攻自破矣。厥後季子再難。不能更執長字。方知孟子立言之妙。

酌則誰先。曰先酌鄉人。此鄉飲正齒位之禮。其時鄉人伯兄咸在賓位。當以齒序。所謂鄉黨莫如齒也。若伯兄宴客。而弟爲行酒。則不論年紀長幼。總當先客。豈有先酌伯兄之理。何必計其長一歲否邪。

諸經音

陸德明云。爲易音者三人。王肅、李軌、徐邈。爲尙書音者四人。孔安國、鄭元、李軌、徐邈。陸云漢人不作音者九人。鄭元、徐邈、蔡氏、孔氏、阮侃、王肅、江惇、干寶、李軌。近有沈重。爲禮音者。鄭元、王肅、李軌、劉昌宗、徐邈、射慈、謝楨、孫毓、曹耽、尹毅、蔡謨、范宣、徐爰。射慈以下。王曉。音周禮。近有戚袞。作周禮。春秋左氏音。則服虔、高貴、鄉公、嵇康、杜預、李軌、荀訥、徐邈。撰春秋音。公羊音有李軌、江惇。論語有徐邈音。老子有戴逵音。莊子有李軌、徐邈音。爾雅則陳施乾、謝嶠、顧野王。並撰音。

大題在下

古書多大題在下。陸氏經典釋文云。毛詩故大題在下。案馬融、盧植、鄭元注禮記。並大題在下。班固漢書、陳壽三國志亦然。予案唐刻石經。皆大題在下。如詩經卷首。周南詁訓傳第一。列于上。毛詩兩字。列于此。

行之下。所謂大題在下也。宋元以來刻本。皆移大題於上。而古式遂亡。今讀者且不知何語矣。予曾見史記宋大字本。亦大題在下。淮南轉運司監雕本。

### 昏當从唐本說文作昏

說文昏日冥也。从日氏省。氏者下也。一曰民聲。案氏與民音義俱別。依許祭酒例。當重出昏。云或作昏。民聲今附于昏下。疑非許氏本文。頃讀戴侗六書故。云唐本說文从民省。徐本从氏省。又引暈說之云。因唐諱民。改爲氏也。然則說文元是昏字。从日民聲。唐本以避諱減一筆。故云从民省。徐氏誤切爲氏省。氏下之訓。亦徐所附益。又不敢輒增昏字。仍附民聲于下。其非許元文信矣。案漢隸字原。昏皆从民。婚亦从昏。民者冥也。與日冥之訓相協。唐石經遇民字皆作𠂔。而偏傍从民者。盡易爲氏。如岷作岷。泯作泯。緡作緡。瘠作瘠。礮作礮。啓作啓。啓作啓。蟲作蟲之類。不一而足。則昏之爲避諱省筆無疑。謂从氏省者。淺人穿鑿傅會之說耳。

### 愚

論語釋文於秦伯先進兩篇。俱有愚字。云古臣字。案一忠爲臣。其義淺鄙。當因艸書臣作𠂔。與一忠相似。俗生附會成之。陸德明著書在隋季。已有此字。蓋出六朝人妄作。陸氏初爲古文。由於不精小學故也。戰國策亦有峯愚字。姚宏校本以武后所造。漢疑之。予謂武后頒行十二字。亦有所本。非盡出臆造。要是魏

晉以後增加之字。若初作秦漢古文。則惑矣。

古今音異

聲音與時變易。未易更僕數。略舉一二言之。古讀富如備。廣韻以富入宥韻。蓋齊梁以後之音。轉重唇爲輕唇也。宋元以來。讀富如傅。南北無異音。不復知其在宥韻矣。古讀不如丕。轉音跗。萼之跗。春秋傳三周華不注。詩鄂不韡韡。鄭箋亦用此義也。廣韻兩收于平聲。尤韻入聲物韻。一讀如浮。一讀如弗。已非三代秦漢之音矣。黃公紹韻會。又收於入聲屋韻。讀不爲卜。與廣韻兩音復不同。今南人多讀不如鉢。與弗亦有重唇輕唇之別。唐宋人應試詩賦。官韻有不字者。必押入尤韻。今人則押入物韻。

論古音四聲者。以緝、合、盍、葉、怙、洽、狎、業、乏、爲侵、覃、談、鹽、添、咸、銜、嚴、凡、之入聲。今以古音求之。亦有未甚協者。答、對也。詩雨無正篇。譖言則答。與退、遂、醉、爲韻。蓋在泰部。从盍聲。古書多以盍蓋通用。禮弓以盍爲盍

今吳中方音。讀蓋如敢。聲相近而譌。非三代秦漢之音。禮又入立、古位字。春秋公卽位。古文作立。位當

从立得聲。納、內聲。古書出納字。或作內。內亦當从入聲。詩小戎以輶與合。邑韻。而內在隊韻。訥在沒韻。

納在黠韻。介、甲也。古甲冑字。或作介。籥、爾聲。瘞、瘞皆疾聲。急與亟通。易井九三。汲與食。惻、福韻。

藝卽摯字。摯、藝皆執聲。法、去聲。劫、怯、亦去聲。葉、世聲。渫、从葉、井、渫。息列反。徐食列反。禮葱渫。以制渫、紕、皆

在辭韻。又从葉之字。或入葉。或入辭。易傳多以業與德韻。隲、陟聲。而在質部。屑部有蒼字。與溼同。

音。邯鄲之邯音寒。邯，甘聲。忝，天聲。三百篇雖有忝字，然不以協韻。未可以隋唐之音遽切爲古音。侵部無入聲。針、砧、枯，皆俗字。卽在職部。節在屑部。柳、櫛在櫛部。柳又入質部。望、卿又在質部。至在至部。室在質部。二部。吉、佶、姑在質部。黠、劫、結在黠部。結、拈、頤、頤、擷在屑部。樂在覺部。又在鐸部。又在效部。而藥、鑠、爍另爲部。爍有歷、洛、刺三音。分入三部。軌、斲、訕、鑿皆在月部。浸部有盪、唄、兀。曷部有怛、妲、頰、闕、預、箴。末部有鉢、鬘、幹、腕、旼、指。黠部有鬪、唄、賑。鎋部有咀、齧、齧、劓。屑部有餐、飡、擊、紉、紉、咽。辭部有讞、讞、讞、準、焯、唱、纂、闈、劓。緝非侵之入聲。詩以緝與洽韻。緝與蟄韻。合非覃之入聲。詩以集與猶、咎爲韻。咎與退韻。納、輒皆內聲。罨、罨皆俗字。盍非談之入聲。譖、章盍切。非古音。葉、怙爲鹽、添之入聲。然鹽、兼、織、僉諸字無入聲。葉、巖、楫、楫當在。涉亦無平聲。唯占在鹽部。而怙、帖皆占聲。厭有平上去入四音。逮、走聲。而在感部。斂、念聲。與涅相近。洽、狎與咸、銜偏旁俱不相近。咸與覃、洽與合皆一類也。甲與介聲近。介在怪韻。業與嚴偏旁無相从者。乏爲凡之入聲。泛、乏聲。貶亦乏聲。而卽在檢部。齊梁人制此韻以當輕唇之一。未必合于古音。古音有入聲。唯支、脂、之、微、齊、佳、皆、灰、哈、魚、虞、模、蕭、宵、爻、豪、麻、尤、侯、幽。此外旦、泛、厭、奄、兼、占等字。偶有入聲。





# 十駕齋養新餘錄卷中

## 史漢目錄

古人書目錄。皆在篇末。太史公之自序。班孟堅之敘傳。卽目錄也。今史漢目錄。出於後人增加。攷隋書經籍志。史記一百三十卷之下。注云。目錄一卷。則史記之有目錄。隋時已然。

史通題目篇云。蔚宗舉例。始全錄姓名。歷短行於卷中。叢細字於標外。其子孫附出者。注于祖先之下。乃類俗之文案。孔目藥艸經方。煩碎之至。孰過於此。是則范氏後漢書始有目錄也。於因習篇又云。蔚既移題目于傳首。列姓名于卷中。而猶於列傳之下。注爲列女高隱等目。范史本題逸民。此云高隱者。避唐諱。非誤記也。

## 諸史目錄皆後人增加

曾子固陳書目錄序云。其書祕府所藏。往往脫誤。嘉祐六年八月。有詔校讐。使可鏤板行之天下。而臣等言。梁陳等書缺。獨館閣所藏。恐不足以定著。願詔京師及州縣藏書之家。使悉上之。至七年冬。稍稍始集。臣等以相校。至八年七月。陳書三十六篇者始校定。可傳之學者。其疑者亦不敢損益。特各疏於篇末。其書舊無目。列傳名氏多闕謬。因別爲目錄一篇。予案子固所謂各疏篇末者。今亦未見。蓋後來重刊失之矣。

太史公李延壽

太史公作十二本紀。以秦項列于周漢之間。後人於秦始皇無異言。而於項羽本紀則怪之。劉知幾謂羽僭盜不當稱王。此未達乎史公之旨者也。秦以暴并天下。雖自稱帝。非人心所歸向。史公初不欲以秦承周。以漢承秦。特以六國既滅。秦主命者十有餘年。秦既滅。項氏主命。又四五年。沛公之爲漢王。亦項羽所立也。秦項雖非共主。而業爲天下主命。不得不紀其興廢之迹。秦之稱帝。與項之稱霸王。均不得與五德之數。黜秦所以尊漢也。於何見之。於表見之。三代之後。繼以十二諸侯。繼以六國。始皇雖并天下。仍附之六國表。及陳涉起事。卽稱秦楚之際。秦楚皆周舊國。是秦未嘗有天下也。班氏漢書。始降陳勝項籍爲傳。孟堅漢臣。故有意抑項。然較之史公之直筆。則相去遠矣。隋亦以不仁得天下。雖兼并江南。而李延壽猶列之北史。不少分別。其義例正大。有太史公之風焉。後儒尊紫陽綱目。然於秦隋猶以正統予之。若太史公、李延壽之例。較之綱目。實勝一籌。

史記年表

十二諸侯年表。徐廣曰。共和元年。歲在庚申。訖周敬王四十三年。凡三百六十五年。共和在春秋前一百十九年。六國表起周元王。訖二世。凡二百七十年。元王元年乙丑。至赧王五十九年乙巳。凡二百廿一年。依史記年表。共和至赧王入秦。凡五百八十六年。

周武王十三年辛未克殷。又七年戊寅崩。周公攝政七年。始己卯。盡乙酉。成王親政五年。卽伯禽之五年。太歲超庚寅入辛卯。歲星超娵訾入降婁。

漢書王子侯誤字

史記王子侯年表。有石洛侯劉敬。漢表作原洛侯敢。頃歲諸城李仁煜書山。於縣南鄉得古印一文。曰石洛侯印。以太史公書攷之。知爲城陽頃王子。諸城與城陽國不遠。或石洛侯封卽在其境邪。漢書原字必是轉寫之譌。

蘇林音肸爲暨

漢書禮樂志。鸞路龍鱗。罔不肸飾。蘇林曰。肸音暨。塗之暨。

漢人異讀

漢書李廣利傳。宛貴人昧蔡。服虔曰。蔡音楚言蔡。

續漢書百官志注譌字

予初讀後漢書獻帝紀。建安二十二年。丞相軍師華歆爲御史大夫。引劉昭注百官志。御史大夫郝慮免。不得補。證華歆爲魏國御史大夫。非漢之御史大夫。不當載於獻帝紀。已於攷異詳言之矣。頃讀宋書百官志。獻帝十三年。罷司空置御史大夫。御史大夫郝慮免。不復補。乃知劉氏注本於宋百官志。又知今本

劉注得字當爲復之譌。

三國志注

予有亂十人論語春秋古文尙書皆同。陸氏釋文謂本或有臣字。非。三國志注引劉廙別傳云。昔者周有亂臣十人。又魏略載文帝詔云。周武稱予有亂臣十人。此類皆後來校刊依今本增入。非裴氏元文。

史傳稱人字

晉書郗超傳。謝安嘗與王文度共詣超。日旰未得前。文度便欲去。文度者坦之字也。隱逸范喬傳。濟陰劉公榮。有知人之鑒。公榮名昶。見王戎傳。武陟傳。同郡劉公榮。有知人之鑒。似卽一人。但陟爲沛國竹邑人。傳稱爲同郡。則公榮亦沛國人矣。而彼傳云濟陰。豈同時有兩公榮乎。王弼傳。隱者董仲道見。而謂之仲道。亦稱字也。

晉書地理志之誤

晉自永嘉之亂。中原淪陷。元帝稱制建康。僑置徐兗青豫諸州郡于揚州之域。以處中華流人。初無實土。及桓溫當國。始有土斷之令。然自元帝至孝武。百有餘年。僑州僑郡。未有加南字者。安帝義熙之世。劉裕滅南燕。收復徐兗青故土。於是北徐北青北兗之名。而僑置之名。猶如故也。宋書武帝紀。永初元年八月辛酉。諸舊郡縣以北爲名者悉除。寓立于南者。聽以南爲號。是郡縣去北加南。始於宋受禪以後。而晉

朝無此名也。不獨郡縣。卽州名亦從而改易。試卽宋書武帝紀一篇言之。初云推高祖爲使持節都督揚徐兗豫青冀幽并八州諸軍事徐州刺史。義熙元年云使持節都督揚徐兗豫青冀幽并江九州諸軍事。鎮軍將軍徐青二州刺史。又云改授都督荊司梁益寧雍涼七州并前十六州諸軍事。又云解青州。加領兗州刺史。四年授揚州刺史。徐兗二州刺史如故。表解兗州。此皆在南燕未滅之前。固無南北之分也。五年詔加公北青冀二州刺史。於是始有北青州矣。九年公表請依界土斷。唯徐兗青三州居晉陵者不在斷例。此徐兗青蓋僑立之州。而不加南字。至十二年加領兗州刺史。增都督南秦凡二十二州。此二十二州之名紀文不具。蓋于前十六州之內去涼州。又增督北徐北青北兗交廣湘南秦七州也。是年十月以徐州之彭城沛蘭陵下邳淮陽山陽廣陵兗州之高平魯泰山十郡封公爲宋公。十三年進宋公爵爲王。以徐州之海陵東安北琅邪北東莞北東海北譙北梁豫州之汝南北潁川北南頓十郡益宋國。十四年固讓進爵。元熙元年正月又申前命。以徐州之海陵東海北譙北梁豫州之新蔡兗州之北陳留司州之陳郡汝南潁川滎陽十郡益宋國。此二十郡之中所云彭城沛蘭陵下邳高平魯泰山者皆僑置之郡。而不繫南字。卽徐州兗州亦南渡僑立之州。而俱無南字。然則東晉之世僑立州郡無南字。斷可識矣。唐人修晉書於地理志述南渡僑立州郡多謬妄。如徐州篇云元帝以江乘置南東海南琅邪南東平南蘭陵等郡分武進立臨淮淮陵南彭城等郡屬南徐州。又置頓邱郡屬北徐州。明帝又立南沛南清河南下邳。

南東莞、南平昌、南濟陰、南濮陽、南太平、南泰山、南濟陽、南魯等郡。以屬徐兗二州。穆帝時移南東海七縣出居京口。不知元帝時安有南北徐之分。而成穆以前郡名本無南字。此誤據宋書州郡志而不察其爲宋史臣之詞也。兗州篇云。明帝以郗鑒爲刺史。寄居廣陵。置濮陽、濟陰、高平、泰山等郡。後改爲南兗州。此所舉濮陽諸郡。卽徐州篇之南濮陽諸郡。而不繫以南。是爲允當。唯云又改爲南兗州。則誤與徐州同。試檢南渡諸帝紀。除授徐兗二州刺史者。歷歷可數。曾有稱南徐南兗者乎。諸臣傳中。除僑立郡國守相者多矣。亦曾有稱南東海太守南琅邪內史者乎。卽一部晉書論之。紀傳之文。無有與志相應者。以矛刺盾。當不待鳴鼓之攻矣。而千二百年來。曾無一人悟其失者。甚矣史學之不講也。

宋書州郡志南徐州篇云。晉永嘉大亂。幽、冀、青、并、兗州及徐州之淮北流民。相率過淮。亦有過江在晉陵郡界者。晉成帝咸和四年。司空郗鑒又徙流民之在淮南者于晉陵諸縣。其徙過江南及留在江北者。竝立僑郡縣以司牧之。徐兗二州。或治江北。江北又僑立幽、冀、青、并四州。安帝義熙七年。始分淮北爲北徐。淮南猶爲徐州。後又以幽、冀合徐。青并合兗。武帝永初二年。加徐州曰南徐。而淮北但曰徐。此條述晉僑立徐州事最分明。首云南徐州刺史者。據宋制而言。而晉時初無南徐之名也。南兗州篇云。中原亂。北州流民多南渡。晉成帝立南兗州。寄治京口。時又立南青州及并州。武帝永初元年。省并併南兗。此條云晉成帝立南兗州寄治京口。又立南青州。似東晉時兗青已有南字。其實出于史臣追稱。欲示別於淮北之

兗青初非當時本稱。冀州篇云：江左立南冀州。後省青州篇云：江左僑立治廣陵。安帝義熙五年平廣固。北青州治東陽城。而僑立南青州如故。後省南青州。而北青州直曰青州。此二條南冀字一見。南青字再見。皆史家變文示別。非當時有此稱也。唐人修晉史。因此致誤。要非宋志之失。唐人讀史不審耳。

晉志之最謬者。徐州篇云：元帝渡江之後。徐州所得惟半。乃僑置淮陽、陽平、濟陰、北濟陰四郡。此四郡在宋志皆繫之徐州矣。然宋志於北濟陰云：孝武孝建元年立。則是宋之孝武與晉邈不相涉也。淮陽則云：安帝義熙中土斷立。非元帝也。陽平則云：流寓來配。雖不言何時立。據來配之文。亦當在義熙土斷時。不在元帝時也。況宋武分兩徐州。本畫淮南北爲界。而元帝渡江之始。所得徐州之半。不過淮南數郡耳。卽有僑立郡縣。亦當在淮南。不在淮北。而宋志所列徐州之境。則皆淮北也。豈可執義熙分配之制。誤切爲元帝所置乎。史家志地理。當知限斷。淮陽屬豫州。陽平屬司州。濟陰屬兗州。皆非徐土也。在徐言徐可矣。何暇及它郡乎。

### 毛寶傳誤

毛寶傳。庾亮西鎮。請爲輔國將軍。又進南中郎。隨亮討郭默。默平。案討郭默者陶侃。非庾亮也。

### 朱序傳誤

朱序傳。太和末。遷兗州刺史。時長城人錢宏聚黨百餘人。藏匿原鄉山。以序爲中軍司馬。吳興太守。序至。



都討擒之。事訖，還兗州。寧康初，拜使持節監沔中諸軍事、南中郎將、梁州刺史、鎮襄陽。是歲，苻堅遣其將苻丕等率衆圍序，序固守，賊糧盡，行退。督護李伯護密與賊相應，襄陽遂沒。序陷于苻堅，今以孝武紀攷之。朱序討平錢步射錢宏等，在寧康二年十一月，非太和也。序自兗州遷梁州鎮襄陽，在太元二年三月，苻丕陷襄陽，在三年二月，非寧康也。序在襄陽逾年而始陷，亦非卽在是歲。傳所書皆誤。

劉逵

左思三都賦爲之注者，劉逵、張載也。趙王倫傳有黃門侍郎劉逵，未審卽其人否。

孟康

晉書王濬傳，博士秦秀、太子洗馬孟康、前溫令李密等，竝表訟濬之屈。此別一孟康，非注漢書之孟康也。顏師古敍例云：孟康，字公休，安平廣宗人，魏散騎侍郎，恆農太守，領典農校尉，勃海太守，給事中，散騎常侍，中書令，後轉爲監封廣陵亭侯，不聞其仕晉也。

何法盛書

何法盛，晉中興書名目與諸史異。本紀曰：典表曰：注志曰：說列傳曰：錄論曰：敍竝見劉氏史通。

李善注文選，引何法盛琅邪王錄、陳郡謝錄、濟陰卞錄，此類甚多，卽晉中興書中之一篇也。李延壽南北史以祖孫父子族屬合爲一篇，蓋取法盛例矣。

史通書事篇云。王隱何法盛撰晉史。專訪州閭細事。委巷瑣言。聚而編之。目爲鬼神傳錄。其事非要。其言不經。是鬼神錄亦法盛書之一篇也。又斷限篇。江左旣承正朔。故氏羌有錄。氏羌錄當亦法盛書篇名。劉知幾云。東晉之史。作者多門。何氏中興實居其最。而爲晉學者。曾未之知。儻湮沒不行。良可惜也。

### 王劭齊隋二史

北史王劭傳論。久在史官。旣撰齊書。兼修隋典。好詭怪之說。尙委曲之譚。文詞鄙穢。體統煩雜。直愧南董。才無遷固。徒煩翰墨。不足觀采。

王劭齊隋二史。最爲劉知幾所稱。於載言篇云。王劭撰齊隋二史。其所取也。文皆詣實。理多可信。至於悠悠飾詞。皆不之取。於言語篇云。王宋著書。宋孝王撰關東風俗傳。敍元高時事。抗詞正筆。務存直道。方言世語。由此畢彰。而今之學者。皆尤二子以言多滓穢。語傷淺俗。夫本質如此。而推過史臣。猶鑑者見嫫姆多嗤。而歸罪于明鏡也。於敍事篇云。王邵齊志。長于敍事。短于論人。唯齊志正文之外。別有子注。則知幾譏其鄙碎。見補注篇。

### 隋五行志多讜言

予最喜五行志。多得古人懲惡勸善之義。如云齊武成帝時。左僕射和士開言於帝曰。自古帝王。盡爲灰土。堯舜桀紂。竟亦何異。陛下宜及少壯。恣意歡樂。一日可以當千年。無爲自勤約也。人言隋煬帝自負才

學。謂侍臣曰。天下當謂朕承籍餘緒而有四海邪。設令朕與士大夫高選。亦當爲天子矣。又嘗從容謂祕書郎虞世南曰。我性不欲人諫。若位望通顯而來諫我。以求當世之名者。彌所不耐。至於卑賤之士。雖少寬假。然卒不置之於地。汝其知之。此三事皆以爲言不從之罰。史家才識如此。視左氏內外傳何多讓焉。

隋書經籍志遺漏

晉灼漢書集解十四卷。宋孝王關東風俗傳。

一字三字石經

經籍志稱一字石經者。周易、尙書、魯詩、儀禮、春秋、公羊傳、論語。凡七部。稱三字石經者。尙書二部。春秋一部。其編次一字在三字之前。是一字爲漢刻。三字爲魏刻也。其序說云。後漢鑄刻七經。著于石碑。皆蔡邕所書。魏正始中。又立一字石經。相承以爲七經正字。此一字當爲三字之誤。蓋蔡中郎所書。祇有隸體。魏刻乃有古文、篆、隸三體。漢刻本無一字之名。魏晉而下。稱漢刻爲一字。取別于魏之三字耳。其誤始于范蔚宗。而隋志因之。

謝吳

隋經籍志。梁書四十九卷。梁中書郎謝吳撰。本一卷在正史類。梁皇帝實錄五卷。梁中書郎謝吳撰。記元帝事。在雜史類。劉知幾史通史官篇云。齊梁二代。又置修史學士。陳氏因循。無所變革。若劉陟、謝吳、顧野王、

許善心之類是也。又正史篇云。梁史武帝時。沈約與給事中周興嗣。步兵校尉鮑行卿。祕書監謝昊。相承撰錄。吳與昊字形相涉。未知孰是。謝宣城集有與謝洗馬吳聯句。

### 南宋事略

餘姚邵二雲。晉滄。精于史學。嘗有志改修宋史。予謂當自南渡始。二雲欣然擬作南宋事略。以續王偁東都事略。篇目悉依王氏之例。請予酌定儒學。文藝。隱逸三傳目錄寄之。今二雲沒矣。索其家遺藁。無有存者。癸亥閏月。予於小唐廡故篋中得所寄目錄藁。恨其志不克。遂姑錄其目。以待後賢。

### 儒學一

楊時

尹焞

胡安國寅宏

朱震

范冲

羅從彥

李侗

朱熹

黃榦

李燔

張洽

陳淳

李方子

黃顯

蔡元定沈

張栻

呂祖謙

真德秀

魏了翁

### 儒學二

邵伯溫

喻樗

洪興祖

高閱

林之奇

林光朝

楊萬里

陸九齡九淵

陳溥良

薛季宣

葉適

戴溪

楊簡

袁燮甫

李舜臣道傳心傳

楊泰之

蔡幼學

程迥

劉清之

廖德明

湯漢

何基

王柏

葉味道

王應麟

黃震

文藝

汪藻

陳與義

葉夢得

程俱

曾幾

張皞

韓駒

朱敦儒

徐俯

葛勝仲

熊克

陸游

范成大

鄭樵

尤袤

陳亮

徐夢莘

劉克莊

張即之

隱逸

徐庭筠

蘇雲卿

譙定

王忠民

劉勉之

胡憲

郭雍

劉愚

魏挾之

安世通

虬

字書無虬字。始見于遼史百官志。有十二行虬軍、各宮分虬軍、遙輦虬軍、各部族虬軍、羣牧二虬軍。又國語解。虬轄虬、軍名、轄者、管束之義。金史百官志。諸虬詳穩一員、掌守禦邊堡。有咩虬、唐古虬、移刺虬、木典虬、骨典虬、失魯虬。又有慈謨典虬、胡都虬、霞馬虬。地理志載詳穩九處。曰咩虬、木典虬、骨典虬、唐古虬、邪刺虬、移典虬、蘇木典虬、胡都虬、霞馬虬。與百官志略同。邪刺卽移刺。蘇木典卽慈謨典。慈恐卽蘇之譌。唯百官志無失魯有移典耳。

哀宗紀

金史哀宗紀。正大四年二月。蒲阿牙吾塔復平陽。執知府李七斤。李七斤卽元史忠義傳之李守忠也。天興元年七月。書參知政事完顏思烈、恆山公武仙、鞏昌總帥完顏忽斜虎、率諸將兵自汝州入援。八月。又書前儀封令魏璠上言。鞏昌帥完顏仲德、沈毅有遠謀。臣請奉命往召。不報。仲德卽忽斜虎也。十二月。又書鞏昌元帥完顏忽斜虎至自金昌。則七月入援者祇完顏思烈、武仙二人。鞏昌總帥以下九字皆衍。

耿炳文

明史耿炳文傳。建文元年。燕王兵起。命炳文爲大將軍。次真定。與燕軍戰敗。帝遣李景隆往代炳文歸。燕王稱帝之明年。刑部尙書鄭賜。都御史陳瑛。劾炳文衣服器皿有龍鳳飾。玉帶用紅鞞。僭妄不道。炳文懼自殺。功臣表亦云。永樂二年。以嫌自殺。除成祖紀。永樂二年十月。籍長興侯耿炳文家。炳文自殺。此本諸永樂實錄。自必可信。而顧應祥長興縣志。謂洪武末鎮守遼東。以兵入援真定。陣亡。不知何據。予嘗見朱竹垞與馬寒中帖。其一云。劉三吾集。乞覓便借愚一讀。記有爲耿炳文墓碑。乃卒于洪武二十七年。今正史野錄俱載建文命帥師討燕。此大可疑事。蓋實錄爲西楊改削。文獻無徵。不可不爲辨明。恐貽誤國史。所關非小耳。三吾集予訪之未得。姑記竹垞說。俟異日攷論之。

江西人

明史李孜省傳云。假扶鸞術言江西人赤心報國。于是致仕。副都御史劉敷。禮部郎中黃景。南京兵部侍郎尹直。工部尙書李裕。禮部侍郎謝一夔。皆因之以進。蕉芳傳。江西萬安人。蕭明舉。下所司勘奏。芳卽署其尾曰。江西土俗。故多玩法。如彭華。尹直。徐瓊。李孜省。黃景等。多被物議。宜裁減解額五十名。通籍者勿選京職。著爲令。且言王安石禍宋。吳澂仕元。宜榜其罪。俾它日毋得濫用江西人。楊廷和解之曰。以一盜故。禍連一方。至裁解額矣。宋元人物。亦欲并案邪。乃止。夫一省之人多矣。賢愚優劣。何可概論。忽以爲赤

心報國，忽以爲俗多玩法，朝廷議論妄誕如此，豈不貽笑千古。

### 東林

顧憲成建東林書院。在萬曆三十二年。憲成卽于四十年卒。至魏忠賢用事，借東林名目，傾陷諸賢。距憲成之卒，已十餘年矣。明史孫丕揚傳，先是南北言官羣擊李三才、王元翰、連及里居顧憲成，謂之東林黨。而祭酒湯賓尹、諭德顧天竣，各收召朋徒，干預時政，謂之宣黨。崑黨以賓尹宣城人，天竣崑山人也。御史徐兆魁、喬應甲、劉國縉、鄭繼芳、劉光復、房壯麗，給事中王紹徽、朱一桂、姚宗文、徐紹吉、周永春輩，則力排東林。與賓尹、天竣聲勢相倚。大臣多畏避之。此段在三十九年京察以前案科道攻李三才者，御史徐兆魁、南京給事中劉時俊、御史劉國縉、喬應甲，給事中王紹徽、徐紹吉、周永春、姚宗文、朱一桂、李瑾、南京御史張邦俊、王萬祚。而三才遂去官。當在卅七八年間。四十二年再攻三才，則御史劉光復，而給事中劉文炳、御史李徽儀、劉廷元等繼之。奉詔往勘者，則給事中吳亮嗣也。攻王元翰者，御史鄭繼芳。而劉文炳、王紹徽、劉國縉等繼之。其事在三才前。以葉向高傳證之，可無疑也。辛亥京察，國縉挂察典，應甲亦以年例出外，而臺諫與東林遂成不解之讐。

顧憲成以萬曆三十二年立東林書院。四十年五月卒。年六十三。

### 齊楚浙三黨



明史夏嘉遇傳帝神宗也久倦勤方從哲獨柄國碌碌充位中外章奏悉留中唯言路一攻則其人自去不待詔旨臺諫之勢積重有齊楚浙三方鼎峙之名齊則給事中元詩教周永春御史韓浚楚則給事中官應震吳亮嗣浙則給學中姚宗文御史劉廷元而湯賓尹輩陰爲之主其黨給事中趙興邦張延登徐紹言商周祚御史駱駸曾過庭訓房壯麗牟志夔唐世濟金汝諧彭宗孟田生金李徵儀董元儒李嵩輩與相倡和務以攻東林排異己爲事方從哲傳齊楚浙三黨鼎立務搏擊清流齊人元詩教從哲門生勢尤張鄭繼之傳四十一年吏部尙書趙煥罷明年二月召繼之代煥是時言路持權齊楚浙三黨尤橫大僚進退惟其喜怒繼之故楚產習楚人議論且年八十餘耄而憤遂一聽黨人意指縉雲李銜以刑部尙書署都察院亦浙黨所推轂四十五年大計京官繼之與銜司其事考功郎中趙士諤給事中徐紹吉御史韓浚佐之所去留悉出紹吉等意繼之受成而已一時與黨人異趣者貶斥殆盡大僚則中以拾遺善類爲空趙煥傳四十六年吏部尙書鄭繼之去國時黨人勢成清流斥逐已盡齊黨元詩教勢尤張以煥爲鄉人老而易制力引煥代繼之比至一聽詩教指揮不敢異同由是素望益損

# 十駕齋養新餘錄卷下

## 帝王大度

唐宣宗時。裴惲進詩賀聖政。有太康字。帝怒曰。太康失邦。乃以比我。戶部韋澳奏云。晉武平吳。改號太康。雖有失邦之言。乃見歸美之義。上曰。天子大須博覽。不然幾錯罪惲。宣宗雖中主。乃能因澳之言。自悟其錯。賢於梁武之護前多矣。

唐文宗對翰林諸學士。因論前代文章。裴舍人素。數道陳拾遺名。柳舍人璟目之。裴不覺。上顧柳曰。它字伯玉。亦應呼陳伯玉。因語錄文宗御名昂。裴於御前直稱陳子昂名。宜觸帝怒。而文宗之言如此。其度量殆不可及。

## 白樂天文集

白樂天以寶歷元年到蘇州刺史任。晚年錄文集三本。置其一於南禪院千佛堂。

## 歐公誤用不識撐犂

細素雜記。歐陽永叔代王狀元謝啓。陸機閱史。尙靡識於撐犂。陸機事不知載何書。王勣夫云。此見元晏春秋云。子讀匈奴傳。不識撐犂孤塗之事。有胡奴執燭。顧而問之。奴曰。撐犂。天子也。匈奴號撐犂。猶漢人

稱天子也。其事亦著藝文類聚、類要諸書。然則不識撐犁者乃皇甫謐，非陸機也。

東坡在元祐時已有詆誣之者。

揮塵餘話：東坡先生雖竄斥於紹聖元符，然元祐中黃慶基、趙君錫、賈易之徒已摘取其所行制詞中語以爲詆誣。後來施行蓋權輿於此。

呂升卿通判海州

東坡外制有呂升卿通判海州詞。蓋在元祐元年。

曾文肅帥青社

揮塵後錄：曾文肅自高陽帥易青社。

章惇事邵康節胡安國稱秦檜

章惇嘗事邵康節。見宋史邵伯溫傳。胡安國初問人材於游酢。酢以秦檜爲言。且比之荀。故安國力稱檜賢。見宋

史安國傳。

程伯淳語

能改齋漫錄：呂正獻公嘗薦常夷甫。秩後差改節。呂對程伯淳有悔薦之意。伯淳曰：顧侍郎寧可受人欺。不可使好賢之心少替。

朱文公語

朱文公與陳同父書云。欲賢者百尺竿頭進取一步。不作三代以下人物。省得氣力爲漢唐分疏。即便脫灑磊落。

何道夫語

梁谿漫錄。何道夫畊云。官不必高。但願衣冠不絕。而常爲士類。家不必富。但願衣食麤足。而可以及人。

陸象山疑有子

陸象山云。初讀論語。卽疑有子之言支離。

呂東萊讀史多

朱子語錄云。東萊聰明。看文理卻不仔細。緣它先讀史多。所以看麤著眼。

晏元獻夫人

揮塵錄。晏元獻夫人王氏。國初勳臣超之女。樞密使德用之妹也。元獻壻。富鄭公也。鄭公壻馮文簡。文簡孫壻蔡彥清。朱聖子。大昕案。朱聖子。聖子女適滕子濟。俱爲執政。元獻有古硯一。奇甚。王氏舊物也。諸女相授。號傳壻硯。今藏滕氏。朱之孫女適洪景嚴。近又登二府。亦盛事也。

韓奉常妻

揮塵錄。韓循之奉常治之妻。魯國太夫人文氏。潞公之孫。魏公之孫婦。儀公之家婦。呂惠穆之外孫。魯簡肅之外曾孫。呂文靖之曾外孫。身見其子肖胄。爲樞密壻。鄭億年爲資政殿大學士。儀同執政。它子與孫俱被飾擢。壽踰八秩。婦人中罕有。

### 藏書之厄

魏華父言。藏書之盛。鮮有久而弗厄者。孫長孺自唐僖宗時爲榜書樓二字。國朝之藏書者莫先焉。三百年間。再燬于火。江元叔合江南吳越之藏。凡數萬卷。爲藏僕竊去。市人裂之以籍物。其入于安陸張氏者。傳之未幾。一篋之富。僅供一炊。王文康、李文正、廬山劉壯輿、南陽井氏。皆以藏書名。未久而失之。宋宣獻兼有畢文簡、楊文莊二家之書。不減中祕。而元符中蕩爲煙埃。晁文元累世所藏。自中原無事時已有火厄。至政和甲午之災。尺素不存。跋尤氏遂初堂藏書目錄序。尤氏書寶慶初亦厄于火。

### 南監板經史

南雍志云。金陵新志。所載集慶路儒學史書梓數。正與今同。則本監所藏諸梓。多自舊國子學而來也。明矣。自後四方多以書板送入。洪武永樂時。兩經欽依修補。然板旣叢亂。每爲刷印匠竊去。刻它書以取利。故旋補旋亡。成化初。祭酒王僎會計諸書亡數。已逾二萬篇。時巡視京畿南京河南道御史上海董綸。乃以贓犯贖金。送充修補之費。文獻通攷補完者幾二千葉焉。宏治初。始作庫樓貯之。嘉靖七年。錦衣衛聞

住千戶沈麟。奏准校勘史書。禮部議以祭酒張邦奇司業江汝璧博學有文才猷亦裕行文使逐一攷對修補以備傳布。其廣東布政司原刻宋史。差人取付該監一體校補。遼金二史原無板者。購求善本翻刻以成全史。於是邦奇等奏稱史記前後漢書殘缺模糊。原板脆薄。剝補隨卽脫落。莫若重刊。又于吳下購得遼金二史。亦行刊刻。已而邦奇汝璧陞遷去任。祭酒林文俊司業張星繼之。乃克進呈。宋史四百九十一卷。成化中巡撫兩廣都御史朱英刻于廣州。

### 南雍經史板

南雍志周易注疏一十三卷。尙書注疏二十卷。毛詩注疏二十卷。春秋正義三十六卷。公羊疏三十卷。穀梁疏十二卷。儀禮注疏五十卷。舊板壞失止新刻儀禮注疏十七卷。孝經注疏一卷。論語注疏十五卷。皆殘闕。爾雅注疏十卷。則見子類。周禮禮記孟子注疏。南監初未有板也。志又云十三經注疏。刻于閩者。獨缺儀禮。以楊復圖說補之。嘉靖五年。巡撫都御史陳鳳梧刻于山東。以板送監。是南監儀禮注疏。雖刻于嘉靖初。乃在張邦奇之前。邦奇等所刊補者。唯二十一史耳。嘉靖七年所刻。唯史記兩漢書遼金二史五部。其後續刻於萬歷二十四年者。則有史記梁書五代史祭酒余有丁司業周子義所校也。

### 翻刻古書易錯

湧幢小品。翻刻古書甚害事。刻一番。錯一番。以後者爲是。則必以前者爲非。

羣書治要

日本人刻羣書治要五十卷。每卷首題祕書監鉅鹿男臣魏徵等奉敕撰。一周易。二尚書。三毛詩。四至六春秋左氏傳。七禮記。八周禮。周書。國語。韓詩外傳。九孝經。論語。十孔氏家語。十一至十二史記。十三至二十漢書。二十一至二十四後漢書。二十五至二十八三國志。二十九至三十晉書。三十一至三十六陰謀。鬻子。三十二管子。三十三晏子。司馬法。三十四老子。鶡冠子。列子。墨子。三十五文子。曾子。三十六吳子。商君子。尸子。申子。三十七孟子。慎子。尹文子。莊子。尉繚子。三十八孫卿子。三十九呂氏春秋。四十韓子。賈子。四十一淮南子。四十二鹽鐵論。新序。四十三說苑。四十四桓子新論。潛夫論。四十五崔寔正論。昌言。四十六申鑒。中論。典論。四十七劉廣政論。蔣子政要論。四十八體論。典語。四十九傅子。五十袁子正書。抱朴子。前有尾張國校督學臣細井德民序。題云天明五年乙巳春二月。未知當中國何年也。

石刻詛楚文

新定續志云。嚴州有石刻詛楚亞駝文。在郡廨清風堂廊廡間。

李伯時畫古器圖

揮塵餘話。李伯時自畫其所蓄古器爲一圖。極其精妙。舊在上蔡畢少董良史處。少董嘗從先人求識于

後少董死。乃歸秦伯陽燹。其後流轉於其壻林子長。今爲王順伯厚之所得。真一時之奇物也。

### 元會運世

朱子語類問天關於子地關於丑。人生於寅。是如何。曰。此是邵子皇極經世中說。今不可知。它只以數推得。是如此。它說寅上生物。是到寅上方有人物也。有三元十二會三十運十二世。十二萬九千六百年爲一元。歲月日時。元會運世。皆自十二而三十。自三十而十二。至堯時會已在巳午之間。今則及未。至西上說閉物。到那裏則不復有人物矣。

道學名臣言行錄。蔡元定論經世書云。元會運世之數。大而不可見。分釐絲豪之數。小而不可察。所得而數者。卽歲月日辰而知之也。一世有三十歲。一歲有十二月。一月有三十日。一日有十二辰。故日與辰之數十二。自歲月日辰之數推而上之。得元會運世之數。推而下之。得分釐絲豪之數。三十與十二反覆相乘。得三百六十。以三百六十乘六十。爲十二萬九千六百。故元有十二萬九千六百歲。會有十二萬九千六百月。運有十二萬九千六百日。世有十二萬九千六百辰。歲有十二萬九千六百分。月有十二萬九千六百釐。日有十二萬九千六百豪。辰有十二萬九千六百絲。大昕案一萬八百年當有十三萬三千五百七十九月。朔三百六十年當有十三萬九千四百。皆天地之自然。非假智營力索。而天地之運。日月之行。氣朔之盈虛。五星之伏見。朧朧屈伸。交關淺深之數。莫不由此。



避諱改姓

賀氏本姓慶。避漢安帝父名改賀氏。唐憲宗名淳。改淳于氏爲于氏。陶穀本姓唐。詩人彥謙之孫。避石晉諱改陶氏。湯悅本姓殷。名崇義。初仕南唐。入宋避諱。改今姓名。金履祥先世姓劉。避吳越諱爲金氏。

姓隨音變

韓滅子孫分散。江淮閒音以韓爲何。字隨音變。遂爲何氏。簡雍本姓耿。幽州人語謂耿爲簡。故隨音變。

京房吹律定姓

京房本姓李。吹律自定爲京氏。

陸羽從僧姓

陸羽無姓氏。初生棄隄上。僧姓陸者收育之。因從僧姓。

司馬康

蘇子瞻爲司馬溫公行狀云。子三人。童、唐、皆蚤亡。康今爲祕書省校書郎。東都事略。宋史本傳。俱不言溫公無子。而邵伯溫聞見前錄。稱溫公無子。以族人之子康。字公休。爲後。與行狀不同。是可疑也。伯溫又言。公休子植蚤死。無後。溫公之世遂絕。據行狀。孫二人。植、桓。皆承務郎。則不獨一植也。

南渡後以溫公無後。以其族人仍爲溫公會孫。仍字季思。官至吏部侍郎。龍圖閣待制。史。不爲立傳。仍子

遵官通直郎權發遣信州。見渭南集。

### 番陽洪氏

洪氏五季時由歛徙饒之樂平。又七世徙番陽。至給事中彥昇。以進士起家。洪氏益大。給事之弟彥先。右通直郎太師鄭國公。是生魏國忠宣公。

文惠之仲子祕。字必之。以廕累官知山陰縣。桂陽軍簽判。通判鄂州。差知武岡軍。甚有政聲。改知南劍州。不赴。自請奉祠。以主管武夷山沖祐觀里居。年七十一卒。官奉直大夫。爵番陽縣男子三人。某朝散大夫。前知容州。偲承議郎。權發遣嘉定府。詹蚤世孫四人。蘭、荀、萬、皆將仕郎。芮。魏了翁為墓志。

### 郭叔誼

郭叔誼。字幼才。蜀之廣都人。官朝奉大夫。自號肖舟老人。有續通鑑長編增添綱目二十卷。溫公通鑑評三卷。見魏鶴山所撰墓志。

### 修容

檀弓。曾子與子貢入於其廐。而修容焉。古人謂儀爲容。修容猶言習儀也。玉藻。將適公所。既服習容。觀玉聲。乃出。大戴禮。火滅修容。周書大聚解。立鄉社以修容。荀子大略篇。君子聽律習容。而後士修與習。其義一也。注以爲更莊飾。似未盡然。古者女子將嫁。教以婦德。婦言。婦容。婦功。容者。儀也。

捉筆

王裒云。吾不捉筆已四十年。見王隱晉書。及魏志王修傳注。

捕風

韋應物詩。持索捕風幾時得。將刀斫水幾時斷。東坡集亦有繫風捕影語。

花木瓜

周必大游山錄。汪彥章與王甫卽輔太學同舍。甫貌美中空。彥章戲之爲花木瓜。及彥章罷符寶郎。甫正當國。以宣倅處之。宣州產花木瓜故也。

雞鴨諫議

繫年要錄。紹興五年。詔禁屠以禱晴。而併及雞鴨。右諫議大夫趙霈。奏疏稱誦上德。以爲齊宣王不忍一牛之比。中書舍人胡寅讀疏。笑曰。諫職乃及此乎。聞女直統兵有號龍虎大王者。或入犯。當以雞鴨諫議拒之。

章硬頸

章帖守蘇州。人目爲章硬頸。見吳郡圖經續記。

笑面夜叉

蔡卞時人目爲笑面夜叉。見能改齋漫錄。

### 金毛鼠

馮當世人目爲金毛鼠。以其外文采而中實貪猥也。亦見能改齋漫錄。

### 滿朝歡

章鑑號滿朝歡。見宋史。

### 賽仁孝

劉整號賽仁孝。見元史。

先君子畢生著述。咸賴友朋門弟子傳寫刊行。養新錄二十卷。成書最後。甫脫藁卽爲阮中丞芸臺先生攜去。釀金開雕。以後續有所得。別記一編。名曰養新餘錄。逮甲子冬捐館。共得若干條。不肖兄弟。謹謹藏弄篋中。未忍輕啓。今夏偕妹倩瞿君鏡濤。校修先君子詩文集告成。適嘉興李許齋太守書來。索經典文字攷異。唐五代學十年表。王深寧年譜。三史諸史拾遺等遺藁。將代謀剞劂。因啓舊笥檢尋。念及養新餘錄未刊。終爲全書缺事。爰取手彙繕錄清本。分爲三卷。以授梓人。俾四方好學之士喜讀我先人書者。無或有遺珠之憾焉。嘉慶丙寅冬十月。旣望男東塾百拜謹識。